



15.5.18.7.

XXXIV

JVENILY

73

1401





INSTITUTIONES  
THEOLOGICÆ  
AD USUM  
SEMINARIORUM.

AUTHORE

GASPARE JUENIN,

Oratorii Gallicani Presbytero, & in  
Seminario Eminentiss. Cardinalis DE  
NOAILLES Archiepiscopi Parisien-  
sis, Sacræ Theologiæ Professore.

*Editio Veneta anterioribus multò auctior,  
& accuratior.*

TOMUS TERTIUS.



VENETIIS,  
Apud PAULUM BALLEONIUM.

M. DCCIV.

*Superiorum Permissu, ac Privilegiis.*



# I N D E X.

<b>P</b> ARS II. <i>De Deo Trino.</i>	pag. 1
DISSERTATIO I. <i>De existentia SS.</i>	
<i>Trinitatis.</i>	2
QUÆSTIO I. <i>De Trinitate personarum in</i>	
<i>divinis.</i>	3
Caput I. <i>Verum pluralitas personarum possit</i>	
<i>probari ex antiquo testamento.</i>	4
Caput II. <i>Verum personarum in divinis di-</i>	
<i>stinctio possit ex Novo Testamento de-</i>	
<i>monstrari.</i>	7
Caput III. <i>Verum personarum in divinis distin-</i>	
<i>ctio possit ex traditione demonstrari.</i>	13
Caput IV. <i>Solvuntur argumenta Sabellia-</i>	
<i>norum contra personarum distinctionē.</i>	17
QUÆSTIO II. <i>De unitate natura in Trin.</i>	25
Caput I. <i>De divinitate Verbi.</i>	26
Articulus I. <i>Verum Verbi divinitas possit</i>	
<i>ex Scripturis demonstrari.</i>	27
Articulus II. <i>Quid de Verbi divinitate sen-</i>	
<i>serint Patres trium priorum seculorum.</i>	40
§. I. <i>Preponitur Patrum Orientalium doctri-</i>	
<i>na.</i> 41. <i>Ignatius martyr.</i> 41. <i>Polycarpus.</i>	
41. <i>Iustinus martyr.</i> 42. <i>Athenagoras.</i>	
48 <i>Irenæus.</i> 50. <i>Clemens Alexandr.</i> 53	
<i>Origenes.</i> 54. <i>Dionysius Alexandr.</i> 59.	
<i>Gregorius Thaumaturgus.</i> 62. <i>Patres</i>	
<i>Concilii Antioch.</i> 64. <i>Pamphilus martyr.</i>	
<i>ib. Lucianus.</i> <i>ibid. Methodius.</i>	65
§. II. <i>Propositur Patrum Occidentalium do-</i>	
<i>ctrina de Verbi divinitate.</i> 67. <i>Tertul-</i>	
<i>lianus.</i> <i>ib. Dionysius Romanus.</i> 72. <i>Cy-</i>	
<i>prianus.</i> 73. <i>Lactantius.</i> 74. <i>Arnobius.</i> 75	
Articulus III. <i>Quid Concilium Nicanum I.</i>	
A 2	circa

# I N D E X.

<i>circa Verbi divinitatem definierit.</i>	77
Articulus IV. <i>Quid de Verbi divinitate senferint Patres, qui post Nicanam I. Sy- nodum floruerunt.</i>	85
§. I. <i>De Eusebio Casariensi.</i>	ibid.
§. II. <i>De formulis fidei post Nicanam Sy- nodum editis.</i>	93
§. III. <i>De Ofio Cordubensi Episcopo.</i>	102
§. IV. <i>De Liberio Papa.</i>	104
Caput II. <i>De divinitate Spiritus sancti.</i>	109
Articulus I. <i>Vtrum divinitas Spiritus sancti possit ex Scriptura demonstrari.</i>	110
§. I. <i>Profertur argumentum petatum ex Dei nominibus.</i>	ibid.
§. II. <i>Profertur argumentum petatum ex charaēteribus Deo propriis.</i>	112
Articulus II. <i>Vtrum divinitas Spiritus san- cti possit ex traditione demonstrari.</i>	116
§. I. <i>Quid de divinitate Spiritus sancti sen- serint Patres trium priorum seculorū.</i>	116.
<i>Hermas.</i>	117.
<i>Clemens Romanus.</i>	ib.
<i>Iustinus.</i>	118.
<i>Athenagoras.</i>	ib.
<i>Irenæus.</i>	119
<i>Lucianus.</i>	121.
<i>Clemens Alexandrinus.</i>	122.
<i>Tertullianus.</i>	ib.
<i>Origenes.</i>	124.
<i>Cyprianus.</i>	ib.
<i>Ambo Dionysii, Romanus &amp; Alexandr.</i>	125.
<i>Greg. Thaumaturgus.</i>	127
§. II. <i>Quid de divinitate Spiritus sancti sense- rint. 4. 5. ac sequentiū seculorū Patres.</i>	128
§. III. <i>Solvuntur argumenta quibus impu- gnatur divinitas Spiritus sancti.</i>	132
QUÆSTIO III. <i>Vtrum mysterium S. S. Tri- nitatis cognosci possit.</i>	137
DISSERTATIO II. <i>De processionibus divi- nis.</i>	141
QUÆSTIO I. <i>Vtrum in divinis dentur pro- cessio-</i>	cessio-

# I N D E X.

<i>cessiones.</i>	<i>ibid.</i>
QUÆSTIO II. <i>De numero divinarum processionum.</i>	150
QUÆST. III. <i>De processione Verbi à Patre.</i>	153
Caput I. <i>An Verbi processio nominetur generatio.</i>	<i>ibid.</i>
Cap. II. <i>De germana divina generat. idea.</i>	157
Caput III. <i>Cur Verbi processio dicatur generatio.</i>	160
Caput IV. <i>Cur processio Spiritus sancti non dicatur generatio.</i>	167
Cap. v. <i>De principio divinarum processionum.</i>	172
Articulus I. <i>Vtrum intellectus &amp; voluntas sint principium Quo proximum divinarum processionum.</i>	173
Articulus II. <i>Vtrum essentia divina sit principium Quo remotum divinarum processionum.</i>	176
Articulus III. <i>Vtrum relationes sint principium Quo divinarum processionum.</i>	183
QUÆSTIO VI. <i>Vtrum processionem in divinis sint voluntaria.</i>	188
DISSERTATIO III. <i>De relationibus divinis.</i>	192
QUÆSTIO I. <i>Vtrum in Deo sint relationes.</i>	193
QUÆSTIO II. <i>Quot sint relat. in divinis.</i>	198
QUÆSTIO III. <i>De distinctione relationum à se invicem &amp; ab essentia divina.</i>	199
QUÆSTIO IV. <i>Vtrum relationes &amp; essentia sint de mutuo conceptu.</i>	207
QUÆSTIO V. <i>Vtrum relationes sint perfectiones.</i>	213
QUÆSTIO VI. <i>Vtrum cuilibet relationi propria conveniat existentia.</i>	217
QUÆSTIO VII. <i>Vtrum in divinis sit absoluta subsistentia.</i>	222

I N D E X.

DISSERTATIO IV. *De personis in communi.* 228

QUÆSTIO I. *De nominibus personarum in communi.* ib.

Caput I. *De nominibus quibus Latini Patres usi sunt, ut personas divinas exprimerent.* 229.

Caput II. *De nominibus quibus Græci usi sunt, ut divinas personas exprimerent.* 231

Caput III. *Quot tempore Latini convenerint de adhibendo hypostasis nomine.* 233

QUÆSTIO II. *De personarum divinarum essentia.* 237

Caput I. *Quid sit persona in genere sumpta.* 238

Caput II. *Per quid personæ divinæ constituentur.* 239

QUÆSTIO III. *De proprietatibus personarum in divinis.* 246

Caput I. *De appropriatione in divinis.* ib.

Caput II. *De æqualitate divinarum personarum.* 249

Caput III. *De circuminceptione personarum in divinis.* 252

Caput IV. *De notionibus personarum in divinis.* 255

Caput V. *De missione personarum in divinis.* 260

DISSERTATIO V. *De personis divinis in particulari.* 267

QUÆSTIO I. *De prima persona S. S. Trinit. ib.*

Caput I. *De nominibus principii & initii.* 268

Caput II. *Utrum prima persona rectè dicatur causa cæterarum.* 270

Caput III. *Utrum primæ personæ proprium sit.*

- fit authoris nomen.* 271
- Caput IV. *Vtrum nomina fontis, originis, capitis, convenient prima persona.* 273
- Caput V. *Vtrum Patris nomen sit propria prima persona.* 275
- Caput VI. *Vtrum Ingeniti nomen prima persona conveniat.* 278
- QUÆSTIO II. *De secunda persona SS. Trinitatis.* 282
- Caput I. *De nomine Verbi.* ibid.
- Caput II. *Vtrum nomina Filii, Sapientia, Imaginis, convenient secunda persona SS. Trinitatis.* 289
- QUÆSTIO III. *De tertia persona SS. Trinitatis.* 295
- Caput I. *De nominibus quæ tertia personæ tribuuntur.* ibid.
- Caput II. *De processione Spiritus sancti à Patre & Filio.* 300
- Articulus I. *Vtrum processio sancti Spiritus à Filio, Scripturis demonstrari possit.* 301
- Articulus II. *Vtrum processio sancti Spiritus à Filio possit ex Patribus Grecis demonstrari.* 304
- Articulus III. *Vtrum processio sancti Spiritus à Filio, possit ex Patribus Latinis demonstrari.* 311
- Articulus IV. *Quid Oecumenica Concilia definierint de processione sancti Spiritus à Filio.* 313
- Articulus V. *Vtrum rationibus theologicis demonstrari possit, Spiritum sanctum à Filio procedere.* 314
- Articulus VI. *Solvuntur argumenta Grecorum adversus Spiritus sancti processionem.*

# I N D E X.

<i>nem à Filio.</i>	321
Caput III. <i>De particula Filioque inserta symbolo.</i>	334
Articulus I. <i>Vtrum particula Filioque jure sit inserta symbolo.</i>	ibid.
Articulus II. <i>Quandonam &amp; à quibus particula Filioque inserta fuerit symbolo.</i>	340
DISSERTATIO VI. <i>De modo loquendi circa Trinitatem.</i>	345
QUÆSTIO I. <i>De nominibus quibus numerus personarum exprimitur.</i>	ibid.
QUÆSTIO II. <i>De nominibus quibus numerus &amp; distinctio personarum exprimuntur.</i>	352
QUÆSTIO III. <i>De nominibus adhibendis, ut unitas divinarum personarum explicetur.</i>	354
QUÆSTIO IV. <i>Vtrum omnia nomina in divinis de se invicem predicari possint.</i>	359
Caput I. <i>Vtrum absoluta de relativis predicentur.</i>	ibid.
Caput II. <i>Vtrum in divinis relativa de essentialibus predicentur.</i>	365
QUÆSTIO V. <i>Vtrum nomina essentialia supponant pro relativis.</i>	367
Caput I. <i>Vtrum nomina essentialia abstracta pro personis supponant.</i>	ibid.
Caput II. <i>Vtrum nomina essentialia concreta supponant pro personis.</i>	370
PARS III. <i>De Deo Creatore.</i>	374
DISSERTATIO I. <i>De Angelis.</i>	375
QUÆSTIO I. <i>De existentia Angelorum.</i>	ib.
QUÆSTIO II. <i>De Angelorum natura.</i>	381
Cap. I. <i>Vtrum angeli natura sint spirituales.</i>	ib.
Caput II. <i>Vtrum Angeli sint immortales.</i>	398
Caput III. <i>Vtrum Angeli inter se specie differant.</i>	401



# I N D E X.

QUÆSTIO III. De Angelorum authore.	406
Caput I. Quando & ubi creati sint Angeli.	407
Caput II. De statu in quo Angeli creati fuerunt.	416
QUÆSTIO IV. De proprietatibus Angelorum.	424
Caput I. De cognitione Angelorum.	ibid.
Articulus I. De objecto cognitionis angelicæ.	425
Articulus II. De medio cognitionis Angelicæ.	434
Artic. III. De dotib. cognitionis angelorū.	437
Caput II. De Angelorum amore.	441
Caput III. De Angelorum loco.	446
Articulus I. Vtrum Angeli sint in loco.	ib.
Articulus II. Quinā sit Angelorum locus.	447
Articulus III. Quomodo angeli sint in loco.	451
Articulus IV. Per quid Angeli sint in loco.	453
Caput IV. De motu, & locutione angelorū.	459
Caput V. De missione Angelorum.	461
Articulus I. Vtru missio conveniat angelis.	ib.
Articulus II. Vtrum Angeli ex omnibus ordinibus mittantur.	463
Articulus III. Vtrum quilibet homo habeat Angelum sui custodem.	466
Articulus IV. Vtrum homo quilibet habeat Angelum malum.	469
QUÆSTIO V. De merito Angelorum.	471
QUÆSTIO VI. De primo Angelorum peccato.	473
Caput I. Quæ fuerit origo primi peccati Angelorum.	474
Caput II. Cujus speciei fuerit primum peccatum Angelorum.	476

# I N D E X.

Caput III. <i>Quinam Angeli peccaverint.</i>	481
Caput IV. <i>De pœna peccati Angelorum.</i>	484
QUÆSTIO VII. <i>De variis Angelorum effectibus.</i>	488
QUÆSTIO VIII. <i>De variis Angelorum ordinibus.</i>	496
DISSERTATIO II. <i>De universi productione.</i>	501
QUÆSTIO I. <i>De opere diei primæ.</i>	ibid.
QUÆSTIO II. <i>De opere secundæ diei.</i>	503
QUÆSTIO III. <i>De opere diei tertiæ.</i>	506
QUÆSTIO IV. <i>De operibus diei quartæ &amp; quintæ.</i>	507
QUÆSTIO V. <i>De opere sextæ diei.</i>	509
DISSERTATIO III. <i>De primo homine.</i>	516
QUÆSTIO I. <i>De primi hominis creatione.</i>	ib.
QUÆSTIO II. <i>De dotibus hominis innocentis.</i>	527
Caput I. <i>De dotibus ad intellectum hominis innocentis spectantibus.</i>	ibid.
Caput II. <i>De dotibus ad hominis innocentis voluntatem spectantibus.</i>	529
Caput III. <i>De dotibus ad corpus hominis innocentis voluntatem spectantibus.</i>	534
Caput IV. <i>De propagatione naturæ in statu innocentie.</i>	540
QUÆSTIO III. <i>De peccato primorum parentum.</i>	547
Cap. I. <i>De causis peccati primorū parētū.</i>	548
Caput II. <i>De specie primi peccati, in quod Adamus &amp; Eva lapsi sunt.</i>	554
Caput III. <i>De gravitate peccati primorum parentum.</i>	557
Caput IV. <i>De pœnis peccati primorum parentum.</i>	559
	IN-



INSTITUTIONES  
THEOLOGICÆ  
AD USUM  
SEMINARIORUM.  

---

PARS SECUNDA.

*De Deo Trino.*



LTERAM hanc nostrarum Institutionum Theologicarum partem dividemus in quinque dissertationes. In priore dicemus de existentia SS. Trinitatis; in secundâ, de processione divinarum personarum; in tertiâ de divinis relationibus; in quartâ de personis in communi; in quintâ denique de divinis personis in particulari. Is nostrarum dissertationum ordo videtur ad rectam exactus methodum. Scilicet personæ relationibus constituuntur, relationes verò fundantur in processionibus; proindeque par est, ut tractemus de processionibus ac relationibus, antequam de personis sermonem instituamus.

# DISSERTATIO PRIMA.

## *De existentia SS. Trinitatis.*

Not. 1. **S**anctissimæ Trinitatis mysterium in eo positum est, quod una divina essentia in tribus personis realiter à se invicem distinctis subsistat: *Catholica fides* (inquit Leo Magnus Epist. 93.) *Patrem & Filium & Spiritum Sanctum sine confusione indivisos, sine tempore sempiternos, sine differentia credit æquales, quia unitatem in Trinitate, non eadem persona, sed eadem implet essentia.*

Ante Leonem Magnum Augustinus, idem Trinitatis mysterium lib. 1. de Trinitate, cap. 4. hisce verbis explicuit: *Omnes quos legere potui, qui ante me scripserunt de Trinitate, quæ Deus est, divinorum librorum veterum & novorum catholici tractatores hoc intenderunt secundum Scripturas docere quod Pater & Filius & Spiritus Sanctus unius ejusdemque substantiæ inseparabili æqualitate divinam insinuent unitatem; ideòque non sint tres Dii, sed unus Deus. Quamvis Pater Filium genuerit, & ideo Filius non sit qui Pater est; Filiusque à Patre sit genitus, & ideò non sit Pater qui Filius est; Spiritus Sanctus nec sit Pater nec Filius, sed tantum Patris & Filii spiritus, Patri & Filio etiam ipse coequalis, & ad Trinitatis pertinens unitatem.*

Not. 2. Ut igitur SS. Trinitatis existentia asseratur, probari debet; 1. Trinitas personarum in divinis; 2. Unitas naturæ; 3. oportet expendere, utrum illud mysterium cognosci possit.

QUÆSTIO PRIMA.

De Trinitate personarum in divinis.

Not. 1. **T**Rinitatem personarum in divinis negant *primo* Judæi, contendunt enim eâ Deorum pluralitatem invehiri. *Secundò*, eam quoque negarunt quidam Montanistæ, nempe id apertè testatur Tertullianus in libro de Præscriptionibus, cap. ultimo: ipse tamen Montanus eo in capite cum catholicis censuit, ut videre est apud Epiphanium hæresi 48. & apud Theodoretum lib. 3. hæreticarum fabul. cap. 2. *Tertio*, in eundem errorem incidit Praxeas, quem Tertullianus singulari libro confutavit. *Quarto*, Noetus Ephesius, qui circa annum Christi 245. prodiit, eandem hæresim docuit, ut scribit Epiphanius hæresi 57. *Quinto*, Sabellius natus in Libya sub annum 257. in eundem scopulum incidit, ut videre est apud Eusebium hist. lib. 7. cap. 6. Ab isto, ii qui deinceps impium illud dogma præpugnarunt, dicti sunt Sabelliani, quòd Sabellius iis qui præcesserant, diligentius ac vehementius errorem de quo agitur, defenderit. *Sextò*, circa annum 265. Paulus Episcopus Samosatenus, idem quod antea Sabellius, virus propinavit: unde & quòd negaret personarum distinctionem, & Christi divinitatem, anno 270. in altero Concilio Antiocheno Episcopali sede dejectus est.

Not. 2. Novatores, qui mox relati sunt, passim à veteribus dicti sunt Patripassiani, quòd nimirum ex eorum doctrinâ consequens esset, Patrem & crucifixum & passum fuisse pro nobis. *Sabelliani* (inquit Augustinus tract. 26. in Joannem) *dicti sunt quidam hæretici, qui vocantur Patripassiani; qui dicunt, ipsum patrem passum fuisse.*

Not. 3. Michael Servetus Hispanus extinctam  
jam-

jamdiu Sabellii hæresim iterum elapso proximè sæculo in orbem invexit, editis quibusdam libris quos de *Erroribus Trinitatis* inscripsit. Apud Polonos ac Transilvanos obtinuit Serveti error agentibus Georgio Blandratâ, Paulo Alciato, Francisco David, Fausto Socino Senensi, qui peragratis variis orbis regionibus, tandem sedem fixit suam in Poloniâ, ubi diem extremam clausit.

Nor. 4. Hic cum Judæis & cum hæreticis est agendum: expendendum est itaque 1. utrum pluralitas personarum in divinis adversus Judæos probari possit ex Antiquo Testamento; 2. utrum adversus hæreticos asseri quoque possit ex Novo.

### CAPUT PRIMUM.

*Utrum pluralitas personarum possit probari ex Antiquo Testamento.*

CONCL. **P**luralitas personarum in divinis potest ex Antiquo Testamento probari.

Probatur. Plura sunt loca in Antiquo Testamento, quæ (etiam seclusâ Patrum traditione) si personarum in divinis pluralitatem non demonstrant, innuunt tamen, saltem obscure.

Primò. Genesis cap. 1. Deus hominem conditurus sic loquitur: *Faciamus hominem ad imaginem & similitudinem nostram*: atqui iis verbis innuitur pluralitas personarum in divinis; includunt enim plurium de homine faciendo consultationem: Si verò non sunt plures naturæ, scilicet, apud ipsos etiam Judæos, constat, unum naturæ Deum esse hominis conditorem: ergo sunt plures personæ; ac proinde in divinis est pluralitas personarum.

Dices 1. verba de quibus agitur, esse unius tantum personæ in plurali numero ob sui dignitatem (ut principes solent) loquentis.

Sed inanis est illa responsio: nam etiam si personæ quædam nobiles nonnunquam ob sui dignitatem in plurali numero loquantur, nullibi

Differt. I. *De Existent. SS. Trin.* 5

tamen Deus ipse eam loquendi rationem adhibuit, nisi cum (ut observat Theodoretus quæst. 19. in Genesim) innuit numerum personarum Trinitatis.

Dices 2. verba quæ ex Genesi laudata sunt, inducere Deum cum Angelis, non autem cum aliis divinis personis loquentem.

Sed falsa est illa responsio. Nam 1. homo creatus non fuit ab Angelis, imò nec quidquam ad illius creationem, etiam per modum instrumenti, contulerunt. 2. Homo factus est ad imaginem earum personarum, quas laudato loco Deus alloquitur: *Faciamus hominem ad imaginem & similitudinem nostram*: Atqui homo non est factus ad Angelorum, sed Dei, imaginem. Vide Tertullianum lib. de Resurrectione carnis, c. 6. Clementem Alexandrinum, 5. Stromatum cap. 6. Irenæum lib. 4. cap. 37.

Quæres, cujus personæ sint verba de quibus agitur; an Patris, an Filii, an Spiritus Sancti, an trium personarum simul?

Resp. varias esse de propositâ quæstione Patrum sententias. Augustinus lib. 1. de Trinitate, cap. 7. docet, vocem, *Faciamus*, esse Dei Patris alloquentis Filium, qui & magni consilii Angelus & Patris consiliarius in Scripturis appellatur. Basilii lib. 4. contra Eunomium vult, vocem esse non ad Filium modò, sed etiam ad Spiritum Sanctum. Cyrillus Alexandrinus lib. 1. Thesauri adversus Julianum, Fulgentius lib. 1. de fide ad Petrum, cap. 1. contendunt, verba de quibus agitur: *Faciamus*, &c. toti Trinitati convenire, hoc est, non unius tantùm esse personæ, sed omnium simul. Utra ex iis Patrum sententiis eligatur, stabit semper argumentum, quod pro personarum pluralitate ex laudato loco desumitur.

Secundò, Veritas de quâ agitur, iis locis probari potest, quæ Deum plurali numero loquentem inducunt, ut sunt ista Geneseos III. *Ecce Adam quasi unus ex nobis factus est*: Genesis x. l.

*Venite, descendamus, & confundamus ibi linguam eorum*: neque enim verba illa sunt Dei Angelos alloquentis, cum nulla aut præcedat aut subsequatur Angelorum mentio.

*Tertio*, Hæc psalmi 160. verba: *Filius meus es tu, ego hodie genui te*, non de Davide, aut de alio à Christo intelligi possunt: nimirum Judæi æquales Christi, de solo Messia eam psalmi sententiam intelligebant, cum Christus ipse Matthæi 22. eâ usus sit, ut se ipsum adversus Judæos tueretur. Præterea de eo Filio intelligi debent, cui in eodem psalmo hæc promissa sunt: *Dabo tibi gentes hæreditatem tuam, & possessionem tuam terminos terræ*: ea autem Davidi promissa non fuerunt, sed soli Messie. Atqui in iis verbis persona Filii aperte distinguitur à personâ Patris: ergo in Deo sunt plures personæ.

*Quarto*, Hæc Psalmi 109. verba: *Dixit Dominus Domino meo: sede à dextris meis*, sunt Dei ipsius, Filium à se genitum alloquentis. *Ex utero ante Luciferum genui te*: ergo personarum distinctionem important; neque enim eadem persona potest sub eodem respectu esse simul & generans & genita.

*Sexto*, In his verbis Genesis 19. *Dominus pluit super Sodomam & Gomorram sulphur & ignem à Domino de celo*, Dominus à Domino, hoc est, Filius à Patre distinguitur quoad personam. *Dominus à Domino*, licet quoad operationem illi jungatur, *pluit super Sodomam & Gomorram*. Loco illo adversus Judæos usi sunt Justinus in Dialogo cum Tryphone, Irenæus lib. 3. adversus hæreses, cap. 7. Tanti roboris adversus Sabellianos visus est Concilio, quod contra Photinum Sirmii celebratum est, ut anathema dixerit iis qui eum detorquerent in alium sensum: *Si quis* (inquit) *Pluit Dominus à Domino, non de Filio & Patre intelligat, sed ipsum à se dicat pluuisse, anathema sit. Pluit enim Dominus Filius à Domino Patre.*



Differt. I. *De Existent. SS. Trin.* 7

*Septimò*, Nonnulli veritatem de qua agitur, probant verbis, quibus trium puerorum Canticum clauditur: *Benedicamus Patrem & Filium cum Sancto Spiritu, laudemus & superexaltemus eum in sæcula*. Verùm non sunt Cantici illa verba, sed ei addita sunt ab Ecclesia, quemadmodum cuique Psalmo additus est glorificationis hymnus: *Gloria Patri, & Filio, & Spiritui Sancto*.

Quæres, cur Spiritus Sanctus Trinitatem in antiquo testamento apertè non expresserit.

Resp. id sapienti œconomiâ factum fuisse: nempe periculum erat, ne Judæorum promiscuum vulgus ad exemplum Ægyptiorum, à quibus plures dii colebantur, in tribus hypostasibus trinam Dei essentiam inesse judicaret.

C A P U T II.

*Utrum personarum in divinis distinctio possit ex Novo Testamento demonstrari.*

**Not.** **A**D revincendos tum gentiles, tum Judæos, tum hæreticos, à quibus negatur personarum in divinis distinctio, satis est auctoritas Novi Testamenti. Scilicet ex motivis credibilitatis, quæ harum Institutionum tom. I. à nobis exposita sunt, constat, stultum esse eum qui iis auditis motivis, negat Novum Testamentum esse Dei ipsius verbum, cui proindè falsum subesse non possit. Unde licet Spiritus Sanctus personarum divinarum Trinitatem in antiqui Testamenti libris non multum evidenter expresserit, satis tamen consuluit hominum tum gentilium, tum Judæorum, tum Christianorum saluti, ad quam mysterii hujus explicita cognitio necessaria est necessitate medii. In Novo nimirum Testamento, quod cuique sapienti constat esse Dei verbum, apertè ( ut mox probabitur ) tradit veritatem, de quâ est hîc quæstio.

C O N-

**CONCLUSIO.** Personarum in divinis distinctio potest ex Novo Testamento demonstrari.

Probatur. *Primò*, demonstratur ex Evangelii Joannis capite 1. ubi hæc habentur: *In principio erat Verbum, & Verbum erat apud Deum, & Deus erat Verbum: Hoc erat in principia apud Deum.* In eo textu Verbum aperte distinguitur à Deo; quod enim dicitur fuisse apud Deum, à Deo distinguitur, cum nullum ens propriè dici possit esse apud seipsum: atqui non distinguitur naturâ; quippè (ut ibidem dicitur) Verbum erat Deus: ergo distinguitur personâ. Ita ratiocinantur Tertullianus adversus Praxeam, cap. 26. Athanasius oratione contra Sabellii Gregales.

*Secundò*, Christus Joannis 14. sic Apostolos alloquitur: *Si cognovissetis me, & Patrem meum cognovissetis..... Philippe, qui videt me, videt & Patrem.... Non creditis, quia ego in Patre, & Pater in me est?..... Ego rogabo Patrem, & alium Paracletum dabit vobis.* In eo Joannis loco non tantum adstruitur unitas naturæ: *Qui videt me, videt & Patrem*; sed etiam distinctio trium personarum: neque enim eadem persona potest realiter esse Pater & Filius & Paracletus.

*Tertio*, in Christi baptismo, cujus Matthæus meminit, cap. 3. reperitur expressa trium personarum distinctio: 1. Pater de cœlis loquitur: *Hic est Filius meus dilectus, in quo mihi complacui*: 2. Filius in Jordane baptizatur: *Hic est Filius meus*: 3. Spiritus Sanctus visus est in columbæ specie: *Vidit Spiritum Dei descendentem sicut columbam, & venientem super se.*

Nec audiendi sunt Sociniani, cum reponunt Filium de quo textus ille loquitur, non esse Filium naturalem, seu consubstantiallem Patri; sed esse Christi personam, quæ (inquiunt) licet sit mera creatura, ratione tamen unionis quam habet cum Deo per charitatem, dicitur Deus. Non sunt (inquam) audiendi, tum quòd (ut suo loco con-

Differt. I. *De Existent. SS. Trin.* 9

contra Nestorium dicitur) Christus sit verè ac propriè Deus ratione substantialis unionis naturæ humanæ cum personâ Verbi : tum etiam quòd Christus eò loci non dicatur Filius simpliciter, sed per emphasim quandam, quâ distinguitur ab iis qui per adoptionem tantum sunt Filii Dei: *Hic est Filius meus dilectus, in quo mihi complacui.*

Non majoris est ponderis, quod iidem hæretici respondent, nomine Spiritus Sancti non intelligi aliquam personam distinctam à Deo Patre, sed solam divinitatis virtutem, quâ Christus abundè in baptismo cumulus sit. Nam 1. Euangelium apud Matthæum & Lucam, non virtutem, sed personam indicat: *Es descendit Spiritus Sanctus* (inquit Lucas, c. 3.) *corporali specie sicut columba in ipsum*; scilicet descensus, est actio personalis: 2. Dei virtus, Dei proprietas, nusquam in Scripturis descendere dicuntur.

Quartò, idem trium personarum in divinis numerus clarissimè continetur in formâ, quâ ex mandato Christi, baptisma confertur: *Euntes ergo* (ait Christus Matthæi 28.) *docete omnes gentes, baptizantes eos in nomine Patris, & Filii, & Spiritus Sancti.* Scilicet 1. Patris & Filii & Spiritus Sancti unam esse (ut inferiùs dicetur) potestatem, unam operationem, ac proindè & unam naturam, probant hæc verba: *In nomine*; liquidem illa verba significant, autoritate & operatione Patris & Filii & Spiritus Sancti dari tum baptismum tum baptismi effectum. 2. Distincta appellatio Patris, Filii & Spiritus Sancti, apertè exprimit eorum à se invicem distinctionem. Id nonnulli de Filio, cum censeant eum esse creaturam, concedunt quidem, sed negant habere locum in Spiritu Sancto; nempe contendunt non esse personam, sed Dei virtutem, ita ut sensus sit, *baptizantes eos in nomine Patris & Filii & virtutis Dei.* Verùm quàm vana sit ea responsio, patet 1. ex eo quòd non sit potior ratio cur

cur appellatio Patris & Filii denotet duas personas, quàm appellatio Spiritus Sancti denotet alianr: patet 2. ex eo quòd absurdus sit sensus quem adversarii laudatæ sententiæ tribuunt; neque enim rectè dicitur quis operari in nomine, seu autoritate, Dei, & virtutis ejus.

*Quintò*, Veritas de qua agitur, conceptisterminis reperitur primæ Joannis cap. 5. ubi hæc habentur: *Quoniam tres sunt qui testimonium dant in calo: Pater, Verbum & Spiritus Sanctus, & hi tres unum sunt*: Nempè voces istæ Pater, Verbum, Spiritus Sanctus, non sunt voces synonymæ, siquidem 1. id assereretur sine fundamento, hoc est, absque ullo Scripturæ aut traditionis testimonio. 2. Pater generat Verbum, unde & aliis in locis Verbum dicitur Filius Patris: Pater & Filius mittunt Spiritum Sanctum, Spiritus Sanctus à Patre & Filio procedit: at generans & genitus, mittens & missus, procedens & is à quo procedit, distinguuntur realiter: ergo, &c. 3. Si Pater, Verbum & Spiritus Sanctus, nomine tantum non re distinguerentur, non efficerent tres testes, sed unum tantum, quod sacro textui repugnat.

Sociniani, duo respondent ad illud argumentum. *Primò*, contendunt, versiculum septimum quinti capitis primæ Joannis Epistolæ non esse ipsiusmet Joannis, sed pluribus sæculis post illius mortem insertum fuisse textui. Probant ex eo quòd ille versiculus septimus in Græcis codicibus nō legatur, imò nec in pluribus veteribus Latinis. Confirmant ex eo quòd nec Augustinus, nec Ambrosius, nec Leo Magnus, qui sæpiùs & ex professione contra Sabellianos, Arianos & Macedonianos manus conseruerunt, usquam eo versiculo (qui tamen rem conficiebat) usi sint. *Secundò*, (inquiunt iidem Sociniani) quamvis daretur, versiculum septimum, de quo agitur, esse ipsiusmet Joannis, inde tamen non colligeretur, esse tres personas distinctas in Deo: nec enim (addunt)

Differt. I. *De Existent. SS. Trin.* 11

ex eo versiculo magis colligi potest, tres esse personas distinctas in Trinitate, quàm ex his ejusdem versiculi verbis: *Et hi tres unum sunt*, colligi potest unam esse in Patre & Filio naturam: atqui id reverà colligi non potest, sicut nec ex istis: *Et hi tres unum sunt*, quæ versiculo 8. leguntur, colligi potest, spiritum, aquam, & sanguinem esse unum substantiâ & naturâ.

Sed contra priorem Socinianorum responsionem, cum auctore qui Estii Commentarium in caput quintum prioris epistolæ Joannis persecutus est, dicendum est 1. non in omnibus quidem exemplaribus Græcis, sed in pluribus tantùm legi versiculum septimum, de quo est hîc questio: nempè Robertus ex sexdecim vetustis exemplaribus Græcis ab Italiâ, Galliâ, Hispaniâ, petitis, solummodò notat septem, in quibus versiculus ille non reperitur.

Dicendum est 2. cum doctissimis monachis Beneditinis, fol. 1673. Tom. 1. operum S. Hieronymi, textum de quo agitur, desiderari quoque in multis vetustissimis exemplaribus Latinis mss. at in pluribus ejusdem ætatis suppleri ad margines librorum: in recentioribus verò semper adesse, non tamen eodem ordine, quia in iis sæpius versiculus octavus vulgatæ Latinæ, præcedit versiculum septimum.

Dicendum est 3. quòd cum ille versiculus legatur in pluribus exemplaribus, tum Græcis, tum Latinis, ac prætereà ab antiquioribus Patribus, (ut mox dicetur) laudatus sit, reverà sit ipsiusmet Joannis textus, initio tamen oscitantia & incuria amanuensium omissus. Nec id mirum est; nihil enim facilius est, quàm omittere verba, quæ secundo eadem ac consequenter leguntur, ut videre est duobus exemplis, quæ laudati monachi ex Antiquo Testamento ibidem protulerunt. Proclivis autem admodùm (addunt ii scriptores) fuit lapsus ille in casu de quo agitur, propter eadem verba quæ secundo loco dicuntur: nempè, *Tres sunt*.

*sunt qui testimonium dant; & iterum, Et hi tres unum sunt.* Qui enim à principio scribebant Græca novi Testamenti exemplaria, postquam posuerant in membranis: *Quia tres sunt qui testimonium dant,* ad exemplar quod præ oculis habebant, recurrentes, facile priora cum posterioribus sociare potuerunt, relictis omnibus intermediis; & ita errore librariorum in pluribus libris duo versiculi in unicum coaluerunt. Quumque sequi debuissent, *In calo, Pater, Verbum, & Spiritus Sanctus, & hi tres unum sunt,* consequenter scripserunt, *In terra, Spiritus, aqua & sanguis: & hi tres unum sunt.* Hujusmodi exemplaribus imperfectis usi sunt apud Latinos (verba sunt eorundem auctorum) qui Græca epistolæ Joannis convertentes, integrum versiculum omittunt ubi *Pater, Verbum & Spiritus Sanctus* unum esse dicuntur.

Dicendum est 4. eum versiculum laudatum fuisse à vetustissimis Patribus: *De Patre & Filio & Spiritu Sancto scriptum est,* (inquit Cyprianus libro de Unitate Ecclesiæ,) *Et hi tres unum sunt;* laudat eum Fulgentius libro contra decem objectiones Arianorum; laudat Idacius Clarus libro contra Varimadum Arianæ sectæ diaconum. Laudat quoque Vittenſis Episcopus; sic enim loquitur lib. 3. de VVandalicâ persecutione qui extat tomo 8. Bibliothecæ Patrum: *Vt adhuc luce clarius unius divinitatis esse cum Patre & Filio Spiritum Sanctum doceamur, Joannis Evangelistæ testimonio comprobatur; ait enim: Tres sunt qui testimonium perhibent in calo, Pater, Verbum, & Spiritus Sanctus, & hi tres unum sunt.* Laudat denique fidei confessio, quam Eugenius Episcopus Carthaginensis, suo & Catholicorum Africæ Episcoporum nomine, obtulit Hunnerico VVandalorum regi. Eam fidei confessionem loco proximè laudato refert ac probat idem Victor Episcopus Vitenſis. Igitur in formâ respondendum est negando, illum versiculum non esse ger-

germanum S. Joannis textum. Ad illius verò priorem probationem distinguendum est ant. Non reperitur in multis exemplaribus sive Græcis sive Latinis, & tamen reperitur in aliis, conc. ant. & non reperitur in aliis, neg. ant. Ad alteram probationem, distingui pariter debet ant. Aliqui ex Patribus qui contra Arianos pugnarunt, non usi sunt adversus eos illo versiculo, & alii Patres eo usi sunt, conc. ant. & alii Patres eo usi non sunt, neg. ant. Patres qui versiculum illum non objecerunt Arianis, usi sunt imperfectis codicibus; qui verò illum laudarunt, usi sunt codicibus integris: quâ ratione autem imperfectio illa in codices irrepsit, fusè superiùs explicatum est.

Quod spectat ad alteram Socinianorum ad nostrum argumentum responsionem, vide quæ dicuntur inferiùs, ubi agitur de Verbi divinitate.

### C A P U T III.

*Virum personarum in Divinis distinctio possit ex traditione demonstrari.*

Not. **A** Liquid dogma duobus modis potest ex traditione demonstrari, præscriptione nimirum & discussione: hîc igitur quærendum est, utrum personarum in divinis distinctio eo duplici argumento demonstrari possit.

CONCLUSIO I. Trium personarum in Divinis distinctio potest argumento præscriptionis demonstrari.

Probatur. Argumentum præscriptionis est illud, in quo ex fide quam Ecclesia certo sæculo profitetur, colligitur, Ecclesiam anterioribus sæculis ad Christum usque, eandem fidem absque ullâ intermissione semper professam fuisse: Atqui ejusmodi argumento demonstratur trium personarum in divinis distinctio: Ergo demonstratur argumento præscriptionis.

Mi-

Minor propositio, in quâ positus est difficultatis cardo, sic ostenditur. Tertio sæculo Ecclesia sive in Oriente sive in Occidente fidem de distinctione trium personarum in divinis profitebatur. Nam ubi tunc Sabellius contrarium docere instituit, adversus eum insurrexerunt omnes orbis Ecclesiæ. Dionysius Alexandrinus Episcopus prolixas de eo argumento epistolas conscripsit, de quibus (apud Eusebium Hist. lib. 7. cap. 6.) Xystum Romanum Pontificem hisce verbis certiores facit: *Nam de dogmate illo, quod nuper apud Ptolemaidem urbem Pentapoleos commotum est, pleno impietatis ac blasphemiae adversus omnipotentem Deum Patrem Domini nostri Iesu Christi: pleno etiam incredulitatis erga unigenitum ejus Filium, primogenitum omnis creaturæ, Verbum quod inter homines versatum est: pleno denique stuporis adversus Spiritum Sanctum: cum ab utraque parte & literæ ad me allatæ essent, & fratres mecum disserturi venissent, epistolas quasdam, quantum Deo juvante potui, tractatoris more fusiùs scripsi, quarum exemplaria ad te misi.* 2. Xystum Romanum Pontificem ejusdem cum Dionysio fidei, in capite de quo agitur, extitisse demonstratur ex eo quòd receptis illius literis adversus Sabellium, ipsum violatæ fidei non accusaverit. 3. Consensisse pariter eidem dogmati Dionysium qui Xysto successerat, colligitur ex eo quòd Dionysius Alexandrinus apud eum postea accusatus à Pentapolitanis, quòd astruendo contra Sabellium personarum distinctionem, naturæ unitatem visus esset destruxisse, istud quidem crimen à se depulerit datis ad Dionysium Romanum literis, dogma tamen de personarum distinctione nullo modo emollierit, aut excusarit, ut patet ex Athanasio libro de sententiâ Dionysii adversus Arianos conscripto.

Jam verò si tertio Ecclesiæ sæculo ea erat totius Ecclesiæ fides, fuerat etiam secundo & primo: nam alioquin tertio sæculo fides in eo capite



pute immutata fuisset, quod est impossibile: nam  
 1. determinari non potest tempus, quo primum  
 contigit illa mutatio: 2. Laudari non possunt ejus-  
 modi mutationis authores: 3. Dici non potest,  
 qua via novum alioquin illud dogma omnes orbis  
 Ecclesias pervaserit. Nec responderi potest, Dio-  
 nysii Alexandrini opera ipsum in Ecclesias inve-  
 ctum fuisse: Nempè si Dionysius quidquam  
 innovasset, aliarum Ecclesiarum Episcopi adver-  
 sùs eum insurrexissent, & præsertim Romanus  
 Pontifex Xystus, ad quem (ut ex Eusebio fuit ob-  
 servatum) à se editarum contra Sabellium episto-  
 larum exemplaria transmiserat.

CONCLUSIO 2. Trium personarum in di-  
 vinis distinctio potest argumento discussionis de-  
 monstrari.

Probatur. Argumentum discussionis est illud  
 quo veritas aliqua prolatis in specie Scripturæ  
 aut Patrum textibus asseritur: atqui dogma, de  
 quo est hìc quæstio, prolatis in specie Scripturæ  
 aut Patrum textibus potest demonstrari. De Scri-  
 pturæ locis, sat superque sunt, quæ duobus hujus-  
 ce quæstionis capitibus dicta sunt: de Patribus  
 verò hæc momenta proferuntur.

1. S. Justinus Martyr, qui altero Ecclesiæ sæcu-  
 lo floruit, in Dialogo cum Triphone Judæo,  
 multis argumentis è Scripturâ petitis probat, esse  
 alterum qui nominatur Deus, præter universorum opi-  
 ficem. Ostendit postea, vim illam Patris, quam  
 contendit Scripturas asserere, non esse meram  
 virtutem, seu efficientiam, sed personam à Pa-  
 tre distinctam, quæ non minùs Deus sit, quàm  
 ipse Pater: Virtutem illam (inquit) esse Dei, ac  
 Deum à Propheta nuncupari, non ita ut solis lux  
 solo vocabulo numeratur; sed numero alterum quid-  
 dam esse: non tamen recisione, tanquam Patris sub-  
 stantia secetur.

2. S. Irenæus lib. 3. adversùs hæreses apertè  
 Filium à Patre distinguit: Illum enim, non autem  
 istum, cum Moyse locutum fuisse contendit:

de utroque tanquam à se invicem distincto explicat hæc Genesis verba: *Et pluit Dominus super Sodomam & Gomorrhæam, ignem & sulphur à Domino.*

3. Tertullianus libro adversus Praxeam totus est in asserendâ veritate, de quâ agitur. Cap. 2. Filii à Patre distinctionem probat ex processione: *Si Filium nominat, Filius autem non alius erit, quàm qui ex ipso prodit: Sermo autem prodit ex ipso, hic erit Filius, non ipse de quo prodit: non enim ipse prodit ex semetipso.* Capite 14. contendit, Filium esse personam distinctam à Patre, quòd Pater in Scripturis asseratur esse invisibilis, cum è contra Filius, etiam ante incarnationem, hominibus, Moyfi nimirum & Prophetis, visus sit. Capite 27. docet, Filium esse alium à Patre quòd à Patre, non autem à semetipso, unctus sit. Capite 31. asserit, hoc esse discrimen inter Judæos, & Christianos, quòd illi Trinitatem in divinis (explicitè saltem) non agnoscerent, & isti è contra eam apertè profiteantur: *Ceterum (ait) Iudaicæ fidei ista res, sic unum Deum credere, ut Filium Dei adnumerare nolis, & post Filium Spiritum. Quid enim erit inter nos & illos, nisi differentia ista?*

4. Dionysius Alexandrinus ita Sabellii, personas in Deo confundentis, dogma confutavit, ut nonnullis visus sit in contrarium errorem abreptus, seu, distinxisse non tantum personas, sed etiam naturas: unde eâ de re à Pentapolitanis quibusdam postulatus fuit apud Dionysium Romanum, ac sub finem vitæ coactus est apologiam ad eundem Romanum Pontificem transmittere.

5. Dionysius Romanus Pontifex expressè contra Sabellianos scripsit: opus quidem non habetur integrum, sed S. Athanasius libro de Nicænæ Synodi decretis refert fragmenta, quibustrium personarum distinctio clarissimè doceatur: *Audito (inquit apud Athanasium) quosdam apud vos esse Catechistas, & doctores divini verbi, qui illius*

*illius sunt opinionis auctores; qui ex diametro, ut sic dicam, pugnant cum Sabellii placitis. Hic enim blasphematur, Filium ipsum asserens esse Patrem, & è converso Patrem esse Filium. At isti tres quodammodo Deos prædicant, dum sanctam monadem dividunt in tres hypostasies peregrinas, à se invicem planè separatas. Etenim necesse est unum omnium Deo Dei Verbum, & in Deo manere, & habitare Spiritum Sanctum.*

6. Qui quarto sæculo, ac postea scripserunt Patres, personarum distinctionem, de quâ hîc agitur, omnes ad unum ad Servetum usque, & Socinum, elapsi proximè sæculi hæreticos, ita apertè professi sunt, ut laudare eorum textus, sit meridiano soli lucem addere. Legantur Athanasii Oratio contra Sabellii Gregales, Basilii epistola 64. ad Ecclesiæ Neocæsariensis doctores, Epiphanius hæresi 55. & 62.

## C A P U T IV.

*Solvuntur argumenta Sabellianorum contra personarum distinctionem.*

Not. **Q**Uæ pro Sabellianis proferri possunt argumenta, reducuntur ad quædam Scripturæ loca; ad nonnullos Patrum textus, ad aliquot rationes ex philosophia depromptas. Suo quæque ordine hîc & proponi & solvi debent ejusmodi argumenta.

Objicies 1. Scripturæ asserunt, Deum esse solum: ergo non sunt plures personæ in Deo: ubi enim est pluralitas, sive naturarum, sive personarum, ibi non est solitudo. Probatur ant. 1. Joannis capite 17. hæc leguntur: *Hæc est autem vita æterna, ut cognoscant te solum Deum verum, & quem misisti Iesum Christum.* Primæ ad Corinth. 8. hæc habentur: *Nobis unus Deus Pater, ex quo omnia, & nos in illum, & unus Dominus Iesus Christus, per quem omnia, & nos per ipsum.* Ad

Epheſios 3. ſic Apoſtolus loquitur : *Vnus Deus & Pater omnium, qui ſuper omnes, & per omnia, & in omnibus nobis.*

Reſp. ad 1. conc. ant. neg. conſeq. Ad 2. diſt. ant. Ubi eſt pluralitas perſonarum, licet non ſit pluralitas naturarum, ibi non eſt *omnimoda ſolitudo*, conc. ant. non eſt *aliqua ſolitudo*, neg. ant. Scripturæ textus, qui Deo ſolitudinem adſcribunt, de ſolitudine naturæ, non autem de ſolitudine perſonæ intelligendi ſunt. Ratio eſt, quia iis textibus Scriptura fideles docere voluit, unum eſſe Deum natura, contra quod gentiles credebant : nempe Deos, tum natura, tum perſonis plures, venerabantur : è contra verò Chriſtiani unum in tribus perſonis Deum, aut ( quod idem eſt ) tres perſonas in uno Deo colunt.

Nec contrarium probant, quæ objecta ſunt loca ; nam ad priorem dici poteſt 1. ſic diſponi debere ſententiam ex Joanne laudatam : *Hæc eſt vita æterna, ut te, & quem miſiſti Ieſum Chriſtum, cognoscant ſolum Deum verum* : ita nimirum cenſet Auguſtinus tractatu 105. in Joannem, nec non lib. 3. contra Maxim. c. 15. Dici poteſt 2. Patrem appellari ſolum Deum per excluſionem Deorum qui à gentilibus colebantur, quique à parte rei non erant Dii ; non autem per excluſionem perſonarum, quæ cum habeant unam naturam divinam, à parte rei ſunt unus & verus Deus : *Quapropter* ( inquit Athanaſius Orat. 4. contra Arianos pag. 1257. ) *cum Pater ſolus Deus, & verus appellatur, non ad exauſtorationem ejus appellatur, qui dicit : Ego ſum veritas ; ſed demolitionem eorum qui ex natura tales non ſunt, qualis eſt Pater, & Patris Verbum, neque veri Dii ſunt.*

Ad alterum locum, eadem adhiberi debet reſponſio, ſeu, Patrem dici unum Deum cum excluſione inanum Deorum, quos gentiles colebant, non autem cum excluſione aliarum perſonarum. Ratio eſt, quia eodem modo ( ex ipſo  
Joan-

Joannis textu ) Pater est unus Deus, quo Christus est unus Dominus: Ergo sicut Christus non est Dominus cum exclusione Patris, ita nec Pater est unus Deus cum exclusione Christi, aut Spiritus Sancti.

Objicies 2. Nullus est alius Deus, quàm qui in Vetere Testamento dicitur Deus Abraham, Isaac & Jacob: atqui sola Patris persona est Deus Abraham, Isaac & Jacob: Siquidem Deus Abraham Isaac & Jacob in Scripturis apertè opponitur cæteris personis, Filio inprimis: *Deus Abraham, & Deus Isaac, & Deus Jacob, Deus patrum nostrorum* ( inquit Petrus Actorum 3. ) *glorificavit filium suum Iesum*. In epist. ad Hebræos cap. 2. Deus Pater qui prophetis locutus fuerat, dicitur *novissimè locutus in Filio*.

Resp. ad 1. conc. maj. neg. min. Ad 2. dist. ant. Deus Abraham in Scripturis apertè opponitur Filio, ut homo est, conc. ant. ut est Verbum, neg. ant. Deus Abraham glorificavit Filium suum ut homo est, seu, prout est humanâ indutum carne, non autem prout Verbum est, hoc est, prout est altera SS. Trinitatis persona: nec id mirum est; nam Deus Abraham glorificavit Filium, per quem novissimè nobis locutus est: sed non locutus est per Filium simpliciter ut est Verbum, sed prout est unitum humanæ naturæ.

Objicies 3. Si in Deo essent tres personæ, essent tres Dii: nam personæ se habent respectu divinitatis, sicut Petrus & Paulus ratione humanitatis; ita nimirum docet Gregorius Nyssenus in epist. ad Ablavium: atqui Petrus & Paulus constituunt duas in individuo humanitates: ergo à pari tres personæ in divinis debent constituere tres deitates; ac proindè non unus tantum, sed plures erunt Dii, quod dictu impium est.

Resp. ad 1. & 2. neg. maj. Ad cujus probationem dist. ant. Ita docet Gregorius Nyssenus, & allatum ab eo exemplum est mancum & imperfectum, conc. ant. Et non est mancum & imper-

fectum, neg. ant. In hoc valet allata à Gregorio comparatio, quòd sicut Petrus & Paulus constituunt personas diversas, ita etiam Pater, Filius, & Spiritus Sanctus tres constituunt distinctas personas; sed non valet in eò, quòd eadem tres personæ in divinis constituent tres naturas, quemadmodum Petrus & Paulus constituunt duas naturas distinctas. Nec mirum est, quòd ea comparatio sit imperfecta: siquidem adeò sublime est mysterium, de quo agitur, ut nullum ex rebus creatis exemplum peti possit, quo perfectè exhibeatur: unde ipse Gregorius profitetur, se maximas acturum esse gratias ei, qui aliud accuratius protulerit: *Sin autem* (inquit) *nostra oratio proposita quæstione infirmior arguatur, traditionem quidem, quam à Patribus per successionem accepimus, servabimus in perpetuum firmatam, & immotam: orationem verò, quæ fidei patrocinetur, à Domino requiremus; quæ si ab aliquo eorum, qui gratia præditi sunt, inventa fuerit, gratias agemus ei qui gratiam dederit.*

Instabis 1. Non est potior ratio, cur Petrus & Paulus duos homines constituent, quàm tres personæ in divinis tres Deos constituent: ergo sicut Petrus & Paulus sunt duo homines, ita tres personæ in divinis sunt tres Dii.

Resp. neg. maj. Ratio est, quia natura humana in Petro & Paulo multiplicatur, nempe licet in eis una sit secundum speciem, non est tamen una secundum numerum & secundum individuum: è contra verò natura in tribus personis divinis est omninò una secundum individuum & secundum numerum.

Objicies 4. Mysterium Trinitatis repugnat trito isti apud philosophos axiomati: *Quæ sunt eadem uni tertio, sunt eadem inter se.* Nempe Pater, Filius, & Spiritus Sanctus, sunt idem cum essentiâ divinâ: & tamen ( in suppositione mysterii ) non sunt idem inter se; imò à se invicem realiter distinguuntur: ergo, &c.

Resp.

Resp. 1. dato ant. neg. conseq. Ratio est, quia mysteria divina, cū humanæ rationis captū superent, non sunt philosophicis principiis explicanda, sed Scripturā tantū & traditione: *Sicut inter nos, & Deum nihil est discriminis* ( inquit Cyrillus Alexandrinus lib. 11. in Joannem pag. 99. ) *divina nostris metiamur. Sin autem incomprehensibile est intervallum, cum naturæ nostræ defectus canonem, & regulam, ac normam Dea præstint?* Confirmatur solutio ex eo, quod licet istud principium: *Ex nihilo nihil fit*, apud philosophos omnes receptum sit, exceptionem tamen patitur respectu causæ ordinis supernaturalis: scilicet constans est, apud ipsos etiam Sabellianos, & Socinianos, Deum hocce universum eduxisse ex nihilo, tum sui, tum subjecti, hoc est, condidisse independentem ex præjacente materiā.

Resp. 2. neg. ant. Ratio est, quia principium philosophicum: *Quæ sunt eadem uni tertio, sunt eadem inter se*, non intelligitur de iis, quæ sunt eadem uni tertio universali, & communicabili. Sic quamvis Petrus & Paulus sint idem cum homine ( uterque nimirum est homo ) tamen Petrus & Paulus non sunt idem inter se. Sed intelligitur tantum de iis, quæ sunt eadem uni tertio singulari & incommunicabili: Verum essentia divina non est ejusmodi, nempe æqualiter in singulis personis reperitur.

Objicies 5. Ex mysterio Trinitatis multa sequuntur, cum quibus divinitas stare non potest. Nam 1. cum quælibet persona sit infinita, includit omnes perfectiones, ac proinde alias personas, nempe in divinis persona est perfectio. 2. Pluralitas personarum supponit, unam ab alia procedere, seu unam ab alia recipere suum esse: quod quidem divinitati repugnat, cum Deus sit ens à se, & per hoc differat à creaturis, quæ sunt ens ab alio. 3. Admittenda erit hæc propositio contradictoria: *Deus est genitus: Deus non est genitus*: nam Pater est Deus, Filius est Deus, ille

verò non est genitus, cum è contrà iste genitus sit: 4. Unam in individuo naturam reperiri in tribus personis realiter distinctis, res est, quæ non tantum superat humanæ mentis captum, sed quæ ipsi omninò repugnat.

Resp. ad 1. dist. ant. Una persona includit alias in essentia divina, cum qua tum ipsa tum aliæ personæ identificantur, conc. ant. in se ipsa, & prout est perfectio relativa, neg. ant. nam sub ratione relativæ perfectionis opponitur alteri perfectioni relativæ, ac proindè tantum abest, ut sub eo respectu eam includat, quin excludat potius. Ea identitate personarum cum essentia divinitatur illud Trinitatis privilegium, quod circumcessionem vocant, ratione cujus una persona est in alia: *Est Filius in Patre* (inquit S. Athanasius orat. contra Arianos) *quatenus intelligere licet, eo ipso, quòd totum id quod est Filius, substantiæ Patris proprium est .... Cum id quod proprium est, nempe divinitas Patris, sit esse Filii, consequens est, ut & Filius in Patre sit, & Pater in Filio.*

Resp. ad 2. dist. ant. Deus est ens à se, hoc est, non est ab alio tanquam à causa, conc. ant. Est ens à se, hoc est, non est ab alio tanquam à principio, neg. ant. Ratio disparitatis est, quia ens, quod per modum causæ tribuit esse alteri, non dat illi proprium suum esse, sed tantum simile, ut paret in igne qui alium ignem generat: è contra verò ens, quod alteri dat esse per modum principii, illi proprium suum esse communicat; ac proindè si esse principii sit independens, esse ejus quod oritur à principio, erit pariter independens. Hincque patet, esse Filii in Trinitate non minùs esse perfectum, quàm esse principii, ex quo oritur: est enim in utroque unum ac idem esse.

Resp. ad 3. negando admitti debere propositiones contradictorias, de quibus agitur in argumento. Ratio est, quia in hac propositione, *Deus est genitus*: terminus iste, *Deus*, supponit pro Filio, ac



ac proinde est vera, verè enim Filius est genitus. In ista verò propositione, *Deus non est genitus*, vox, *Deus*, supponit pro omnibus personis indistinctè, & sic sensus illius est, quòd nulla persona in divinis sit genita, hincque patet, eam esse omninò falsam; unde apertè sequitur, ex suppositione mysterii S. S. Trinitatis admitti non debere has propositiones in specie contradictorias, *Deus est genitus, Deus non est genitus*. E contra istæ propositiones admittendæ sunt: *Deus est ingenus, Deus non est ingenus*; non enim sunt contradictoriæ, quia diversa habent subjecta: nempe in prima subjectum est Pater, & in secunda Filius, quia genitus & ingenus sunt termini relativi: Sicut (inquit Augustinus lib. 5. de Trinitate cap. 7.) *genitus non ad se ipsum dicitur, sed quòd ex genitore sit: ita cum dicitur ingenus, non ad se ipsum dicitur, sed quòd ex genitore non sit, ostenditur.*

Resp. ad 4. neg. ant. seu nego repugnare rationi, quòd una numero natura in tribus personis distinctis reperiatur. Nec ad id probandum satis est ostendere, mysterium illud humanæ mentis captum superare. Nimirum ipsa humana ratione docemur, divinum esse, cum infinitum sit, existere posse variis modis, qui finiti intellectus creati captum superent. Quum de mysteriis agitur, Christianus cui persuasum est, Scripturam & traditionem esse verbum Dei, qui nec falli nec fallere potest, eos fontes, non autem humanam rationem consulere debet: *De illa summa Trinitate quæ Deus est* (inquit Augustinus lib. 15. de Trinitate cap. 27.) *credant potius, quod in S. litteris invenitur, quam poscant liquidissimam sibi reddi rationem, quæ ab humana mente, tarda scilicet infirmæque, non capitur. Et certè cum inconcussè crediderint Scripturis sanctis, tanquam veracissimis testibus, agant orando & querendo & benè vivendo ut intelligant, id est, ut quantum videri potest, teneatur mente, quod tenetur fide.*

Objicies 6. Priores Christiani non crediderunt mysterium Trinitatis : nam si illud credidissent 1. gentiles ex eo desumpserunt argumentum pro pluralitate Deorum, quam Christiani passim illis exprobrabant : 2. Illis saltem objecissent innumeras difficultates ; quæ ex illo mysterio nascuntur, quæque spontè cuique, cujus in mentem venerit, sese objiciunt : atqui gentiles neutrum egerunt ; nec enim ejusmodi argumentationis vel minimam speciem in gentilium libris aut in Christianorum apologiis reperire est.

Resp. 1. non extare libros omnes quos gentiles adversus Christianam religionem quondam scripserunt, nec apologias quibus Christiani eam ab eorundem gentilium convitiis vindicarunt : ac proinde quamvis nunc nullum sit monumentum quo probari possit, gentiles ex mysterio SS. Trinitatis desumpsisse argumenta, quibus impugnaverint Christianam religionem, non sequitur eos reverà ex eo mysterio nusquam contra fidem nostram argumentatos fuisse. Vide similem solutionem fusè pertractatam tomo 1. Commentarii historici, & dogmatici de Sacramentis, pag. 286.

Resp. 2. quòd quamvis pastores prioribus sæculis sedulò SS. Trinitatis mysterium fideles explicitè docerent, cum ( ut agentes de fide dicitur ) illius explicita cognitio sit cuique adulto ad salutem necessaria necessitate medii, nec baptizarent catechumenos, antequam symbolum, in quo continetur, memoriter reddidissent ; tamen passim illud Gentilibus non evulgabant, ne propter difficultates, quas continet, eorum animos exulcerarent, nève illud, quòd nonnulla complectatur, quæ rationis captum superant, irrisioni exponerent ; unde iidem Patres de illo mysterio aut scribentes aut coram gentilibus loquentes, œconomix ac prudentix causa reticentiis subobscurisque phrasibus usi sunt. Vide varia illius subobscuri loquendi modi exempla in unum collecta

lecta tom. 1. Commentarii Historici & Dogmatici de Sacramentis pag. 286.

Resp. 3. negando absolutè ant. seu philosophos gentiles nusquam adversus religionem Christianam ex mysterio SS. Trinitatis argumentatos fuisse. Nam 1. Justinus in priore apologiâ quam pro Christianis conscripsit, refert, Christianos pro insipientibus apud gentiles audiisse, quòd Christum tanquam Dei Filium colerent : at Christi divina filiatio stare non potest absque doctrina de personarum in divinis pluralitate. 2. Praxeas, qui labente altero sæculo vexavit Ecclesiam, totus est, ut ex fide Trinitatis, Deorum pluralitatem adversus orthodoxos adstruat. Vide Tertullianum libro contra Praxeam edito. 3. Apud Origenem libro contra Celsum, Celsus gentilis philosophus data opera probat, ex fide Trinitatis sequi Deorum pluralitatem : quod quidem negat Origenes, quòd (ut inferiùs ostendetur) Pater & Filius sint unum essentia, quamvis sint plures persona.

## Q U Æ S T I O II.

### *De Vnitate naturæ in Trinitate.*

**I**N divinis ( ut præcedente quæstione, ex Scriptura & traditione ostensum est ) tres sunt personæ realiter à se invicem distinctæ : ut igitur unitatem naturæ seu essentiæ in Trinitate probemus, necesse est, ut earundem personarum divinitatem adstruamus. De Patris divinitate non est dubium, cum tum Scriptura, tum traditione, tum ratione constet, eum esse ens à se, & à quo creata omnia pendeant; sed difficultas est de Filii & Spiritus Sancti divinitate. Igitur hîc agendum est 1. de divinitate Filii: 2. de divinitate Spiritus Sancti; seu expendendum est, utrum Filius & Spiritus Sanctus sint verè Deus, sicut est Pater.

## CAPUT PRIMUM.

*De Divinitate Verbi.*

Not. 1. **A** Riani, quarto Ecclesiæ sæculo, docuerunt, Verbum non esse verè & substantialiter Deum; blasphemarunt è contra ipsum meram esse creaturam, quam Deus ante alia entia creata eduxisset ex nihilo, & per quam tanquam per instrumentum, quæcumque facta sunt, condidisset. Propter varias temporum circumstantias mutarunt nonnunquam loquendi modum, sed tamen à parte rei in eodem semper errore steterunt, ut suo loco dicetur.

Not. 2. Aliud est quærere, an Verbum sit Deus, & aliud an Christus sit Deus. Nempè ex suppositione, quòd Verbum sit Deus, non sequitur, Christum esse Deum, quia ut Christus sit Deus, necesse est, ut illius humanitas hypostaticè cum Verbo conjuncta sit: at ea hypostatica unio non sequitur ex Verbi divinitate. Unde Nestorius, cui alioquin certa erat Verbi divinitas, negavit unionem hypostaticam, seu contendit Christum non esse verè ac substantialiter Deum.

Not. 3. Licèt ( ut ex mox observatis patet ) ex eo, quòd Verbum sit Deus, necessariò non sequatur, Christum esse substantialiter Deum: sequitur tamen, Verbum esse substantialiter Deum ex suppositione, quòd Christus sit substantialiter Deus: nec enim potest esse substantialiter Deus nisi illius humanitas substantialiter unita sit cum persona, quæ verè & substantialiter sit Deus. Postremam hanc quæstionem, *Utrum Christus sit verè ac substantialiter Deus*, fusè pertractabimus agentes de Deo Incarnato: ibi lector argumenta reperiet, quæ demonstrativè quidem, sed tamen indirectè, probant, Verbum esse Deum. Priorem igitur quæstionem, *Utrum Verbum sit verè Deus*, hic separatim à priore pertractabimus, quæremusque I, utrum Verbi divinitas possit directè  
ex

ex Scripturis probari: 2. utrum eam crediderint Patres, qui ante Concilium Nicænum 1. hoc est, tribus prioribus sæculis vixerunt: 3. quid de Verbi divinitate Concilium Nicænum 1. definierit: 4. quid post Concilium Nicænum 1. de eodem argumento Patres asseruerint.

## ARTICULUS I.

*Vtrum Verbi divinitas possit ex Scripturis demonstrari.*

CONCL. **V**erbi divinitas potest ex Scripturis demonstrari.

Probatur. Id probatur ex Scripturis, quod probatur ex Joannis Evangelii capite 1. Ex prioris ejusdem Joannis epistolæ capite 5. Ex capite 28. Matthæi: atqui Verbi divinitas iis monumentis potest demonstrari: ergo reverà ex Scripturis demonstratur.

*Profertur argumentum ex Evangelio Joannis desumptum.*

In Evangelio Joannis, capite 1. hæc habentur: *In principio erat Verbum, & Verbum erat apud Deum, & Deus erat Verbum. Omnia per ipsum facta sunt, & sine ipso factum est nihil.* Atqui eo Joannis loco vera & substantialis divinitas asseritur Verbo.

Primò, per has voces: *In principio erat Verbum*, eternitas tribuitur Verbo: nempè terminus, *Erat*, denotat, ipsum sèper fuisse, unde Joannes quater eum repetit: *Erat apud Deum. Erat, erat, erat.* Ecce quater, *erat* (inquit Ambrosius libro 1. de Fide ad Gratianum cap. 5.) ubi impius invenit, quòd non erat? Vox hæc alia, *In principio*, eandem æternitatem confirmat, sumitur nimirum pro, *Ante omnia*, ita ut sensus sit: *Ante omnia erat Verbum.* Hinc patet, Concilium Nicænum 1. ex eo Joannis loco, *In principio erat Verbum*, meritò dam-

damnasse Arianos dicentes, *fuisse aliquando tempus, quando Filius Dei non erat.*

Dices 1. Nonnulli Patres hanc vocem, *In principio*, interpretati sunt de Patre æterno, in quo erat Verbum, cum creata educta sunt ex nihilo, sic nimirum explicatur ab Augustino lib. 6. de Trinitate, cap. 5. Alii verò eandem vocem, *In principio*, exposuerunt de initio rerum omnium, ita ut (inquiunt) Joannes significare voluerit originem mundi, seu Verbum extitisse, cum mundus fieri cœpit: Atqui ex suppositione illarum explicationum, hæ voces, *In principio*, non probant æternitatem Verbi: Siquidem potuit esse in Patre tanquam in principio, à quo originem suam ducit; potuit jam existere antequam mundus fieri inciperet, & tamen non esse æternum: unde Ariani licet faterentur, Verbum ante mundum extitisse, negabant tamen, illud æternum esse.

Verum inanis est illa objectio: nam quamvis in suppositionibus de quibus agitur, Verbi æternitas non tam aperte adstruatur, quam in priore quam retulimus, solidè tamen stabilitur: siquidem si Verbum jam erat in Patre, si jam existebat cum omnia facta sunt, sequitur ipsum factum non fuisse, ac proinde ipsum esse æternum.

Dices 2. non magis ex his verbis, *In principio erat Verbum*, colligi potest æternitas Filii, quam ex istis quæ Genesis 1. leguntur, *In principio creavit Deus cælum & terram*, potest colligi æternitas cœli aut terræ.

Sed contra est, quia Moyses non dicit absolute, cælum & terram fuisse in principio, addit è contra, in principio creata fuisse: quod autem creatum est, æternum esse nequit: Joannes è contra non dixit, Verbum in principio factum fuisse, sed simpliciter fuisse, ac omnia per ipsum fuisse facta.

Dices 3. nomine *Verbi*, quo Joannes laudato sui Evangelii loco utitur, non significari personam

nam à Patre distinctam, sed divinam Patris sapientiam ab eo non distinctam, per quam educta sunt ex nihilo, quæcumque facta sunt: Ita apud Athanasium oratione contra Arianos, quidam Ariani ratiocinantur.

Sed stare non potest ea responsio; nam de eo de quo Joannes dixerat: *In principio erat Verbum: Omnia per ipsum facta sunt, & sine ipso factum est nihil*, dicit, *Verbum caro factum est, & habitavit in nobis*; quæ quidem voces haud dubiè non de internâ sapientiâ Patris, sed de æterno ejus Filio necessario intelligi debent: nempe eum, per quem omnia facta sunt, quique factus est caro, Joannes statim declarat fuisse Dei Filium: *Vidimus gloriam ejus, gloriam quasi Unigeniti à Patre*. Id verò confirmatur ex Apostolo qui ad Hebræos 1. scribit, per Filium, quem Joannes vocavit Verbi nomine, sæcula & universa quæ cœli ambitu continentur, condita fuisse.

Secundò. Idem Joannes eum quem dixerat Verbum, quem asseruerat fuisse in principio, conceptis terminis asserit fuisse Deum: *Et Deus (inquit) erat Verbum*. Nonnulli dubitant, quinam terminus in eâ Joannis propositione sit subiectum, qui verò terminus sit prædicatum; seu dubitant, an Verbum de Deo prædicetur, an Deus de Verbo, ita ut sic termini disponi debeant, *Deus erat Verbum*, aut, *Verbum erat Deus*. Hilarius lib. 1. de Trinitate cap. 7. multique post illum Patres docent, Deum de verbo prædicari. Hilarii expositio cum euangelii contextu cohæret quàm maximè: nam Joannes non de Deo, sed de Verbo antè locutus fuerat: *In principio erat Verbum, Verbum erat apud Deum*; par igitur est ut quod illis sententiis immediatè subjicitur: *Et Deus erat Verbum*, de Verbo, non autem de Deo (de quo non erat quæstio) prædicetur. Sed sive in illâ Joannis propositione Deus sit subiectum, & Verbum prædicatum, sive è contra Verbum sit subiectum, & Deus prædicatum, valet

valet argumentum pro Verbi divinitate ex eâ desumptum: Siquidem si Verbum sit subjectum, evidenter patet, ipsum esse Deum: nimirum ille Deus est, de quo Scriptura divinitatem prædicat, sicut illa substantia est homo, de quâ prædicatur humanitas, cum ex logicis, in propositione subjectum & prædicatum identificentur. Si autem Deus sit subjectum, & Verbum sit prædicatum, non alius quoque erit sensus: quia si Deus sit Verbum, Verbum debet esse Deus, quia subjectum & prædicatum propositionis convertuntur propter rationem, quam ex Logicis mox tradidimus: idque hoc exemplo patet: *Homo est animal mente præditum; Animal mente præditum est homo*. Ergo ex laudatâ Joannis sententiâ *Deus erat Verbum*, invictissimè colligitur, Verbum esse Deum.

Dices 1. Equidem Verbum eò loci Deum vocari, sed id non intelligitur de Deo summo, sed de quodam minore Deo, seu de eo qui propter excellentiam, qua inter alia creatapollet, Deus appellatur. Id autem patet ex eo, quòd Deus qui de Verbo prædicatur, in Græco textu sine articulo legatur, cùm è contra Deus cum articulo præposito *ὁ Θεός* semper legatur; unde non simpliciter, sed per emphasim Deus appellatur, quasi dicatur Magnus ac Summus ille Deus. Ita apud Chrysostomum Homilia 3. in Joannem Ariani quondam, ratiocinabantur.

Sed inutilis est ea responsio. Nam 1. (ut ibidem advertit Chrysostomus) Pater in Scripturis nunquam sine præposito articulo Deus appellatur, ut in hujusce capituli versiculo 6. legere est: *Fuit homo missus à Deo*, 7. contra verò Filius, *ὁ Θεός* Deus, cum articulo vocatur sæpius, ut patet ex versu 5. noni capituli epistolæ ad Romanos. Cur autem Joannes hoc loco articulum non addiderit, hanc Grammatici rationem reddunt. Non solet (inquiunt) Græca lingua prædicato propositionis articulum præponere, sed subjecto tantum: unde



unde λόγος Verbum, quod est, ut observatum fuit, subjectum propositionis, articulum habet, non autem vox Θεός, quæ est illius prædicatum.

Dices 2. Verbum in laudata Joannis sententia vocari Deum eo modo, quo Moyses Exodi 7. vocatus est Deus Pharaonis.

Sed illud Arianorum effugium præcludit Hilarius lib. de Trinitate cap. 7. ubi scribit, Moysen non absolutè dici Deum, sed cum additione, *Deum Pharaonis*; ac proinde ( addit ) *Moyses Pharaoni Deus datus est, dum timetur, dum oratur, dum punit, dum medetur*, hoc est, Moyses ratione effectuum, quos in Pharaonem operabatur, seu, quòd in eum Dei potentia uteretur, vocatus est Deus; cum è contra Verbum in Euangelio simpliciter ac absolutè Deus appelletur. Prætereà Scriptura non dicit, Moysen fuisse Deum Pharaonis, sed à Deo ipso constitutum fuisse Deum Pharaonis: *Ecce ( verba sunt ipsius Dei, Exodi 7. ) constitui te Deum Pharaonis. Aliud est ( inquit ibidem Hilarius ) Deum dari, aliud Deum esse. Eo ipso quòd dicitur constitutus Deus, non naturalis, sed fictitiis significatur Deus.* Addunt interpretes aliqui, Moysen non fuisse vocatum Deum, sed *Deum Pharaonis*, hoc est, ( ajunt ) in opinione Pharaonis. Addendum est, in eo loco non legi nomen *Adonai*, quod apud Hebræos est nomen Deo proprium, sed *Elohim*, quod Chaldæus R. Abraham Nuntium ac legatum ad Pharaonem interpretatur.

Tertiò, hæc sententia quam Joannes aliis hætenus explicatis subjicit: *Omnia per ipsum facta sunt, & sine ipso factum est nihil*, non minùs quàm præcedentes Verbi divinitatem confirmat. Nam 1. Dei solius est creare, nempè ( ut philosophi definiunt ) ad creandum superanda est distantia infinita, nihili nimirum ad ens, qua major excogitari non potest; ac proinde ad id requiritur virtus infinita; quæ quidem ( ut patet ) soli Deo convenire potest. Atqui Joannes asserit

Ver-

Verbum omnia cum Patre creasse: *Omnia per ipsum facta sunt*: ergo pariter asseruit, Verbum esse substantialiter Deum. 2. Si Verbum non sit Deus, factum, seu creatum fuit à Deo, cum inter Deum & ens factum ac creatum non sit aliquod medium: atqui Joannes docet, Verbum factum, seu creatum non fuisse: Scilicet illud ens factum, seu, creatum non est, per quod quæcumque sunt facta, seu creata, fuerunt facta ac creata: Sed, ex Euangelio, quæcumque sine ullâ exceptione facta sunt, seu creata, per Verbum facta, seu creata sunt: ergo Verbum non est ens factum, seu creatum: *Exeat* (inquit Augustinus tractatu 1. in Joannem) *nunc nescio quis infidelis Arianus, & dicat, quia Verbum Dei factum est. Quomodo potest fieri, ut Verbum Dei factum sit, quando Deus per Verbum fecit omnia? Si & Verbum Dei ipsum factum est, per quod aliud Verbum, factum est? Si hoc dicis, quia hoc est verbum Verbi, per quod factum est, illud ipsum dico ego unicum Filium Dei. Si autem non dicis verbum Verbi, concede non factum, per quod facta sunt omnia: non enim per se ipsum fieri potuit, per quod facta sunt omnia.*

Dices 1. ab illâ generali sententiâ: *Omnia per ipsum facta sunt*, Verbum excipi debere; & in hoc Joannem imitatum esse tritum loquendi morem; nempe ita loqui solemus, ut cum aliquid universè de aliquibus dicimus, nos ipsos & eos quibuscum loquimur, comprehendi nolumus. Sic cum Christus Marci 3. dicit, *Non surrexit inter natos mulierum major Ioanne Baptista*, se ipsum minimè comprehendi voluit, sicut nec Apostolos cum Matthæi 18. Centurionis fidem hisce verbis laudavit, *Non inveni tantam fidem in Israel.*

Verùm non cohæret illa responsio cum Evangelii textu. Nam 1. Joannes ante sententiam de quâ agitur, *Omnia per ipsum facta sunt*, jam dixerat, Verbum esse æternum, ac proinde negaverat esse factum, *In principio erat Verbum.* 2.

Post-

Postquam asseruit, *Omnia per ipsum esse facta*, conceptis terminis negat, aliquid sine ipso factum fuisse, *Et sine ipso factum est nihil*. Igitur assertio Arianorum contendentium aliquid, Verbum scilicet, sine Verbo factum fuisse, apertè contradictoria est assertioni Joannis, *Sine ipso factum est nihil*. 3. Joannes, quasi excludere voluisset Arianorum exceptionem, addidit, *Quod factum est*, seu, nihil ex iis quæ facta sunt, sine Verbo factum fuisse. Quæ tertio loco hîc proposita est ratio, locum habet in eorum opinione, qui cum aliquibus Patribus censent, Joannis sententiam, *Sine ipso factum est nihil*, claudi non debere puncto, nisi post hæc verba, *Quod factum est*, ita ut sic ex integro legi debeat: *Sine ipso factum est nihil quod factum est*. Vide Maldonatum Comment. in Joannem cap. 1.

Dices 2. Euangelium eo sensu asserere, omnia per Verbum facta esse, quòd fuerit veluti instrumentum, quo Pater usus est in Universi creatione: id verò confirmatur ex eo, quòd Euangelium non adhibuerit præpositionem *à*, sed præpositionem, *per*, quæ non causam principalem, sed instrumentalem tantum significat: at ex eo quòd Verbum fuerit veluti instrumentum, quo Pater usus est in Universi creatione, non rectè colligitur Verbum esse Deum. Ita veteres Ariani cavillantur apud Athanasium libro de communi essentia Patris & Filii & Spiritus Sancti, & apud Basilium libro de Spiritu Sancto cap. 2.

Sed nullius est ponderis ea responsio. Nimirum 1. discrimen illud inter præpositiones *à* & *per*, quo nitebantur Ariani, non est perpetuum in Scripturis: variis enim exemplis ostendi potest præpositionem *per* non minùs quàm præpositionem *à* conjungi cum causâ principe: id videre est in locis quæ hîc subijcimus. Genesios 4. *Possedi hominem per Deum*. Proverbiorum 8. *Per me reges regnant*. Primæ ad Corinth. 1. *Paulus vocatus Apostolus Iesu Christi per voluntatem Dei*. 2. Hoc  
in

in loco præpositionem per significare causam principem, non autem instrumentalem, docet Paulus in epist. ad Hebræos cap. i. ubi illud psalmi 101. *Initio tu Domine terram fundasti, & opera manuum tuarum sunt cali*, quod haud dubiè Psalmus Deo tribuit, de Christo dictum affirmat. 3. Ariani nullo Scripturæ aut Patrum testimonio probare possunt, Euangelium in loco, de quo agitur, sumere, *Omnia per ipsum facta sunt*, pro causa instrumentali: Non tantum igitur falsa est eorum interpretatio, sed etiam temeraria.

*Profertur argumentum desumptum ex primæ epistolæ Ioannis cap. 5.*

Prioris epistolæ Joannis capite quinto hæc leguntur: *Quoniam tres sunt qui testimonium dant in cælo: Pater, Verbum, & Spiritus Sanctus: & hi tres unum sunt*. Atqui eo Joannis textu demonstratur Verbi divinitas. Nam eo textu Verbi divinitas demonstratur, quo ipsa Patris natura Verbo tribuitur: Sed textu de quo agitur, ipsa natura Patris Verbo tribuitur: nimirum de Verbo prædicatur unitas cum Patre: *Hi tres unum sunt*.

Ea autem unitas non est unitas personæ, cum Pater, Verbum, & Spiritus, ibi tanquam tres testes laudentur, idque (sicut docet Scriptura) ut in ore duorum vel trium stet omne verbum.

Non est quoque sola unitas, consensûs: siquidem eadem est unitas, de qua Christus hæc habet, *Ego & Pater unum sumus*; unitatem verò de qua Christus laudatis verbis loquitur, non est (ut ostendemus in tractatu de Incarnatione, agentes de Christi divinitate) sola unitas consensûs, cum sit unitas, quæ Christus probat, neminem posse oves illi traditas à Patre, de manibus illius rapere. 2. Testimonium quod dant in cælo Pater, Verbum, & Spiritus Sanctus, Euangelista mox, seu, versu nono, vocat Dei ipsius testimonium,

nium, illudque opponit testimonio creaturarum: *Si* (inquit) *testimonium hominum accipimus, testimonium Dei majus est: quoniam hoc est testimonium Dei quod majus est, quoniam testificatus est de Filio suo: ergo unitas cum Patre, quæ de Verbo hîc prædicatur, est unitas naturæ.*

Dices 1. Versum, ex quo desumptum est argumentum, non esse indubitatæ fidei: nec enim in Græcis exemplaribus, imò nec in pluribus Latinis reperitur.

Verùm corruiat illa responsio ex iis, quæ superius de divinarum personarum reali distinctione agentes diximus.

Dices 2. Si voces istæ versûs septimi: *Hi tres unum sunt*, significant unitatem essentiae & naturæ, eandem quoque versu octavo significabunt, *Et tres sunt, qui testimonium dant in terra, spiritus, aqua, & sanguis: & hi tres unum sunt*: atqui voces illæ versu octavo non significant unitatem essentiae & naturæ, neque enim dici potest spiritum, aquam & sanguinem habere unam essentiam, eandem naturam.

Sed contra est 1. Nonnulli contendunt, voces versûs octavi: *Hi tres unum sunt*, additas fuisse ab Arianis, ut vim argumenti pro Verbi divinitate ex versu septimo desumptam elevarent. Confirmant ex eo, quòd Lovanienses correctores testentur, se quindecim codices Latinos legisse, in quibus non reperiabantur. 2. Alii affirmant quidem, adjecta non esse verba de quibus agitur, cum in omnibus Græcis codicibus (excepta tamen Complutensi editione) constanter legantur, sed contendunt, corruptè in Latinos codices irrepsisse: nam (ajunt) in Græcis omnibus leguntur cum appositione præpositionis; *In*, hoc modo; *Et hi tres in unum sunt*; idque factum est aut Scribarum oscitantia, aut Arianorum fraude. Unde ut Latini codices cum Græcis exemplaribus cohæreant, eadem ratione vulgatæ Latinæ editionis textus ita explicari debet, ac si præpositio *In*

ea contineretur: quamobrem dicendum est, hunc esse laudatæ sententiæ sensum, *Et hi tres unum sunt*, hoc est, ad unum de Christo testimonium referuntur, seu, (ut exponit Oecumenius) *Ad unam, eandemque rem*, humanitatis nimirum à Verbo assumptæ veritatem, *testandam consentiunt*.

Quæres, quâ de re & quando, Pater, Verbum, & Spiritus Sanctus testimonium in cœlo dederint.

Resp. ad 1. eos dedisse testimonium, seu testificatos fuisse, Christum id esse, quod de se ipso prædicaverat, Messiam nimirum in lege promissum, Deum verum ad hominum salutem incarnatum. Ratio est, quia verba versûs septimi, ab istis versûs sexti, immediatè præceduntur: *Et spiritus est qui testificatur, quoniam Christus est veritas*.

Resp. ad 2. Patrem æternum variis modis ac temporibus testatum fuisse, Christum esse suum Filium, ac mundi redemptorem. Nempè in illius tum baptismo tum transfiguratione vox Patris insonuit: *Hic est Filius meus dilectus in quo mihi complacui: Ipsum audite*. Joannis 12. cum Jesus sic orasset: *Pater clarifica nomen tuum*, statim audita est vox de cœlo: *Et clarificavi & iterum clarificabo*. Addendum est, Patrem toties Christo testimonium perhibuisse, quoties Christus edidit miracula, quibus divinam suam missionem confirmavit: *Amen, amen dico vobis* (ait ipse Christus Joannis 5. versu 19.) *Non potest Filius à se facere quidquam, nisi quod viderit Patrem facientem: quæcumque enim ille fecerit, hæc & Filius similiter facit*. Verbum, altera SS. Trinitatis persona, toties Christo testimonium reddidit, quoties Christus dixit se esse Dei Filium, idque miraculis confirmavit: *Nos* (ajunt Judæi apud Joannem cap. 19.) *legem habemus, & secundum legem nostram debet mori, quia Filium Dei se fecit*. Spiritus Sanctus sæpius quoque pro Christo testi-

monium reddidit; *Et Spiritus est qui testificatur quoniam Christus est veritas*: idque præsertim contigit, cum in specie columbæ super Jesum baptizatum descendit: Scilicet Joannes Baptista eo signo novit eum esse ad populi redemptionem divinitus missum: *Qui me misit baptizare in aqua* (inquit ipse Joannes Baptista, in Joannis Evangelio cap. 1. ) *ille mihi dixit: Super quem videris Spiritum Sanctum descendantem & manentem super eum, hic est qui baptizat in Spiritu Sancto. Et ego vidi & testimonium perhibui, quia hic est Filius Dei.*

Quæres 2. quid nomine spiritus, aquæ & sanguinis intelligi debeat, & quâ de re testimonium perhibuerint.

Resp. ad 1. nomine spiritus intelligi humanam, animam Christi: per sanguinem verò & aquam intelligi debere sanguinem & aquam, quæ ex Christi mortui latere fluxerunt. Ad 2. dicendum est, spiritum, sanguinem & aquam perhibuisse testimonium *in terra*, hoc est, testimonium quod minus quidem est divino, cujus versus septimus meminerat, sed tamen omninò certum, de veritate humanitatis in Christo: quemadmodum enim Ebion negabat divinitatem Christi, cui tota Trinitas versu septimo testimonium perhibuit, ita Basilides negabat humanitatis veritatem, cui versu octavo spiritus, sanguis & aqua testimonium perhibent / Utrumque illum hæreticum priore suâ epistolâ Joannes aggreditur: unde tum pro Christi divinitate, tum pro illius humanitate plures in eâ textus reperiuntur.

*Profertur argumentum desumptum ex Matthæi capite 28.*

Hujusce dissertationis quæstione 1. personarum in divinis distinctionem probavimus his Christi verbis, quæ Matthæi cap. 28. leguntur: *Euntes ergo docete omnes gentes, baptizantes eos in nomine Patris & Filii & Spiritus Sancti.* Verùm ea verba non minùs apertè probant & Filii & Spiritus

ritus Sancti divinitatem. Siquidem 1. Apostoli jubentur baptizare non minùs in Filii & Spiritus Sancti nomine, quàm in nomine Patris: æquales igitur potentia, auctoritas & efficacia baptismatis respectu, Patri, Filio, & Spiritui Sancto tribuuntur. 2. Si Filius & Spiritus Sanctus essent creaturæ, Christiani baptizarentur in nomine alicujus creaturæ, quod tamen negat Paulus primæ ad Corinth. 1. Ex his patet, Athanasium oratione contra Sabellii Gregales, Hilarium agendo de Trinitate, Fulgentium libro contra objectiones Arianorum, cæterosque veteres Patres meritò usos fuisse laudato Matthæi loco, ut Arianos debellarent.

*Solvuntur Scripturæ loca quæ contra Verbis divinitatem pugnare videntur.*

Objicies 1. Scriptura docet, Christum non esse Deum, sed meram creaturam: ergo docet quoque, Verbum non esse Deum, sed creaturam.

Resp. 1. neg. ant. Quæ enim adversùs Christi divinitatem argumenta proferuntur, nullius omninò sunt ponderis, ut in tractatu de Incarnatione contra Nestorianos ostendemus.

Resp. 2. hìc non esse quæstionem de Christi divinitate, sed de divinitate Verbi, ut jam superius observatum est: unde hæc, seu Verbi divinitas, reverà stare,t, quamvis (quod tamen dictu impium est, quodque suo loco fusè probaturi sumus, Scripturæ & traditioni repugnare) Christus verè non esset Deus: unde in forma negari debet argumenti conseq.

Objicies 2. Ille non est Deus, qui à Deo creatus est: atqui Verbum, creatum est à Deo: nempe Verbum, idem est cum Sapientia, sed Sapientia fuit à Deo creata: *Ab initio* (ait ipsamet Ecclesiastici cap. 24.) *& ante secula creata sum*: ergo, &c.

Resp. ad 1. neg. min. Ad 2. dist. min. Sapientia creata fuit creatione improprie dicta, conc.  
min,



min. Creatione propriè dicta, neg. min. Creatio impropriè dicta, idem est cum simplici productione ac generatione; creatio verò propriè dicta, esteductio ex nihilo. Illa, non autem ista, Dei Sapientiæ convenit: Scilicet Sapientiæ ea creationis species convenit, quæ cum æternitate conjuncta sit: *Ab aeterno* (inquit ipsa) *ordinata sum*: at creatio propriè dicta cum æternitate conjuncta non est. Præterea dici potest, laudatum ex Ecclesiastico locum intelligi de Sapientiæ incarnatâ, seu de Christo, prout est homo: *Caro Dominum agnoscit* (inquit Ambrosius lib. 1. de Fide cap. 7.) *divinitas Patrem*. Dominus ergo *creavit me*, id est, fecit & condidit me, ratione humanitatis; *initium viarum suarum*, quia ipse Christus nobis via est factus, ut eo duce nobis ad virtutem perfectam & immortalitatem aditus pateret. Eandem responsionem tradit Fulgentius libro adversus objectiones Arianorum: Eam pariter tradit Augustinus lib. x. de Trinitate cap. 12.

Objicies 2. Ille, quo, tanquam instrumento, Deus usus est ad rerum omnium productionem, non est Deus: nempe instrumentum est quid inferius eo, qui instrumento utitur: atqui Verbum fuit instrumentum, quo Deus usus est ad rerum omnium productionem: id enim probare videntur hæc verba Joannis 1. *Omnia per ipsum facta sunt*, nec non hæc alia, quæ leguntur ad Hebr. 1. *Per quem fecit & secula*: ergo, &c.

Resp. 1. ad 1. conc. maj. neg. min. Ad 2. nego præpositionem, *Per*, eo loci significare causam instrumentalem. Ratio est 1. quia antequam Joannes diceret, *Omnia per ipsum facta sunt*, jam dixerat, Verbum esse æternum, ipsum esse Deum, sine ipso nihil omnino factum fuisse: vide quæ superius in eum locum dicta sunt. 2. Apostolus capite 1. Epistolæ ad Hebræos, Verbo tribuit dotes, quæ soli Deo conveniunt: nempe tribuit ei jugem orbis conservationem, *Portans-*

*que omnia verbo virtutis suæ:* ita ut, quemadmodum si Pater manum suam subtraheret, statim mundus in nihilum lapsurus esset; ita etiam idem accideret, Verbo manum suam, cum ei totus orbis innitatur, subtrahente. Sed de hoc loco vide, quæ in tractatu de Incarnatione dicemus agentes de Christi divinitate.

Resp. 2. distinguendo Joannis & Apostoli textus: *Omnia per ipsum facta sunt: Per quem fecit & sæcula*, tanquam per causam exemplarem, concant. tanquam per causam instrumentalem, negant. Verbum fuit causa exemplaris, ad quam Deus Pater exegit universi creationem; scilicet Pater per Verbum operatur tanquam per ideam, in quâ omnium agendorum rationes continentur. Ita locus ille exponitur ab Augustino, pluribusque Patribus. Vide quæ tom. 1. de Dei ideis dicta sunt.

## ARTICULUS II.

*Quid de Verbi divinitate senserint Patres trium priorum sæculorum.*

Not. 1. **N**onnulli è Socinianis fatentur quidem, trium priorum sæculorum Patres agnovisse Verbi divinitatem, sed contendunt, eos illo in capite novatores fuisse, seu ipsos statim post Apostolorum mortem immutasse fidem, quam iidem Apostoli docuerant. Alii è contra contendunt, Patres sæculorum, de quibus agitur, constanter ad Nicænum usque Concilium docuisse, Verbum non esse Deum.

Not. 2. Methodi causâ hîc expendemus 1. quid de controversiâ, de quâ est quæstio, senserint Patres Orientales, qui ante Concilium Nicænum I. vixerunt: 2. Quænam pariter fuerit mens Occidentalium, qui idem Concilium præcellerunt.

## §. I.

*Proponitur Patrum Orientalium doctrina.*

CONCLUSIO. Patres Græci, qui floruerunt ante Concilium Nicænum I. docuerunt Verbum verè esse Deum.

Probatur. Præcipui Patres Græci, qui ante Concilium Nicænum I. floruerunt, sunt Ignatius martyr, Polycarpus, Justinus martyr, Athenagoras, Irenæus, Clemens Alexandrinus, Origenes, Dionysius Alexandrinus, Gregorius Thaumaturgus, Episcopi Concilii Antiocheni qui Paulum Samosatensem damnarunt, Pamphilus martyr, Lucianus & Methodius martyres: Atqui ii Patres docuerunt, Verbum verè esse Deum; ergo &c. Minor propositio patebit ex eorum Patrum textibus, quos modò subjiciemus.

*Ignatius martyr.*

Ignatius martyr plurimo tempore vixit priore Ecclesiæ sæculo, nempe diem extremam clausit anno 108. Is in Epistolâ ad Ephesios sic de Christo loquitur: *Vnus est medicus carnalis & spiritalis, factus & non factus, in carne Deus, in morte vita vera, & ex Maria & ex Deo.* Unde sic arguitur. Ille docuit, Verbum esse Deum, qui ipsum conceptis terminis vocat Deum; qui asserit, ipsum non esse factum: atqui Ignatius Verbum conceptis terminis vocat Deum, asserit, ipsum non esse factum: nam id prædicat de Christo; Christo autem non convenit, nisi ratione Verbi: ergo, &c. Alios ejusdem Ignatii textus vide in tractatu de Incarnatione iis locis, ubi expressè Christi divinitatem adstruimus.

*Polycarpus.*

Polycarpus, Joannis Apostoli discipulus, Eusebio teste hist. lib. 4. cap. 5. jamjam martyrium

rium subiturus, sic precatus est: *Quamobrem de omnibus te laudo, te benedico, te glorifico per sempiternum Pontificem Iesum Christum, dilectum Filium tuum, per quem tibi, una cum ipso, in Spiritu Sancto, gloriamur & in secula seculorum. Amen.* Polycarpus iis verbis 1. vocat Christum sempiternum pontificem: at nullum ens, præter Deum, est sempiternum. 2. Filium unà cum Patre glorificat, seu æqualem ipsi gloriam tribuit: at ei tantum æqualis cum Patre gloria tribui potest, qui simul cum Patre Deus est. In Epistolâ ad Philippenses idem S. Martyr non minus Dei Filio, quàm Patri adscribit salutis, & gratiæ collationem: *Deus autem & Pater Domini nostri Iesu Christi, & ipse sempiternus Pontifex Dei Filius, Iesus Christus, sanctificet vos in fide & veritate .... & det vobis sortem & partem inter sanctos suos.*

Dices. Polycarpus in suâ precatatione 1. solum Patrem dicit Deum: 2. ipsum Filium vocat sacerdotem: Sed hæc Filii divinitati repugnant.

Verum hæc nullius sunt ponderis. Nam 1. ideò solus Pater à veteribus, aliquo respectu, Deus dicitur, quòd (ut docet Athanasius) fons sit Deitatis. Concilium Nicænum I. eadem loquendi ratione utitur: *Credimus (inquit in symbolo) in unum Deum Patrem omnipotentem, omnium tam visibilium, quàm invisibilium creatorem*: At nemo, qui sapiat, inde concludet, Concilium Nicænum I. credidisse, Verbum non esse verè Deum: 2. Polycarpus non unam solam naturam, sed duplicem agnovit in Christo: igitur dici potuit Sacerdos ratione humanæ naturæ, & sempiternus ratione divinæ.

#### *Justinus Martyr.*

Justinus, qui obiit anno 171. in Apologiam quæ secunda dicitur, eos arguit, qui negant, Filium esse Deum. Suum autem adversus illos argumentum

tum petit ex eo, quod sit Filius primogenitus, & Dei Verbum: *Filium* (inquit) esse Patri universo- rum, qui quod Verbum Dei primogenitum sit, Deus etiam existit.

Idem author in Dialogo cum Tryphone aper- tē docet, Filium esse quidem numero, seu perso- nā, distinctum à Patre, sed non esse distinctum naturā & essentiā: *Virtutem istam* (ait) quam Deum sermo propheticus vocat, non ut solis lumen no- mine tantum numerari, verum numero aliud quid- dam esse, ratione exquisita supra paucis explicavi: virtutem hanc dicens de Patre genitam virtute & consilio ipsius, non per abscissionem, tanquam dis- pertita esset Patris essentia, prout alia omnia divi- sa & secta, non eadem sunt, quæ ante fuerunt, quàm scinderentur. Id Justinus confirmat simili- tudine ab igne petita: *Quemadmodum in igne vi- demus alium fieri, non decrescere illo, unde facta est alterius accensio, sed in eodem statu permanen- te, & qui ex ipso accenditur, etiam ipse esse appa- ret, non imminuens illum, unde est accensus.* Ea Ju- stini ratiocinatio sic ad hillogismum reducitur: Virtus de Patre genita non per abscissionem, ac dispartitionem essentia Patris, est ejusdem essen- tia cum Patre: nam virtus sic genita integram habet naturam generantis. Virtus de Patre geni- ta tanquam ignis de alio igne, ejusdem est essen- tia cum Patre: nimirum ignis de alio igne geni- tus, habet ignis naturam. Atqui, ex Justino, Verbum est virtus de Patre genita non per abscis- sionem ac dispartitionem essentia; est virtus de Patre genita tanquam ignis de alio igne: ergo Verbum, ex eodem Justino, est ejusdem essen- tia, ejusdem naturæ cum Patre; ac proinde non minùs est Deus, quàm ipse Pater, sicut ignis ge- nitus de alio igne, non minùs est ignis, quàm ille de quo genitus est.

Idem scriptor in oratione paræneticā ad Græ- cos, quàm Justinus germanum esse fœtum docti omnes hodie consentiunt, licet non reperiatur in

additione operum Justini, quam Stephanus Robertus anno 1551. adornavit, sic loquitur: *Ipse omnipotens, & omnium conditor, & invisibilis Deus, è cælis Veritatem, & Verbum sanctum, & incomprehensibile inter homines locavit, non quemadmodum aliquis conjicere possit, misso hominibus ministro aliquo, sed ipso opifice & creatore omnium. .... tanquam Rex mittens Filium Regem misit tanquam Deum, tanquam ad homines, misit, tanquam servans misit: Unde sic in formâ conficitur argumentum: Is verè Deus est, qui non est Patris minister, sed opifex ac creator omnium; qui non minùs est Rex, quàm Pater: atqui Verbum, ex Justino, non est Patris minister, sed opifex ac creator omnium; Rex est à Rege missus: ergo Verbum est verè ac propriè Deus.*

Tandem idem author Apologiâ secundâ hæc habet de tribus personis SS. Trinitatis: *Fatemur quidem (quod Christianis exprobrabant Ethnici) nos talium, qui habentur, Deorum esse expertes, & atheos: sed non verissimi illius Dei, Patris videlicet justitiæ, & castitatis, & virtutum aliarum .... Verùm hunc ipsum, & qui ab eo venit, Filium & Spiritum Sanctum colimus, & adoramus cum ratione & veritate venerantes.* Ex iis autem verbis sic licet argumentari: Is cui eundem exhibemus cultum, quem æterno Patri exhibemus, verè ac propriè Deus est: Atqui, ex Justino, Filio eundem, quem æterno Patri, cultum exhibemus, nimirum cultum latriæ: nec enim Justinus quidquam distinguit inter cultum, quem Christiani exhibent Deo Patri, & inter eum quem exhibent Filio: ergo Dei Filius, seu Verbum, est verè ac propriè Deus.

Objicies. In Justino Martyre plura sunt, quæ videntur pugnare contra Verbi divinitatem. Scribit enim 1. in Apologiâ secundâ, Christianos Filium Dei *in secundo loco habentes cum ratione venerari*. 2. Ibidem asserit, quòd Filius sit prima  
pote-

*potestas post parentem, & Dominum universorum Deum.* 3. In Dialogo cum Tryphone Filium nuncupat Deum, qui *administer est Dei universorum creatoris*. 4. In eodem Dialogo docet, Deum ipsum nec Moyfi nec Patriarchis quondam apparuisse, licet Filius eis videndum se præbuerit, eò quod ( inquit ) Deus *neque superiora cælo spatia relinquere possit, nec in exigua terre parte conspici*. 5. Ibidem scribit, Patrem esse Filio *causam ut sit*. Ex iis autem textibus sic contra Verbi divinitatem conficitur argumentum: Ille non credidit Verbum esse verè ac propriè Deum, qui asseruit ipsum secundo tantum loco, hoc est, post Patrem, coli; ipsum secundam esse post Patrem potestatem; ipsum esse administrum Dei creatoris: ipsum visum fuisse Moyfi ac Patriarchis; ipsum esse à Patre tanquam à causâ: Nempè qui Deus est æquali cum Patre cultu colitur; prima est, sicut & Pater, potestas; non est Patris administrum; non minùs, quàm ipse Pater, est invisibilis, nec minùs quàm ipse Pater, potest superiora cælo spatia relinquere; non est à Patre tanquam à causâ: Atqui Justinus asseruit, Verbum secundo tantum loco coli; ipsum non primam, sed secundam tantum esse potestatem; administrum esse Patris, invisibile non esse; esse à Patre tanquam à causâ: Ergo Justinus non credidit, Verbum esse verè ac propriè Deum.

Resp. neg. ant. Ad cujus priorem, & alteram probationem dist. ant. Justinus scribit, fideles Filium venerari secundo loco; ipsum esse post Patrem potestatem primam, ratione originis, conc. ant. ratione dignitatis, neg. ant. Ratio est, quia Justinus laudatis locis sibi probandum sumit, id quod tunc negabant nonnulli hæretici, quibus postea Sabelliani adhæserunt, plures esse personas in divinis, non autem unam tantum multiplici virtute præditam, multiplici nomine donatam; nempè ipse in Dialogo cum Tryphone pag. 358. asserit, eos hæreticos docuisse, *Virtutem à Patre*

*rerum omnium provenientem, quæ Moysi apparuit, aut Iacobo, aut Abraha, Angelum vocari, cum ad homines, quibus mandata Patris per ipsum denuntiatur, progreditur; gloriam verò, cum in visione incomprehensibili aliquando exhibetur; virum autem & hominem nominari, quandoquidem ea specie, quam Pater velit, conspicitur; & propterea Verbum appellari, quòd Patris sermones ad mortales perferat; Virtutem autem, cum à Patre nullo pacto disjungi, & secerni possit, eo videlicet modo, sicut solis lux in terris ab eo in cælis rescindi & segregari nequit, atque illo occidente illa una auferatur: tali nimirum modo Patrem, cum vult, efficere ut virtus ejus profiliat, & cum vult, ut eandem ad se ipsum retrahat. Mirum igitur non est, quòd Justinus scribat, Verbum secundo post Patrem loco coli, primam esse ab ipso potestatem: non enim est prima persona, cum ab aliâ, Patris nimirum personâ, suam ducat originem.*

Ad tertiam ejusdem antecedentis probationem, dist. ant. Justinus Filium nuncupat improprie ministrum creatoris, conc. ant. proprie, neg. ant. Is tantum proprie nuncupatur minister, qui nec per se, nec proprio nomine agit; è contrà verò improprie is dicitur minister, qui non agit, nisi ratione esse, quod habet ab alio. Filius non est creatoris minister sumendo ministrum priore modo: siquidem licet acceperit esse à Patre, illud tamen esse est ipsi proprium; ipse reverà cum Patre operatus est, respectu creationis universi: sed est minister sumendo ministrum posteriore modo: Scilicet esse, ratione cujus agit, accepit à Patre tanquam à sui fonte, ac origine, proindeque Pater per Filium agit, ac operatur, per esse quod illi communicavit, ac communicat semper, mundum visibilem cunctasque creaturas eduxit olim ex nihilo, & jam temporis jugiter conservat, juxta illud Joannis 1. *Omnia per ipsum facta sunt.*

Ad



Ad quartam probationem, dist. ant. Justinus scribit, Deum Patrem nec Moyſi nec Patriarchis apparuisse, conc. ant. Deum Filium, neg. ant. Ratio est, quia Deus Pater nusquam speciem humanam gessit, è contra verò, secundum Justinum ac plurimorum veterum sententiam, Filius, etiam antequam Christus nasceretur ex Virgine, sub humanâ specie, cui tamen non esset unitus hypostaticè, hominibus apparuit, ac reverà cum Moyſe, Abrahamo, Isaaco, Jacobo, cæterisque Patriarchis collocutus est: idque (dicebant illi veteres) ut homines ad Incarnationis fidem, in tempore peragendam, sensim ac sine sensu disponentur. Itaque, ex Justino, Filius in se sumptus non minùs est invisibilis, quàm Pater; sed sumptus sub humanâ specie, visibilis fuit, reliquit, quoad illum effectum, superiora cælo spatia, conspectus est (ut Justinum verbis utamur) in exiguâ terræ parte.

Ad quintam probationem, distingo pariter antecedens. Justinus scribit, Patrem esse Filio causam cur sit; & nomine causæ intelligit causam latè sumptam, conc. ant. intelligit causam strictè sumptam, neg. ant. Causa latè sumpta est, id omne à quo aliquis accipit suum esse, abstrahendo à modo quo illud recipit, dependenter nimirum aut independenter. Causa strictè sumpta est, id à quo aliquis accipit suum esse non simpliciter, sed cum dependentiâ. Illo, non autem isto modo, Justinus causam sumpsit, hoc est, nihil aliud adstruere voluit, quàm istud, nempe Patrem esse principium Filii, Filium à Patre procedere; ac proindè esse personam à Patre distinctam, quod (ut jam observatum est) negabant illi quos in Dialogo cum Tryphone Justinus obiter urgebat.

Confirmatur responsio 1. ex eo, quòd Justinus Filium conceptis terminis nuncupet Deum, asseratque, illi cum Patre naturam esse communem. Vide loca, quæ ex illo scriptore superius laudata sunt.

sunt. Confirmatur 2. ex eo, quòd plures ex Patribus, qui post Nicænam I. Synodum floruerunt, quibusque persuasum fuit, Filium verè ac propriè esse Deum, ut Filii originem exponerent, aliquoties dixerint, Patrem esse causam Filii: ita Basiliius lib. 1. contra Eunomium tom. 1. pag. 72. ita Gregorius Nazianzenus oratione 29. ita etiam Joannes Damascenus lib. 3. de Fide Orthodoxâ cap. 5. Hincque patet, non ex illâ solâ voce, *Causa*, judicandum esse, quid Patres de Verbo senserint, seu, an crediderint aut non crediderint, illum non minùs esse verè ac propriè Deum, quàm ipse Pater.

*Athenagoras.*

Athenagoras, philosophus Atheniensis, ferè fuit æqualis Justinì: nempè pro Christianis Scripsit apologiam ad M. Aurelium Antoninum, & L. Aurelium Commodum Imperatores. Apud ethnicos Christiani pro atheis audiebant: eos verò sic ab eâ calumniâ liberat in suâ apologiâ: Docet nimirum 1. Christianos unum Deum colere. *Ingenitum* (inquit) & *æternum*, nec *aspectabilem*, *paciendæ expertem*, qui neque *comprehendi*, neque *capi loco possit*. Docet 2. Deum illum habere Filium, qui sit Verbum Patris in ideâ & operatione. *Ab ipso enim & per ipsum omnia facta sunt*. Rationem reddit, cur per ipsum omnia facta sunt: *Cum* (inquit) *sit unum Pater & Filius*, & *sit in Patre Filius & Pater in Filio unitate & virtute Spiritus*. *Mens & Verbum Dei Filius est*.

Athenagoras iis verbis, 1. apertè distinguit personam Filii à personâ Patris: neque enim idem potest esse, respectu sui ipsius, Filius & Pater: 2. asserit, Filium eandem habere cum Patre naturam: *Cum sit unum Pater, & Filius*. 3. scribit, omnia non tantùm per Filium, sed etiam à Filio, seu tanquam à causâ efficiente, facta fuisse: *Ab ipso enim & per ipsum omnia facta sunt*: 4. Ex eo, quòd Filius sit unum cum Patre, colligit

git Trinitatis proprietatem, quam theologi circumcessionem vocant, per quam scilicet una persona est in aliâ: *Et sit in Patre Filius & Pater in Filio.*

Idem scriptor Filium non minùs apertè, quàm Patrem, nuncupat Deum: *Quis igitur ( addit ) non miretur, cum audiat, nos qui Deum Patrem prædicamus, & Deum Filium, & Spiritum Sanctum, eorum in unitate virtutem, & in ordine distinctionem explicantes, Atheos vocari?* Eodem in libro idem repetit distinctè, exponens, quid Christiani de Trinitate credant: Deum ( ait ) asserimus & Filium ipsius Verbum, & Spiritum Sanctum virtute unitos. Conceptis terminis ibidem docet, Verbum seu Dei Filium, licèt minimè factum, verè tamen à Patre prodiisse: *Quod si qui intellectus subtilitate excellitis, altius repetendum videtur, quidnam sibi velit hic Dei Filius, paucis dicam: primogeniam illum esse Patris primogeniem, non quasi factum quiddam sit.* Ex iis autem omnibus locis sic conficitur argumentum: Ille credidit, Verbum esse verè ac propriè Deum, qui credidit, ipsum eandem cum Patre naturam habere, ab ipso ac per ipsum omnia ac singula facta fuisse, ipsum esse in Patre & Patrem in ipso, ipsum rectè vocari Deum, ipsum non esse factum, sed ab æterno fuisse in Deo Patre, ipsum à Christianis eodem cultu coli quo Pater: Atqui ea omnia ( ut mox dictum est ) Athenagoras credidit: Ergo credidit, Verbum esse verè ac propriè Dei Filium.

Objicies. Athenagoras asseruit, Verbum in tempore à Patre prodiisse, cum nempè mundus eductus est ex nihilo; *Sed ita ( inquit in suâ apologiâ ) ut cum materia concreta omnia, informis-que natura, atque terra instar vehiculi subjicerentur, in iisque crassioribus leviora admixta essent, ad hoc ut idea & ætius illorum esset, prodierit:* ergo Athenagoras credidit, Verbum non esse Deum.

Resp. dist. ant. Athenagoras asseruit, Verbum in tempore prodiisse exteriùs, conc. ant. prodiisse interiùs, neg. ant. Verbum in tempore quidem exteriùs prodiit, quia ab ipso & per ipsum visibile hoc universum conditum est; sed non prodiit interiùs in tempore, eò quòd ( ut ipse Athenagoras notat ) factum non sit, quòd ab ipso è contra facta sint omnia, quòd tandem ab æterno in Patre fuerit: *A principio enim Deus* (ait laudatus apologista) *qui est æterna mens, habuit in se ipso λόγον, cum æternum sit λογικός.*

*Irenæus.*

Irenæus Polycarpum Joannis Apostoli discipulum audiit, obiit anno 210. libro 3. adversus hæreses cap. 6. scribit, neque Dominum, neque Spiritum Sanctum, neque Apostolos, eum qui non esset Deus, definitivè & absolutè Deum nominasse aliquando, nisi esset verus Deus: neque Dominum appellasse aliquem ex sua persona, nisi qui dominatur omnium, Deum Patrem & Filium. Unde sic arguitur: Ex Irenæo, qui definitivè & absolutè Deus in Scripturis nominatur, est verè ac propriè Deus: atqui Verbum, seu Filius, ex eodem Irenæo, in Scripturis definitivè & absolutè nominatur Deus: ergo, &c.

Idem S. Martyr lib. 4. cap. 11. docet, vivum ac verum Deum quondam Moyfi apparuisse in rubo: *Quoniam* ( inquit ) *is qui de rubo locutus est Moyfi, & manifestavit se esse Deum Patrum, hic est viventium Deus. Quis enim est vivorum Deus, nisi qui est super omnia Deus, & super quem alius non est Deus?* Addit S. Doctor, eum qui Moyfi locutus est in rubo, fuisse Verbum ipsum, seu Dei Filium: *Qui igitur à prophetis adorabatur Deus vivus, hic est vivorum Deus & Verbum ejus, qui & locutus est Moyfi....* Quod de Verbo asseruit, mox de Christo asserit: *Ipse igitur Christus cum Patre, vivorum est Deus, qui & locutus est Moyfi, qui & Patribus manifestatus est.*

*Idem*

Idem S. Doctor infinitatem ac immensitatem eandem Filio, quam Patri, tribuit: *Et bene* ( ait lib. 4. cap. 8. ) *qui dixit ipsum Patrem in Filio mensuratum . Mensura enim Patris Filius, quoniam & capit eum .* Lib. 2. c. 42. eidem Verbo aperte tribuit æternitatem, & æqualem cum Patre coexistentiam, quam ibidem cuilibet entī creato denegat, utiturque illo argumento, ut probet, Verbo nihil esse absconditum, cum ē contra creaturis plura sint ignota: *Non enim ineffectus es, ò homo, neque semper coexistebas Deo, sicut proprium ejus Verbum .*

Ex iis autem Irenæi textibus sic licet argumentari. Ille docuit, Verbum esse verè ac propriè Deum, qui asseruit, Scripturas ipsum absolutè ac definitivè vocare Deum; qui scripsit, ipsum per se locutum fuisse Moyfi in rubo; qui dixit, Christum esse cum Patre vivorum Deum; qui Verbo tribuit immensitatem, infinitatem, æternitatem Patris: Atqui Irenæus hæc omnia dixit, & docuit: ergo, &c.

Objicies. Apud Irenæum multa sunt quæ non cohærent cum Verbi divinitate. Nam 1. lib. 3. cap. 8. scribit, Deum Patrem præcepisse Filio, ut mundum conderet: *Cui ergo præcepit?* ( inquit in hæc Psalmi verba: *Quoniam ipse præcepit & creata sunt* ) *Verbo scilicet, per quod cæli firmati sunt .* 2. lib. 4. cap. 17. asserit, Filium esse ministrum Patris, indeque colligit Patri angelorum ministerio opus non fuisse ad mundi creationem, ut volebant ii, quos ibidem Irenæus impugnat: *Ministrat enim ei ad omnia* ( inquit ) *sua progenies & figuratio sua .* 3. Verbo, ut Verbum est, ignorantiam extremæ mundi diei tribuit lib. 2. cap. 49. ubi hæc habet: *Etenim si quis exquirat causam, propter quam Pater in omnibus communicans Filio, solus scire & horam & diem à Domino manifestatus est .* 4. Docet, Patrem esse majorem Filio etiam quā Verbum est, additque propter id, seu, quòd Pater sit major Filio, illum, non autem

autem istum, scire extremi iudicii diem: *Neque* (inquit) *optabilem magis rationem, quam hanc, inveniat in præsenti, quoniam cum solus verax magister sit Dominus, ut discamus per ipsum, super omnia esse Patrem. Etenim Pater (ait) major me est.*

Ex iis autem locis sic arguitur. Ille non credit Verbum esse verè ac propriè Deum, qui docuit Patrem imperasse Verbo; scilicet imperium supponit in imperante superioritatem, respectu ejus cui fit imperium; qui docuit Verbum fuisse in creatione mundi Patris ministrum: ministratio enim larguit subjectionem, respectu ejus cui exhibetur ministerium; qui docuit Verbum nesciisse diem extremi iudicii, ipsum esse minus Patre: Atqui Irenæus ea omnia docuit: ergo non credidit Verbum esse verè ac propriè Deum.

Resp. neg. ant. Ad cujus priorem probationem dist. ant. Præcepit impropriè, conc. ant. propriè neg. ant. Imperium de quo loquitur Irenæus, non est imperium Domini ad servum; siquidem Irenæus conceptis terminis ibidem eximit Verbum ex eorum numero, quæ constituta, facta, & subiecta sunt; sed est imperium Patris ad Filium, ejusdem cum ipso naturæ: hoc est, Pater voluit mundum fieri per Verbum suum, concurrente ipsius Verbi voluntate. Confirmatur responsio ex eo quòd plures ex Patribus, qui post Synodum Nicænam vixerunt, eadem loquendi ratione nonnunquam usi sint. Vide Basilium lib. de Spiritu Sancto cap. 16. Cyrillum in libro 29. Thesauri, Athanasium orat. contra gentes tom. I. pag. 51.

Ad alteram ejusdem antecedentis probationem, dist. ant. Irenæus Verbum vocat Patris ministrum, connaturalem & internum, conc. ant. Irenæus eo loci arguit hæreticos, qui contendebant, Patri ad rerum creationem opus fuisse angelorum ministerio: eos autem sic confutat: Pater non indiguit ministerio alicujus potestatis inferioris & intrinsecæ, satis nimirum ei fuit ministerium

rium Verbi; quod ejusdem est cum ipso essentiae & naturae; unde illud ministerium (ut jam superius observatum fuit) est ministerium improprie dictum.

Ad tertiam probationem dicendum est, Irenaeum loqui de Filio, non prout est Patris Verbum, sed prout est homo: de eo enim Filio loquitur, qui nos exterius docuit: *Vt* (inquit) *discamus per ipsum*: de illo loquitur quem opponit Spiritui Salvatoris, de quo hæc ibidem habet: *Est enim Spiritus Salvatoris, qui in eo est, scrutatur omnia, & altitudines Dei &c.* At is qui Spiritui Salvatoris opponitur, non aliud est quam humanitas, cui Verbum sese hypostaticè conjunxit.

*Clemens Alexandrinus.*

Clemens Alexandrinus, discipulus Pantæni qui magistros audiit eos, qui Apostolos viderant apertè favet Verbi divinitati.

Et sanè non minùs Verbo quàm Patri omnia subijcit: *Vnus quidem est universorum Pater, (inquit initio Admonitionis ad gentes) unum est etiam Verbum universorum, & Spiritus Sanctus unus, qui & ipse est ubique.* Eodem in libro cap. 8. omnia Dei Patris attributa absoluta Verbo tribuit: idque oriri asserit ex eo, quòd Deus sit sicut Pater: *Nihil (inquit) odio habet Deus: sed neque Verbum, utrumque enim unum est, nempe Deus.*

Idem scriptor Pædagog. lib.3. cap.7. probat Deum Filium nullâ re indigere, quòd Verbum habeat Deum omnipotentem: *Est enim (ait) minime indigens qui Verbum habet Deum omnipotentem, & nullo eorum, quibus opus habet, unquam eget. Verbum enim possessio est, cui nihil deest & est causa omnis copiae.* Plurima alia loca ex eodem Clemente referemus, cum in tractatu de Incarnatione disseremus de divinitate Christi: scilicet apertè proficitur, multisque argumentis Christi divinitatem probat.

Obji-

Objicies 1. Clemens Stromatum lib. 7. scribit, *naturam Filii esse soli omnipotenti conjunctissimam*. Asserit eodem in libro, *Filium omnipotentis Patris voluntati servire*. Stromatum 5. dicit, *Filium Dei primò creatam sapientiam*. Unde sic pro Arianis licet argumentari. Ille non credidit Verbum esse verè & propriè Deum, qui asseruit, Verbi naturam esse Patri conjunctissimam; quæ enim conjuncta sunt, non sunt unum sed duo; qui scripsit, Verbum servire Patri; nempè non servit nisi inferior superiori; qui dixit, Verbum esse primò creatam sapientiam: siquidem ens creatum non potest esse Deus: Atqui ( ut ex dictis patet ) Clemens Alexandrinus ea omnia asseruit, scripsit, & docuit: ergo, &c.

Resp. ad 1. Vocem *naturam* ibi à Clemente sumi pro personâ; alioquin sibi ipsi contradiceret: idque mirum non est, cum vocem *ὁ λόγος*, sive *natura*, eo in sensu nonnunquam ab iis etiam sumpta sit, qui post Concilium Nicænum I. apertissimè Arianismum impugnarunt, ut videre est in Epistolâ Gregorii Nysseni ad Ablavium. Ad 2. dicendum est, Clementem loqui de Filio ut homo est: nempè de eo loquitur, quatenus est Salvator hominum, & eorum salutem promovet: sic autem servit voluntati Patris, qui vult hominis salutem. Ad 3. dicendum est, vocem *creatam* sumi pro *genitam*, ita ut sensus sit, Filii personam esse primò genitam ac productam: nimirum persona Filii est prior origine personâ Spiritus sancti. Ea solutio evidenter colligitur ex perfectionibus, quas Clemens ( ut mox observatum est ) Verbo tribuit.

*Origenes.*

Origenes Clementem Alexandrinum magistrum audit. Quid de Verbi divinitate senserit, eruemus ex libris, quos contra Celsum philosophum jam senior exaravit: ii nimirum libri nec corrupti fuerunt ab ejus invidis, nec obscurantia scri-



scribarum interpolati; nec dubium est, quin ab ipso reverà conscripti fuerint: è contra plura ex aliis illius operibus, aut hæreticorum fraude, aut invidorum iniquitate, aut librariorum incuriâ, aut interpretum imperitiâ, ita corrupti sunt, ut vix ex illis dijudicari possit, quid de pluribus magni momenti capitibus senserit.

Lib. 3. contra Celsum, asserit, Jesum esse Deum, quòd sit ipsummet Dei Verbum: *Sciatis isti criminatores* (inquit respondens Celso arguenti Christianos, quòd pro Deo venerarentur eum, qui cum mortali corpore visus fuerat) *hunc Iesum quem ab initio Deum, Deique Filium esse credimus, ipsum esse Verbum, ipsam veritatem, ipsam sapientiam.* Libro 4. eidem Celso contendenti, Christianos Deum mutabilem colere, respondet, id calumniosè Christianis imponi, quia Verbum, quod ad homines descendit, (inquit) *in forma Dei subsistit.* Discat (Celsus) *Verbum manere Verbum sua substantia, nec pati eorum quidquam, quæ corpus & anima patitur.* Ibidem contendit colligi non posse, Deum quem Christiani colunt, quidquam passum fuisse, ex eo, quòd Christus reverà passus sit: nam (inquit) *responderi potest, distinguendo divini Verbi naturam, quæ Deus est, & Iesu animam.*

Idem author libro 5. contra eundem Celsum, scribit, Christianos non adorare creaturas, sed Deum ejusque Filium, qui simul cum eo Deus est: Sed (ait) quòd agnoscamus Dei & Filii ejus unigeniti inenarrabili præstantia præcellentem divinitatem, quæ cetera omnia longè post se relinquit. Libro 6. divinam ac increatam Filii Dei naturam apertis hisce verbis profitetur: *Neque enim eum qui factus non est, & naturæ omnis factæ est primogenitus, quisquam pro dignitate potest nosse, sicut Pater ipse qui genuit, neque Patrem quisquam, sicut animatum ejus Verbum, veritas & sapientia.* Eodem in libro docet, non creaturis, sed soli Verbo, quòd Deus sit, Dei naturam esse

con-

comprehensibilem : *Distinguo significatum* ( inquit respondens Celso asserenti, Deum ratione non esse comprehensibilem ) *si intelligatur de ratione, quæ vel inserta est nobis, vel è nobis se exerit, hac non esse Deum comprehensibilem. Sin de illa quæ erat in principio, & erat apud Deum, & ipsa erat Deus, damus hac Deum esse comprehensibilem.* Alia loca hìc prætermittimus, quibus Origenes Christi, ac proinde Verbi, divinitatem apertè profitetur, ea nimirum in tractatu de Incarnatione referemus.

Ex allatis autem Origenis textibus sic licet argumentari. Ille censuit Verbum esse verè ac propriè Deum, qui docuit, Jesum esse Deum, quòd sit ipsummet Dei Verbum; qui docuit, Verbum esse prorsus immutabile; qui docuit, Verbum quicquam pati non posse, quòd naturâ Deus sit; qui docuit, Christianos, cum Verbum colunt, non colere creaturam aliquam, sed Dei ac ejus Filii divinitatem; qui docuit, factam non esse Verbi naturam; qui tandem asseruit Verbum comprehendere Deum Patrem, quòd, juxta Evangelium Joannis, Deus sit: Atqui Origenes in libris contra Celsum ea omnia docuit: ergo censuit Verbum esse verè ac propriè Deum.

Objicies 1. Origenes lib. 7. contra Celsum scribit Patrem esse primarium mundi opificem, Verbum verò, proximum: Patrem Verbo jussisse ipsam mundi confectionem. Lib. 8. sic loquitur: *Itaque religiosè colimus Patrem veritatis, & veritatem Filium, duos quidem hypostasi, unum verò concordia, consensu, voluntatisque identitate.* Ibidem asserit Verbum non esse universorum Deum: *Esto autem* ( inquit ) *non deesse quosdam ut in tam numerosa credentium multitudine, qui discrepantes ab aliis, temerè affirmant, quòd Servator sit ille universorum Deus: Ejus autem effati rationem reddit, quâ Verbi divinitas planè destruitur: Nos certè* ( ait ) *hoc non facimus, qui credimus ipsi dicenti: Pater qui misit me,*

ma-

*maior me est.* Libro 5. scribit, solum Deum Patrem esse bonum: *Nemo bonus nisi unus, nempe Deus Pater.* Eodem in libro docet, preces quas offerimus Verbo, vocari preces non propriè, sed abusivè tantùm; *Verbum quoque illud deprecatur sumus, modò intelligamus quomodo hæc accipiantur vel abusivè, vel propriè.*

Ex iis autem textibus sic argui potest. Ille non creditit Verbum esse verè ac propriè Deum qui docuit 1. Verbum non esse primarium, sed secundum tantùm mundi opificem; 2. Patrem & Verbum duos esse hypostasi & unum concordia; neque enim Origenis tempore invaluerat usus sumendi hypostasiam pro personâ: nempe tribus prioribus sæculis passim accipiebatur pro naturâ; 3. Verbum non esse universorum Deum; 4. ipsum esse minus Patre; 5. solum Deum Patrem esse bonum; 6. preces quas offerimus Verbo, non propriè, sed abusivè tantùm, vocari preces: Atqui Origenes ea omnia docuit: ergo non creditit, Verbum esse verè ac propriè Deum.

Resp. ad 1. dist. min. Origenes docuit Verbum esse tantùm secundum opificem mundi, ratione originis, conc. min. scilicet Pater est origine prior Verbo: ratione naturæ, neg. min.

Ad 2. nego Origenis tempore morem apud plures non obtinuisse sumendi hypostasiam pro personâ, non autem pro naturâ: exempla laudabimus infra, ubi de Trinitatis personis in communi dicemus. Nec obstat, quòd Origenes dixerit, Patrem & Filium esse unum concordia: neque enim asserendo unū, scilicet unitatem concordia, cõsetur aliud negasse, unitatem nimirum essentia.

Ad 3. dist. ant. Origenes asseruit, Verbum non esse universorum Deum, sumendo Deum pro personâ Patris, conc. ant. sumendo pro naturâ, neg. ant. Ibi enim perstringit Noetianos, qui volebant, Filium esse ipsum Deum Patrem, quem eorum temporum Scriptores his vocibus, *universorum Dominum*, significabant.

Ad

Ad 4. dist. ant. Origenes scripsit, Filium, quæ Deus est, esse minorem Patre, ratione originis, conc. ant. ratione dignitatis aut naturæ, neg. ant. Nec mirum est, quod Origenes eam loquendi rationem adhibuerit: Nempè plures è scriptoribus maximè Catholicis eâ nonnunquam usi sunt: *Solum ingenuum* (inquit Alexander Episcopus Alexandrinus, à quo primùm damnatus fuit Arius, apud Theodoretum lib. 1. cap. 4.) *Patris proprium esse dicamus, cum & ipse servator dixerit, Pater major me est.* Athanasius oratione secundâ contra Arianos, hæc quoque scribit: *Non dixit Filius, Patrem se meliorem esse, ne quis ipsum externum, alienumque à Patris natura existimaret: sed Pater, inquit, major est, non quidem magnitudine aliqua, aut ætate, sed propter generationem ex ipso Patre.* Sic etiam Basilus loquitur libro 1. contra Eunomium: *Quoniam enim à Patre principium est Filio, ideo major est Pater, ut causa & principium: Quapropter etiam Dominus sic dixit: Pater meus major me est, quatenus videlicet est Pater.*

Ad 5. dist. ant. Origenes scripsit, solum Deum Patrem esse bonum, excludendo humanam Christi naturam, conc. ant. excludendo illius personam, neg. ant. Ratio est, quia Origenes asserit, Christum, prout homo est, hæc verba protulisse, *Quid me dicis bonum?* nemo bonus nisi unus, nempè Deus Pater.

Ad 6. dist. ant. Origenes preces, quas offerimus Verbo, vocavit preces abusivè, hoc est, ita hærentes humanitati, cui unitum est Verbum, ut ad Deum referantur, conc. ant. ut ad Deum non referantur, neg. ant. Origenes in eo loco agit de Filio Dei, prout est mediator; ibi enim eum vocat pontificem ac propitiationem pro peccatis: sumptus autem prout est mediator, sumitur ratione humanæ naturæ, ac proindè preces, quas ad mediatorem illum dirigimus, non ita terminantur ad humanam illius naturam, quin ad Deum

Deum ultimò non tendant; imò eo fine preces offerimus mediatori, ut mediator sibi, ut Verbum est, ac toti Trinitati eas offerat.

Objicies 2. Hieronymus variis in locis carpit Origenem; quòd de Verbi divinitate pessimè senserit. Idem de eo judicium tulit Epiphanius hæresi 64. c. 4. & in Ancorato c. 63.

Resp. Hieronymum, & Epiphanium ex libris aut interpolatis, aut corruptis, aut dubiis, aut infideliter ex Græco conversis judicasse de Origenis circa Verbi divinitatem sententiâ: nos verò ex illius libris contra Celsum, qui haud dubiè sunt germanus Origenis fœtus, quos senex summo studio conscripsit adversùs insensissimum religionis Christianæ criminatorem; quique sinciores sunt ac castigatiores aliis omnibus, qui sub Origenis nomine laudantur.

*Dionysius Alexandrinus.*

Dionysius Alexandrinus post medium sæculum tertium, ad Ammonium & Euphranorem dedit Epistolas adversùs Sabellianos, qui tunc temporis grassabantur. In iis epistolis dum personas in Deo accuratiùs distingueret, quibusdam visus est in partem contrariam, & quidem extremam, abiisse, hoc est, non tantùm personas contra Sabellium distinxisse, sed etiam naturas, quemadmodum postea factum est ab Arianis. Eam ob rem à quibusdam Pentapolitanis quasi lesæ fidei ad Dionysium episcopum Romanum delatus est. Hic celebrato Romæ Concilio, Synodicam misit ad Dionysium Alexandrinum, imperavitque, ut suam de argumento circa quod ipsi lis intentata fuerat, sententiam aperiret. Scripsit iste apologiam ad Dionysium Romanum, in quâ Verbi *ὁμοουσιον*, sive consubstantialitatem conceptis terminis professus est, depulitque calumnias omnes sibi à delatoribus impactas. Ejusmodi autem apologiæ meminit Athanasius tum in Commentario de Synodis Ariminensi & Se-

Seleuciensi, tum in libro quem ex professio scripsit adversus Arianos, qui Dionysium laudabant quasi in suis contra Sabellianos epistolis, Arianæ heresi fuisset patrocinator. Eusebius historiæ libro 7. cap. 26. hæc habet de eadem Dionysii apologiâ : *Quatuor etiam libros de eodem argumento composuit, quos cognomini suo, Dionysio Romanorum Episcopo nuncupavit.*

Quæ mox enarrata sunt, confirmantur tum ex capitibus Dionysio objectis, tum ex ejusdem Dionysii ad ea accusationum capita responsis. Pentapolitani conquesti fuerant 1. quod Dionysius nominans Patrem, non appellasset Filium ; unde concludebant, eum divisisse Filium à Patre, cui tamen propter naturæ identitatem conjunctissimus est. Ad hoc, apud Athanasium Tom. 1. pag. 561. sic respondet S. Præsul : *Singula illa nomina (Pater: Filius, Spiritus Sanctus,) de quibus locutus sum, inseparabilia à se invicem sunt, nec dividi queunt.* Multis interjectis asserit : *Invisibilem & indiminutam Trinitatem in unitatem colligi.*

Conquesti fuerant 2. quod dixisset, Patrem ad Filium se habere, sicut agricola se habet ad vitem, & fabricator navis ad scapham ; indèque concluderant, eum asseruisse Verbum non esse consubstantialiale Patri, sed diversæ omnino naturæ, quemadmodum agricola non est ejusdem naturæ cum vite, nec navis fabricator cum ipsâ nave.

Ad primum accusationis caput responderet, se obiter tantum, ut personas contra Sabellianos distingueret, usum fuisse duplici similitudine, de quâ in illum Pentapolitani querelam moverant. *Horum quidem (ait apud Athanasium) ut minoris momenti exempla tantum in transcursu recensui.*

Ad aliud autem delationis caput reponit, immerito suos accusatores ex iis similitudinibus conclusisse, eum sensisse Verbum non esse consubstantialiale Patri : *Quæ magis genuina erant plenius*

Differt. I. De Existent. SS. Trin. 61

*nus enarravi, variis adinventis argumentis, (quæ & tibi in alia epistola descripsi) quibus ostendi crimen, quod deferunt contra me, falsum esse, quasi qui non dixerim, Christum esse Deo CONSUBSTANTIALEM. Nam tametsi dico, me id nomen non reperisse, nec legisse alicubi in Sacris Literis, argumenta tamen mea, quæ postmodum subjunxi, & ab illis tacita sunt, ab hac sententia non dissonant.*

Quàm meritò Dionysius id asseruerit, ipsemet probat ex aliis comparationibus, quibus scribit se usum fuisse in suo contra Sabellianos opere. Nempè scribit, se Dei Filium cum humano partu comparasse, cum fluvio qui egreditur è fonte, cum plantâ quæ oritur à semine: Indeque concludit, se Verbi consubstantialitatem cum Patre, licet nomen non adhibuisset, tuitum fuisse in suo opere contra Sabellianos: scilicet homo & ejus partus, fluvius & fons, planta & semen, ejusdem sunt speciei ac substantiæ: Nam (inquit) & humanum partum pro exemplo adduxi, haud dubiè congenerem, idque in verbis meis addens, omnino parentes eo solùm alios esse à liberis, quòd ipsi, liberi sui non sint..... Nam & plantam dixi è semine aut radice proveniente, aliud esse ab eo unde germinascit, & tamen cum eo prorsus esse similis naturæ; & fluvium à fonte promanantem, aliam formam nomenque accipere: neque enim fontem fluvium, neque fluvium fontem appellari; & tamen ambos existere, & fontem instar patris esse, fluvium verò esse ex fonte aquam.

Antequam Dionysianæ historiæ finem imponamus, operæ pretium est, ut lector observet, ubique eo tempore, quo laudatus Episcopus florebat, fidelibus persuasum fuisse, Verbum esse Patri consubstantiale.

Et quidem 1. id credebant Pentapolitani; siquidem Dionysium Alexandrinum tanquam temerariæ fidei reum detulerunt ad Dionysium Romanum, quòd censerent, ejusmodi consubstantialitati labem ab eo illatam fuisse in epistolis quas

quas scripserat adversus Sabellianos. 2. Id quoque credebant Ægyptii, scilicet præcipuus Ægypti Episcopus, Dionysium Alexandrinum dico, tanquam calumniam repulit, quæ sibi de negatâ consubstantialitate Verbi objecta fuerant à Pentapolitanis. 3. Id quoque credebatur Ecclesia Romana: nam Dionysius Romanus Episcopus acceptis Pentapolitanorum adversus Dionysium Alexandrinum literis, Romæ plurimum Episcoporum Concilium habuit, missaque ad eum Synodicâ, iussit, ut Pentapolitanorum accusationibus responderet. Ei autem mandato Dionysium Alexandrinum obtemperasse, superius paginâ 60. ostensum est Eusebii & Athanasii testimonio.

*Gregorius Thaumaturgus.*

Gregorius Thaumaturgus, Neocæsariensis in Ponto Episcopus, auditor fuit Origenis, dum adhuc in adolescentiâ versaretur; obiit paulò post Dionysii Alexandrini mortem: nempe interfuit Concilio, quod adversus Paulum Samosatensem Antiochiæ secundò celebratum est, ante quod tamen Dionysius jam diem extremam clausurat.

Parte 1. operum ejusdem Gregorii legitur fidei confessio hisce verbis concepta: *Vnus Deus, Pater Verbi viventis, sapientiæ Subsistentis & potentiae & characteris sempiterni: perfectus perfecti genitor, Pater Filii unigeniti. Vnus Dominus, solus ex solo, Deus ex Deo .... Vnusque Spiritus Sanctus ex Deo existentiam habens, &c.*

Eam fidei confessionem, spuriam censent novi Ariani, eò quòd nec Eusebius, nec Hieronymus illius meminerint. Verùm facilè revincuntur. Nam 1. refertur à Gregorio Nysseno in vitâ Gregorii Thaumaturgi. 2. Ejusdem Nysseni ætate ferebat traditio Ecclesiæ Neocæsariensis, illam reverà esse laudati Gregorii: *Per quam* (ait Nyssenus) *usque in præsentem diem instituitur plebs, Neocæsariensis, quæ ab omni hæretica malitia*  
inta.



*intacta permansit.* Unde summâ curâ ab eâdem Ecclesiâ in archivis conservabatur: *Quod si quis sibi fidem* ( verba sunt Nysseni ) *de hac re fieri cupit, audiat Ecclesiâ, in qua sermonem prædicabat, apud quam illa ipsa verba à beata illa manus exarata, adhuc etiam nunc conservantur.* 2. Basilii, operum tom. 2. pag. 360. Edit. Parisiensis 1638. expressè affirmat, Neocæsarienses suâ ætate non ad aliam formulam, quàm ad relictam à Gregorio, fidelibus tradidisse fidei rudimenta: *Itaque non praxim aliquam, non dictum, non formam ullam mysticam, ultra quam illis reliquit, Ecclesiæ suæ adjecerunt: tunc autem* ( ut Nyssenus testatur ) *Neocæsariensis Ecclesia habebat apud se fidei confessionem, de quâ agitur.* 3. Quinta Synodus generalis eandem confessionem agnovit, tanquam genuinum Thaumaturgi opus.

Objicies 1. Confessionis de quâ agitur, nec Eusebius, nec Hieronymus meminerunt; eam tamen non prætermisissent, si Gregorii sit opus: rem enim adversus Arianos confecisset. 2. In eâ confessione Thaumaturgus asserit, Patrem & Filium esse unum hypostasi, & solâ ratione distingui, id verò ipsissimus est Sabelianorum error. 3. Idem S. Pater de Christo agens, aliquando *creaturæ, facturæ*, nominibus utitur.

Resp. ad 1. nec Eusebium, nec Hieronymum omnia retulisse, quæ scripserunt Patres, qui ante eorum tempora vixerunt. Opus de quo agitur referunt Gregorius Nyssenus & alii, quos jamjam laudavimus. Ad 2. respondet Basilii, id dictum fuisse, à Gregorio ex suppositione adversariorum contra quos agebat: *Hoc scilicet* ( ait ) *non dogmaticè, neque affirmando, sed concertationis more in disputatione adversus Ælium ab eo dictum esse, intelligere nequiverunt, qui propter intelligendi subtilitatem beatos sese reputant.* Ad 3. idem Basilii respondet, hæc nomina, *creatura,*

*factura*, referri ad humanam, non autem ad divinam Christi naturam: *Multa etiam quæ de Incarnatione dicta sunt, ad divinitatis rationem referunt, qui imperitè, quæ scripta sunt, audiunt.*

*Patres Concilii Antiocheni.*

Antequam frequens esset Episcoporum Antiochiæ confessus, sex Episcopi, qui ad Concilium brevî contra Paulum Samosatensem celebrandum sese contulerant, Epistolam ad eundem Paulum dederunt, in quâ definiunt: *Christum*, cujus divinitatem negarat Samosatensis, *Sapientiam esse, & Verbum, virtutemque Dei ante sæcula existentem, non sola præscientia, sed substantia & subsistentia Deum.*

*Pamphilus Martyr.*

Pamphilus propter causam fidei sub Maximo occubuit. Is in libro apologetico, quem in Origenis defensionem conscripsit, & cujus meminit Eusebius hist. lib. 6. cap. 33. probat, Origenem catholicè scripsisse: probat (inquam) quod docuerit, eandem esse *inconvertibilitatem Spiritus Sancti, quæ & Patris & Filii, æqualem esse Trinitatem; sicut Pater novit initia omnium quæ sunt & fines, sic & Filium, sic & Spiritum Sanctum scire, quomodo esse cum Patre Filium, id est, æquis substantiæ.*

*Lucianus.*

Lucianus, Ecclesiæ Antiochenæ presbyter, (ait Eusebius hist. lib. 6. cap. 13.) *vir in omni vita sanctissimus*, propriâ manu symbolum descripsit, in quo hæc leguntur: *Credimus in unum Deum Patrem .... & in unum Dominum Iesum Christum, Filium ejus unigenitum Deum, per quem omnia facta sunt, & Deum ex Deo, totum ex toto, solum ex solo, perfectum ex perfecto, regem ex rege. Et in Spiritum sanctum, &c.* Iis autem verbis Lucianus

cianus apertè profitetur, Verbum esse Deum ; *Deum ex Deo*, æquale esse Patri, *Perfectum ex perfecto*, æternum sicut & ipse Pater: *Genitum ex Patre ante omnia secula*.

Objicies 1. Nec Eusebius nec Hieronymus meminerunt symboli, de quo est quaestio. 2. Luciano afflictum est ab Episcopis Concilii Antiocheni, quod Constantius ad Encæniam ( Sozomeno teste hist. lib. 3. cap. 5. ) convocarat.

Resp. ad 1. ex Eusebii, ac Hieronymi silentio nihil posse concludi de facto, quod Athanasius lib. de Synodis Arimin. & Seleuciensi Tom. 1. pag. 892. Socrates histor. lib. 2. cap. 10. alique non multum à Luciano temporibus distantes retulerunt. Ad secundum dicendum est, verum quidem esse, Episcopos de quibus argumentum loquitur, eam fidei confessionem primum promulgasse: *Ajebant autem* (inquit Socrates) *reperisse se hanc fidem totam scriptam manu ipsius Luciani, ejus qui Nicomediae martyrium perpassus est*. Sed multa (ajunt nonnulli) probant, illos Episcopos verum dixisse. Nam 1. verisimile non est Episcopos, quorum pars major plus æquo favebat Arianis, promulgaturos esse Luciani martyris nomine confessionem, catholicæ fidei tam evidenter faventem, si eam de facto Luciani manu ( ut ajebant ) conscriptam Antiochiæ non reperissent: 2. Impostura diù latere non potuisset Antiocheneses, apud quos Luciani scripta summo studio conservabantur. Vide de hoc argumento Hilarium, libro de Synodis adversus Arianos.

*Methodius.*

Methodius Tyri Episcopus ( Hieronymo teste in catalogo de scriptoribus Ecclesiasticis cap. 34. ) sub Diocletiano & Maximiniano in Chalcide civitate Græciæ martyrio coronatus est. Is in libro de Martyribus apud Theodoretum, Dialog. 1.

pag. 37. Christum, ac proinde Verbum, nominat, *Dominum & Filium Dei, qui non rapinam arbitratus est, esse æqualem Deo.* Apud Photium cod. 237. dicit, existentiam Verbi nec initium nec finem habuisse, sed semper eandem fuisse. Unde sic arguitur: Ille est verè ac propriè Deus, qui est æqualis Patri; qui est ipsi cœternus: atqui, ex Methodio, sic se habet Verbum: ergo, &c.

Objicies. Methodius apud Photium cod. 235. scribit 1. duas esse in Deo potentias effectrices. 2. Patri, orbis creationem tribuit; Verbo autem illius ornatum tantum. 3. Afferit, Filium à se ipso non operari, sed solum Patrem. *Vnam (inquit) quæ ex non extantibus à se ipsa molitur quidquid vult facere, eaque est Pater: alteram quæ componit, & varietate quadam exornat ad prioris imitationem, quæ jam facta sunt, & est Filius.* Unde sic arguitur: Ubi sunt duæ potentix effectrices, ibi duæ sunt naturæ; ubi operans producit effectum ad extra, qui ab alio operante non producit, duplex est essentia: atqui, ex S. Methodio, duæ sunt in Deo potentix effectrices; effectus, qui ab unâ producit, non producit ab aliâ: ergo in Deo sunt duæ naturæ, & duæ essentix.

Resp. ad 1. dist. min. Ex S. Methodio, duæ sunt in Deo potentix effectrices personaliter, conc. min. substantialiter, neg. min. scilicet, sunt plures personæ operantes, licet una tantum sit substantia operans. Ad 2. dist. pariter min. Effectus, qui ab unâ producit, non producit ab aliâ secundum quemdam loquendi modum, conc. min. ab aliâ absolutè non producit, neg. min. Patres, quos eo in capite sequuntur de scholâ theologi, nonnulla per appropriationem tribuerunt Patri, alia Filio, alia Spiritui Sancto: creationem adscripserunt Patri, eò quòd conveniat, ut is dicatur rerum creaturarum principium, qui totius deitatis fons est, ac origo. Filio universi  
orna-

ornatum ac ordinem, eò quòd deceat, ut is dicatur res exornare & in ordinem disponere, qui dicitur sapientia, & verbum Patris : nimirum sapientis est, cuique rei convenientem situm ac ordinem tribuere . Jam verò quòd Methodius non excludat Filium à creatione mundi, cujus ornatum illi tribuit, patet ex eo, quòd non excludat Patrem ab ornatu & dispositione universi, licèt ipsi ejusdem universi creationem adscribat : *Omnipotens* ( ait ibidem ) *ac fortis manus Patris, in qua, postquam fecit materiam ex non extantibus, exornat.* Ad 3. dist. ant. Methodius asserit, Filium non operari à se ipso, hoc est, per esse, quod ab alio non acceperit, conc. ant. nimirum totum suum esse, omnem operationem ad extra, accipit à Patre per generationem, per esse, quod ab alio acceperit, neg. ant. Non apud Methodium tantum, sed etiam apud Patres, qui post Concilium Nicænum I. scripserunt, invaluit ille loquendi modus.

## §. II.

### *Proponitur Patrum Occidentalium doctrina de Verbi divinitate.*

CONCLUSIO . Patres qui ante Concilium Nicænum I. floruerunt in Occidente, docuerunt, Verbum esse verè ac propriè Deum.

Probatur. Patres, qui ante Concilium Nicænum I. in Occidente floruerunt, sunt Tertullianus, Dionysius Romanus, Cyprianus, Lactantius, Arnobius: Sed Tertullianus & alii docuerunt, Verbum esse verè ac propriè Deum: ergo, &c. Minor propositio subsequenti examine demonstratur.

#### *Tertullianus.*

Tertullianus ( ut ipse testatur lib. 1. in Mar-

cionem, nec non in Apologetico cap. 4.) tempore Severi Imperatoris floruit, hoc est, labente sæculo secundo, & ineunte tertio.

In Apologetico cap. 21. expressè docet 1. Dei Filium vocari Deum: 2. unius esse cum Patre substantiæ: 3. id ex eo colligi, quòd ex Patre genitus sit: *Hunc ( inquit ) ex Deo prolatum dicimus, & prolatione generatum; & idcirco Filium Dei, & Deum dictum, ex unitate substantiæ.*

Libro adversùs Praxeam c. 8. asserit, Verbum se habere respectu Patris, sicut se habet fructus respectu radices, sicut fluvius respectu fontis; indeque concludit, unam esse ac indivisam Patris ac Filii substantiam. *Protulit Deus Sermonem sicut radix fructum, & fons fluvium, & sol radium: nam & istæ species probola sunt earum substantiarum, ex quibus procedunt.*

Eodem in libro, c. 17. testatur, omnia Patris nomina & attributa Filio, ut Filius est, convenire. *Nomen Patris ( inquit ) Deus omnipotens, altissimus, Dominus virtutum, Rex Israelis, Qui est. Hæc dicimus & in Filium competisse, & in his Filium venisse, & in his semper egisse, & sic ea in se hominibus manifestasse.* Addit, eum non nomina tantùm habere communia cum Patre, sed etiam omnia prorsùs, nihil planè præter personam excepto: *Omnia sibi tradita dicit à Patre ( ait lib. 4. contra Marcionem cap. 25. ) Credas, si Creatoris est Christus, cujus omnia, quia non minori se, tradidit omnia Filio Creator, quæ per eum condidit, per sermonem scilicet suum.*

Libro de Resurrectione Carnis c. 6. scribit, Filium in omnibus esse æqualem Patri: *Est Sermo enim Deus, qui in effigie Dei constitutus, non rapinam existimavit parari Deo.* Libro adversùs Praxeam cap. 22. hæc ait de Christo ut Filius est Patris: *Vnum sumus, dicens, Ego & Pater, ostendit duos esse, quos æquat, & jungit.* Lib. de Pudicitia cap. 21. docet, non Filium modò, sed  
& to-

& totam Trinitatem esse consubstantialem, quippe agnoscit: *Trinitatem unius Divinitatis, Patrem, Filium & Spiritum Sanctum.*

Ex allatis verò Tertulliani sententiis sic confici potest argumentum. Ille docuit, Verbum esse verè ac propriè Deum, qui asseruit, ipsum vocari Deum, quòd à Deo Patre genitum sit; qui scripsit, Filium esse unius ac indivisæ substantiæ cum Patre; qui dixit, non nomina tantùm, quæ Patri tribuuntur, sed etiam attributa quælibet ipsi cum Patre esse communia; qui voluit ipsum in omnibus esse æquale Patri; qui tandem expresse professus est trinitatem unius divinitatis: Atqui Tertullianus id asseruit, id scripsit, id dixit, id voluit, id professus est: Ergo Tertullianus docuit, Verbum esse verè ac propriè Deum.

Objicies 1. Tertullianus negavit æternitatem Verbi: ergo non credidit, ipsum esse verè ac propriè Deum. Probatur ant. Lib. contra Hermogenem cap. 3. scribit, Deum non semper fuisse Patrem; addit, fuisse tempus quo Filius non extitit: *Quia (inquit) & Pater Deus est, & iudex Deus est; non tamen ideo Pater, & iudex semper, quia Deus semper. Nam nec Pater esse potuit ante Filium, nec iudex ante delictum. Fuit autem tempus, cum & delictum, & Filius non fuit, quod iudicem & Patrem Dominum faceret.*

Nec argumentum solvunt, qui cum Bellarmino respondent, Filium, de quo Tertullianus loco mox laudato loquitur, non esse Verbum, sed Filium per adoptionem. Nam 1. absque ullâ limitatione Tertullianus scribit, Deum non semper fuisse Patrem. 2. Libri, de quo agitur, capite 18. præcluditur illud effugium: ibi enim Tertullianus ait, Sophiam, quæ haud dubiè est ipsummet Verbum, non sine initio fuisse, imò prolatam ac natam esse, cum Deus sese ad Universi productionem accinxit: *Si enim (inquit) intra Dominum, quod ex ipso & in ipso fuit, sine initio non fuit; So-*

*phia scilicet ipsius exinde nata & condita; ex quo in sensu Dei ad opera mundi disponenda capit agitari: multò magis non capit, sine initio quidquam fuisse quod extra Dominum fuerit.*

Resp. ad 1. neg. ant. Ad 2. dist. ant. Tertullianus docet, Deum non semper fuisse Patrem, hoc est, non semper declaratum ac manifestatum fuisse Patrem, conc. ant. Semper non fuisse absolute & intrinsecè Patrem, neg. ant. Ad 3. dist. pariter, ant. Tertullianus scribit, fuisse tempus, quo Filius non fuit, secundum aliquem respectum, conc. ant. quo non fuit absolute, neg. ant. Tertullianus in loco de quo agitur, solvit hocce argumentum Hermogenis: *Si materia non esset æterna, Deus non semper fuisset Dominus: Siquidem nihil habuisset, quod ipsi paruisset.* Solvit (inquam) dicendo, non esse absurdum, quòd Deus non semper fuerit Dominus, cum absurdum non sit, quòd in omni sensu non semper fuerit Pater: neque enim fuit Pater extrinsecè ac in manifesto, nisi cum per generationem in propriè dictam Verbum misit ad universi creationem. Si quis autem urgeat, non magni esse ponderis illud Tertulliani responsum ad argumentum Hermogenis, dicendum erit, rem esse perspicuam, authorem illum undecumque responsa ac rationes, quas sciret non plurimi esse momenti, arripere solitum esse, ut propositam sibi thesim tueatur.

Confirmatur responsio ex eo, quòd eodem contra Hemogenem libro Tertullianus millies testetur, Filium à Patre ab æterno genitum fuisse.

*Primò enim cap. 18. ( ut jam observatum est ) scribit, Sophiam, quam dicit natam, ex quo Pater accinxit se ad rerum externarum productionem, fuisse ex ipso & in ipso Deo: Quod autem in Deo & ex Deo fuit, non potest non esse æternum, quippè nihil est in Deo, quod Deus non sit.*



Dissert. I. *De Existent. SS. Trin.* 71

*Secundò*, libro adversus Praxeam cap. 5. dicit Deum, etiam ante mundi creationem, non fuisse solum, quòd etiam tunc secum haberet Rationem, seu Sermonem, seu Sophiam, seu Verbum: *Anse omnia.* (inquit) *Deus erat solus, ipse sibi mundus, & locus & omnia.* Solus autem, quia nihil aliud extrinsecus præter illum. Cæterum ne tunc quidem solus, habebat enim secum, quam habebat in semetipso, Rationem suam scilicet. Rationalis enim Deus, & Ratio in ipso prius, & ita ab ipso omnia. Ea autem Ratio quæ in Deo fuit semper, in tempore vocata fuit Sermo, eò quòd Sermo quidpiam exterius prolatum sonet, cum è contra Ratio internum aliquid dicat: *Iam in usu est nostrorum* (ait author) *per simplicitatem interpretationis, Sermonem dicere in primordio apud Deum fuisse, cum magis Rationem competat antiquiorem haberi, quia non Sermonialis à principio, sed Rationalis Deus etiam ante principium.* Itaque constat, eo sensu Sermonem natum fuisse in tempore, quòd à Patre receperit metaphoricam quandam generationem, quæ non aliud est, quàm missio ad rerum externarum productionem.

*Tertiò*, idem author sumens Sermonem pro Ratione, conceptis terminis scribit lib. adversus Praxeam cap. 13. Sermonem esse hypostasim à Patre distinctam: *In principio erat Sermo & Sermo erat apud Deum, & Deus erat Sermo, unus qui erat, & alius apud quem erat.* Capite 8. addit, quâ ratione intelligendum sit illud, *In principio*: hæc enim scribit: *Sermo ergo & in Patre semper, sicut dicit, Ego in Patre, & apud Deum semper, sicut scriptum est, Et Sermo erat apud Deum.*

Objicies 2. Tertullianus lib. adversus Praxeam c. 6. docet, Sermonem, seu, Verbum, seu Sophiam, à Patre procedere per quandam separationem: *Et hinc* (inquit ubi retulit hæc Geneseos verba: Dominus creavit me initium vi-

rum in opera sua, *adſiſtentem eam ipſa ſeparatione cognoſce*: Atqui quæ ſeparata ſunt, non ſunt unius ac ejuſdem ſubſtantix: ergo, &c.

Reſp. diſt. maj. per quãdam ſeparationem improprie dictam, conc. maj. per ſeparationem proprie dictam, neg. maj. Separatio priore modo ſumpta, nihil aliud eſt, quàm Filii miſſio ad opera externa: per ipſum nimirum omnia facta ſunt, & ſine ipſo factum eſt nihil. Hanc Tertulianus concedit Verbo, non autem aliam: nempe capite 8. contra Valentinianos agens ſic loquitur: *Filius in Patre ſemper, & nunquam ſeparatus à Patre*: quibus verbis hæc alia ibidem ſubjicit: *Hæc erit probola veritatis, qua prolatum dicimus Filium à Patre, non ſeparatum*. Hinc patet, quo ſenſu idem author ſcripſerit, Sermone ſpeciem & ornatum ſuum ſumpſiſſe, cum dixit Deus, *Fiat lux*: nihil enim aliud voluit, quàm quòd tunc Verbi, quod eſt Sapientia Patris, virtus mirum in modum eluxerit, in ordine ad quem reduxit informem prius ac rudem materiam.

*Dionyſius Romanus.*

Dionyſius Romanus ( Eufebio teſte hiſt. Eccleſ. lib. 7. c. 7. ) ſub Valeriano & Gallieno Imperatoribus floruit.

Prolixam Dionyſius ſcripſit Epiſtolam adverſus Sabellianos: hæc periit quidem, ſed tamen nonnulla illius apud Athanaſium fragmenta reperire eſt: ſic nimirum apud eum libro de decretis Nicænæ Synodi Tom. I. pag. 275. veteris editionis loquitur: *Audire, quosdam apud vos eſſe catechiſtas, & doctores divini verbi, qui illius ſunt opinionis authores, qui ex diametro, ut ſic dicam, pugnant cum Sabellii placitis. Hic enim blaſphemat, Filium ipſum aſſerens eſſe Patrem, & è converſo Patrem eſſe Filium. At iſti tres quodammodo Deos prædicant, dum ſanctam Monadem dividunt in tres hypſtaſes peregrinas, à ſe invicem plañe*

*nè separatas . Eum autem errorem Sabellianismo planè contrarium sic refellit : Etenim necesse est uniri omnium Deo Verbum , & in Deo manere , & habitare Spiritum Sanctum . Iam verò divinam quoque Trinitatem in unum , velut in caput quoddam & summum , omnipotentem Deum universorum dico , colligi & coalescere prorsus est necesse .*

Idem Pontifex maximus expressè negat, Verbum aut factum aut creatum fuisse : Cæterum ( ait ) non minùs culpaveris eos , qui Filium Dei opus existimant , & Dominum factum esse sicut cætera opinantur , cum sacra eloquia generationem ei congruentem & decentem , non autem formationem & creationem testimoniis suis attribuant . Alia ejusdem sancti Pontificis loca vide in tractatu de Incarnatione , ubi agitur de Christi divinitate .

*Cyprianus .*

Cyprianus medio tertio sæculo floruit . Libro secundo Testimoniorum adversùs Judæos ad Quirinum , probat è Scripturis , Christum esse Deum , eique omnia tribuit , quæ in iisdem Scripturis soli vero ac summo Deo tribuuntur . Vide S. Martyris textus descriptos in tractatu de Incarnatione , ubi de Christi divinitate disseremus . Si verò Cyprianus crediderit , Christum esse Deum , consequens est , ipsum quoque credidisse , Verbum esse verè ac propriè Deum .

Idem S. Martyr in epistolâ ad Jubajanum de hæreticis baptizandis , alludens ad septimum versiculum capitis quinti primæ Joannis Epistolæ , docet , tres , in quorum nomine baptizamur , esse naturâ unum : Cum ( inquit ) tres unum sint . In eâdem Epistolâ S. Cyprianus Trinitatem vocat , plenam & adunatam : siquidem baptismus in solo Christi nomine datum , irritum esse ex eo probat , quòd ipse Christus gentes baptizari jubeat in plena & adunata Trinitate .

Quæ novi Ariani proferunt ex Cypriano, ut probent eum suo errori patrocinarum fuisse, referuntur aut ad Verbum prout incarnatum, aut ad processionem Filii à Patre, secundum quam veteres quidam ( ut superius observatum est ) dixerunt, Filium esse subordinatum Patri, ac illo esse minorem; de quorum quidem Patrum sensu jam superius dictum est, ac inferius recurret sermo, ubi de divinis processionibus agetur.

*Lactantius.*

Lactantius, Rhetor erat, non Theologus; unde magni ponderis non sunt argumenta, quæ ex ipso contra Verbi consubstantialitatem proferri possent. Præterea varios in suis libris errores sparsit, quæ probant, eum non multam in fidei mysteriis peritiam habuisse. Ad-dendum, gravissimos scriptores censuisse, ea quæ Lactantius de Filii generatione lib. 2. cap. 9. & lib. 4. c. 8. scribit, adulterata esse ab hæreticis.

Nonnulla tamen sunt in Lactantio, quæ probant, eum idem cum Tertulliano de Verbi consubstantialitate credidisse. Nam 1. Sermonem sicut Tertullianus, à Ratione distinxit: 2. Con-tendit, Rationem esse idem cum istâ Dei Sapientiâ quæ sanè Deus est: sic enim loquitur lib. 4. c. 9. *Est ille Filius Dei, & Dei Sermo & Dei Ratio, & vox & sapientia Dei: & melius dicitur in loco Ioannis, Rationem & sapientiam, quam Ser-monem & vocem, in principio fuisse, & apud Deum fuisse.* 3. Censet, Rationem tunc factam fuisse Sermonem, cum Deus per eam condidit universum: *Scilicet vox & Sermo non erat Filius antequam ex Patre cum voce processerit, ad consti-tuendum universa: Sed Ratio & sapientia Dei æter-num erat.* Igitur cum Lactantius scribit, Sermonem fuisse tunc genitum, cum Deus Pater sese accinxit ad universi productionem, intelligi po-  
test

rest de generatione improprie dictâ, quæ non aliud est, quàm Filii à Patre missio ad rerum externarum productionem.

Confirmatur responsio ex eo, quòd Lactantius velit, Deum Patrem Filio tanquam consiliatore usum fuisse ad rerum productionem: *Exorsus igitur Deus* ( inquit lib. 2. cap. 8. ) *fabricam mundi, illum primum & maximum Filium præfexit operi universo, eoque simul & consiliatore usus est, & artifice in excogitandis, ornandis, perficiendisque rebus*: At Dei ipsius consiliator non alius est, quàm ejus Verbum, quàm illius Sapientia, quam quidem Lactantius asseruit æternam fuisse.

Confirmatur iterùm ex lib. 4. cap. 29. ubi hanc Gentilium objectionem sibi proponit: *Fortasse quærat aliquis, quomodo, cum Deum nos unum colere dicamur, duos tamen esse asseveramus, Deum Patrem, & Deum Filium*: Sic autem solvit eam objectionem: *Cum dicimus Deum Patrem & Deum Filium, non diversum dicimus, nec utrumque discernimus, quia nec Pater sine Filio esse potest, nec Filius à Patre scèrni: siquidem nec Pater sine Filio nuncupari, nec Filius potest sine Patre generari*. Ex illâ verò generatione hancce idem Lactantius conclusionem elicit: *Cum igitur & Pater Filium faciat, & Filius Patrem, una utrique mens, unus spiritus, una substantia est*. Id adhibitis comparationibus confirmat, quæ mirum in modum & Patris & Filii consubstantialitatem illustrent, ac supponunt: *Sed ille ( ait ) quasi exuberans fons, hic tanquam defluens ex eo rivus: ille tanquam sol, hic quasi radius à sole porrectus, qui quoniam summo Patri & fidelis & charus est, non separatur, sicut nec rivus à fonte, nec radius à sole, quia & aqua fontis in rivo est, & solis lumen in radio*.

*Arnobius.*

Arnobius primùm gentilis, rhetoricam Siccæ  
in

in Africâ docuit, imperante Diocletiano. Opus in septem libros distributum edidit adversus Gentes, postquam Ecclesiæ Christianæ dedisset nomen. Pluribus locis, quæ videre est descriptos in nostro tractatu de Incarnatione, ubi agitur de Christi divinitate, conceptis terminis asserit, multisque argumentis probat, Christum esse verè ac propriè Deum: ergo credidit, Verbum esse Deum: neque enim ( ut superius observatum est ) Christus est Deus, nisi quòd in eo natura humana hypostaticè cum Deo conjuncta sit.

Ex iis, quæ hucusque dicta sunt, colligitur 1. Dionysium Petavium libro 1. de Trinitate non æquum fuisse censorem Patrum, qui ante Concilium Nicænum sive in Oriente, sive in Occidente floruerunt, cum eos omnes, paucis exceptis, asseruit, Arianismo circa Verbi divinitatem laborasse. Colligitur 2. Socinianos, ut Traditionis vim enervent, immeritò Catholicis objicere, Patres trium priorum sæculorum docuisse, Verbum non esse Patri consubstantiale. Colligitur 3. ab iisdem Socinianis ac aliis heterodoxis immeritò objici Petavii hoc in capite judicium. Nam Petavius in præfatione sui operis in antecessum retractat, quod docet lib. 1. quipè qui contendat, Patres trium priorum sæculorum magis loquendi ratione, quàm in rei veritate, differre ab iis Patribus, qui post Nicænum I. Concilium scripserunt. Addendum est, Ecclesiam Catholicam in capite de quo agitur, non probare Petavii judicium, si reverà senserit, Patres trium priorum sæculorum aliud de Verbi divinitate sensisse, quàm quod Nicæni Patres definierunt.

ARTICULUS III.

*Quid Concilium Nicænum I. circa Verbi divinitatem defini-  
erit.*

Not. **H**ic proferemus 1. Concilii definitionem : 2. exponemus vocem ὁμοούσιον, sive Consubstantialia, quâ usa est Synodus.

CONCLUSIO I. Concilium Nicænum I. definiit, Verbum esse verè ac substantialiter Deum.

Probatur. Concilium Nicænum I. in Symbolo, quod ab ipso editum est, hisce apertis verbis definit, Filium esse Deum : *Deum ( inquit ) de Deo, lumen de lumine, Deum verum de Deo vero.* Addit, ipsum esse ejusdem naturæ cum Patre: *Genitum, non factum, consubstantialia Patri, per quem omnia facta sunt.* Afferit, æternum illum esse, ac contrarium sentientes cum Ario anathemate damnat : *Eos autem qui dicunt, erat quando non erat, & priusquam nasceretur non erat, aut ex non extantibus factus est, vel ex alia hypostasi sive substantia, vel creatum, vel convertibilem, aut alterabilem dicentes Dei Filium, hos anathemate ferit Catholica & Apostolica Ecclesia.*

CONCLUSIO 2. Nicæni Patres meritò usi sunt voce ὁμοούσιον, hoc est, Consubstantialia.

Probatur. Nicæni Patres illâ voce meritò usi sunt, quæ aptissima erat ad damnandam Ariano-  
rum hæresim, & ad stabiliendam Catholicam fidem : atqui vox ὁμοούσιον erat hujusmodi. Nam 1. Ariani docebant, Verbum ex non extantibus factum esse, fuisse tempus, quo non esset, ipsum esse creaturam, licèt in aliquo sensu ab aliis dissimilem : Sed ad eos errores dam-  
nandos aptissima erat vox ὁμοούσιον, nempe signi-  
ficat,

ficat, Verbum esse unius ac ejusdem substantiæ, seu essentiæ, cum Patre : Quod verò est unius ac ejusdem substantiæ, cum Patre, factum non fuit ex non extantibus, non præsupponit tempus quo non fuerit, nullâ ratione dici potest creatura : 2. Catholici docebant, Verbum esse ex substantiâ Patris, esse verè ac propriè Deum, genitum non factum : Sed vox ὁμοούσιον ea omnia significat : Qui enim unam habet essentiam cum Patre, verè ac propriè Deus est sicut Pater, proindèque æternus est, factus non est.

Confirmatur argumentum 1. ex Athanasio, qui expressè docet, neminem posse credere Filium esse naturâ Filium, quin simul profiteatur, eum esse Patri Consubstantialem : Quòd si ( inquit in epist. ad Afric. Episcopos ) *simulent se exhorrere vocabulum ὁμοούσιον, dicant & sentiant, simpliciter & verè Filium natura esse Filium, & anathemate, ut imperavit Synodus, eos feriant, qui dicunt, Filium Dei facturam, aut creaturam, aut ex non extantibus esse, vel fuisse, quando non esset, & mutabilem & alterabilem, & ex aliena substantia illum esse, itaque fugiant hæresim Arianam; & nulli dubitamus, quin postquam hæc ingenuè & candidè anathematizaverint, statim confessuri sint, Filium esse de substantia Patris, Patrique consubstantialem esse.*

Confirmatur 2. ex Hilario, qui in libro de Synodis adversùs Arianos hæc habet : *Displicet cuiquam, in Synodo Nicæna ὁμοούσιον esse susceptum? Hoc si cui displicet, necesse est placeat, quod ab Arianis est negatum. Negatum enim idcirco est ὁμοούσιον, ne ex substantia Dei Patris Deus Filius natus, sed secundùm creaturas ex nihilo conditus prædicaretur.*

Confirmatur 3. ex Basilio, qui Epistolâ 300. sic loquitur : *Et quia ex non esse ad esse productum Filium etiam tunc nonnulli asseverabant, hanc ut abscinderent impietatem (Nicæni Patres) nomen Homousii usurparunt.*

Obji-



Objicies 1. Vox illa , *ὁμοούσιον* , hoc est , *Consubstantiale* , in Scripturis non reperitur: ergo Nicæna Synodus eam adhibere non debuit, ut damnaret hæresim Arianorum , & assereret Catholicorum fidem.

Resp. conc. ant. neg. conseq. Ratio est, quia Nicæna Synodus ad asserendam Verbi divinitatem , & damnandam Arii hæresim , habebat quidem in votis non adhibere alias voces, quàm quæ in Scripturis continentur: Verùm cum eas omnes in pravam sensum Ariani detorquerent , coacta fuit usurpare *ὁμοούσιον* , cui Ariani nullum sensum affingere poterant , qui suæ hæresi patrocinaretur. Et sanè rogati, an agnoscerent Filium ex Patre genitum esse? annuebant: scilicet intelligebant, Filium eo sensu esse genitum ex Patre , quòd , sicut aliæ res, ab ipso, per creationem, originem suam traxisset: Quæsit, an Filium fateantur esse Deum? affirmabant contendentes , eum esse Deum, qui per gratiam quâ eminebat , verè factus esset Deus: Reprehensi, quòd Dei Filium creaturam dicerent , reponebant , iniquam esse accusationem : sed vanâ æquivocatione , subintelligebant enim, eum non esse creaturam ejusdem cum aliis creaturis gradûs , sed multùm sublimioris. Necesse fuit igitur, ut Nicæni Patres voce uterentur, quam heterodoxi in pravam suum sensum detorquere non possent: ejusmodi verò est vox *ὁμοούσιον* , unde Ariani nihil intentatum reliquerunt , ut illius usum abolerent.

Objicies 2. Non licet ad explicanda fidei mysteria inusitatis ac novis terminis uti , nempe terminorum immutatio nonnunquam ipsarum rerum immutationem invehit: atqui terminus *ὁμοούσιον* , seu *Consubstantiale* , tempore Concilii Nicæni I. erat inusitatus: si enim usitatus fuisset, Ariani non ausi fuissent ei tam evidenter contradicere, nec arguere Catholicos, quòd eo uterentur: ergo, &c.

Resp.

Resp. 1. neg. maj. nempè hæreticorum var-  
fricies, quâ fit, ut sæpiùs consuetis terminis abu-  
tantur, nonnunquam cogit Ecclesiam, ut ter-  
minos excogitet, quibus fiat, ne catholica dog-  
mata heterodoxorum fraudibus ac cavillis pa-  
teant.

Resp. 2. datâ maj. neg. min. seu contendimus  
longè ante Concilium Nicænum I. vocem ὁμοούσιον  
fuisse in communi Ecclesiarum usu. Id-  
que evincitur 1. ex S. Irenæo, qui lib. 1. cap. 1.  
exponens Valentinianorum placita, voce ὁμοού-  
σιον utitur, ut significet, rem ejusdem esse essentie  
cum alterâ: dicit enim: *Id quod spirituale erat,  
haud quaquam ab Acamoth informari potuisse, quo-  
niam ejusdem cum ipso essentie, ὁμοούσιον erat.*  
Evincitur 2. ex Tertulliano, qui initio libri adver-  
sus Praxeam expressis verbis scribit, Patrem,  
Filium, & Spiritum Sanctum esse *unius substan-  
tiæ*, quæ quidem verba Græcè per ὁμοούσιον ver-  
tuntur. Evincitur 3. ex Athanasio, qui in libro  
de sententiâ Dionysii Alexandrini circa Verbi  
divinitatem, scribit, Dionysium Alexandrinum  
in Epistolâ ad cognominem Dionysium Roma-  
num dixisse, Christum esse ὁμοούσιον, *Consub-  
stantialem Deo*; eamque confessionem Dionysium  
Romanum exegisse, ut Alexandrinus apud eum  
Catholicus audiret. Evincitur 4. ex Pentapoli-  
tanis, qui Dionysium Alexandrinum tanquam  
violatæ fidei reum detulerunt ad Dionysium Ro-  
manum, quòd in suis contra Sabellianos epistolis  
Verbum non dixisset, ὁμοούσιον, seu *Consub-  
stantiale Patri*: Aded vox illa necessaria erat, ne  
quis in hæresis suspicionem veniret. Evincitur 5.  
ex Eusebio Cæsariensi, qui in Epistolâ ad suos  
Cæsarienses, cujus meminit Socrates hist. Eccles.  
lib. 1. c. 8. sic loquitur: *Novimus quosdam ex ve-  
teribus, doctos & illustres Episcopos & scriptores,  
qui de Patris & Filii divinitate differentes, nomi-  
ne ὁμοούσιον usi sunt.*

Objicies 3. Concilium Nicænum I. ad expli-  
can-

candam Verbi divinitatem uti non potuit voce quam Antiochena Synodus, sexaginta circiter annis antè habita, expressè rejecerat: atqui sic se res habuerat, Athanasio teste in libro de Synodis Arimin. & Seleuc. seu laudata Synodus Antiochena decrevit, Filium non esse *ὁμοούσιον*, hoc est, *Consubstantialem Patri*: ergo, &c.

Resp. 1. dist. maj. Concilium Nicænum I. uti non potuit voce sumptâ eodem sensu, quo damnata fuerat à secundâ Antiochenâ Synodo, conc. maj. in alio sensu, neg. maj. Altera Synodus Antiochena (inquiunt nonnulli) damnavit vocem *ὁμοούσιον*, hoc est, *Consubstantiale*, in sensu Pauli Samosatени, qui eam sumptserat in sensu Sabellii personas in Trinitate non distinguentis, ita ut vellet cum Sabellio, Filium esse Patri consubstantialem, hoc est, unam cum eo non tantum naturam, sed etiam personam constituere. Theologis qui sic sentiunt, prævit Hilarius in libro de Synodis adversus Arianos propè finem: *Malè (inquit) ὁμοούσιον Samosatenus confessus est: sed numquid melius Ariani negaverunt?* In hoc autem malè Samosatenum confessum fuisse *ὁμοούσιον*, ibidem docet Hilarius, quia per hanc unius essentiæ nuncupationem solitarium atque unicum esse Patrem, & Filium prædicabat.

Resp. 2. dist. maj. Concilium Nicænum uti non potuit voce, quam secunda Antiochena Synodus damnaverat, in se & absolutè sumptam, conc. maj. quam damnaverat propter abusum tantum, neg. maj. Paulus Samosatenus (ajunt plures Theologi) nusquam dixit, Filium esse consubstantialem Patri, sed eâ doctrinâ, & eo loquendi modo, quem sciebat apud Catholicos esse passim receptum, abusus est, ut contra ipsos probaret, inde sequi, tres esse substantias in Deo, unam quæ prior esset, & duas alias quæ ex eâ productæ essent. Ut autem Antiocheni Patres impedirent, ne ejusmodi sophisma simplices Catho-

tholicos deciperet , vetuerunt , ne Filius Patri conſubſtantialis diceretur .

Confirmatur ſolutio 1. ex Athanaſio , qui in libro de Synodis Ariminenſi & Seleucienſi ſic loquitur : *Qui Samofatenum ſubſtulerunt , hanc vocem , Conſubſtantiale , corporaliter accipere , cum ſcilicet Paulus ſophiſticari vellet , & diceret , Si non ex homine Chriſtus Deus factus eſt , igitur conſubſtantialis eſt Patri ; unde neceſſariò ſequitur , tres eſſe ſubſtantias , unam quidem , quæ prior ſit , reliquas verò duas ex ea oriundas : ideoque meritò vitantes illud ſophiſma Pauli , dicere , Chriſtum non eſſe conſubſtantialem : non enim ita ſe habet Filius ad Patrem , ut ille cogitabat . Illi verò , ( hoc eſt , Nicæni Patres ) qui Arianam hæreſim anathemate percufferunt , cum Pauli calliditatem animadvertiſſent , neque hoc modo in rebus corporeis , præſertim in Deo , conſubſtantiale accipiendum eſſe conſideraſſent ..... meritò inducti ſunt , ut Filium conſubſtantialem dicerent .*

Confirmatur 2. ex Baſilio , qui epift. 300. ubi aſſeruit , neminem in Synodo Nicænâ I. contra dixiſſe decreto , quo Patres declararunt , Verbum eſſe Deum verum de Deo vero , lumen de lumine , genitum non factum , dicit è contra , non eodem unanimi conſenſu vocem ὁμοούσιον , receptam fuiſſe : At ( inquit ) vocem illam ὁμοούσιον , ſiniſtrè à nonnullis acceptam , ſunt qui nondum admiſerunt . Addit eos , qui illam non recepiſſent , reprehensione ac ſimul aliquâ excuſatione dignos fuiſſe : *Quos jure quis dignos reprehensione dixerit , & eoſdem iterum jure excuſandos .* Mox reddit rationem , cur meritò debeant accuſari : *Patrum enim veſtigiiſ non inſiſtere , & ſuam ipſorum excogitatam ſententiam velut potiorem voci illorum anteferre , tanquam præſumptionis plenum , reprehensione dignum eſt : eandem verò rursus à nonnullis accuſatam , ſuſpectam habere , videtur aliquatenus illos à culpa liberare .* Quinam verò ſint , quibus illa vox ſuſpecta fuerat , hiſce

hisce verbis tradit: Nam revera qui convenerunt in causa Pauli Samosatensis, vocem hanc ut minus congruam accusatam rejecerunt. Dixerunt enim illi, Homousii vocem, notionem & substantiæ, & eorum quæ ex ipsa sunt, representare nobis, ita ut substantia distributa, Homousii appellationem impertiat iis, in quæ distributa fuerit. Eam autem expositionem, quam Paulus Samosatenus Ecclesiæ Catholicæ imponebat, sic idem Basilii confutat: Hoc quidem (ait) verissimum est de are, & numismatibus inde cussis: at in Deo Patre & Deo Filio, nec substantia est antiquior, nec utrique videtur superstrata: Hoc enim dicere vel cogitare, impietatis omnem rationem excedit.

Confirmatur 3. ex Eusebio Cæsariensi. Is in Epistolâ ad suos Cæsarienses, quam Socrates describit hist. lib. 1. cap. 8. asserit primò, non sine prævia discussione vocem *Consubstantialis*, insertam fuisse symbolo: Id quod ab illis dictum erat, *Ex substantia Patris, & Consubstantialis*, non absque examine prætermisimus. Hinc igitur variæ quæstiones ortæ sunt, & responsiones, & quænam esset eorum verborum sententia, accuratè expendebatur. Asserit secundò, Patres Nicænos vocem illam non intellexisse eo sensu, quo eam ab orthodoxis intelligi finxerat Samosatenus: Et has quidem voces, *Ex substantia*, fassi sunt hoc significare, *Filium* quidem esse ex Patre, sed non tanquam partem ipsius Patris. Asserit tertio, ipsum Constantinum imperatorem eadem ratione vocem, de quâ est quæstio, exposuisse coram Episcopis, qui quòd pravum sensum aut timerent, aut se timere fingerent, eam admittere detrectabant: *Consubstantialia* à se dici, non juxta corporum affectiones, neque per divisionem, aut per sectionem quandam *Filium* ex Patre subsistere: fieri enim non posse, ut materiæ experta natura, & intellectualis & incorporea, corpoream ullam affectionem admittat: sed

*sed divinis arcanisque rationibus id esse intelligendum.*

Confirmatur 4. ex eo, quòd Sabellius ante Paulum Samosatenum ex voce ὁμοούσιον concluderet, sequi, Filium per excisionem & separationem divinæ substantiæ ex Patre generari; id enim apertè colligitur ex Alexandro Alexandrino, qui in Epistolâ ad Alexandrum Constantinopolitanum, apud Theodoretum Hist. Ecclesiast. lib. 1. cap. 1. expressè asserit: *Filium genitum esse, non ex non existentibus, sed ex ipso existente Patre, non corporum more per incisiones aut defluxus divisionem, quemadmodum Sabellio videtur.*

Ex iis, quæ hucusque dicta sunt, patet 1. ante Paulum Samosatenum vocem ὁμοούσιον apud Catholicos in usu fuisse. Patet 2. alteram Synodum Antiochenam rejecisse eandem vocem quòd Paulus Samosatenus eâ, ex suppositione Catholicorum, qui eam admittebant, abutere-  
tur. Patet 3. Nicænam primam Synodum eam in usum restituisse, eò, quòd Arianis damnan-  
dis aptissima esset, nec eâ Ariani, sicut antea Paulus Samosatenus, abuti possent, cum illi subjecta esset explicatio, quâ impedirentur, ne ex eâ inferrent, Filium à Patre generari per excisionem aut partitionem Patris substantiæ: *Credimus in unum Deum, Patrem omnipotentem* (verba sunt Nicæni Symboli) *omnium visibilium & invisibilium creatorem, & in unum Dominum Iesum Christum, natum de Patre unigenitum, hoc est, ex substantia Patris; Deum de Deo, lumen de lumine, Deum verum ex Deo vero, genitum, non factum, consubstantialē Patri, per quem omnia facta sunt.*

ARTICULUS IV.

*Quid de Verbi divinitate senserint Patres, qui post Nicænam I. Synodum floruerunt.*

Not. **N**ON hîc agemus de Patribus, quos post Synodum Nicænam certò, ac evidenter constat, Verbi divinitatem propugnasse; sed de iis tantum, quorum fides eo in capite potest esse dubia. Ii verò præ cæteris sunt, Eusebius Cæsariensis, authores formularum, quæ in aliquibus Conciliis post Nicænum habitis editæ sunt, Osius Cordubensis, Liberius Papa.

§. I.

*De Eusebio Cæsariensi.*

CONCLUSIO. Eusebius Cæsariensis apud plures Patres meritò tanquam Arianus audit.

Probatur prior pars. Primò sic de illo loquitur Athanasius in libro de Synodis Arimini, & Seleuciæ: *Non veritus est palam dicere, Christum non esse verum Deum.* 2. Hieronymus in Epistolâ ad Ctesiphontem hæc scribit: *Eusebium fuisse Arianum, nemo est, qui nesciat:* 3. Patres septimæ Synodi generalis actione sextâ sic loquuntur: *Quis enim fidelium Ecclesiæ & eorum, qui verorum dogmatum scientiam perceperunt, ignorat, quòd Eusebius Pamphili in reprobum sensum traditus, ejusdem opinionis & sensus fuerit cum his, qui Arianismum impietatem secuti sunt?*

Nec valet responsum Valesii contententis, id fuisse dictum obiter tantum, & ex occasione, non autem datâ operâ, & causâ priùs cognitâ; siquidem septimæ Synodi Patres frigidè non asserunt, Eusebium fuisse Arianum, sed & variis argumen-  
tis

tis ex ejus operibus depromptis probant, ut videre est in septimæ Synodi loco, quem mox laudavimus.

Probatur altera pars. *Primò*, Eusebius Cæsariensis libro 7. Præparationis Euangelicæ cap. 15. Patrem comparat supremo cœlo, Verbum Soli, & Spiritum Sanctum Lunæ; aitque, quòd quemadmodum cœlum supremum præstantius est sole, & sol lunâ, ita Pater præstantior est Verbo, & Verbum Spiritu Sancto: *Nobis igitur (inquit) simile utcumque modo de incorporarum illarum, intelligentiumque naturarum ordine sentiendum, ut vis quidem illa immensa Dei præpotentis omnique oratione major, confertim ac simul universa comprehendat; tum Patrem consequatur Verbi divini potentia, quæ reliqua pariter & molitur & illustret, quam ob causam lux vera, & justitiæ sol ab Hebræis nominari consuevit. Deinde post secundam illam naturam, lunæ quasi loco, Spiritus Sancti natura succedat.*

*Secundò*, Euseb. lib. 4. Demonstrat. Euangelicæ cap. 3. scribit, Patrem existere ante Verbum: Pater (ait) priusquam Filius, & ante generationem ejus subsistit, quatenus solus erat ingenuus.

*Tertiò*, idem author sæpiùs iisdem loquendi formulis utitur, quibus utebantur Ariani. Libro 4. Demonstrationis Euangelicæ c. 2. Filium Dei vocat *Patris opificium*: lib. 5. c. 1. secundam causam: cap. 6. dicit, Patrem esse universarum Deum primum & verè Dominum tam ipsius unigeniti sui Verbi, quàm eorum omnium quæ post illud genita sunt: cap. xi. asserit, Filium esse inferiorem primæ causæ, eum esse alteram præter Patrem essentiam.

*Quartò*, libro 1. Hist. cap. 2. scripsit, Verbum quâ Verbum est, fuisse Patris præcepto de condendo orbe subditum: *Verbum autem Dei ab ipso secundum, paternis præceptis obtemperans.* Libro 1. adversùs Marcellum docuit, Filium Dei, quâ Verbum



bum est, mediatorem esse inter Deum & Angelos: Non est existimandum, hunc esse Deum illum, qui est supra omnia Deus, nedum de numero Angelorum aliquem; sed medium, utrorumque & mediatorem; quippe cum inter Patrem suum & Angelos intercedat medius. Epistolâ ad Euphratium negat, Filium coexistere Patri: Non enim (inquit) coexistere Filium Patri, sed ante fuisse Patrem quàm Filium dicimus. Nam si coexistant, quomodo erat Pater Pater, aut Filius Filius? vel quomodo unus quidem primus, alter secundus est?

Ex textibus, qui hucusque laudati sunt, sic argumentum confici potest. Ille merito tanquam Arius audiit apud Patres, qui scripsit, Patrem esse præstantiorem Verbo, ante Verbum existere, Deum esse Verbi; qui scripsit, Filium esse opificium Patris, secundam causam, alteram præter Patrem essentiam, Patris præcepto de condendo orbe subditum, ipsum non coexistere Patri: atqui ea omnia (ut patet ex textibus mox laudatis) asseruit Eusebius Cæsariensis: ergo merito tanquam Arius audiit apud antiquos Patres.

Respondent nonnulli, ea omnia loca exponi posse in sensum catholicum: Hoc est (inquiunt) dici potest, Eusebium iis textibus non aliud intendisse, quàm contra Sabellianos, ac præsertim contra Marcellum, quem Sabellianismi fuligine tinctum arbitratus est, asserere Patris à Verbo distinctionem personalem, & veram illius ab eodem Patre generationem; ac proinde Patrem esse præstantiorem Verbo, origine, non autem naturâ; Patrem ratione originis esse priorem Filio; ipsum eo sensu Deum esse Filii, quod Filius esse ab illo receperit; Filium esse secundam ratione originis causam; alteram præter Patrem essentiam personam, non naturam; subditum fuisse Patris præcepto improprie sumpto, hoc est, accepto promissione ad mundi creationem: nempe Pater

per suum Verbum omnia & molitus & executus est.

Verùm licèt in alio scriptore loca, de quibus agitur, in sensum catholicum exponi possent, nimirùm in Justino, Tertulliano, Origene, similia legere est, quæ tamen (ut superius ostensum est) Arianismum non sapiunt; in Eusebio tamen, vehementer hæreseos ejusmodi suspecta sunt: nempe 1. Arium recenter exortum, & ab Alexandro Episcopo Alexandrino synodicè damnatum, studio ac favore complexus est, ut patet ex ejusdem Ariani ad Eusebium Nicomediensem Epistolâ quam hæresi 68. refert Epiphanius. 2. Cum in Concilio Nicæno proposita fuisset fidei formula quâ Verbum dicebatur Patri Consubstantialiale, subscribere initio detrectavit, licèt postridiè, haud dubiè veritus Imperatoris minas, eam amplexus sit. 3. Post Concilium Nicænum, Arianorum conciliabulis non interfuit modò, sed etiam præfuit, velut Antiocheno, in quo (ut inferius dicitur) Nicænæ fidei formula multùm fuit coarctata, & Tyrio, in quo Athanasius catholicæ fidei columen vim passus, iniquè ex suâ sede dejectus est.

Objicies 1. Eusebius Cæsariensis, 1. subscripsit Symbolo, quod in Synodo Nicænâ confectum est: 2. Admisit *Consubstantialis* vocem, quam Nicæni Patres symbolo inseruerant: 3. Anathema cum iisdem Nicænis Patribus dixit iis, qui assenserent, Verbum de non extantibus factum fuisse, extitisse tempus, cum non esset: ergo Eusebius, saltem post Concilium Nicænum I. catholicè sensit de Dei Verbo. Probatur antecedens ex ipsiusmet Eusebii de Nicæno Concilio Epistolâ ad suos Cæsarienses, quam Socrates Hist. lib. 1. cap. 8. describit: in eâ enim Epistolâ sic loquitur: *Ne ipsam quidem vocem, Consubstantialis, rejicimus. Atque hæc dicta sint de fide quæ Nicææ promulgata est, cui quidem omnes consensimus .... Sed & anathematismum, qui post fidei formulam*

*mulam ab illis est promulgatus, haudquaquam moleste suscepimus.*

Resp. dist. ant. Eusebius subdolè subscripsit symbolo, quod in Synodo Nicænâ confectum est, conc. ant. subscripsit sincerè, neg. ant. Nempè in Epistolâ ad suos Cæsarienses ita exposuit Nicænum symbolum, ut ea quæ in illo proposita sunt, impierati Arianæ minimè contraria sint.

Et sanè asserit 1. eo tantùm sensu definitum fuisse, Verbum esse genitum ex substantia Patris, quòd non sit portio substantiæ Patris, ita ut rentâ sibi portione substantiæ, aliam partem ipsi tradiderit: *Et has quidem voces, Ex substantiâ, fassi sunt (ait) hoc significare, Filium quidem esse ex Patre, sed non tanquam partem ipsius Patris. Hunc sensum ut nos quoque amplecteremur, æquum omninò videbatur, cum pia doctrina prædicet, Filium ex Patre esse, nec tamen partem esse illius substantiæ; cum è contra earum vocum, Ex substantia, obuius sensus, à Nicænis Patribus intentus, sit, non esse quoddam extrinsecus productum & adventitium, ac neque de nihilo, neque de priùs existente materiâ factum.*

Asseruit 2. *Consubstantialis* vocem non aliud excludere, quàm quod ipse excludi voluit voce *ex substantia genitum*, scilicet Filium à Patre non processisse per divisionem, aut abscissionem, aut mutationem substantiæ, sicut contingit in corporum, aut animalium generatione: *Sic etiam (inquit) illud, Consubstantialem esse Filium Patri, cum allatis rationibus discussum esset, convenit juxta corporum modum, neque instar mortaliū animantium accipi debere: Nam neque per divisionem substantiæ, neque per abscissionem, nec per mutationem paternæ substantiæ, atque virtutis, id posse constare: Ingenitam enim Patris naturam ab his omnibus alienam esse. Addit, eandem Consubstantialis vocem hoc unum significare, quòd nulla sit similitudo inter Filium & creaturarum ge-*

nerationem: Verum ( ait ) hoc *Consubstantialem* esse Patri, nihil aliud significare, quam Filium Dei nullam cum creaturis ab ipso factis similitudinem habere; sed solius Patris, à quo genitus sit, per omnia similem esse: cum è contra voce *Consubstantialis*, Nicæni Patres adversus Arium significare voluerint, unicam & eandem, nec ullâ re diversam Patris ac Filii esse substantiam; ita ut personarum quidem, sed non essentiae sit aliqua distinctio.

Asserit 3. Concilium ideò damnassee hæc verba: *Ex non extantibus*: Fuit aliquando tempus cum non esset, quòd in Scripturis non reperientur: Sed & anathematismum qui post fidei formulam ab illis est promulgatus, haudquaquam molestè suscepimus, eò quòd peregrinis, & à sacra Scriptura alienis vocibus uti prohibeat, ex quibus omnis ferè dissensio ac perturbatio Ecclesiarum exorta est. Cum igitur nulla divinitus inspirata Scriptura istis unquam usa sit vocibus, *Ex non extantibus*, &: Fuit aliquando tempus cum non esset: & aliis quæ ibidem subjiciuntur, visum est, nullatenus rationi consentaneum esse, ut hæc vel dicerentur vel docerentur. Proinde huic recto ac salubri decreto, etiam consensimus. Verum licet sententias illas Eusebius proscripserit quoad verba quibus constant, non proscripsit tamen quoad sensum, quem continent, unde sensus iis vocibus damnati ne meminit quidem; sed nec meminisse potuisset, cum alibi, scilicet lib. 4. de Evangelicâ Demonstratione cap. 1. scribat, omnibus omnino creaturis convenire, quòd non factæ fuerint *ex non extantibus*: Nulla ( inquit ) ratione dici potest, de nihilo esse quidquam eorum quæ sunt: Neque enim esse quidquam potest ex eo quòd ipsum non sit: Quomodo enim id quòd non est, alteri ut sit causa erit? omne autem quodcumque est, ex uno qui solus est, & ante omnia est, qui quæ olim etiam illud respondit: Ego qui sum, ut esset, & accepit & habet.

Obji-

Objicies 2. Eusebius in Epistolâ ad suos Cæsarienses, loquens de symbolo Nicæno, conceptis terminis negat, Verbum esse factum: *Pari enumeratione* ( inquit ) *has etiam voces approbavimus : Genitum non factum .* 2. Ibidem pariter negat ; Verbum esse ex substantiâ aliâ à Patris substantiâ : *Nec ex alia* ( inquit ) *quadam hypostasi aut substantia , sed ex Patre esse .* 3. In libris contra Marcellum sæpiùs asserit, Verbum extitisse ante omnia sæcula : *Ecclesia Dei* ( ait libro 1. cap. 8. ) *Dei Filium unigenitum agnoscit eum , qui ante omnia sæcula de Patre fuit genitus .* Ejusdem libri cap. 9. damnat eos, qui contenderint, ipsum appellari debere creaturam : *Atque adeo reprehendi nec immeritò debent ii , qui ausi sunt illum creaturam nominare .* Tandem 4. ipsum sæpiùs vocat Dei Filium unigenitum, Deum de Deo, lumen de lumine : *Credimus* ( verba sunt quæ leguntur in symbolo, quod ipse Eusebius in Nicænâ synodo obtulit Imperatori Constantino ) *in unum Dominum Iesum Christum , Dei Verbum , Deum de Deo , lumen de lumine , vitam ex vita , Filium Unigenitum , primogenitum omnis creaturæ , ante omnia sæcula ex Deo Patre genitum , per quem omnia facta sunt .*

Ex iis autem locis sic conficitur argumentum: Ille catholicè de Verbo sensit, qui negavit, ipsum esse factum, esse ex substantiâ aliâ à substantiâ Patris, esse creaturam; qui è contra asseruit, Verbum esse ante omnia sæcula, esse Deum de Deo, Unigenitum Patris Filium: Atqui Eusebius illud negavit, & istud asseruit: ergo, &c.

Resp. conc. maj. neg. min. Ad cujus probationem disting. priorem partem: Eusebius negavit Verbum esse factum; esse ex aliâ substantiâ à Patris substantiâ; esse creaturam, *secundum quid*, conc. ant. *absolute*, neg. ant. Scilicet eo tantùm sensu Eusebius ea, de quibus agitur, negavit de Verbo, quòd contenderit, ea ipsi non convenire;

eâdem ratione, quâ cæteris entibus conveniunt : Nam cum alia entia *immediatè* à Deo condita non sint, omnia quippè per Verbum facta sunt; è contra ipsum Verbum *immediatè* ab ipso Deo productum est : *Pari ratione* (inquit ad suos Cæsarienses scribens) *has etiam voces approbavimus, Genitum non factum. Nam FACTUM Verbum esse dicebant COMMUNE reliquis omnibus creaturis, quæ per Filium factæ sunt; quibus nihil simile habeat Filius, ac proinde eum non esse facturam, his, quæ per ipsum facta sunt, similem; sed longè præstantioris, quàm reliquas creaturas, esse substantiæ.*

Ad alteram partem probationis, de quâ agitur, respondendum est, per has voces : *Ante omnia sæcula*, Eusebium id tantum intellexisse, quod intelligebant Ariani, nempe Verbum à Deo productum fuisse ante cæteras omnes creaturas : quippè sæcula recensentur inter res à Deo creatas : *Tempora & sæcula per illum facta sunt* ( inquit Ariani in Concilio Antiocheno ) Eâdem etiam ratione asserebant, Verbum esse Primogenitum omnis creaturæ, unicum ejus Filium. Jam verò quòd idem Eusebius Verbum dixerit Deum, nihil obstat, cum creaturæ excellentes nonnunquam in Scripturis Dii appellentur . Hinc patet deceptum esse Socratem, cum hist. lib. I. cap. 23. scripsit, inter Episcopos quæstionem non de re, sed de nomine tantum extitisse : *His de causis* ( inquit ) *singuli Episcopi velut contra adversarios scriptis voluminibus decertarunt. Et cum utrique dicerent, Filium Dei propriam personam atque existentiam habere, Deumque in tribus personis unum esse confiterentur; tamen, nescio quo pacto, nullatenus inter se consentire potuerunt, nec ulla ratione quiescere sustinuerunt.*

Objicies 3. In Martyrologiis Ussuardi, Adonis Viennensis, & in veteri Breviario manuscripto Ecclesiæ Lemovicensis, Eusebius inter Sanctos recensetur : ergo, saltem ante mortem, ejuravit hæresim Arianam.

Resp.

Resp. 1. illorum Martyrologiorum authores deceptos fuisse sumendo Eusebium Cæsariensem pro Eusebio Samosateno, qui sub Constantio Ariano Imperatore martyr occubuit; nempe in odium fidei, projectâ in illius caput tegulâ, ab Ariana muliere occisus est. Resp. 2. Ecclesiam Lemovicensem, si verum sit quod ex vetere illius Breviario objectum est, in facto errasse, seu catholicum credidit, quem multa probant juratum fuisse Arianum, etiam post habitam Synodum Nicænam.

## §. II.

*De formulis fidei post Nicænam Synodum editis.*

Not. Mortuo Constantino Imperatore, Ariani nullum non moverunt lapidem, ut *Consubstantialis* vocem, quâ fides Catholica continetur, obliterarent; unde variis in Conciliis varias fidei formulas ediderunt, in quibus aut omisâ est vox ejusmodi, aut apposti termini, quibus illius sensus corrumpetur: operæ pretium est, ut eas post Nicænum Concilium editas fidei formulas, hoc in paragrapho proponamus.

CONCLUSIO I. In Concilio Antiocheno quod habitum est anno 341. tres editæ sunt fidei formulæ.

Probatur 1. Socrates hist. lib. 1. cap. 10. duas refert fidei formulas Antiochiæ editas. 2. S. Athanasius lib. de Synodis tertiam describit. Prior formula nec consubstantialitatis, nec similitudinis, nec dissimilitudinis meminit: licenim habet: *Didicimus ab initio credere in unum Filium Dei unigenitum, ante omnia sæcula subsistentem, manentemque cum Patre qui ipsum genuit, per quem omnia facta sunt.* Altera similitudinem agnoscit inter Verbum & Patrem: *Credimus in unum Dominum Iesum Christum, Filium ejus unigenitum*  
E & Deum,

Deum, per quem omnia facta sunt, genitum ex Patre ante omnia secula, Deum ex Deo .... nec mutationi obnoxium nec conversioni, paternæ divinitatis, substantiæ, potestatis, consilii & gloriæ expressam undequaque imaginem. Deinde anathema dicit iis, qui dixerint, *Filium creaturam tanquam unam ex creaturis*. Tertia fidei formula, quam protulit Theophronius Tyanorum Episcopus, quamque probavit Antiocheum Concilium, sic habet: *Credimus in Filium Dei unigenitum, Deum, Verbum, potentiam & sapientiam, Dominum nostrum Iesum Christum, per quem omnia, eumque genitum esse ex Patre ante secula, Deum perfectum ex Deo perfecto, & apud Patrem existere in sua persona.*

Quæres, an tres illæ fidei formulæ sint Catholicæ.

Resp. 1. tres illas fidei formulas, si habeatur ratio solorum terminorum ex quibus constant, nihil continere, quod Catholicæ fidei adversetur. Resp. 2. quòd licet eæ formulæ cum Catholicâ fide, absolutè loquendo, conciliari possint; eam tamen non sufficienter exprimant: nempe nihil in eis est, quod (ut ostendimus agentes de Eusebio) puri Ariani non concedant. Resp. 3. eas fidei formulas esse suspectas de hæresi, tum quòd vox *Consubstantialis*, quæ iis temporibus erat fidei Catholicæ tesera, in eis omissa sit, tum etiam quòd editæ sint ab Episcopis, qui Athanasium, Eustathium, Paulum Constantinopolitanum, præcipua tunc fidei Nicænæ apud orientales columnina, ex sedibus iniquè deiecissent; unde corrigendus videtur Hilarii locus, quo Antiochenum, de quo agitur, Concilium *Sanctorum Synodus* appellatur: tum denique quòd trium personarum unitatem reducant ad unitatem consensûs & voluntatis, licet tamen unitatem essentiæ non excludant.

CONCLUSIO 2. Aliquibus post solutum  
An-



Antiochenum Concilium mensibus, quarta edita est fidei formula.

Probatur ex Socrate, qui hist. lib. 1. cap. 18. eam fidei formulam describit: sic autem habet: *Credimus in unigenitum ejus Filium Dominum nostrum Iesum Christum, qui ex Patre genitus est ante omnia secula, Deum ex Deo, lumen ex lumine; per quem omnia facta sunt in celo, & in terris. Addit ( quod & omnes ferè Ariani addebant, ne audirent, tanquam fidei Nicænæ destructores: ) Illos autem qui dicunt, ex eo quod non erat, extitisse Filium Dei, & ex alia substantia, non autem ex Deo, & tempus aliquando fuisse cum non esset, Ecclesia Catholica alienus esse statuit.*

Quæres, à quibus & quâ occasione edita sit quarta illa fidei formula.

Resp. ad 1. quartam illam fidei formulam editam fuisse à Narcisso Cilice, Theodoro Thrace, Mario Chalcedonensi & Marco Syro. Resp. ad 2. editam fuisse occasione depositionis Athanasii & Pauli ab Arianis tentatæ. Cum enim Constans Occidentalium Imperator de eâ certus factus fuisset, datis ( inquit Socrates hist. 2. cap. 18. ) ad fratrem Constantium literis, postulavit, tres ad se Episcopos mitti, qui de Pauli & Athanasii depositione rationem redderent: ii verò ( pergit idem author ) fidem Antiochiæ promulgatam penès se occultantes, quartam hanc fidei formulam à se compositam Constanti Augusto obtulerunt.

CONCLUSIO 3. Anno 345. Episcopi ad Concilium Antiochiæ coacti, quintam ediderunt fidei formulam.

Probatur autoritate Socratis, qui hist. lib. 2. cap. 19. hæc scribit: *Transacto post hæc, ( seu post legationem Episcoporum ad Constantem Occidentis Imperatorem ) rursus Orientales Episcopi collecta Synodo aliam fidei formulam conscripserunt, eamque ad Episcopos Italiæ*

( qui tunc Mediolani habebant Synodum ) *miserunt*.

Ea verò fidei formula, quam ibidem Socrates describit, prolixior quidem est aliis, quæ eò usque post Concilium Nicænum promulgatæ fuerant, sed nihil eis addit novi, nisi quasdam expressiones, quæ cum Arianorum hæresi facili conciliari possunt: Nempè asserit quidem, Filium per omnia similem esse Patri; sed substantiæ ne meminit quidem: Ait, eum ante tempora extitisse; sed tempora accenset creaturarum numero, hincque fit, ut ex eò loquendi modo colligi non possit æternitatem Verbo convenire. Docet quidem ipsum ex non extantibus factum non fuisse, sed nomen tantum, non verò rem ipsam proscribit: *Neque ( inquit ) citra periculum erroris dici potest Filium ex iis quæ non erant, extitisse, cum nusquam in divinis libris id de illo prædicatum reperitur*. Videtur innuere, Divinitatem ei reverà competere; verum immediatè post, eum dicit subjectum esse Patri: *Scimus enim illum, quamvis Patri ac Deo subjectus sit, nihilominus tamen genitum ex Deo, Deum natura esse perfectum ac verum*.

Postquam Episcopi, de quibus agitur, suum errorem variis vocum involucris obtegere conati sunt, damnant Pauli Samosatani de Christo hæresim; in eo ( inquit ) positam, quòd Christus *natura nudus sit ac simplex homo*: damnant quoque Photinum & Marcellum, quos errorum tum Sabellii circa Trinitatem, tum Pauli Samosatani circa Incarnationem, insimulant. Sed Marcellus in Concilio Sardicensi, utroque se purgavit, *docens ( inquit Socrates Hist. lib. 2. c. 21. ) verba libri sui non fuisse intellecta, atque idcirco se in suspicionem venisse erroris Pauli Samosatani*.

**CONCLUSIO 4.** Concilio Sirmienti tres fidei formulæ passim adscribuntur.

Probatur. Prior formula legitur apud Athanasium libro de Synodis, apud Hilarium de Synodis,

nodis, apud Socratem hist. lib. 2. cap. 30. Ex formula prætermittit tum *substantiæ*, tum *similitudinis* voces, constatque 25. anathematismis, quibus damnantur tum Photini de Christo errores, tum nonnullæ expressiones, quæ à primis Arianis adhibitæ fuerant, sed quæ tamen cum Arianæ dogmate facile conciliari poterant. Hilarius libro de Synodis illam formulam non improbat; imò censet Catholicam: sed ab Athanasio rejicitur tanquam opus, quo Ariana impietas, implicitè saltem, contineretur.

Altera fidei formula purum Arianismum complectitur, scilicet 1. Patrem idè Deum appellat, quòd ipsius etiam Christi sit Deus: *Duos autem Deos nec posse nec debere prædicari, quia ipse Dominus dixit: Ibo ad Patrem meum & Patrem vestrum, Deum meum & Deum vestrum.* 2. Prohibet, ne substantiæ aut similitudinis voces adhibeantur: *Quod verò quosdam hæc multos movebat de substantia, quæ græcè ὁσίας appellatur, id est, ut expressius intelligatur, Homoousion quod dicitur, aut Homoeusion, nullam omninò fieri oportere mentionem.* 3. Asserit, absolutè Patrem tum majestate, tum dignitate, tum gloriâ, esse Filio majorem: *Nulli potest dubium esse, Patrem honore, dignitate, claritate, majestate, & ipso nomine Patris, majorem esse.* 4. Docet, Filium esse Patri subiectum: *Catholicum esse nemo ignorat, duas personas esse Patris & Filii; majorem Patrem, Filium subiectum cum omnibus his, quæ ipsi Pater subiecit.* 5. Innuit, solum Patrem cum exclusione Filii esse æternum, invisibilem, & immortalem: *Patrem initium non habere, invisibilem esse, immortalem esse, impassibilem esse.*

Tertia fidei formula, quæ Sirmienfi Concilio tribuitur, quæque ab Ursacio & Valente delata est ad Ariminensem Synodum, à tribus aut quatuor Episcopis (ut testatur Athanasius lib. de Synodis) Sirmii conscripta est: In eâ verò formulâ rejicitur substantiæ nomen, & adstruitur simili-

tudo: *Vocabulum porro substantiæ, quia simplicius à Patribus positum est, & à populis ignoratur, & scandalum affert, eò quòd in Scripturis non continetur, placuit, ut de medio tolleretur, & nullam posthac de Dei substantia mentionem esse faciendam, eo quòd sacre Scripturæ nusquam meminere substantiæ Patris & Filii. Filium autem Patri per omnia similem dicimus, quemadmodum sacra litera dicunt & docent.*

Quæ mox relata est fidei formula, à juratis Arianis promulgata est; verum id factum fuit operâ Semiarianorum, qui cum in Concilio Ancyrano, præside Basilio Ancyrae Episcopo, secundam formulam Sirmiensem proscripserant, ab Imperatore Constantio, apud quem plura poterant, obtinuerunt, ut secunda Sirmiensis formula proscriberetur, ejusque authores subscriberent Ancyranæ, in qua rejecta fuerat *Consubstantialis* vox, inserta sola similitudo; sic enim habet quartus Concilii Ancyrani anathematismus: *Si quis audiens hoc: Quomodo Pater habet vitam in semetipso, similem non dicat etiam Filium Patri juxta essentiam, anathema sit.* Sic etiam, Epiphonio teste hæresi 73. habet anathematismus decimus octavus: *Si quis Patrem potestate simul, & substantia, Filii Patrem asserens, consubstantialem, vel ejusdem cum Patre substantiæ Filium esse dicat, anathema sit.* Verum Hilarius libro de Synodis, non refert, eum anathematismum ab Ancyranis Episcopis latum fuisse; nec enim exarabat in Concilio Synodica, quam Hilarius penes se habebat: *Literarum* (inquit) *fidem tenco non à Laicis sumptam, sed ab Episcopis datam.* Eo argumento S. Doctor utitur, ut Basilii, Eustathii, & Eleusii, qui Ancyrae adversus secundam Sirmiensem formulam convenerant, fidem, quæ tamen meritò multis aliis Patribus dubia visa est, tueatur.

CONCLUSIO 5. Anno 359. in Concilio Ariminensi Episcopi Occidentales ab Arianis ter-  
riti

riti & decepti probarunt tertiam formulam, quæ Sirmii promulgata fuerat.

Probatur autoritate Theodoreti, hist. lib. 2. c. 16. Athanasii in Epistolâ ad Africanos, Hilarii in fragmentis, Hieronymi in Dialogo adversus Luciferianos; ii Patres factum, de quo agitur, missum à Socrate, literis consignarunt. Hoc tamen inter hanc formulam & tertiam Sirmiensem discrimen est, quòd tertia Sirmiensis Filium dicat, *Per omnia similem Patri*, Ariminensis verò dicat solùm, *Similem Patri qui eum genuit, secundum Scripturas*.

Diximus, Ariminenses Episcopos, *territos ab Arianis*, formulam, de quâ agitur, probasse, ut nimirum observet lector 1. defuisse illi Concilio libertatem, quæ requiritur in iudiciis, ut eorum decreta valeant. Addidimus, eos pariter ab iisdem Arianis *deceptos fuisse*: nempe arbitrati sunt adversantes sibi Episcopos sincerè Arianam hæresim damnare variis anathematismis, quibus subscripserant; decepti præsertim fuerunt à Valente, qui eis author fuit, ut in anathematismo, quo decernebatur Filium Dei non esse creaturam, adderent, *Sicut aliæ creaturæ*, ne (quod ipsi non adverterunt) Verbum è numero creaturarum prorsus eximeretur. Formulam, quam (ut mox diximus) Ariminenses Episcopi, Arianorum minis territi, & fraudibus decepti probarunt, priùs seu dum libertate fruerentur, unanimi consensu rejecerant, ac insuper Valentem, Ursacium, Demophilum, & alios contradicentes Episcopos ab Episcopatu dejecerant. Vide Socratem hist. lib. 2. c. 37. Sozomenum hist. lib. 4. c. 19.

**CONCLUSIO 6.** Orientales Episcopi in Concilio Seleuciensi, quod eodem tempore celebrabatur, quo Ariminense, duplicem proposuerunt fidei formulam.

Probatur ex Socrate hist. lib. 2. cap. 39. ex Sozomeno lib. 4. cap. 21. Nempè scribunt auctores illi, Episcopos ex quibus constat synodus,

dus, in duas partes scissam fuisse. Quatuor supra triginta Episcopi, quorum caput erat Acacius Cæsariensis, protulerunt formulam, in qua tum *Homousion*, tum *Homoension*, tum *Anomæon* anathemate damnarunt. *Nos non refugimus authenticam fidem, quæ Antiochiæ in encæniis promulgata est ..... Ceterum quandoquidem hæ voces, Homousion, & Homoension tanquam voces à sacris literis alienas rejicimus: Anomæon autem anathemate damnamus ..... Similem autem Patri Filium esse planè confitemur.* Quæsi autem Acaciani, in quo eam Filii cum Patre similitudinem ponerent, responderunt, Filium *sola voluntate* similem esse Patri. Alii è contra Episcopi numero quatuordecim supra centum, quorum principes erant Basilus Ancyrae, Eleusius Sizici, *in omnibus* ( inquit Socrates ) *Nicænum Concilium suscipiebant, solam autem dictionem Consubstantialis reprehendebant:* unde rejectâ Acacianorum formulâ, authoribusque ab Episcopatu dejectis, perlectam alteram formulam, quæ Antiochiæ in encæniis promulgata fuerat, suâ subscriptione confirmarunt.

Non multò post solutum Seleuciense Concilium, Acaciani Episcopi numero quinquaginta, favente Imperatore Constantio, aliam fidei formulam, quam Socrates describit hist. lib. 2. c. 41. Constantinopoli promulgarunt: ea autem formula nihil differt ab eâ, quæ Ariminii probata fuerat, nisi quòd prohibuerit, *ut neque hypostasis, neque substantia de Deo diceretur.*

Aliquibus post annis ( Athanasio teste ) anno nimirum 359. formula, quam mox retulimus, Acacianis displicuit, quòd Filium Patri similem prædicaret; unde aliam Antiochiæ protulerunt in quâ apertè profitebantur hæresim Arianam quæ latebat in Constantinopolitanâ formulâ: asseverarunt ergo, Filium omninò dissimilem esse Patri, nec ullâ ratione esse similem.

His fidei expositionibus addi debent duæ aliæ.

Prior

Prior edita est in Pseudo-Concilio Sardicensi, quod Philippopoli celebratum est; in eâ Verbum *Deus de Deo* dicitur, tum anathemate damnantur *qui dicunt, fuisse aliquando tempus vel sæculum quando non fuit Filius*, aut, *Christum non esse Deum*. Posterior anno 398. edita est in Concilio Ancy-rano, cui Basilius præerat: ea est, quam de secun-dâ Sirmienti discentes, superius retulimus. Ita-que tredecim vel quatuordecim fidei formulæ in-tra quatuordecim annos ab iis promulgatæ sunt qui Nicænam admittere detrectabant. Octo prio-res referuntur à Socrate, aliæ verò ab Athanasio Hilario & Epiphanio.

Quæres, cur Episcopi, qui Nicænum symbo-lum non recipiebant, tot tamque diversas fidei formulas ediderint.

Resp. id contigisse 1. quòd mendacium diù sibi constare non possit.: 2. quòd ii de quibus agitur Episcopi post Concilii Nicæni tempora in tres factiones abiissent.

Prima factio fuit Anomæorum, qui Filium apertè creaturam dicebant, contendebantque nullâ re Patri esse similem, econtrâ prædicabant in omnibus dissimilem: Uno verbo quæcumque Arius de Verbo blasphemaverat, blasphemabant & Anomæi, qui & dicti sunt Eunomiani ab Eu-nomio presbytero, qui in omnibus capitibus hæ-refim Arianam apertè profitebatur.

Altera factio fuit Semi-Arianorum, qui fate-bantur quidem, Filium esse Patri *per omnia*, ac proindè *substantia* similem; sed consubstantia-lem non agnoscebant, aut saltem contendebant adhiberi non debere *Consubstantialis* vocem.

Tertia factio inter duas, quæ mox relatæ sunt, interjecta, eorum erat, qui neque Consobstantia-lem Filium, neque substantiâ similem esse prædi-cabant, & eundem creaturam ex cæterarum ordi-ne esse vel negabant, vel manifestè profiteri non audebant. Anomæorum capita fuerunt Aetus, Eunomius, Euzojus, Valens Mursæ & Ursacius

Singidoni, Germinius, Auxentius, Cajus, Demophilus. Inter Semi-Arianos præcipui erant Basilius Ancyranus, Georgius Laodicens, Sylvanus Tarsensis, Eleusius Cizicenus, & Macedonius Constantinopolitanus, qui postea in Spiritum Sanctum blasphemavit, ut suo loco dicemus. Tertiæ factionis princeps fuit Acacius Cæsariensis, cui suffragati sunt Episcopi, qui post Concilium Seleuciense formulæ Antiochiæ promulgatæ subscripserunt: hi non re, sed nomine tantum ( ut patet ex dictis superius ) à puris Arianis differebant. Vide Petavium lib. 1. de Trinitate, capite x.

## §. III.

*De Osio Cordubensi Episcopo.*

*Not.* De Osio Cordubæ in Hispaniâ Episcopo hic tria quæremus: 1. quid adversus Arianam hæresim egerit: 2. an in fide Catholicâ propugnandâ constans fuerit semper: 3. utrum catholicus, an verò hæreticus obierit.

CONCLUSIO 1. Osius plura egit adversus Arianam hæresim.

Probatur brevi enumeratione. 1. à Constantino Magno circa annum 323. Alexandriam missus est, ut ortas in Ægypto de fide & disciplinâ lites componeret: 2. Silvestri Papæ nomine præfuit Concilio Nicæno primo: 3. Julii Papæ nomine præfuit quoque Concilio Sardicensi, in quo Nicæna fides confirmata fuit: 4. Cordubæ Concilium celebravit, in quo proscripti sunt ii omnes quos Sardicense Concilium proscripserat, & absoluti quos absolverat. 5. Ab anno 355. ad plures alios, gravissimas ab Arianis persecutiones passus est. *Pro nihilo sunt tanta opera* ( verba sunt Arianorum ad Constantium, apud Athanasium in Epistolâ ad Solitarios ) *neque quidquam profecimus, quamdiu reliquus est Osius. Quamdiu enim ille*



*ille in suis agit, omnes in suis Ecclesiis agere videntur. Potest ille & verbis & auctoritate fidei sue omnes contra nos inducere. Hic princeps est Synodorum, & si quid scribit, ubique auditur. Hic formulam fidei in Nycæna Synodo concepit, & Arianos ubique pro hæreticis traduxit. 6. Arianorum factione tandem pulsus fuit in exilium, in quo plurimas ærumnas perpessus est.*

**CONCLUSIO 2.** Osius Sirmii exul communicavit cum Arianis, subscripsitque secundæ formulæ, quam Arianis in Concilio Sirmienti promulgaverant.

Probatur 1. auctoritate Socratis, qui hist. lib. 2. cap. 31. de Osió sic loquitur: *Necessitate compulsus ( Concilio Sirmienti ) adfuit invitus. Sed Cum consentire renueret, verbera & tormenta infligerunt seni ( & quidem centenario, ut scribit Athanasius in epist. ad Solitarios: ) itaque vi & necessitate adactus, editistum fidei expositionibus consensit atque subscripsit. 2. De eodem lapsu fusè tractat Hilarius lib. de Synodis, vocatque formulam, cui subscripsit Osius, blasphemiam per Osió & Potamió conscriptam. 3. Osió lapsum recenset pariter Athanasius in Epistolâ ad Solitarios: Tantam vim Constantius Imperator intulit seni, & ita eum arctè tenuit ( verba sunt Athanasii in Epistolâ ad Solitarios ) ut afflictus attritusque malis, tandem agrèque cum Ursacio & Valente communicaret, sed tamen contra Athanasium non subscriberet.*

**CONCLUSIO 3.** Osius Cordubensis in hæresi & impietate Arianorum non obiit.

Probatur ex S. Athanasio. 1. S. Doctor in libris post Osió mortem conscriptis, de Osió semper cum honore loquitur. 2. hæc de eodem habet idem Athanasius in Epistolâ ad Solitarios: *Verum ne ita quidem eam rem pro levi habuit: moriturus enim protestatus est, & Arianam hæresim condemnavit, vetuitque, eam à quoquam probari, aut recipi.*

Obji-

Objicies. Faustinus & Marcellus presbyteri Luciferiani, in libello quem Imperatori Theodosio porrexerunt, asserunt 1. Gregorium Illiberitanum Episcopum noluisse cum Osio, qui ex exilio redierat, communicare: 2. Osum ob id tentasse Gregorii depositionem, sed tentatam cum vellet exequi, è sede suâ divinitus dejectum & elisum fuisse. Iis authoribus subscribit Isidorus Hispalensis, libro de Viris illustribus cap. 14. Ergo, &c.

Resp. nec Faustinum, nec Marcellinum testes esse, qui fidem mereantur, nempè 1. libellus quem obtulerunt Theodosio, variis in Athanasium calumniis scatet: 2. Neminem fugit, Luciferianos ( ut erant Faustinus & Marcellus ) odisse Episcopos omnes, qui clericos sub Constantino lapsos cum suis ordinibus receperant.

#### §. IV.

#### *De Liberio Papa.*

Not. Hic quæremus 1. quid Liberius pro causâ fidei egerit adversus Arianos: 2. cui ex Sirimienfibus formulis subscripserit.

CONCLUSIO 1. Liberius plura egit pro Catholicâ fide adversus hæresim Arianam.

Probatur. Liberius, *primò*, in Epistolâ ad Osum damnavit Arelatense Concilium, in quo annuentibus ejus legatis, Vincentio Capuano & aliis, an. 353. decreta fuerat Athanasii damnatio. *Secundò*, anno 355. fortiter restitit eunuchis quos Constantius Imperator Romam miserat, ut eum ad damnandum Athanasium induceret. *Tertiò*, proscripsit Concilium Mediolanense, in quo major episcoporum pars, Còstantii minis territa sese ab Athanasii communione sejunxerat. *Quartò*, cum nec minis nec blanditiis Constantii, Mediolani ubi cum eo colloquium habuit, flecti potuisset, Beroëam Thraciæ in exilium missus est.

Vc-

Verùm qui, Theodoreto teste hist. lib. 2. cap. 16. dixerat : *Leges Ecclesiasticas observare pluris faciendum censeo, quàm Romæ domicilium habere*, biennio post, tædio affectus, & recuperandæ sedis studio exæstuans, ab Athanasij communione se sejunxit, subscripsitque fidei formulæ, quæ in Concilio Sirmienfi promulgata fuerat.

CONCLUSIO 2. Liberius Papa, cum adhuc Beroeæ exul esset, non subscripsit secundæ Sirmienfi formulæ, sed tantùm primæ.

Probatur prior pars, seu, Liberium uni ex formulis, quæ Sirmii editæ fuerant, subscripsisse, fidem facit Epistola, quam dedit ad Episcopos Orientales; sic enim in ea loquitur : *Dominus & frater meus communis Demophilus (Beroeæ Episcopus) qui dignatus est pro sua benevolentia fidem Catholicam exponere, quæ apud Sirmium à pluribus fratribus & coepiscopis nostris tractata, exposita, & suscepta est ..... ab omnibus qui in præsentis fuerunt, hanc ego libenti animo suscepi, in nullo contradixi, consensum accommodavi, hanc sequor, hæc à me tenetur* : Eam autem Epistolam, cum adhuc Beroeæ exul versaretur, scriptam fuisse, demonstrant hæc verba, quæ mox laudatis subjiciuntur : *Sanè petendum credidi sanctitatem vestram, quia jam pervidetis, in omnibus me vobis consentaneum esse, dignemini communi consilio ac studio laborare, quatenus de exilio dimittar, & ad Sedem, quæ mihi divinitus credita est, revertar*.

Probatur altera conclusionis pars, seu fidei formulam, cui Liberius subscripsit, non esse secundam, sed primam Sirmiensem.

Primò, Hilarius in fragmentis recensens Episcopos, à quibus edita fuerat formula, quam Liberius probavit, recenset plures Homoeusianos, quorum caput erat Basilii Ancyranus. *Perfidiam autem apud Sirmium descriptam, quam dicit Liberius Catholicam, & à Demofilo sibi expositam, hi sunt qui conscripserunt, Narcissus, Theodorus,*

dorus, Basilus, Eudoxius, Demophilus, Cecropius, Silvanus, Ursacius, Valens, Evagrius, Hyrenius, Exuperantius, Terentianus, Bassus, Gaudentius, Macedonius, Martinus, Aëtius, Iulius, Surinus, Simplicius & Iunior. At ab Homoousianis edita non fuerat posterior Sirmienfis formula; econtrà ubi primùm ad Homoousianorum notitiam devenit, eam, coactâ Ancyrae Synodo sub Basilio damnarunt. Nec obstat, quòd formulæ, cui Liberius subscripsit, subscripsissent non solùm Homoousiani, sed etiam (Hilario teste) Anomœi: siquidem ad id à Constantio coacti fuerant, apud quem Homoousianos plura potuisse, scribit Socrates lib. 2. historiæ, c. 24.

Secundò, Liberius, dum adhuc Beroeæ esset, subscripsit formulæ quæ conveniebat cum eâ, quam Sirmii, quò Beroeâ ab Imperatore vocatus fuerat, probavit postea: neque enim verisimile est, eum intra brevissimum tempus, probaturum fuisse duas formulas sibi invicem oppositas: atqui prior Sirmienfis, non autem posterior, conveniebat cum eâ, quam Liberius coram Constantio Sirmii probavit: utraque nimirum similitudinem Filii cum Patre profitebatur; cum è contra posterior dissimilitudinem assereret, damnaretque similitudinem.

Confirmantur, quæ mox dicta sunt, ex Sozomeno, qui lib. 4. hist. cap. 15. recenset 1. Liberii ex urbe Beroeâ ad urbem Sirmium evocationem: *Non multò post Imperator ( inquit ) ab urbe Roma Sirmium reversus, cum Occidentales Episcopi legationem ad ipsum misissent, Liberium Beroea ad se accersivit.* Recenset 2. Constantium conatum fuisse suadere Liberio, ut consubstantialitatis terminum damnaret: *Cumque adessent legati Episcoporum Orientis, convocatis sacerdotibus, qui in comitatu erant, Liberium cœpit compellere, ut Filium Patri non esse consubstantialem profiteretur.* Recenset 3. formulam, cui tunc Liberius consensit: *Instabant autem, & im-*  
pera-

peratorem ad hoc impellebant *Basilius*, *Eustathius*, & *Eleusius* ( *Homoeousianorum* principes ) qui præcipua apud ipsum authoritate pollebant . Qui cum ea , quæ contra *Paulum Samosatensem* & contra *Photinum Episcopum Sirmii* decreta fuerant , ac prætereà fidei formulam in dedicatione *Antiochenfis Basilicæ* editam , in unum tunc libellum coniecissent ; perinde quasi quidem sub obtentu vocabuli *Consubstantialis* , propriam hæresim stabilire conarentur , effecerunt , ut *Liberius* , & *Athanasius* , *Alexander* , *Severianus* , & *Crescens Africa Episcopi* , ei formulæ consentirent . Consenserunt pariter *Vrsacius* , & *Germinius Episcopus Sirmii* & *Valens Mursæ* , & quotquot ex *Orientis* partibus aderant *Episcopi* . Recenset 4. confessionem à *Liberio* iisdem *Episcopis* propositam : Sed & confessionem ( ait ) à *Liberio* vicissim susceperunt , qua eos , qui *Filium* secundum substantiam & per omnia *Patri* similem non esse assererent , alienos ab *Ecclesia* pronuntiabat .

Ex eâ *Sozomeni* narratione patet 1. in formulâ cui *Liberius Sirmii* subscripsit , damnatam non fuisse *Consubstantialitatem* , licet *Consubstantialis* vox omiſſa fuerit , quòd quidam ( *Sabelliani* nimirum , ac *Pauli Samosatensis* discipuli ) sub illius vocis obtentu propriam hæresim stabilire conarentur . Patet 2. à *Liberio* damnatos fuisse *Anomæos* , qui in alterâ *Sirmienſi* formulâ *Filium Patri* dissimilem asseruerant . Patet 3. eundem *Liberium* propugnasse *Filii* cum *Patre* per omnia , etiam secundum substantiam , similitudinem : Ita verò sese tunc *Liberius* gessit , quòd *Anomæi* ex occasione formulæ , cu *Beroeæ* subscripserat , divulgassent , *Consubstantialitatem* & similitudinem à *Liberio* fuisse proſcriptas . Nam cum *Eudoxius* ( verba sunt *Sozomeni* ) & qui cum illa opinioni *Aetii* favebant , *Antiochiæ Oſii* Epistolam ( hoc est subscriptam ab eo secundam formulam *Sirmienſem* ) accepissent , sparsis rumoribus divulgaverant , *Liberium* quoque consubstantialis

*tialis vocabulum condemnasse, & Filium Patri dissimilem confiteri.*

Objicies 1. Liberius ei Sirmienti formulæ subscripsit, cujus beneficio sperabat se revocandum esse ab exilio: atqui ejusmodi non erat prior, sed altera tantum, quæ Arianismum apertè profitebatur: ergo, &c.

Resp. conc. maj. neg. min. Ratio est 1. quia vix edita fuerat posterior fidei formula, cum Arianis ipsis & Constantio Imperatori displicuit: unde nullum non moverunt lapidem, ut exemplaria ab iis qui eam descripserant, reciperent: *Sciendum est, (inquit Socrates hist. lib. 2. cap. 31.) Episcopis qui Sirmii convenerant, latinam illam fidei formulam abs se editam, postea displicuisse .... Quocirca operam dederunt, ut eam ab illis qui descripserant, reciperent. Sed quoniam multi eam occultabant. Imperator edicto præcepit, ut exemplaria ejus omnia conquirentur, penam interminatus, si quis eam occultasse deprehenderetur.* Ratio est 2. quia secunda Sirmiensis formula plurimum exulcerarat Semi-Arianorum, seu Homoeusianorum animos; unde Basilius eorum caput, statim Concilium habuit Ancyrae, in quo altera illa Sirmiensis formula proscripta fuit: Cum verò (Sozomeno teste hist. lib. 4. cap. 15.) Constantius Imperator Basilio ac cæteris Semiarianis impensè faveret, mirum non est, quòd Liberius non sperarit, se alterius formulæ Sirmiensis subscriptione ab exilio revocandū esse.

Objicies 2. Liberius ei formulæ subscripsit, quam Hilarius vocat *perfidiam apud Sirmium descriptam*: atqui Hilarius non vocavit priorem formulam Sirmiensem *perfidiam apud Sirmium descriptam*: siquidem lib. de Synodis eam tanquam catholicam exponit: ergo, &c.

Resp. conc. maj. neg. min. Ad cujus probationem dist. ant. Hilarius libro de Synodis priorem formulam Sirmiensem, sumptam in se & independenter à circumstantiis, exposuit tanquam

catholicam, conc. ant. sumptam non in se tantum, sed etiam dependenter à circumstantiis, neg. ant. Et sanè licèt in sensu obvio, seu quem verba præ se ferebant, nihil falsi contineret; erat tamen maximè suspecta ratione Episcoporum, à quibus conscripta fuerat: nam in Ancyranâ Synodo non erant solùm Episcopi Semi-Ariani, sed etiam Ariani, Valens, Ursacius & alii. 2. Illi formulæ Liberius addidit condemnationem Athanasii, eumque tum ab Episcopali sede, tum à communione fidelium expulit. Ego (inquit in Epistolâ, quam adhuc Beroeæ exul scripsit ad Orientales) *Athanasium non defendi; sed quia susceperat illum bonæ memoriæ Iulius Episcopus decessor meus, verebar, ne fortè in aliquo prævaricator judicaretur. At ubi cognovi, quando placuit Deo, justè vos illum condemnasse, mox consensum commodavi sententiis vestris .... Itaque amoto Athanasio à communione omnium nostrum, cujus nec Epistolæ à me suscipienda sunt, dico me parem cum omnibus vobis & universis Episcopis Orientalibus, seu per universas provincias pacem & unanimiæ habeo.* 3. Rejecta est, *Consubstantialis*, vox, quæ erat Catholicorum veluti tessera; proindèque licèt Hilarius probasset priorem Sirmiensem formulam in se spectatam, potuit postea in fragmentis propter circumstantias peculiare eam vocare *perfidiam apud Sirmium conscriptam, quam dicit Liberius catholicam.*

## C A P U T II.

### *De Divinitate Spiritus Sancti.*

Not. 1. **E**X Arii principiis sequebatur quidem Spiritum sanctum non esse Deum, sed cum Arius id apertè non protulisset, nec Alexandrina Synodus, nec Nicæna I. in quibus solemniter damnatus est, hæresis ejusmodi minuerunt.

Not. 2.

*Not. 2.* Quod Arius apertè non docuerat, palam deinceps asseruerunt illius discipuli, & quidem primò Aetius, & illius auditor Eunomius, Eudoxius Episcopus Antiochenus, alique omnes, qui blasphemabant, Filium esse Patri dissimilem. *Secundò*, idem dogma propugnarunt plures ex Semi-Arianis, seu ex iis qui tuebantur *homoousion*, hoc est, Filium esse similem Patri: sed quòd apertiùs inter eos id propugnarit Macedonius, audiit apud veteres tanquam author Pneumatomochorum sectæ, seu eorum qui Spiritui Sancto divinitatem abnegarunt.

*Not. 3.* Ut Catholicam de Spiritus Sancti divinitate doctrinam asseramus, methodi causâ hocce caput in tres articulos dividemus; in priore quæremus, utrum divinitas Spiritus Sancti possit ex Scripturis demonstrari; in altero, utrum demonstrari possit ex Patribus; in tertio tandem solventur Macedonianorum argumenta.

## ARTICULUS I.

*Virum divinitas Spiritus Sancti possit ex  
Scripturis demonstrari.*

*Not. 1.* **S**cripturæ textus, de quibus agitur sunt 1. ii quibus ipsum Dei nomen Spiritui Sancto tribuitur; sunt 2. ii quibus characteres, qui Deo proprii sunt, dicuntur Spiritui Sancto convenire; nec non ii in quibus agitur de Spiritus Sancti efficientiâ & operatione.

### §. I.

*Profertur argumentum petatum ex Dei  
nominibus.*

**CONCLUSIO.** Divinitas Spiritus Sancti potest ex iis Scripturæ locis demonstrari, quibus Dei nomen Spiritui Sancto tribuitur.

Pro-



Differt. I. *De Existent. SS. Trin.* III

Probatur. Ille verè ac substantialiter est Deus cui Scripturæ Dei nomen tribuunt, ipsum creaturis opponendo: atqui Scripturæ Spiritui Sancto tribuunt Dei nomen, ipsum creaturis opponendo: ergo Spiritus Sanctus est verè ac substantialiter Deus. Minor propositio, in quâ posita est difficultas, subsequenter momentis ostenditur.

*Primò*, Petrus Actorum 5. sic Ananiam alloquitur: *Anania, cur tentavit satanas cor tuum, mentiri te Spiritui Sancto, & fraudare de pretio agri?* Eum autem, cui Ananias mentitus fuerat, hoc est Spiritum Sanctum, Petrus mox Deum vocat, ipsumque creaturis opponit, seu dicit Ananiam non creaturis, sed ipsimet Deo fuisse mentitum: *Non es (ait) mentitus hominibus, sed Deo: ergo, &c.*

*Secundò*, Textus Scripturæ in quibus Deus ipse dicitur locutus fuisse, in aliis ejusdem Scripturæ locis plerumque explicantur de Spiritu Sancto. Hæc verba, *Audite audientes, & nolite intelligere*, quæ Isaiæ 6. Deo exercituum tribuuntur, Paulus ad Hebræos 3. dicit fuisse à Spiritu Sancto prolata: *Quia benè (inquit) Spiritus Sanctus locutus est per Isaiam prophetam ad Patres nostros dicens, Vade ad populum istum, & dic ad eos, Aure audietis & non intelligetis.* Psalmo 105. hæc habentur: *Tentaverunt Deum in iniquo: at Deus ille, quem Judæi tentarunt, à Paulo vocatur Spiritus Sanctus: Quapropter (ait ad Hebræos 13.) sicut dicit Spiritus Sanctus, hodie si vocem ejus audieritis, nolite obdurare corda vestra, sicut in exacerbatione secundum diem tentationis in deserto, ubi tentaverunt me patres vestri.* Apostolus primæ ad Corinth. 12. fideles vocat templum Dei: *Nescitis, quia templum Dei estis vos?* Verùm postea eosdem fideles vocat templum Spiritus Sancti: *An nescitis, quoniam membra vestra templum sunt Spiritus Sancti?* Idem Apostolus, Dei opera recensens, ea promiscuè

Deo ac Spiritui Sancto tribuit : *Divisiones* ( inquit ad Corinthios scribens ) *gratiarum sunt, idem autem Spiritus .... Divisiones gratiarum sunt, idem verò Deus, qui operatur omnia in omnibus*. Iis autem gratiis singulariter enumeratis, sic concludit : *Hæc autem omnia operatur unus atque idem Spiritus, dividens singulis, prout vult*.

*Tertio*, ipsum *Spiritus* nomen, quod tertiæ Trinitatis personæ tribuitur, eum Deum esse non obscure innuit. Scilicet ( ut advertit Athanasius in libro ad Serapionem ) Spiritus Sanctus nusquam ferè in Scripturis *Spiritus* appellatur, quin aut præmittantur aut subsequantur verba quæ vocem illam *Spiritus* ad Deum referant; vel si ejusmodi verba nec præcedant, nec subsequantur, Spiritus Sanctus non dicitur simpliciter *Spiritus*, sed cum addito : *Spiritus Dei, Spiritus Christi*.

*Quarto*, idem pariter evincit *Paracleti* nomen quod Spiritui Sancto tribuitur, & præsertim si attendatur, quòd ille Paracletus dicatur æqualis Filio : *Ego* ( ait Christus Joannis 14. ) *rogabo Patrem, & alium Paracletum dabit vobis* : nempe vox, *Alium*, comparisonem includit; ac proinde significat, Paracletum quem Christus pollicetur à Patre mittendum, sibi omninò æqualem fore.

## §. II.

*Profertur argumentum petitum ex  
characteribus Deo pro-  
priis.*

CONCLUSIO. Divinitas Spiritus Sancti potest iis Scripturæ locis demonstrari, quæ illi tribuunt characteres, qui Deo soli conveniunt.

Probatur. Ille est Deus, cui Scripturæ tribuunt cha-

characteres, qui Deo soli conveniunt: non enim aliâ ratione judicamus Patrem in divinis esse Deum, quàm quòd Scripturæ ei tribuant divinitatis characteres; atqui Scripturæ tribuunt Spiritui Sancto characteres, qui soli Deo conveniunt: ergo Spiritus Sanctus est verè ac substantialiter Deus. Probatur minor propositio. Characteres qui Deo soli conveniunt, sunt processio à Deo ipso, expressa illius invocatio in Baptismatis formulâ, cogitationum cordis cognitio, collatio cœlestis gratiæ quæ sanctificet hominem, peccatorum remissio, in creaturis mente præditis habitatio, tanquam in templo; Apostolorum, Doctorum, Episcoporum constitutio ac missio: Sed Scripturæ ea omnia tribuunt Spiritui Sancto, ut patebit attendenti ad ea quæ mox subjicienda sunt.

*Primò*, Processio unius ab alio, in divinis arguit æqualitatem; eo nimirum argumento Patres quondam usi sunt, ut Verbi divinitatem adversus Arianos assererent: ut videre est apud Ambrosium lib. 1. de Spiritu Sancto cap. 4. Nec id mirum est: siquidem procedere ab alio, est, recipere ipsum esse principii, à quo est processio. Atqui Spiritus Sanctus à Deo procedit, juxta illud Christi apud Joannem c. 26. *Cum autem venerit Paraclitus, quem mittam vobis à Patre, Spiritum veritatis, qui à Patre procedit, ille testimonium perhibebit de me.*

*Secundò*, Ille verè ac substantialiter est Deus, cujus expressa invocatio necessariò requiritur, ut Baptisma valeat: non enim alteriùs quàm Dei ipsius nomen invocatur in formula sacramenti in quo fidem nostram profitemur, scilicet fides non est in creaturam, sed in Deum tantum: Atqui expressa invocatio Spiritus Sancti necessariò requiritur, ut Baptisma valeat, ita enim docet unanimis Patrum traditio, ut de sacramentis agentes ostendimus. Athanasii est illud argumentum; sic enim libro ad Serapionem loquitur: *Nam*

qui de Trinitate aliquid eximit, & in solo Patris nomine baptizatur, aut in solo nomine Filii, aut sine Spiritu, in Patre ac Filio, nihil accipit; sed inanis ac sine initiatione manet tam ipse quàm qui tribuere videtur. Præterea, is qui expressè invocatur in Baptismatis formulâ, in unum, cum Patre & Filio, majestatis ac honoris consortium adjungitur: ergo utrique est æqualis. Addendum est, efficientiam Baptismatis non minùs adscribi Spiritui Sancto, quàm aliis divinis personis: proindeque Deus est, sicut & aliæ personæ.

Tertiò, Qui scrutatur internas hominis cogitationes, verè ac substantialiter est Deus, juxta illud Scripturæ: *Scrutans corda & renes Deus*: atqui Spiritus sanctus scrutatur internas hominis cogitationes: *Nobis autem* (ait Apostolus 1. ad Corinth. 2.) *revelavit Deus per Spiritum suum; Spiritus enim omnia scrutatur, etiam profunda Dei. Quis enim hominum scit, quæ sunt hominis, nisi spiritus hominis qui in ipso est? ita & quæ Dei sunt, nemo cognovit, nisi Spiritus Dei.*

Quartò, Ille verè ac substantialiter est Deus qui confert gratiam, quæ hominem sanctificet: siquidem (ut Basilius ait in quinto adversus Eunomium) *creatura non potest sanctificare creaturam*: Atqui Spiritus sanctus confert gratiam quæ hominem sanctificet. Nam 1. non ob aliud in Epistolâ ad Romanos vocatur *Spiritus Sanctificationis*, ad Romanos octavo, *Spiritus adoptionis*, ad Hebræos 11. *Spiritus gratiæ*, Actorum 15. gratia quâ gentes sanctificatæ sunt, Spiritui sancto tanquam causæ tribuitur, *In nationes gratia Spiritus Sancti effusa est*, ad Romanos quinto, *Charitas Dei diffusa est in cordibus nostris per Spiritum Sanctum qui datus est nobis*, ad Galatas quinto, *Fructus autem Spiritus est charitas, gaudium, pax, patientia, bonitas, longanimitas.*

Quintò, Qui peccata remittit, verè Deus est:  
atqui

atqui Spiritus sanctus peccata remittit : Nempè  
 1. Spiritus sanctus est principium, unde oritur  
 potestas dimittendi peccata, quâ Ecclesia fruitur :  
*Accipite* (inquit Christus Joannis 20.) *Spiritum*  
*Sanctum* : *quorum remiseritis peccata, remittuntur*  
*eis*. 2. Ei quoque tanquam causæ tribuitur effe-  
 ctus potestatis ministri, quâ per Baptismum pec-  
 cata dimittuntur ; nam non datur baptismus ( ut  
 jam superius observatum est ) nisi nomine, au-  
 ctoritate, & invocatione Spiritus sancti : *Bapti-*  
*zantes eos* ( ait Christus ) *in nomine Patris & Filii*  
*& Spiritus Sancti*.

Sextò, Qui in creaturis mente præditis inhabi-  
 tat tanquam in templo, verè ac substantialiter  
 est Deus : Nam 1. solus Deus potest in creaturas  
 illabi, seu, totum illarum esse pervadere ; sunt  
 enim Dei respectu, sicut chrystallus perlucida re-  
 spectu solis. 2. Soli Deo templum debetur, quip-  
 pè ipsi soli exhibendus est latriæ cultus. 3. Inha-  
 bitatio unius divinæ personæ in nobis, efficit, ut  
 à Patre simul ac Filio inhabitemur : atqui Spiritus  
 sanctus in creaturis mente præditis inhabitat  
 tanquam in templo : *Nescitis* ( ait Apostolus 1.  
 ad Corinth. 3. ) *quia templum Dei estis, & Spi-*  
*ritus Dei habitat in vobis* ? Capite 6. idem cla-  
 riùs asserit : *An nescitis, quoniam membra vestra*  
*templum sunt Spiritus sancti* ?

Septimò denique, Is à quo sunt Apostolorum  
 episcoporum, ac Doctorum constitutio ac missio,  
 verè ac substantialiter est Deus : neque enim crea-  
 tura potest Dei ministros constituere ac mit-  
 tere : unde nec ipse Christus, ut homo est, seme-  
 tipsum clarificavit, ut pontifex fieret, nec Moyses,  
 nec prophetæ ab hominibus missi sunt ac consti-  
 tuti, sed à Deo ipso : Atqui Spiritus sanctus con-  
 stituit ac misit Apostolos, Episcopos, Doctores,  
 ministros : *Ministrantibus autem illis Domino &*  
*jejunantibus* ( ait Lucas Actorum 13. ) *dixit Spiri-*  
*tus Sanctus* : *Segregate mihi Saulum & Barna-*  
*bam in opus, ad quod assumpsi eos .... Et ipsi quidem*

*missi à Spiritu Sancto, abierunt. Hæc pariter leguntur Actorum cap. 20. Attendite vobis, & universo gregi, in quo vos Spiritus Sanctus posuit Episcopos regere Ecclesiam Dei. Capite 21. Agabus in Spiritum Sanctum, tanquam in authorem, prophetiam suam refert: Hæc dicit Spiritus Sanctus, &c. Paulus 1. ad Timoth. 4. eâdem ratione loquitur: Spiritus manifestè dicit, quia in novissimis temporibus discedent quidam à fide. Plurima similia loca laudari possunt ex Scripturis, sed brevitatis causâ hîc ea prætermittimus.*

## ARTICULUS II.

*Verum divinitas Spiritus Sancti possit ex Traditione demonstrari.*

*Not.* **U**T cum methodo pertractetur difficultas, de quâ agitur, articulum hunc partiemur in tres paragraphos. In priore expendemus, quid Patres trium priorum sæculorum docuerint de divinitate Spiritus Sancti: in altero quæremus, quid de eâdem quæstione senserint quarti, quinti & aliorum sæculorum Patres.

### §. I.

*Quid de divinitate Spiritus Sancti senserint Patres trium priorum sæculorum.*

**CONCLUSIO.** Patres trium priorum sæculorum docuerunt, Spiritum Sanctum esse verè ac substantialiter Deum.

Probatur. Inter Patres trium priorum sæculorum non ultimum tenent locum Hermas, Clemens Romanus, Justinus, Athenagoras, Irenæus, Lu-

Lucianus, Clemens Alexandrinus, Tertullianus, Origenes, Cyprianus, uterque Dionysius, Romanus, & Alexandrinus, tandem Gregorius Thaumaturgus. Atqui ii Patres docuerunt, Spiritum sanctum esse verè ac substantialiter Deum: ergo, &c.

*Hermas.*

Hermas, seu author libri qui *Pastor* inscribitur, asserit, humanam Christi naturam servisse Spiritui Sancto: *Cum igitur ( inquit ) corpus illud parvisset omni tempore Spiritui sancto ... fortiter cum Spiritu sancto comprobatum, Deo ( in cœlum ) receptum est.* Atqui humanitas Christi, alii quàm Deo servire nec potuit nec debuit, cum inter ea quæ educta sunt ex nihilo, principem locum tenuerit.

*Clemens Romanus.*

Clemens Romanus ( teste Basilio, lib. de Spiritu Sancto, cap. 29. ) docuit, vitam eâdem ratione convenire Spiritui Sancto, quâ convenit Patri ac Filio: *Sed & Clemens antiquior: ( verba sunt Basilii ) vivit, inquit, Deus & Dominus Iesus Christus, & Spiritus Sanctus:* atqui is, cui vita convenit eâdem ratione, quâ convenit Patri ac Filio, est verè ac substantialiter Deus. Confirmatur argumentum ex eo, quòd Clemens Patrem, Filium ac Spiritum Sanctum opponat diis gentium, quibus vita non convenit; cum è contrà Deus verus in Scripturis *Deus vivens* appelletur.

Dices, verba quæ Basilius ex Clemente Romano laudat, neque in Epistolâ 1. Clementis, nec in secundâ reperiri, ac proindè firmum non est argumentum, quod ex iis verbis deducitur.

Sed inanis est illa objectio: nam integram non habemus alteram Clementis Epistolam, sed tantum fragmenta quædam: itaque verba quæ Ba-

filii ex Clemente laudat, reperiiebantur in iis ejusdem Epistolæ fragmentis, quæ haud dubiè Basilius perlegerat.

*Justinus.*

Justinus Apologiâ quæ dicitur secunda, docet  
1. Christianos non esse atheos ( ut gentiles calumniabantur: ) *Fatemur quidem, ( ait ) nos tantum qui habentur, Deorum esse expertes, & atheos, sed non verissimi illius Dei, Patris videlicet, &c.*  
Docet 2. Christianos Patrem, Filium ac Spiritum sanctum eodem cultu, latriæ nimirum, de quo erat quæstio, prosequi: *Verum ( inquit ) hunc ipsum & qui ab eo venit .... Filium & Spiritum Sanctum colimus & adoramus, cum ratione & veritate venerantes.*

Inde verò sic arguitur: Ille verè ac substantialiter est Deus, cui Christiani eundem exhibent cultum, quem exhibent æterno Patri; atqui, ex Justino, Christiani eundem Spiritui Sancto cultum exhibent, quem æterno Patri; ergo, &c.

*Athenagoras.*

Athenagoras in suâ pro Christianis apologiâ atheismi crimen, quod gentiles Christianis imponebant, sic repellit: *Quis igitur non miretur, cum audiat, nos qui Deum Patrem prædicamus & Deum Filium, & Spiritum Sanctum, eorum in unitate virtutem, & in ordine distinctionem explicantes, atheos vocari?*

Idem author eodem in libro sic hisce verbis Christianorum de divinitate fidem proponit: *Deum asserimus, & Filium ejus Verbum, & Spiritum Sanctum, virtute unitos Patrem, Filium & Spiritum Sanctum; Filius enim Patris mens, Verbum & sapientia est, & effluentia, ut lumen ab igne, Spiritus.*

Ex iis Athenagoræ textibus sic argumentum conficitur: Ille credidit, Spiritum sanctum esse Deum, qui asseruit, idè Christianos non esse atheos



atheos, quòd profiteantur se Patrem, Filium & Spiritum sanctum colere; qui docuit, eum emanare ab eodem fonte, Patre nimirum, à quo Filius emanat; qui voluit, Spiritum sanctum à Patre effluere sicut lumen ab igne: atqui Athenagoras id asseruit, id docuit, id voluit: ergo Athenagoras credidit, Spiritum sanctum esse verè ac substantialiter Deum.

Dices, Athenagoram non asserere, Spiritum sanctum esse ejusdem cum Patre, & Filio substantiæ, sed tantum eorum virtutem.

Verum illa objectio nullius est momenti. Nam 1. Athenagoras asserit, idè Christianos non esse atheos, quòd Patrem, Filium, & Spiritum sanctum venerentur: 2. Conceptis terminis asserit, Spiritum sanctum esse Deum: *Deum asserimus*, &c. 3. Eodem modo vult, Spiritum sanctum esse Patris ac Filii virtutem, quo ibidem vult, Filium esse Patris Sapientiam: atqui Filius, ex Athenagora, est substantialis Sapientia Patris: ergo & Spiritus sanctus est utriusque substantialis virtus. Confirmatur ex eo, quòd quidquid est in Deo, sit Deus; ac proindè cum Sapientia illa, cum ea Virtus, sint in Deo, Athenagorà teste, necessariò sunt Deus.

*Irenæus.*

Irenæus, libro 1. adversus hæreses c. 19. docet, Deum Patrem omnia, sive visibilia sive invisibilia, non minùs per Spiritum sanctum quàm per Verbum olim condidisse, ac etiam nunc gubernare: *Nihil enim (inquit) indiget omnium Deus; sed per Verbum & Spiritum suum omnia faciens & disponens, & gubernans, & omnibus esse præstans.* Eadem ratione loquitur libro 4. cap. 37. *Nec enim indigebat horum (angelorum) Deus ad faciendum quæ ipse apud se præfinierat fieri, quasi ipse suas non haberet manus. Adest enim ei semper Verbum & Sapientia, Filius & Spiritus, per quos, in quibus omnia liberè*

Et sponte fecit. Mox ibidem addit, ad imaginem Dei Patris, Filii, & Spiritus Sancti hominem conditum fuisse: *Ad quos loquitur dicens, Faciamus hominem ad imaginem & similitudinem nostram.*

Idem S. Martyr, libro 5. cap. 12. docet, Spiritum Sanctum in eo differre ab afflatu quo Adamus animatus est, quod Spiritus Sanctus sit increatus, omnium rerum creator; afflatus econtrà sit creatus & temporalis: *Aliud est (inquit) afflatus vitæ, qui & animale efficit hominem, & aliud Spiritus vivificans, qui & spirituale effecit eum.* Addit, afflatum omni homini datum fuisse, cum econtrà Spiritus Sanctus iustis tantum conferatur: *Afflatum quidem communiter omni, qui super terram est, populo dicens datum; Spiritum autem propriè his, qui conculcant terrenas concupiscentias:* Tum ex Isaiâ, distinguit originem Spiritus Sancti ab origine afflatus: *Propter quod rursus ipse Isaias distinguens ea, quæ prædicta sunt, ait, Spiritus enim à me exiet, & flatum omnem ego feci:* Observat, Isaiam iis verbis prædixisse Spiritus Sancti, qui in Deo est, effusionem in genus humanum: *Spiritum quidem propriè in Deo deputans, quem in novissimis temporibus effudit per adoptionem filiorum in genus humanum: afflatum autem communiter in conditione & factura ostendens illum.* Addit tandem, afflatum idè esse temporalem, quia factus est, econtrà Spiritum idè esse æternum, quod minimè factus sit: *Aliud autem est, quod factum est, ab eo qui fecit. Afflatus igitur temporalis, Spiritus autem sempiternus.*

Ex textibus, quos ex Irenæo mox laudavimus, sic licet argumentari. Ille credidit, Spiritum Sanctum esse verè ac substantialiter Deum, qui docuit, omnia per Spiritum facta fuisse; eâ nimirum ratione S. Martyr utitur, ut Verbum eximat ex creaturarum numero, ipsiusque divinitatem asserat; qui scripsit, Spiritum Sanctum cum Pa-  
tre

tre & Verbo operam suam contulisse ad hominis formationem; qui voluit, hominem ad Spiritus Sancti imaginem creatum fuisse, scilicet non ad creaturæ, sed ad Dei ipsius imaginem homo primum factus est, juxta illud Scripturæ, quod ipse Irenæus laudat: *Faciamus hominem ad imaginem & similitudinem nostram*; qui asseruit, Spiritum Sanctum in eo ab afflatu, cæterisque rebus creatis differre, quod afflatus factus sit, non autem Spiritus Sanctus; quod afflatus aliæque creaturæ temporales sint, è contra verò Spiritus Sanctus sit æternus; quod Spiritus sanctus à Deo exierit: *Spiritus à me exiet*, cum è contra afflatus à Deo factus sit: Atqui ea omnia docuit, asseruit, voluit, scripsit Irenæus: ergo credidit, Spiritum Sanctum esse verè ac substantialiter Deum.

*Lucianus.*

Lucianus floruit Marci Antonini temporibus, hoc est circa Christi annum 170. Illi adscribitur Dialogus qui Philopatris inscribitur. In eo dialogo loquens inducitur Christianus, qui ethnicum mysteria religionis edoceat. Roganti ethnico atque dicenti: *Quemnam igitur tibi jurabo?* Tryphon, Christiani personam sustinens, sic respondet: *Deum alitè regnantem, magnum, immortalem, cælestem, Filium Patris, Spiritum ex Patre procedentem, unum ex tribus, & ex uno tria.* Illud Tryphonis responsum ethnicus excipit hac interrogatione: *Non intelligo, quid dicas, Vnum tria, Tria unum.*

In eo textu tres personæ SS. Trinitatis clarè designantur. Scilicet ille Deus alitè regnans, est Deus Pater, qui ided primus semper nominatur, quod sit totius divinitatis fons & origo; deindè Filius Patris subjungitur tanquam persona, quæ à Patre distincta sit; tandem nominatur Spiritus sanctus, qui ex Patre tanquam à primo divinitatis principio procedit. Eas verò personas unam

ac eandē essentiam habere, demonstrat hæc altera hominis ethnici interrogatio : *Non intelligo quid dicas, Unum tria, Tria unum.*

Dices, equidem eo in dialogo rectè explicari Christianæ religionis de Trinitate fidem, verum nullius esse momenti argumentum ex eo desumptum, eò quòd Dialogus iste non sit Luciani, sed hominis ethnici, qui ipsum edidit, ut illuderet Christianæ religioni.

Sed inutilis est ea objectio : Nam constat, scriptum esse dialogum illum ab autore Luciano coætaneo, proindèque proponit fidem, quam Luciani temporibus, Christiani de Trinitate profitebantur.

*Clemens Alexandrinus.*

Clemens Alexandrinus integram Trinitatem agnoscit: *Pedagog. lib. 1. cap. 6.* sic loquitur : *Unus quidem est universorum Pater; unus est etiam Verbum universorum; & Spiritus Sanctus, unus qui & ipse est ubique.* In quæ quidem verba observandum est, cuique personæ vim divinam tribui : Primæ quidem, quòd sit Pater universorum : Secundæ, quòd sit Verbum universorum : Tertiæ verò, quòd sit in universis.

Eiusdem *Pedagog. lib. 3. cap. 7.* hæc habet : *Gratias agamus soli Patri, & Filio, Filio & Patri, Pedagogo & Magistro Filio, unà cum Sancto Spiritu, per omnia uni, in quo omnia, per quem omnia unum, per quem est quod semper est.* Auctor (ut patet) docet, æqualiter agendas esse gratias Patri, Filio, ac Spiritui sancto : eos igitur censet esse prorsus æquales. Asserit Patrem, Filium & Spiritum sanctum esse per omnia & in omnibus unum, non quidem personā, sed naturā : arbitratus est igitur, unam esse in tribus personis naturam.

*Tertullianus.*

Tertullianus libro de Pudicitia c. 21. disertè pro-

profitemur: *Trinitatem unius Divinitatis, Patrem, Filium & Spiritum Sanctum.*

Idem author libro adversus Praxeam cap. 2. post recitatam fidei regulam sic loquitur: *Dandus est retractationis locus; vel ne videatur ista per-versitas non examinata, sed præjudicata damnari, maximè hæc, quæ se existimat meram veritatem possidere, dum unicum Deum non aliàs putat credendum, quàm si ipsum eundemque & Patrem & Filium & Spiritum Sanctum dicat. Quasi non sic unus sit omnia, dum ex uno omnia, per substantiæ scilicet unitatem; & nihilominus custodiatur æconomias sacramentum, quæ unitatem in Trinitate disponit, tres dirigens, Patrem Filium & Spiritum Sanctum.* Ex iis verbis patet evidenter 1. Tertullianum agnoscere, Spiritum Sanctum esse unam è divinis personis, 2. eum esse ejusdem substantiæ cum aliis personis.

Ejusdem libri capite 13. expressis verbis asserit, Spiritum Sanctum esse Deum, licet sit persona quæ à Patre & Filio distincta sit: *Duos quidem definimus ( inquit ) Patrem & Filium, etiam tres cum Spiritu Sancto ..... Duos tamen Deos nunquam ex ore nostro proferimus: non quasi non & Pater Deus, & Filius Deus, & Spiritus Sanctus Deus, & Deus unusquisque.*

Ex iis Tertulliani textibus sic argumentum conficitur. Ille credidit, Spiritum Sanctum esse Deum, qui scripsit, Spiritum Sanctum unius esse cum Patre & Filio divinitatis; qui asseruit, credi debere unicum Deum qui sit Pater, Filius & Spiritus Sanctus; qui docuit, Spiritum Sanctum cum Patre & Filio efficere unitatem in Trinitate; qui tandem voluit, Spiritum Sanctum esse eadem ratione Deum, quàm Pater & Filius: Atqui ea omnia Tertullianus scripsit, asseruit, & docuit: ergo credidit, Spiritum Sanctum esse verè ac substantialiter Deum. Vide eundem authorem iis locis ubi egimus de Verbi divinitate.

Origenes.

Origenes eâdem ratione locutus est de Spiritu Sancto, quâ de Verbo; ac proinde, cum Verbi divinitatem asseruerit, præsertim in libris quos contra Celsum Philosophum Epicureum exaravit, asseruit quoque divinitatem Spiritûs Sancti. Vide loca, quæ de divinitate Verbi differentes laudavimus, vide etiam totum ejusdem authoris opus adversus Celsum, vide etiam Bellarminum, libro 1. de Christo, cap. 10.

Nobis hîc satis sit unicus textus, quem Pamphilus in apologiâ laudat ex libro 1. Periarcon ubi Origenes inter dogmata creditu necessaria, hæc ponit: *Primò, quòd unus est Deus qui omnia creavit .... Tum deinde quòd Iesus Christus ante omnem creaturam natus ex Patre est .... Incarnatus est, cum Deus esset, & homo factus mansit, quod Deus erat .... Tum deinde honore ac dignitate Patris & Filii sociatum esse Spiritum sanctum.*

Inde verò sic arguitur. Ille docuit, Spiritum Sanctum esse Deum, qui asseruit, eum esse tum dignitate, tum honore, sociatum Patri ac Filio: neque enim aliqua creatura, sive dignitate sive honore, potest esse Deo Patri, ac Filio sociata: nempè societas illa æqualitatem importat: Atqui Origenes asseruit, Spiritum Sanctum esse tum dignitate tum honore sociatum Deo Patri ac Filio: ergo docuit, Spiritum Sanctum esse verè ac substantialiter Deum.

Cyprianus.

Cyprianus libro de unitate Ecclesiæ, laudat versiculum septimum capitis quinti primæ Joannis Epistolæ, quo trium SS. Trinitatis personarum consubstantialitas ac distinctio personalis asseritur: *De Patre ( inquit cap. 4. ) Filio & Spiritu Sancto scriptum est, Hi tres unum sunt.*

In

In Epistolâ ad Jubajanum, probat, baptismum ab hæreticis datum non valere, quòd nec Deus Pater, nec Deus Filius, nec Deus Spiritus Sanctus per ejusmodi baptismum remissionem peccatorum operentur: *Si baptizari quis apud hæreticos potuit, utique & remissionem peccatorum consequi potuit. Si peccatorum remissionem consecutus est, & sanctificatus est, & templum Dei factus est, quæro, Cujus Dei? Si creatoris, non potuit, qui in eum non credidit. Si Christi, ne hujus fieri potest templum, qui negat Deum Christum. Si Spiritus Sancti, cum tres unum sint, quomodo Spiritus Sanctus placatus ei esse potest, qui aut Patris aut Filii inimicus est?*

Eâdem in Epistolâ idem S. Martyr baptisma, quod quis, solo nomine Christi invocato, contulerit, irritum esse ex eo probat, quòd *ipse Christus gentes baptizari jubeat in plena & adunata Trinitate.*

Jam verò sic ex laudatis Cypriani textibus licet argumentari. Ille censuit, Spiritum Sanctum esse verè ac substantialiter Deum, qui asseruit eum esse unum naturæ cum Patre & Filio; qui dixit, eum esse Deum eâdem ratione, quâ Pater & Filius; qui docuit, irritum esse baptisma datum absque invocatione Spiritus Sancti: Atqui ea omnia asseruit, ac docuit Cyprianus: ergo censuit, Spiritum Sanctum esse verè ac substantialiter Deum.

*Ambo Dionysii, Romanus & Alexandrinus.*

Dionysius Romanus prolixam Epistolam scripsit adversus Sabellianos, qui suâ ætate in Libya grassari cœperant. Integra non extat illa Epistola, sed plurima illius fragmenta reperire est apud Athanasium lib. de decretis Synodi Nicænæ.

Ubi S. Pontifex eâ in Epistolâ plurimis confutavit Sabellianos, qui tres SS. Trinitatis personas, nomine tantum, non re, distinctas esse conten-

tendebant, aggreditur oppositum dogma, eorum scilicet, qui tres personas ita distinguebant, ut etiam tres substantias admitterent. Docet itaque 1. tres SS. Trinitatis personas, licet à se invicem realiter distinctas, tamen minimè separatas esse, sed esse in se invicem per mutuam inhabitationem, quam theologi vocant circumincessionem: *Etenim necesse est uniri omnium Deo Dei Verbum, & in Deo manere & habitare Spiritum Sanctum*. Docet 2. omnipotentem Deum, seu Patrem, esse totius Trinitatis caput: *Iam verò divinam quoque Trinitatem in unum, velut in caput quoddam, & summum, (omnipotentem Deum universorum dico) colligi & coalescere, prorsus est necesse*. Docet 3. credendam esse SS. Trinitatis divinam unitatem: *Non igitur dividenda est in tres deitates admirabilis & divina unitas*. Docet 4. illam SS. Trinitatis divinam unitatem exprimi fide in Patrem, Filium & Spiritum Sanctum: *Sed credendum est in Deum Patrem omnipotentem, & in Christum Iesum Filium ipsius, & in Spiritum Sanctum*. Docet 5. eâ unitate ac Trinitate sanam de Deo doctrinam conservari: *Ita enim (ait) & divina Trinitas, simulque sancta prædicatio monarchiæ conservari possunt*.

Ex iis Dionysii Romani textibus sic demonstratur divinitas Spiritu Sancti. Ille verè ac substantialiter est Deus, qui eodem modo unitur Deo Patri, quo Verbum; qui pertinet ad Trinitatem, cujus caput, & origo est Deus Pater: ideo enim Verbum (ut superius ostensum fuit) est Deus, quod originem suam Deo Patri debeat; qui est primum objectum fidei, quam quis profiteri debet, ut Christianus censeatur. Atqui, ex Dionysio Romano, Spiritus Sanctus eodem modo quo Verbum, unitur Deo Patri; pertinet ad Trinitatem, cujus caput est Deus Pater; est primum objectum fidei, quam quis profiteri debet, ut Christianus censeatur: Ergo Spiritus Sanctus, ex Dionysio Romano, est verè ac substantialiter Deus.

Dio-



Dionysius Alexandrinus, idem de Spiritu sancto sensit, quod Romanus. Scripsit nimirum 1. eum ab aliis SS. Trinitatis personis separari non posse; scripsit 2. invisibilem & indiminutam Trinitatem in unitatem colligi: Unde sic in forma licet argumentari. Ille est Deus, qui nec à Patre nec à Filio potest separari; scilicet mutua inhabitatio est efficax pro substantiali unitate argumentum, unde inter Deum & creaturas non potest habere locum: Ille est Deus, qui cum aliis personis, licet à se distinctis, in unitatem colligitur; neque enim alia est ea unitas, quam unitas essentiae: Atqui, ex Dionysio Alexandrino, Spiritus Sanctus separari non potest ab aliis SS. Trinitatis personis; cum eis, licet personam distinctis, ad unitatem colligitur: Ergo ex Dionysio Alexandrino, Spiritus Sanctus est verè ac substantialiter Deus. Vide hujusce tomi paginam 60.

*Gregorius Thaumaturgus.*

Quid de Spiritu Sancto senserit Gregorius Thaumaturgus, qui utrique Dionysio, Romano & Alexandrino, coætaneus fuit, demonstratur ex fidei confessione ab eo edita, quam retulimus superius paginâ 62.

In eâ autem fidei confessione Gregorius docet Spiritum Sanctum pertinere ad divinam Trinitatem, ipsum non minùs æternum esse, quàm sint Pater & Verbum; addit, personas quibus Trinitas constituitur, non esse quid creatum & immutabile: *Non igitur (inquit) creatum quid ac servum in Trinitate, neque superinductitium aliquid & adventitium, quasi prius non-existens, posterius verò adveniens. Non ergo defuit unquam Filius Patri, neque Filio Spiritus; sed immutabilis & invariabilis, eadem semper manet Trinitas.*

Eo quo textu sic Macedoniani possunt impugnari. Ille est Deus, qui pertinet ad Trinitatem, in quâ

quâ nec quid creatum ac servum reperitur; qui non minùs est æternus, quàm sint Pater & Filius; qui immutabilis & invariabilis est: Atqui ex Gregorio Thaumaturgo, Spiritus Sanctus est hujusmodi: ergo, &c.

## §. II.

*Quid de divinitate Spiritus Sancti senserint, quarti, quinti, ac sequentium sæculorum Patres.*

CONCLUSIO. Quarti, quinti, & aliorum sequentium sæculorum Patres docuerunt, Spiritum Sanctum esse Deum.

Probatur 1. Athanasius tum in libro ad Serapionem, tum in pluribus suis operibus divinitatem Spiritus Sancti non minùs apertè adstruit contra Pneumatomachos, quàm Verbi divinitatem adversùs Arianos. 2. Basilii in libro, quem contra Eunomium inscripsit *De Spiritu Sancto*, idem dogma fusè demonstrat, ac solvit, quæ adversùs illud ab hæreticis objiciebantur. 3. Eandem Catholicam veritatem tuitus est Ambrosius integro volumine, quod, sicut antea Basilii, de Spiritu Sancto inscripsit. 4. Gregorius Nazianzenus oratione 37. ac pluribus aliis, Macedonianorum hæresim impugnavit.

Probatur iterum 1. Ægypti Ecclesia post Imperatoris Constantii obitum, Alexandriae sub Athanasio ad Concilium coacta, apertè definiit, Spiritum Sanctum esse Deum: *Convenerunt ergo ex diversis civitatibus Episcopi* ( inquit Socrates hist. lib. 3. cap. 7. ) *& de plurimis rebus valde necessariis inter se contulerunt. Ac sancti quidem Spiritus divinitatem illic. asseruerunt, eum in consubstantiali Trinitate comprehendentes.* 2. Tota Orientalis Ecclesia ad generalem Synodum Constantinopoli sub Theodosio Magno, anno 381. congregata, in symbolo à se edito apertè professâ

fecta est : *Credendum esse in Spiritum Sanctum , Dominum , vivificantem , qui ex Patre procedit , qui cum Patre & Filio simul adoratur & conglorificatur .* 3. Ecclesia Romana, quoad illud caput, admisit Synodum Constantinopolitanam in Concilio, quod sub Damaso celebratum est . 4. A quarto sæculo ad hæc usque tempora , tum apud Orientales , tum apud Occidentales , illæsa permansit fides de articulo, de quo agitur . Eam nimirum fidem profitentur etiam nunc tum Græci tum Latini , quamvis in aliis capitibus dissentiant . 5. In octavâ generali Synodo, quæ celebrata fuit adversus Photium , in Lugdunensi , cui Orientales adfuerunt, in Florentinâ, cui Josephus Patriarcha Constantinopolitanus , alique ex Oriente Episcopi aut per se aut per legatos aderant cum ipso Orientis Imperatore , idem articulus definitus ac receptus est .

Quæres 1. quid Nicæna 1. Synodus edixerit de divinitate Spiritus Sancti .

Resp. 1. Nicænam Synodum nihil statuisse in causâ, de quâ est quæstio : Nec id mirum est , quippè quod nec ipse Arius , nec aliqui ex illius discipulis , ante Concilium Nicænum I. blasphemassent ( apertè saltem ) adversus divinitatem Spiritus Sancti . Basilii est ea responsio , Epist. nimirum 78. *scribit , paulatim progressum habuisse mala impietatis semina , quæ antea ab authore illius hæresis Ario jacta , ab iis deinde qui ipsius propugnanda dogmata malè susceperant , ad Ecclesiarum perniciem nutrita sunt .*

Quæres 2. quid Eusebius Cæsariensis , quid Basilii Ancyranus , alique tum Ariani tum Semiariani senserint de divinitate Spiritus Sancti .

Resp. ad 1. Eusebium Cæsariensem pessimè sensisse de divinitate Spiritus Sancti : lib. 5. contra Marcellum Episcopum Ancyranum , qui apud Arianos Sabellianus audiebat , scripsit ( ait Petavius ) *Paracletum nec Deum esse nec Filium .*  
Sed

Sed Petavii pace dixerim, argumentum ex iis verbis desumptum, non multum habere roboris, quia Dei nomine, Eusebius intelligit personam Patris; unde addit: *Neque Filius*, significans, Spiritum Sanctum personam esse à Patre & Filio distinctam, contra quod sentiebant Sabelliani, quibus Eusebius Marcellum accensebat. Verùm impietatem apertè tradit libro 5. de Demonstratione c. 4. eo nimirum loci scribit, Christum non solum Davidis esse dominum, sed etiam Spiritus Sancti, adeoque multò magis Angelorum & aliarum rerum omnium creatarum. 3. Agentes de Verbi divinitate, probavimus, Eusebium Cæsariensem impensè Arianismo fuisse: at ex Arianismo evidenter sequebatur blasphemia, de quâ est hîc quæstio: siquidem argumenta quibus Ariani Verbi divinitatem impugnabant, vim habebant adversus divinitatem Spiritus Sancti: nam præcipuum erat, quòd per Verbi consubstantialitatem cum Patre, Sabellianismus in Ecclesiam invehetur.

Resp. ad 2. Basilium Ancyranum circa divinitatem Verbi Catholicum audiisse apud Hilarium ac multos alios veteres, tum quòd Anomæorum hostis infensissimus extiterit, tum etiam quòd fidei formula Concilii Ancyrani, cui præfuit, in Catholicum sensum (ut superius ostensum est) explicari possit; tum denique quòd œconomix tantum causa vocem, *consubstantialis*, omisisse visus sit. Tamen, eò quòd ab aliis veteribus inter Semi-arianos recensitus fuerit, audit tanquam hostis divinitatis Spiritus Sancti. Verùm immeritò id erroris adscriptum est ipsi. Nam 1. non omnes Semi-ariani, sed ii tantum qui Macedonio adhærebant, negarunt divinitatem Spiritus sancti. 2. Nullum monumentum proferri potest, quo probetur, Basilium Ancyranum impiè sensisse de Spiritu Sancto. 3. E contra Epiphanius hæresi 73. quæ est Semi-arianorum, testatur, hæc verba legi in Epistolâ Synodicâ Concilii Ancyrani, cui

Basi-

Basilii præfuerat : *Credimus igitur in Patrem & Filium & Spiritum Sanctum, non in creatorem & creaturam. Aliud est enim creator & creatura, aliud Pater & Filius* ; quibus quidem verbis apertè declaratur, Spiritum sanctum non esse creaturam, nempe ibidem asseritur, non esse credendum in creatorem & creaturam, licet credendum sit in Patrem, Filium, & Spiritum sanctum. Petavio visum est, voces istas, *Et Spiritum Sanctum*, formulæ postea insertas fuisse : Sed levia sunt momenta quibus nititur. Non enim obstat, quòd in eo Concilio nulla posthac fiat mentio Spiritus sancti, licet copiosa fiat de Filio : Siquidem tunc non de Spiritu sancto, sed de solo Filio lis erat : scilicet formula Concilii Ancyрани edita est præsertim adversus formulam quæ secunda Sirmienensis passim appellatur, & in quâ purus Arianismus ( ut suo loco dictum est ) fuerat assertus.

Quæres 3. cur Concilium Constantinopolitanum I. Spiritum Sanctum expressè non dixerit Deum, quemadmodum Concilium Nicænum I. expressè Verbum vocarat Deum, *Deum de Deo*.

Resp. Concilium Constantinopolitanum I. non obscurè in symbolo definiisse, Spiritum Sanctum esse Deum, siquidem definiit, eum simul cum Patre & Filio adorari : Is autem cui exhibetur idem omninò cultus, qui Patri & Filio, haud dubiè Deus est. Addendum est, Concilium in Epistolâ Synodicâ quam misit ad Damasum Papam, expressis verbis Spiritui Sancto tribuisse eandem quam Patri & Filio divinitatem, ac asseruisse, eum esse cæteris personis consubstantialem & coæternum.

## ARTICULUS III.

*Solvuntur argumenta quibus impugnatur  
divinitas Spiritus  
Sancti.*

*Not.* **A**rgumenta quæ pro Macedonianis  
objici possunt adversus divinitatem  
Spiritus Sancti, reducuntur ad quædam tum Scri-  
pturæ tum Traditionis argumenta, quæ brevi-  
ter hîc expendenda sunt.

Objicies 1. Quæ dissimili modo in Scripturis  
exprimuntur, dissimilis sunt naturæ: atqui Pa-  
ter, Verbum, & Spiritus Sanctus dissimili mo-  
do exprimuntur in Scripturis, nempe Pater ex-  
primitur per præpositionem *Ex*, Filius per præ-  
positionem *Per*, & Spiritus Sanctus per præpo-  
sitionem *In*. Ita apud Basilium lib. de Spiritu  
Sancto c. 2. Aetiani ratiocinantur, nixi hâc Apo-  
stoli loquendi ratione primæ ad Corinth. 8. *No-  
bis tamen unus Deus Pater, ex quo omnia, & nos in  
illum, & unus Dominus Iesus Christus, per quem  
omnia, & nos per ipsum, & unus Spiritus sanctus  
in quo omnia.*

Resp. dist. min. Pater, Verbum, & Spiritus  
Sanctus aliquando dissimili modo exprimuntur,  
transeat min. eodem modo semper exprimuntur,  
neg. min. Scilicet sæpius cum unâ ac eâdem per-  
sonâ tres illæ præpositiones conjunguntur, ut vi-  
dere est in hâc Apostoli sententiâ ad Roman. xi.  
*Quoniam ex ipso, & per ipsum, & in ipso sunt  
omnia.*

Objicies 2. Ille non est Deus, qui nusquam in  
Scripturis dicitur Deus; quem Scripturæ nusquâ  
asserunt adorari debere: atqui Spiritus Sanctus  
nusquam in Scripturis dicitur Deus; Scripturæ  
nusquam asserunt, eum adorari debere: ergo non  
est Deus.

Resp. neg. maj. Ratio est, quia solum scri-  
ptum

ptum Dei Verbum non est principium, ex quo eruantur fidei veritates; id enim virtutis habet etiam traditio, quæ est non scriptum Dei verbum; ac proinde non sequeretur, Spiritum Sanctum non esse Deum, præcisè ex eo, quòd illius divinitas in Scripturis non contineretur.

Resp. 2. datâ maj. disting. min. Spiritus Sanctus nusquam in Scripturis *explicitè* dicitur Deus, conc. min. nusquam *implicitè* dicitur Deus, neg. min. scilicet Scripturæ testantur, Spiritum Sanctum à Patre procedere, ipsum esse primum fidei objectum, eandem cum reliquis personis efficientiam habere, inhabitare tanquam in templo in creaturis ratione præditis: ea autem omnia ( ut superius ostensum est ) demonstrant illius divinitatem.

Objicies 3. Ille non est Deus, quem Scripturæ testantur gemere, interpellare, postulare pro nobis: nempè gemitus Deum dedecet; postulatio ac interpellatio inferioritatem arguunt respectu ejus, à quo oratur ac interpellatur: nam propter eam rationem Christus, qui in cœlis ( ut ait Joannes ) apparet vultui Dei pro nobis, sub eâ ratione, sub quâ orat, seu prout est homo, inferior est Patre: Atqui Scripturæ testantur, Spiritum Sanctum gemere, interpellare, postulare pro nobis: *Ipse Spiritus* ( verba sunt Apostoli ad Roman. 8. ) *postulat pro nobis gemitibus inenarrabilibus*?

Resp. disting. maj. Ille non est Deus, quem Scripturæ testantur gemere pro nobis, interpellare, postulare, propriè, conc. maj. gemere, interpellare, postulare, metaphoricè, neg. maj. Propter rationes in argumento propositas Spiritus Sanctus propriè nec gemit, nec interpellat, nec postulat pro nobis: at verò gemit, interpellat, postulat metaphoricè, quia nos gementes & postulantes efficit, seu ( ut loquitur Augustinus Epist. 105. ) nobis interpellandi & gemendi inspirat affectum: *Dictum est* ( ait ) *interpellat pro Sanctis*

*Etis, quia interpellare Sanctos facit, sicut dictum est: Tentat vos Dominus Deus noster, ut sciat si diligatis eum, hoc est, ut scire vos faciat.*

**Instabis.** Si Spiritus Sanctus eo sensu gemit, interpellat, ac postulat pro nobis, quod nos gementes, interpellantes, & postulantes faciat, Pater eodem sensu rectè dici poterit gemere, interpellare, postulare pro nobis: siquidem effectus ad extra, ut est inspiratio affectus ad gendum & postulandum, communis est toti Trinitati: Sed absurdum est consequens: neque enim unquam apud sacros scriptores obtinuit ille loquendi modus, quo Pater diceretur gemere, interpellare, ac postulare pro nobis.

**Resp. neg. maj.** Ratio est, quia invaluit usus, & quidem Scripturarum consuetudine confirmatus, ut quædam opera, licet toti Trinitati communia, certo quodam modo, quem theologi appropriationem vocant, uni personæ, non autem alteri, tribuantur: sic, quod Pater sit fons ac origo totius Trinitatis, omnipotentia ei adscribitur; quod Filius sit Verbum Patris, dicitur Sapientia; tandem quod Spiritus Sanctus per mutuum Patris ac Filii amorem producat, operationes quæ ad nostram sanctificationem spectant, speciali ratione ei tribuuntur.

**Objicies 4.** Ille non est Deus, qui nec est genitus, nec ingenuus: atqui Spiritus Sanctus non est ingenuus; id enim soli Patri convenit: non est quoque genitus, alioquin esset Filius: nempe terminus qui ex generatione resultat, est Filius, quia producit in similitudinem naturæ.

**Resp. neg. maj.** Ratio est, quia inter genitum & ingenuum datur aliquod medium, scilicet procedens aliâ viâ, quàm per generationem: de eâ processionis specie, dissertatione secundâ inferius fusè dicetur.

**Objicies 5.** Qui à semetipso non loquitur, & ea tantum profert, quæ audit ab alio, non est Deus; fungitur nimirum legati officio, quod qui-  
dem



dem Deum dedecet : atqui ( dicente Christo Joannis 16. ) Spiritus sanctus non loquitur à semetipso, sed tantum quaecumque audit, loquitur : ergo non est Deus.

Resp. disting. maj. Qui non loquitur à se ipso, tanquam legatus alterius, non est Deus, conc. maj. tanquam non legatus alterius, neg. maj. Spiritus sanctus non est legatus aut Patris aut Filii, quia non minus quam Pater & Filius, proprio nomine loquitur. Non ita tamen proprio nomine loquitur, ut suam sapientiam, & suum esse à Patre & Filio non receperit ; imò quaecumque loquitur, ea simul cum essentia suâ ab eis accepit. *Non ergo loquetur à semetipso* ( ait Augustinus tractatu 99. in Joannem, ) *sed quaecumque audiet, loquetur. Ab illo audiet, à quo procedit. Audire, illi scire est : scire verò esse. Quia ergo non est à semetipso, sed ab illo, à quo procedit, à quo illi est essentia, ab illo scientia, ab illo agitur audientia, quia nihil est aliud, quam scientia.*

Objicies 6. Basilii Epist. 42. apud Petavium lib. 1. de Trinitate cap. 14. hæc habet de Dionysio Alexandrino : *Hunc ( de Spiritu sancto loquitur ) ab adorandæ deitatis consortio segregasse, & creatæ ac servili naturæ annumerasse fertur.* Idem Basilii non videtur credidisse, semper Spiritum sanctum esse Deum, non enim in omnibus suis operibus ausus est eum appellare Deum : cum autem eam omissionem Gregorius Nazianzenus orat. xx. commendat, sequitur, articulum de divinitate Spiritûs sancti ad fidem non pertinuisse, eo saltem tempore, quo florebant laudati Patres.

Resp. ad 1. Basilium non asserere, se id quod objicitur, legisse in operibus Dionysii Alexandrini, sed quodam tantum rumore didicisse : *Servili naturæ* ( inquit ) *annumerasse fertur.* Nec mirum est, quòd Basilii non laudet Dionysii Alexandrini opera, scilicet in iis ( ut superius ostensum est ) aperte Spiritus sancti cum cæteris personis con-

substantialitas adstruitur. Textibus, quos ex illius ad cognominem suum Dionysium Romanum apologiâ suo loco laudavimus, adjungi possunt hæc verba, quæ habentur in illius responsione ad propositiones Pauli Samosatani: *Non impunè feret, is qui adversus benignum Spiritum sanctum blasphemus est, Spiritus autem est Deus.* In Epistolâ ad eundem Paulum Samosatenum, sic etiam idem Dionysius Alexandrinus loquitur: *Nisi enim esset Christus Deus Verbum, non potuisset non esse peccati obnoxius. Nullus enim non obnoxius est peccato, nisi unus Christus, ut & Pater Christi, & Sanctus Spiritus.*

Resp. ad 2. negando, Basilium non semper credidisse divinitatem Spiritus sancti. Equidem fatendum est, S. Doctorem prudenti œconomiâ aliquoties expressis verbis non dixisse, Spiritum sanctum esse Deum: *Illi* (ait Gregorius Nazianzenus orat. xx.) *nudam & apertam vocem de Spiritu sancto, quod Deus esset, arripere studebant (quod quidem tametsi verum erat, impium tamen illis, atque improbo impietatis antistiti videbatur) ut eum quidem cum theologica lingua civitate pellerent, ipsi autem Ecclesiam occuparent.* Verùm eodem tempore, quo Basilius à voce, *Deus*, abstinerebat, ne impii illius æmuli Ecclesiam, cui præerat, invaderent, implicite assererat, Spiritum sanctum esse Deum: Nimirum 1. expressè profitebatur, eum non esse creaturam; 2. utebatur glorificationis hymno, quo illius divinitas non obscurè innuitur.

Nec obstat, quod nonnunquam sic eundem glorificationis hymnum exprimeret: *Gloria Patri per Filium in Spiritu Sancto.* Nam præter quàm quod eum pariter sic expresserit, *Gloria Patri cum Filio & cum Spiritu Sancto*, necesse fuit, ut sic se gereret propter adversarios, quorum animos postrema hæc glorificationis formulâ solebat offendere. Præterea Gregorio Nazianzeno, amicorum intimo, author fuit, ut (quod minus  
quàm

quàm ipse, invidiæ pateret ) Spiritus sancti divinitatem publicè profiteretur , dum ipse temporum iniquitati serviens, nomen taceret , licèt rem adstrueret . Addendum est, Basilium eam œconomiam non adhibuisse semper, quia quovis in casu necessaria non fuit : *Confitendum est* ( inquit Epistolâ 141. ) *Deum esse Patrem, Deum Filium, Deum Spiritum sanctum : quemadmodum divinæ Scripturæ, & qui sublimiora contemplati sunt, docuerunt.*

---

### QUÆSTIO III.

*Utrum mysterium SS. Trinitatis cognosci possit.*

*Not. 1.* **M**ysterium aliquod duobus modis cognosci potest, implicite nimirum & explicitè : Implicitè quidem, cum cognoscitur id, in quo continetur à parte rei, & ex quo deduci potest : sic qui aliquam habet cognitionem essentiae divinæ, habet implicitam attributorum, quæ in eâ continentur & ex eâ colliguntur ; explicitè verò, cum illud mysterium distinctè cognoscitur.

*Not. 2.* Cognitio sive implicita sive explicita rei alicujus, duobus modis comparari potest, ratione scilicet & revelatione. Hic igitur querendum est 1. utrum Trinitatis cognitio, sive implicita sive explicita, acquiri possit ratione aut revelatione : 2. utrum ex suppositione quòd solâ revelatione comparari possit, aliquibus exemplis, quæ ex rebus creatis desumpta sint, possit illustrari.

**CONCLUSIO I.** Nulla Trinitatis cognitio, sive implicita, sive explicita, potest comparari solâ naturali ratione.

**Probatur.** Cognitio rei quæ omninò superna-

turalis est, & cujus nullum vestigium, saltem quod prorsus simile sit, extat in rebus creatis, comparari non potest solâ ratione naturali: siquidem potentia cognoscens & objectum cognitum, debent esse ejusdem ordinis, cum inter ea debeat esse proportio: atqui mysterium Trinitatis est omninò supernaturale, nullumque illius vestigium, saltem quod omninò simile sit, extat in rebus creatis: ergo, &c.

Confirmatur argumentum autoritate Scripturæ. Illud mysterium cognosci non potest ratione naturali, quod solâ revelatione cognoscitur: atqui mysterium Trinitatis, ex Scripturis, solâ revelatione cognoscitur: Hæc enim habet Christus Matthæi xi. *Nemo novit Filium nisi Pater, neque Patrem quis novit, nisi Filius, & cui voluerit Filius revelare.*

Objicies. Cognoscere rem implicitè, est cognoscere objectum, in quo à parte rei continetur: atqui solâ ratione naturali cognosci potest, saltem imperfectè, objectum in quo à parte rei Trinitas continetur, nimirum Dei essentia: ergo Trinitas potest implicitè cognosci solâ ratione naturali.

Resp. neg. maj. seu ut quid cognoscatur implicitè, satis non est, ut cognoscatur objectum in quo à parte rei continetur; sed requiritur præterea, ut ex illo objecto cognito per argumentationem colligi possit: at ex essentiâ Dei cognitâ viribus naturæ, colligi non potest Trinitas personarum; neque enim sequitur ex essentiâ sic imperfectè viribus naturæ cognitâ.

CONCLUSIO 2. Ex suppositione, quòd quis per revelationem didicerit mysterium Trinitatis, potest aliqua, sed multum imperfecta, illius vestigia in rebus creatis invenire.


Probatur. Augustinus libro 9. de Trinitate

te docet, aliquam esse Trinitatis imaginem in humanâ mente. Tria sunt, cum anima semetipsam amat; Notitia sui, ignoti nimirum nulla cupido; Amor; & ipsa animæ substantia; ea autem sunt unum substantialiter, licet relativè distinguantur: *Igitur (ait cap. 4.) ipsa mens, & amor, & notitia ejus, tria quædam sunt, & hæc tria unum sunt, & cum perfecta sunt, æqualia sunt.*

Verùm, cum imperfecta sit illa imago, quod Verbi generationem non exprimat, Augustinus aliam repetit ex memoriâ, cogitatione & amore quæ in animâ reperiuntur. Memoria (ait) non aliud est, quàm continuata notitia: Cogitatio est actus, quo quis advertit ad rem quam mente revolvit: Amor est motus ad utendum aut fruendum re, de quâ cogitatur. Cum autem mens de re aliquâ cogitat, format in se verbum sibi simile. *Nemo enim (ait S. Doctor cap. 7.) volens, aliquid facit quod non in corde suo prius dixerit, quod verbum amore concipitur sive creaturæ sive creatoris, id est, aut naturæ mutabilis, aut incommutabilis veritatis: ergo à pari, dum Pater se ipsum cogitat, ut reverà cogitabit semper & cogitavit ab æterno, generat Verbum omninò sibi simile, quia verbum tunc est omninò simile rei cognitæ, cum res perfectè cognoscitur. Præterea anima quæ se ipsam amat, quæ sui ipsius verbum effinxit, movetur, ut illo verbo, aut utatur, aut fruatur; proindeque producit amorem, qui sit utriusque vinculum: ergo à pari Pater & Verbum moventur ad suimet fruitionem, ac proinde produciunt Spiritum Sanctum, qui quidem est utriusque amor: Sicut (inquit Augustinus lib. 9. de Trinitate cap. 12.) Dei Verbum Filium esse, nullus Christianus dubitat, ita charitatem esse Spiritum Sanctum.*

SS. Trinitatis mysterium non consistit solum in eo, quod tres personæ realiter distinctæ, sint unum substantialiter Deus, quod Pater

generet Verbum, quòd Pater & Filius producant Spiritum sanctum, sed quòd ea Spiritus sancti productio non sit generatio: atqui ejus circumstantiæ vestigium in hominis animâ reperitur; nempe mens hominis suum amorem non generat, nimirum amor partum mentis, seu productionem verbi, hoc est; imaginis rei quam cogitat, subsequitur: *Cur itaque amando se* (ait ibidem Augustinus) *non genuisse dicatur amorem suum, sicut cognoscendo se, genuit notitiam suam?* In eo quidem manifestè ostenditur hoc amoris esse principium, unde procedit: ab ipsa quippè mente procedit, quæ sibi est amabilis, antequam se amet: atque ita principium est amoris sui quo se amat. Sed ideo non rectè dicitur genitus ab ea, sicut notitia sui qua se novit, quia notitia jam inventum est, quod partum vel repertum dicitur, quod sæpè præcedit inquisitio eo sine quæstura. Nam inquisitio est appetitus inveniendi, quod idem valet si dicas, reperiendi. Quæ autem reperiuntur, quasi pariuntur, unde proli similia sunt, ubi vis in ipsa notitia; ibi enim quasi expressa formantur: nam etsi jam erant res quas quærendo invenimus, notitia tamen ipsa non erat, quam sicut prolem nascentem deputamus. Sed de eâ difficultate, quæ haud dubiè gravissima est, dicemus agentes de Processionibus; eo nimirum loci prolatis variis antiquorum Patrum sententiis, ex Augustini principiis, reddemus rationem, cur processio Verbi à Patre dicatur generatio; cum econtra processio sancti Spiritus eo nomine nec appelletur, nec appellari possit.



# DISSERTATIO SECUNDA.

## De Processionibus Divinis.

*Not.* **D**E processionibus quæremus 1. utrum dentur in divinis: 2. quinam sit earum numerus: 3. cur prima, quæ est Filii à Patre, dicatur generatio: 4. cur secunda, quæ est Sancti spiritûs à Patre & Filio, dicatur processio simpliciter: 5. quodnam sit principium processionum divinarum: 6. denique, utrum sint voluntariæ.

### QUÆSTIO PRIMA.

#### *Utrum in divinis dentur processionες.*

*Not.* 1. **P**ROCESSIONIS nomine aliud non intelligitur, quàm emanatio, seu origo unius ab alio: sic fluvius dicitur procedere à fonte, quòd ab eo emanet ac oriatur.

*Not.* 2. Processio duplex est, transiens & immanens. Prior est ea per quam potentia extra se ipsam operatur; propter eam rationem processio caloris per quem calefit aqua, appellatur transiens, nempe ignis ex quo calor ille procedit, extra se ipsum, in aquam nimirum, operatur. Posterior est ea in quâ potentia, seu principium, operatur in subjectum extra se minimè positum; sic visio est actio immanens; scilicet ut oculus videat, non est necesse, ut extra se ipsum exeat, seu non est necesse, ut operetur in subjectum, quod extra ipsum oculum positum sit.

*Not.* 3. Processio immanens subdividitur in

processionem unius ab alio tanquam à causâ , & in processionem unius ab alio tanquam à mero principio . Illa dicit in termino receptionem esse cum dependentiâ à principio ex quo oritur , ut patet in processione luminis à sole ; ista verò dicit receptionem esse , sed absque dependentiâ .

Not. 4. Nihil hîc dicemus de processione transeunte : quæ enim ad eam spectant , referimus in harum Institutionum partem tertiam , in quâ de Deo creatore differemus .

CONCLUSIO I. In divinis non datur processio unius ab alio tanquam à causâ .

Probatur . Id in divinis non datur , quod Deo repugnat : atqui processio unius ab alio tanquam à causâ , Deo repugnat : nempe tollit divinitatem ipsam : Deus enim est essentialiter independens , cum essentialiter sit ens à se .

Objicies . Multi veteres videntur admisisse in divinis processionem unius ab alio tanquam à causâ : Justinus in dialogo cum Tryphone scribit , Deum Patrem esse Filio *causam cur sit* . Constantinus Magnus in oratione ad Sanctorum cœrum , apud Eusebium sic loquitur : *Pater quidem Filii causa est , Filius verò est causatum* : sic etiam Basilii lib. I. contra Eunomium : *Nos autem secundum causarum habitudinem ad ea , quæ ex illis oriuntur , Patrem collocari ante Filium asserimus* : hæc etiam habet eodem in libro idem S. Doctor : *Vox ipsa Patris quid aliud significat , nisi hoc , quod causa est & principium ejus qui ex ipso genitus est* ? Hæc quoque leguntur apud Gregorium Nazianzenum orat. 29. *Deus quidem ( de Patre loquitur ) est Deus , siquidem Filius & Spiritus Sanctus ad unam causam referuntur* . Ergo , ex SS. Patribus , admitti debet in divinis processio unius ab alio tanquam à causâ , Filii nimirum & Spiritus sancti à Patre .

Resp. dist. conseq. Admitti debet in divinis pro-



processio tanquam à causâ, improprie sumptâ, conc. conseq. proprie sumptâ, neg. conseq. Causa priore modo sumpta, est simplex communicatio esse, abstrahendo, an per eam communicationem terminus pendeat à principio, aut ab eo minimè pendeat. Jam verò quòd scriptores in argumento laudati causam in eo priore sensu, non autem in posteriore, sumpserint, demonstratur ex eo, quòd ii scriptores conceptis terminis docuerint, Verbum esse verè ac substantialiter Deum, ac proindè non esse terminum qui à suo principio, Patre nimirum, tanquam effectus à causâ pendeat. Ubi sunt autem eâ loquendi ratione, ut adversus Sabellianos aliosque similes hæreticos personarum in divinis distinctionem adstruerent.

CONCLUSIO 2. Admitti debet in divinis processio immanens unius ab alio tanquam à principio.

Probatur 1. ex Scripturâ. Processio tanquam à principio, ex observatis, est origo seu emanatio unius ab alio: atqui in divinis admitti debent ejusmodi origo, ejusmodi emanatio: Siquidem 1. Scripturæ conceptis terminis ejusmodi originis, emanationis, ac processionis meminere cum de Filio & Spiritu Sancto loquuntur: Joannis 8. sic Christus de se ipso loquitur: *Ego (quatenus Verbum) ex Deo processi & veni*. Joannis 16. Christus hæc ait de Spiritu Sancto: *Spiritus qui à Patre procedit*. 2. Eadem Scripturæ sæpiùs Verbum vocant Dei Filium; asserunt ipsum esse genitum: atqui qui Filius est, emanat à Patre; qui genitus est, ab eo oritur, à quo generatus est. 3. Ex iisdem Scripturis constat, alteram Trinitatis personam mitti à primâ, tertiam verò à primâ & secundâ: sed missio (ut dicetur inferius) processionem præsupponit: idè enim nusquâ Scripturæ asserunt, Patrem mitti, quòd à nullâ aliâ personâ procedat. Jâ verò quòd eæ processiones sint emanatio absq; depèndentiâ, patet ex iis

quæ ad prioris conclusionis probationem dicta sunt.

Probatur 2. autoritate Patrum, qui floruerunt ante Concilium Nicænum I. Nimirum imitati Scripturarum loquendi morem, sæpiùs Verbum vocant Dei Filium, ut patet ex textibus, quibus superiùs Verbi divinitatem adversùs Arianos asseruimus. Communem illorum mentem, tritum loquendi modū Novatianus, seu author libri de Trinitate, qui reperitur inter opera Tertulliani, cap. 31. hisce verbis expressit: *Quidquid est Filius, non ex se est, quia nec innatus est, sed ex Patre est, quia genitus est; sive dum Verbum est, sive dum virtus est, sive dum sapientia est, sive dum lux est, sive dum Filius est, & quidquid horum est, non aliunde est, quàm ex Patre, Patri suo originem suam debens.*

Idem Patres passim, cum de Deo Patre loquuntur, eum absolute ac sine addito Deum appellant; nonnunquam cum eo conjungunt pronomen, *illum Deum*; aliquando vocant *Deum & Patrem omnium*: Econtra cum nominant alias Trinitatis personas, Filium v. g. eum designant titulo vel *Filii Dei*, vel *Servatoris*, vel *Domini*. Eam loquendi formulam legere est apud Tertullianum libro adversùs Praxeam cap. 13. *Apostolum sequar (inquit) ut si pariter nominandi fuerint Pater & Filius, Deum, Patrem appellem, & Iesum Christum, Dominum nominem. Solum autem Christum potero Deum dicere, sicut idem Apostolus; Ex quibus Christus, qui est (inquit) Deus super omnia benedictus in ævum omne. Nam & radium solis seorsum, Solem vocabo; Solem autem nominans, ejus est radius, non statim & radium, Solem appellabo.*

Eodem referri possunt ex formulæ, quibus nonnulli ex Patribus trium priorum sæculorum usi sunt adversùs Sabellianos. Scilicet nonnunquam dixerunt, Patrem esse causam Filio, cur sit; esse fontem, ex quo Filius & Spiritus sanctus oriun-

oriuntur . Eorum Patrum textus retulimus in objectione adversus priorem hujusce capituli conclusionem . Huc quoque referri possunt loca quibus eorundem temporum scriptores asseruerunt Patrem esse majorem Filio , etiam quatenus Filius est Deus : neque enim alio sensu Pater potest esse major Filio , etiam quā Deus est , quā quod sit principium , ex quo Filius oritur .

Ex iis autem omnibus sic conficitur argumentum , Illi docuerunt admitti debere processionem in divinis , seu originem unius ab alio tanquam à principio , qui Verbum vocarunt Filium Dei ; qui dixerunt , ipsum non esse innatum ac ingenitum , imò natum & genitum ex Patre ; qui de Patre ac de aliis personis simul loquentes , illum , non autem alias personas , appellarunt Deum absolute , Deum præposito pronomine , *illum* ; qui dixerunt illum esse Filio causam cur sit ; qui asseruerunt Patrem esse majorem Filio , etiam quā Filius est Deus : atqui Patres trium priorum sæculorum sic se gesserunt : ergo docuerunt , in divinis admitti debere processionem , seu originem unius ab alio tanquam à principio .

Probatur 3. autoritate Patrum qui post exortam Arianorum hæresim scripserunt . 1. Processionem de quā agitur , aperte tradidit Concilium Nicænum I. *Credimus* ( verba sunt symboli ) *in unum Dominum Iesum Christum , natum de Patre unigenitum , Deum de Deo , lumen de lumine , Deum verum ex Deo vero , genitum non factum .* 2. Nonnulli scriptores Patri , *Auctoris* nomen respectu Filii tribuerunt . Hilarius in hæc Psalmi 44. verba , *Propterea unxit te Deus , Deus tuus .* sic loquitur lib. 4. de Trinitate : *Tuus , relatus est ad auctorem : Te verò , ad ejus , qui ex auctore est , significationem . Est enim Deus ex Deo .* 3. Gregorius Nazianzenus orat. 35. quæ prima de Filio dicitur , hanc sibi quæstionem proponit : *Quomodo igitur non sunt ( Filius & Spiritus sanctus ) simul cum Patre principii expertes , si qui-*

*dem æterni sunt? Eam autem sic solvit: Quia inde procedunt, etsi non post illum sunt. Data à se solutionis hanc reddit rationem: Equidem quod principio caret, etiam æternum est: quod autem æternum est, non protinus omni caret principio; quamdiu ad Patrem, velut ad principium, refertur. Ergo illi, quantum ad causam, non carent principio.*

4. Athanasius oratione contra Sabelli gregales, concedit, Patrem jure meritò dici solum Deum. *Quòd solus ingenuus sit, & solus fons Deitatis.*

Ex iis verò Patrum locis sic arguitur. Illi judicarunt, in divinis admitti debere processiones seu emanationes ac origines unius ex alio tanquam à principio, qui docuerunt, Verbum esse Deum de Deo; ipsum verè genitum esse, non factum; Deum Patrem esse Filii auctorem, Filium & Spiritum Sanctum non esse expertes principii eò quòd à Patre procedant; utrumque referri ad Patrem tanquam ad principium; Patrem rectè dici solum Deum, quòd solus sit ingenuus, quòd solus sit fons Deitatis: atqui id docuerunt Patres qui post exortam Arianorum hæresim scripserunt: ergo, &c.

Obiectes 1. Processio supponit prius & posterius, nempe principium est prius termino, qui ab eo procedit: atqui in divinis non datur prius & posterius, non enim dantur inter ea quæ sibi invicem coexistunt: sed omnes personæ SS. Trinitatis sibi invicem coexistunt, cum omnes sint æternæ: ergo, &c.

Resp. dist. maj. Processio supponit prius & posterius aut temporis, aut originis, conc. maj. temporis tantum, neg. maj. In divinis prioritas temporis locum non habet, eò quòd (ut dictum est in argumento) singulæ personæ sint essentialiter æternæ, sed admitti debent prioritas & posterioritas originis. Patet solutio argumentis omnibus, quibus conclusio secunda confirmata fuit, ac præsertim hoc textu qui laudatus est ex Gre-

Gregorio Nazianzeno: *Quod autem æternum est non protinus omni caret principio*. Confirmatur ex eo, quòd si supponeretur, solem esse æternum, sequeretur, lumen quod profundit, fore pariter æternum: in ea tamen suppositione esset prioritas inter solem & lumen, quod ex eo productum fuisset ab æterno.

Objicies 2. Si inter personas divinas admitteretur processio, solus Pater esset Deus à se ipso: siquidem solus à se ipso divinitatem haberet, aliæ personæ eam ab ipso reciperent: atqui solus Pater non est Deus à se ipso, nempe si solus Pater esset Deus à se ipso, aliæ personæ non essent Deus; siquidem est de essentiâ Dei, ut sit Deus à se ipso, hoc est, independenter à quolibet alio: ergo, &c.

Resp. ad 1. conc. maj. neg. min. Ad 2. neg. ant. Ad 3. dist. ant. Est de essentiâ Dei, ut sit Deus à se ipso, hoc est, independenter ab aliquâ causâ extrinsecâ, conc. ant. independenter à principio originis, neg. ant. Non est quidem de essentiâ Dei, ut habeat principium; nam alioquin Pater qui est innascibilis & improducibilis, non esset Deus; sed non est quoque de illius essentiâ, ut careat principio originis. Id persuasum fuit Patribus Nicænis, qui Christum dixerunt *Deum de Deo, Deum verum de Deo vero, genitum non factum*.

Doctrinam illam Nicæni Patres docti fuerant ab iis qui vixerunt tribus prioribus sæculis: siquidem (ut de Verbi divinitate differentes ostendimus) asseruerunt, Verbum se habere respectu Patris, (sublatis tamen imperfectionibus) sicut se habet radius respectu solis, sicut fluvius respectu fontis. Vide quæ dicta sunt superiùs paginis 59. 60. 61.

Objicies 3. Esse personarum divinarum non potest esse receptum: nam esse receptum, est esse imperfectum, tum quia (dicente Scripturâ) beatus est magis dare quàm recipere, tum etiam quia esse receptum præsupponit in subjecto indigen-

gentiam rei quæ in eo recipitur: atqui si in divinis admitti deberet processio, esse divinarum personarum foret esse receptum: nempe personæ procedentes reciperent esse à principio à quo procederent: est enim de essentiâ processionis, ut sit origo seu emanatio, ac proinde receptio esse ab aliquo principio: ergo, &c.

Resp. ad 1. neg. maj. Ad 2. neg. ant. Ad 3. dist. ant. Beatius est magis dare quàm recipere, in creaturis, conc. ant. in divinis, neg. ant. Ratio est, quia receptio in creatis fit cum dependentiâ recipientis ab eo à quo recipitur; in divinis verò fit absque dependentiâ; nec id mirum est: nam in creatis is qui dat, non dat esse proprium, sed simile tantum: sic homo generans hominem, ei quidem communicat ejusdem speciei naturam, sed non communicat eandem numero; unde natura humana multiplicatur in individuis, qui sunt sub humanâ specie: E contra in divinis Pater eandem numero naturam communicat Filio, quam ipse habet; Pater & Filius eandem quoque communicant Spiritui sancto: at natura divina in quâcumque personâ consideretur, est omnino independens, & cum à personâ realiter non distinguatur, efficit, ut persona procedens sit independens ab eâ à quâ procedit. Ad 4. dist. ant. Esse receptum præsupponit in subjecto indigentiam rei quæ recipitur, si subjectum sit aliquando sine re quæ recipitur, conc. ant. si nusquam sit sine re quæ recipitur, neg. ant. *Si ergo aliquid est* (ait S. Thomas quæst. 10. de potentiâ art. 1. ad 13.) *quod receptioni non præexistit, sed semper est in recepisse, hoc nullo modo est indigens. Filius autem non sic accipit à Patre, quasi prius non habens, & postea accipiens, sed quia hoc ipsum quod est, habet à Patre; unde non sequitur, quod sit indigens.*

Objicies 4. Explicari non potest, in quo posita sit natura processionum divinarum: ergo reverà non dantur in divinis. Probatur ant. Triatan-  
tium

tum fingi possunt, in quibus natura divinarum processionum posita sit; nimirum vel simplex resultantia ex intellectione & volitione divinâ, ei similis quæ reperitur inter substantiam rei, & proprietates quæ ab eâ dimanant, ut patet in calore respectu ignis; vel actio ipsa intelligendi & volendi; vel ( ut vult Scotus ) actio aliqua, formaliter ( ut loquitur ) ab intellectione & volitione distincta: atqui in nullo ex iis tribus processio activa posita est. Non quidem in simplici resultantiâ ( ut vult Suarez ) siquidem, cum Filius & Spiritus sanctus sint personæ verè subsistentes, per meram resultantiam produci non possunt. Non est quoque posita in ipsâ actione intelligendi & volendi, nam alioquin, cum illa actio non minùs sit in Spiritu sancto, quàm in Patre & Filio, non minùs in eo, quàm in illis, esset alicujus personæ productiva, quod tamen repugnat fidei. Non est tandem posita in actione distinctâ formaliter ( ut loquitur Scotus ) ab ipsâ seu intellectione seu volitione: scilicet, cum Verbum ex vi suæ processionis sit essentialis sapientia genita, & Spiritus sanctus ex vi suæ processionis sit substantialis amor, seu dilectio Patris & Filii, necessariò postulant produci per ipsum intelligendi & volendi actum. Ergo explicari non potest, in quo posita sit natura processionis activæ.

Resp. ad 1. neg. ant. Ad 2. neg. min. Nempe, cum scholâ S. Thomæ dicendum est, processionem activam positam esse essentialiter in ipsâ intelligendi & volendi actione, hoc est, Filium generari per actum, quo Pater semetipsum intelligit, & Spiritum sanctum produci per actum, quo Pater & Filius sese mutuò diligunt. Nec contrarium probat argumentum: siquidem ipsimet actus intelligendi & volendi in se, hoc est, absolute sumpti, non producunt personas, sed tantum prout per paternitatem aut filia-

filiationem modificantur ; sic actus intelligendi non generat Verbum, nisi prout contractus & modificatus per paternitatem ; sic etiam actus volendi non producit Spiritum Sanctum , nisi prout contractus est ac modificatus per relationes paternitatis & filiationis . Illi solutioni lux affulgebit ex iis quæ de principio divinarum processuum dicentur inferius .

---

## Q U Æ S T I O   I I .

### *De numero divinarum processuum .*

*Not.* **P**rocessio duobus modis sumi potest, activè nimirum & passivè . Sumpta priore modo est actus quo datur esse divinis personis: accepta verò posteriore modo est receptio esse, quod datur per processionem activam , seu est terminus qui per processionem activam producitur . Hic igitur quærendum est 1. quot sint processiones passivæ, 2. quot sint activæ .

**CONCLUSIO I.** Duæ sunt tantum in divinis processiones passivæ .

Probatur . Tot sunt processiones passivæ quot sunt termini producti per processiones activas : atqui duo tantum sunt termini producti per processiones activas , Verbum nimirum & Spiritus Sanctus : Cum enim Pater ( ut superius observatum est ex traditione ) sit fons , origo ac principium totius deitatis , à nulli aliâ personâ generari aut produci potest ; ac proinde Filius & Spiritus Sanctus sunt solæ personæ , seu termini qui per processiones activas in divinis producantur .

GON-



CONCLUSIO 2. Processio activa, sumpta realiter & à parte rei, est una tantum.

Probatur. Processio activa, ex observatis, est actus, per quem datur esse Verbo & Spiritui Sancto: atqui unus tantum est realiter & à parte rei actus ille: siquidem actus in Deo non distinguuntur à parte rei; omne enim absolutum quod in Deo reperitur, est una ac maximè simplex substantia.

CONCLUSIO 3. Dux tantum sunt in divinis processionibus activæ, virtualiter distinctæ.

Probatur 1. Ex observatis, processionibus activæ sunt actus, per quos aliquæ personæ in divinis producuntur: atqui illi actus sunt tantum duo, virtualiter distincti: nam tot & non plures sunt actus illi, quot in Deo sunt actus immanentes, à se invicem virtualiter distincti: sed actus immanentes virtualiter à se invicem distincti, in divinis sunt duo tantum, intelligere scilicet & velle; alii enim omnes actus qui in Deo cogitari possunt, sunt transeuntes, ut sunt creatio, conservatio, destructio rerum, & alia huiusmodi: ergo, &c.

Probatur 2. Tot sunt processionibus activæ virtualiter distinctæ, quot sunt earum termini: neque enim actus Dei immanentes virtualiter distinguuntur, nisi ratione terminorum qui per eos producuntur: atqui fide constat, duos tantum esse terminos divinarum processionum, Filius & Spiritus Sanctus: ergo sunt tantum dux processionibus activæ virtualiter distinctæ.

Objicies 1. Si essent in divinis plures processionibus activæ, quælibet earum non esset infinita in genere processionis: sed absurdum est consequens: ergo & antecedens. Probatur maj. Illud non est infinitum in genere processionis activæ, quod non continet omnes processionibus activas: atqui quælibet processio activa in divinis non contineret omnes processionibus activas: si enim continere-

tineret omnes , non esset multiplex , sed una tantum processio , quod est contra suppositionem .

Resp. ad 1. neg. maj. Ad 2. neg. min. Ad 3. dist. ant. Si una processio contineret omnes processiones , non esset multiplex processio realiter & actu , conc. ant. non esset multiplex virtualiter , neg. ant. Generatio Verbi , & productio Spiritus sancti non sunt duæ entitates realiter & actu distinctæ , sed una , & quidem maximè simplex , quæ tamen est virtualiter multiplex: nempe idem præstat, ac si reverà essent duæ actiones à parte rei actu distinctæ , hoc est, producit duplicem terminum , seu duas personas, tum à se invicem tum à Patre realiter distinctas . Vide quæ harum Institutionum Tomo 1. dicta sunt de distinctione attributorum à se in invicem , & quæ dicentur inferiùs de distinctione relationum ab essentiâ divinâ .

Objicies 2. Non est potior ratio, cur ex intellectione & volitione oriantur aliquæ processiones, quàm ex potentiâ & bonitate: atqui ex potentiâ & bonitate non oriuntur aliquæ processiones , alioquin quatuor processiones in divinis admitti deberent, quod quidem est contra thesim: ergo nec aliquæ oriuntur ex intellectione & volitione .

Resp. neg. maj. Ratio disparitatis est 1. quia actio potentiæ est ad extra , è contra processio ( ut patet ex observatis ) est ad intra . 2. Bonitas ex se & secundum suum conceptum non dicit aliquam actionem , è contra verò processio est activa , cum per eam Verbum & Spiritus sanctus producantur .

Q U Æ S T I O III.

*De processione Verbi à Patre.*

Not. **D**E processione Verbi à Patre quærendum est 1. utrum dicatur generatio: 2. quænam sit propria generationis idea: 3. utrum reddi possit ratio, cur Verbi processio dicatur generatio.

C A P U T PRIMUM.

*An Verbi processio nominetur generatio.*

Not. **A**Riani constanter negarunt, Verbi processionem nominari debere generationem: nec mirum; cum enim nollent Verbum esse verè Deum ac Patri consubstantiale, consequens erat ut assererent, ipsum verà generatione non produci: nempe quæ generatione producuntur, ejusdem, saltem secundum speciem, sunt naturæ, ut videre est in homine qui ab alio generatur. Econtra Catholici quovis sæculo Verbi processionem à Patre vocarunt veram ac propriè dictam generationem, indeque desumpserunt invictum argumentum pro consubstantialitate Verbi.

CONCLUSIO I. Processio Verbi à Patre dicitur generatio.

Probatur I. ex Scripturâ. Psalmo 3. sic Pater Verbum alloquitur: *Filius meus es tu, Ego hodie genui te.* Nec obstat, quòd Apostolus Actuum 13. iis verbis utatur ad probandam Christi resurrectionem, quæ fuit illius altera veluti generatio: Nam ad Hebræos 1. iis etiam utitur, ut eidem Christo divinitatem asserat: *Cui enim dixit aliquando angelorum: Filius meus es tu, ego hodie*

*die genui te?* Nec mirum est, quòd verbis de quibus agitur, Apostolus duplicem sensum tribuat: tanta scilicet est Scripturæ vis, ut plures sensus etiam literales contineat.

Psalmo 109. sic quoque Deus Verbum suum alloquitur: *In splendoribus sanctorum ex utero ante Luciferum genui te.* Eam autem sententiam de Christo intelligit Apostolus ad Hebræos 5. ut illius sacerdotium supra Aaronicum extollat: *Nam ( inquit ) Christus non semetipsum clarificavit, ut pontifex fieret, sed qui locus est ad eum: Filius meus es tu, ego hodie genui te.*

De eadem processione intelligi debent hæc verba, Isaïæ 53. *Generationem ejus quis enarrabit?* scilicet temporalis enarrari potest ac intelligi, saltem à beatis. Joannis 3. Verbum vocatur Filius unigenitus: *Sic Deus dilexit mundum, ut Filium suum unigenitum daret.* In pluribus locis prima persona SS. Trinitatis vocatur Pater: *Testimonium perhibet de me* (ait Christus Joannis 8.) *qui misit me Pater.*

Ex iis verò Scripturæ textibus sic conficitur argumentum. Illius processio rectè dicitur generatio, qui in Scripturis dicitur Filius genitus à Deo Patre; cujus generatio est sive beatis sive viatoribus ineffabilis; qui est Dei Filius unigenitus; qui Deum habet Patrem, idèd enim Pater est, quòd generet Filium: ergo Scripturæ docent Verbi processionem debere nominari generationem.

Probatur 2. ex traditione. Patres qui Concilium Nicænum I. præcesserunt, non rarò generationis nomen explicitè aut implicitè usurpant ut Verbi processionem designent; nonnunquam enim Verbum vocant Dei Filium: at nemo Filius est, nisi per generationem. Sæpiùs dicunt ipsum à Deo genitum: *Sin propriè* (ait Justinus Apolog. 2.) *etiam præter communem natiuitatem genitum ipsum ex Deo Verbum Dei dicimus.*

Idem

Ideum author ( ut videre est hujusce tom. pag. 43. ) in dialogo cum Tryphone explicat modum divinæ generationis Verbi . Dionysius Alexandrinus in Epistolâ adversus Paulum Samosatænum sic loquitur: *Deus enim manifestatus est in carne , factus ex muliere ; qui ex Deo Patre genitus est ex utero ante Luciferum , velut è corde Verbum ex Patre editum .* Sic etiam Alexander Episcopus Alexandriæ in Epistolâ ad Alexandrum Constantinopolitanum Episcopum : *Quid illud , Ex utero ante Luciferum genui te , nonne palam ostendit naturalem partus paterni filietatem ?* Concilium Nicænum I. apertè profitetur in symbolo, Verbum esse *genitum* , non *factum* . Patres qui post illud Concilium floruerunt, unanimi consensu hanc Psalmi sententiam : *In splendoribus Sanctorum ex utero ante Luciferum genui te* , explicarunt de æternâ Verbi processione à Patre . Vide Basilium lib. v. contra Eunomium, Epiphanium hæresi 69. Cyrillum Hierosolymitanum Catechesi xi. Augustinum lib. 2. contra Maximinum cap. 7. Fulgentium qui libro Responsionum ad Objectiones Arianorum Responsionē nonâ sic loquitur de Psalmi textu de quo agitur : *Multum fallitur , qui hujus scripturæ locum divinæ nativitatis non credit convenire .* Concilium Toletanum XI. ex eodem textu colligit, Verbum ex nihilo non prodiisse : *Nec enim ( inquit ) de nihilo , neque de aliqua alia substantia , sed de Patris utero ; id est , de substantia ejus , idem Filius genitus , vel natus esse credendus est .*

Objicies . Vox hæc *Generatio* , apta non est ad exprimendam processionem Verbi à Patre . Primò enim includit ideam principii mutabilis ; quia generatio non fit nisi in tempore , nec sine principii generantis mutatione ; 2. importat divisionem , sectionem ac decissionem substantiæ principii generantis ; scilicet in animatis v. g. non fit generatio, nisi per semen, quod  
qui-

quidem est pars decisa ex substantiâ generantis : ergo , &c.

Resp. 1. Arianos iis ratiunculis olim usos fuisse, ut Catholicis invidiam facerent: scilicet contendebant, ex Verbi generatione quam Catholici profitebantur, sequi absurda, quorum meminit objectio. Arius eâ falsâ suppositione nixus, in Epistolâ ad Eusebium Nicomediensem conquestus est, se ab Alexandro Episcopo Alexandrino damnatum fuisse, quòd ei assentiri noluisset ista prædicanti: *Semper Deus, semper Filius, simul est Pater, simul est Filius. Neque cogitatione, neque momento aliquo Filium Deus antecedit, semper Deus, semper Filius, ex ipso Deo Filius est.* Ibidem asserit, se credere *Filium non esse ingeniis ullo modo partem.*

Resp. 2. dist. ant. Vox hæc *Generatio*, includit ideam principii mutabilis, divisionem substantiæ, in creatis, conc. ant. in divinis, neg. ant. Ratio est, quia proprietates rerum creatarum Deo non tribuuntur, nisi seclusis imperfectionibus: Hinc sequitur, generationem, cum de Deo passivè dicitur, nihil aliud significare, quàm originem viventis à vivente in similitudinem naturæ: cum autem activè, non aliud in Patre dicit, quàm substantialem ac perfectam naturæ divinæ communicationem.

Confirmatur responsio ex ipso Scripturarum usu: nempè ad significanda varia Dei attributa nonnunquam iis vocibus utuntur, quæ secundum sensum quem sillabæ præ se ferunt, imperfectionem important, & tamen de Deo nonnisi perfectè, hoc est, seclusis imperfectionibus, prædicantur: *Scriptura* (ait Gregorius Nyssenus lib. 7. contra Eunomium) *oculum, & supercilia, & digitos, & manum, & dextram, & brachium, ac pedem, calceamenta & ejusmodi alia de Deo narrat, quorum nihil secundum usitatam intelligentiam in divina natura deprehenditur. Sed id quod facile à nobis percipi potest, disciplinam perdu-*  
gens,

5 Dissert. II. De Procession. Divin. 157.  
*cens, tritis hominum consuetudine vocibus res illas, quæ significationem excedunt omnem, definit; dum proportionem quadam per singula, quæ de Deo prædicantur, ad altiore[m] quendam sensum evehimur.*

## C A P U T II.

### *De germana divina generationis idea.*

**Not.** **U**T cum methodo proponatur divinæ generationis idea, quærendum est 1. utrum generationis idea conveniat processioni Verbi à Patre: 2. Quid ex eâ ideâ consequatur.

**CONCLUSIO 1.** Generationis idea convenit processioni Verbi à Patre.

Probatur. Idea generationis continetur hæc illius definitione, quam tradit S. Thomas 1. p. q. 27. art. 2. *Origo alicujus viventis à principio vivente conjuncto, secundum naturæ similitudinem*: atqui ea generationis definitio convenit processioni Verbi à Patre. Nam 1. ea processio est vera origo viventis, nempe Verbum sumit suum esse à Patre: 2. Est à principio vivente, Patre nimirum æterno: 3. Est à principio conjuncto non quidem per partitionem sui esse, ut fit in creatis, per semen nimirum decisum ex substantiâ principii; sed integrè ac perfectè, hoc est per totius naturæ communicationem: 4. Est in similitudinem naturæ: nempe Verbum in Scripturis appellatur imago Patris, & quidem perfectæ, cum eum perfectè referat, utpotè eandem à Patre recipiens naturam, quâ ipsemet Pater est Deus.

**CONCLUSIO 2.** Varia consequuntur ex eo quòd veræ generationis idea conveniat processioni Verbi à Patre.

Probatur enumeratione. *Primò*, sequitur, Verbum non esse aliquid effectum exterius à Patre: nam

nam quod extrinsecus efficitur, non dicitur generari, sed fieri; sic domus non dicitur generata ab artifice, sed facta: unde Scriptura cum de rebus creatis agit, non generationis, sed creationis nomen usurpat: *In principio* ( inquit Genesis 1. ) *creavit Deus cælum & terram*: Econtra verò cum agit de Dei Filio, utitur generationis nomine: *Ex utero ante Luciferum genui te*.

Sequitur 2. Verbum divinum esse de Patris substantiâ; nempè essentiale est ei, qui per generationem procedit, ut fiat ex sui principii substantiâ: *Quod efficitur* ( inquit Basilus libro 4. contra Eunomium ) *non ex substantia efficientis existit*: *Quod autem gignitur, ex ipsamet generantis est substantia*. Non est igitur idem efficere ac generare. Nihil magis olim offendit Arianos, quàm consequens, quod modò retulimus; unde semper negarunt, Verbum esse ex substantiâ Patris: Econtra verò Catholici constanter propugnarunt, Patrem Verbum genuisse de se ipso, de substantiâ suâ, de eo quod est: *Non sic* ( inquit Augustinus Epist. 67. ) *ex Deo Patre unigenitus Filius, quemadmodum ex illo est universa creatura quam ex nihilo creavit*. Hunc quippè de sua substantia genuit, non ex nihilo fecit, nec eum ex tempore genuit, per quem cuncta tempora condidit. Catholici urgere soliti sunt semper hunc Scripturæ loquendi morem, *Ex utero*, ut generationem à creatione, ac quâlibet aliâ effectiōe discernerent. Asseruerunt, Verbum non esse Filium degenerem: *Non est* ( ait Augustinus lib. 3. contra Max. cap. 14. ) *degener ab uno Deo Patre Deus unus Filius*.

Sequitur 3. Verbum esse omninò simile Patri: scilicet est de essentiâ generationis, ut genitum sit simile generanti: nam homo hominem, leo leonem generat. Ea verò similitudo non est secundum accidentia, sed secundum ipsam naturam; hincque fit, ut filius qui parentum vultum nullâ ratione refert, parentum tamen imago nuncupetur.



cupetur: Hinc etiam olim contigit, ut Catholici constanter propugnaverint, Verbum non esse simile Patri bonitate tantum, sapientiâ, aliisque attributis, quæ mens ab essentiâ distinguit; sed & ipsamet essentiâ, naturâ, substantiâ.

Sequitur 4. Verbum esse Filium Dei per communicationem naturæ divinæ: siquidem generatio est origo viventis à principio *conjuncto*: generans verò non jungitur genito, nisi per propriæ naturæ communicationem; quæ quidem in creatis continetur in semine, quod est pars substantiæ quæ ex generante decisa est.

Sequitur 5. idem Verbum esse Dei Filium per communicationem totius naturæ divinæ: nempe cum natura divina sit indivisibilis, oportet, ut, si communicetur ( ut communicari necesse est per generationem ) tota ac integra communicate: *Impassibilis est enim ille qui genuit, & imago invisibilis Dei est ille qui natus est* ( ait Hilarius lib. 2. de Trinitate cap. 1. ) *Est enim unus ex uno: non est portio, non est defectio, non est diminutio, non derivatio, non protensio, non passio; sed viventis naturæ ex vivente nativitas est.*

Sequitur 6. Verbum esse Omoousion, hoc est Consubstantiale Patri. Quid enim aliud Omoousii, sive Consubstantialis nomine intelligitur, quàm res quæ ejusdem est substantiæ cum eo, à quo procedit? Hinc mirum non est, quòd Catholici tamdiu, tamque constanter pro illâ voce contra Arianos decertaverint.

Sequitur 7. Verbum esse verè ac substantialiter Deum: Ille nimirum verè ac substantialiter est Deus, cui inest vera ac substantialis natura Dei.

Sequitur tandem 8. Verbi generationem esse æternam: nempe cum Verbum per generationem recipiat esse divinum, necesse est, æternam esse illius generationem. Neque enim æterna natura, seu esse divinum, communicari potest

per temporalem generationem. Siquidem persona cui communicatur esse divinum, necessariò est Deus ipse; ac proindè ea persona est necessariò æterna, cum æternitas sit essentialis Deo.

## CAPUT III.

*Cur Verbi processio dicatur generatio.*

Not. 1. **M**Ovetur hæc quæstio occasione argumenti, quo Macedoniani quondam utebantur, ut Spiritus Sancti divinitatem impugnarent: *Si creatura non est* ( inquit apud Athanasium Epist. ad Serapionem ) *neque unus ex angelis, sed à Patre procedit, igitur & ipse Filius est, & duo sunt fratres, nimirum ille ipse Spiritus & Verbum. Quòd si frater est, quinam unigenitus est Verbum?* Idem argumentum adhibuerunt etiam Ariani: *Cum enim* ( ajunt apud Augustinum lib. 1. contra Maximinum ) *& Spiritum sanctum de substantia Patris esse dicitis, si Filius ex substantia Dei Patris est, de substantia Patris & Spiritus sanctus, cur unus Filius est, & alius non est Filius? Quid Spiritus vobis deliquit, cum ex eadem sit substantia, cum æqualis sit Filio, ut dicitis?*

Not. 2. Patres, antequam illud argumentum solverent, monuerunt, evidentem rationem reddi non posse, cur Filii à Patre processio dicatur generatio potius, quàm Spiritus sancti à Patre & Filio processio; cur ille sit Filius, iste verò, licèt ex substantiâ Patris productus, Filius nec sit nec appellari debeat. Augustinus lib. 3. contra Maximinum cap. 14. Ariano quærenti, *cur unus Filius sit, & alius non sit Filius*, sic respondet: *Ecce respondeo, sive capias, sive non capias: De Patre est Filius, de Patre est Spiritus sanctus; sed ille genitus, iste procedens. Quid autem inter nasci & procedere intersit, de illa excellentissima natura loquens,*

*quens, explicare quis potest? Non omnè quod procedit, nascitur, quamvis omne procedat quod nascitur .... Hæc scio: Distinguere autem inter illam generationem & hanc processionem nescio, non valeo, non sufficio.*

*Not. 3.* Postquam veteres monuerunt, non esse quærendum evidens discrimen inter generationem Verbi & processionem Spiritûs Sancti, conati sunt aliquod reddere, quod verisimilitudine niteretur. Non eandem tamen omnes viam tentarunt. Putarunt nonnulli, idè processionem Spiritûs Sancti non dici generationem, quòd alioquin sequeretur, eum à duobus Patribus generari: *(Moniam ( apud Augustinum lib. 15. de Trinit. cap. 26. ) si & ipse Filius diceretur, amborum utique Filius diceretur, quod absurdissimum est: Filius quippe nullus est duorum, nisi patris & matris.*

Alii voluerunt, quæstionis de quâ agitur, hanc reddi debere rationem, quòd Filius procedat ut natus, è contra Spiritus Sanctus ut datus: *Exist ( apud Augustinum lib. 5. de Trinitate cap. 14. ) non quomodo natus, sed quomodo datus; & idè non dicitur Filius.*

Contenderunt aliqui, ejus de quo quæritur, hanc esse rationem, quòd Filius, non autem Spiritus Sanctus, propriè sit imago Dei Patris. Docuerunt alii, peti debere rationem ex eo, quòd Spiritus Sanctus à Patre & Filio non recipiat naturam fœcundam; ac proindè (inquiunt) non potest esse Filius, quia Filius, cum debeat esse omnino similis Patri, fœcundam, sicut Pater, naturam debet habere.

Tandem alii quibus subscripsit S. Thomas, asserunt, rationem quæ hìc investigatur, peti debere ex eo, quòd secunda persona SS. Trinitatis producat per intellectum, cujus operatio est productiva imaginis, quæ objecto intellecto planè sit similis; è contra Spiritus Sanctus procedat per voluntatem, cujus actus ex se non producit ima-

ginem objecto, quod amatur, similem. Cuinam ex iis sentiis adhærendum sit, subsequentes conclusiones aperient.

**CONCLUSIO 1.** Ratio quam assignat prior sententia, satis non est ad explicandum discrimen generationis Verbi à processione Spiritus Sancti.

Probatur. Ea ratio satis non est, quæ non explicat, cur is qui à duobus procedit, non sit duorum Filius, quemadmodum Filius unius est qui ab uno procedit, atqui, &c. ergo, &c. ~~hæc~~ valet quod reponitur, scilicet, ubi duo concurrunt ad generationem, unum vocari Patrem, alterum verò nominari matrem. Non valet (inquam) siquidem licet id verum sit in rebus creatis, non sequitur, quòd in divinis locum habere debeat; nempe divinæ generationis conditio diversa est omninò à quâlibet creatâ generatione; undè multa ei propria sunt, quæ creatæ nullo modo conveniunt.

**CONCLUSIO 2.** Sententia quæ docet, idèd Verbum esse Filium, quòd procedat ut natum, non satis explicat discrimen, quod reperitur inter Verbi processionem à Patre, & processionem Spiritus Sancti à Patre & Filio.

Probatur. Sententia de quâ agitur, non explicat, cur Filius, non autem Spiritus Sanctus, procedat ut natus, quamvis tamen utrique divina Patris natura ex æquo communicetur.

**CONCLUSIO 3.** Sententia quæ docet, idèd Verbum esse Filium, quòd sit imago Patris, satis non est ad constituendum discrimen, quod reperitur inter processionem Verbi, & processionem Spiritus Sancti.

Probatur. Ea sententia satis non est, quæ præsupponit aliam rationem quâ nitatur: atqui sententia de quâ agitur, præsupponit aliam rationem quâ nitatur: Scilicet ab eo qui assereret, Verbum idèd generari, quòd sit imago Patris, quæri posset cur Verbum sit potius imago Patris, quàm Spiritus

tus sanctus, cum uterque ratione naturæ perfectè referat Patrem æternum.

CONCLUSIO 4. Sententia quæ docet, idèd Verbum, non autem Spiritum Sanctum, esse Filium, quòd à Patre recipiat naturam fœcundam, quæ quidem è contra sterilis est in Spiritu Sancto, satis non est.

Probatur. Primò, ea sententia non reddit rationem, cur eadem natura, quæ fœcunda est in Filio, sit sterilis in Spiritu Sancto. 2. Ut quis sit alicujus filius, non est necesse, ut ab eo naturam fœcundam recipiat: quàmplures enim sunt filii, qui nullo modo generare possunt: ergo, &c.

CONCLUSIO 5. Cæteris omnibus probabilior est sententia quæ asserit, secundam personam SS. Trinitatis idèd generari, quòd à Patre procedat per actum intellectus.

Probatur. Primò, secundam SS. Trinitatis personam procedere à Patre per actum intellectus, seu per actum quo Pater æternus se ipsum cognoscit, Patres docuerunt: *Cur Verbum dicitur?* (quæstio est quam sibi proponit Basiliius hom. in initium Evangelii Joannis) *ut ostendatur* (respondet) *ex mente processisse*. Eàdem ratione loquitur Gregorius Nazianzenus Orat. 36. *Verbum* (inquit) *appellatur, quoniam sic se habet ad Patrem, ut Verbum ad mentem*. Idem passim asserit Augustinus in libris de Trinitate.

Secundò, actum intellectus esse causam, cur processio de quâ agitur, vocetur generatio, sic ostenditur. Ille actus est causa, cur processio dicatur generatio, vi cujus secunda persona SS. Trinitatis producit in similitudinem divinæ naturæ; in eo enim posita est generationis essentia: atqui secunda persona SS. Trinitatis producit in similitudinem naturæ vi actus intellectus: siquidem producit in similitudinem naturæ vi actus, qui ex se tendit ad efformandam imaginem

objecti quod intelligitur : sed actus intellectûs ex se tendit ad efformandam imaginem objecti quod intelligitur ; unde dicitur, ad se attrahere objectum de quo cogitat , cum è contra volitio exeat ad objectum quod amat , imò & in ipsum aliquâ ratione transformetur : idque patet experienciâ quâ docemur , nos de nullâ re cogitare , quin ejus in nobis exprimamus similitudinem , quæ quidem similitudo dicitur verbum mentis , seu interna mentis locutio .

Idem ostenditur autoritate Patrum. Secunda persona SS. Trinitatis generatur vi illius actûs, vi cuius est & dicitur Filius; nempe filius est terminus generationis: atqui dicitur, & est Filius vi actûs, quo Pater se ipsum intelligit: est enim Filius, quia Verbum est Patris: at idè est Verbum Patris, quòd Pater semetipsum intelligat; quippè non aliâ ratione, quàm semetipsum intelligendo, exprimit Verbum. Augustini est illud argumentum; scilicet Epistolâ 49. disertè scribit, *Christum dici Verbum Dei, per quod facta sunt omnia, & ideo Filium quia Verbum, nec Verbum dictum, atque transactum, sed apud incommutabilem Patrem incommutabile ipsum, atque incorruptibiliter manens.* Eodem modo loquitur Athanasius impugnans Arianos, qui cum faterentur secundam personam SS. Trinitatis esse Verbum, nolebant tamen concedere esse Filium: *Ac Dei quidem omninò esse Verbum inficiari nolunt, ( inquit in lib. de Decretis Synod. ) hoc verò esse Dei Filium nolunt confiteri. Sed illud est ignoratio veritatis & sacrarum Scripturarum inscitia. Nam si omninò Deus est Verbi Pater, cur non & hoc quod gignitur, Filius est? Rursus verò Dei Filius quis esse potest, nisi orta ex ipso progenies? Similis est loquendi modus apud Basilium & Chrysostomum: Propterea ( ait Hom. 2. in Joannem. ) Verbum etiam ipsum nominavit. Nam quia illud edoctrurus erat, Verbum hoc unigenitum esse Filium Dei: ne quis patibilem putaret esse genera-*  
tio-

*tionem, appellatione illa Verbi occupavit, pravam antea suspicionem aufert, cum ex ipso esse demonstrans, tum sine passione Filium. Ambrosius hæc etiam habet libro de Incarnatione cap. 3. Simul- ta Verba, multi Filii.*

Objicies 1. Secunda persona vi illius actûs non generatur, per quem non accipit esse verum & reale: atqui vi actûs intellectûs non accipit esse verum & reale: nempè esse quod habetur per actum intellectûs, est esse fictum & intentionale, quod quidem non aliud est, quàm idea seu imago objecti, de quo mens cogitat: unde nemo dixerit lapidem habere esse verum & reale, eo quòd homo aut angelus de eo cogitent: ergo secunda persona SS. Trinitatis non generatur vi actûs, per quem Pater æternus seipsum cognoscit.

Resp. ad 1. neg. min. Ad 2. dist. ant. Esse quod habetur per actum intellectûs creati, non est verum & reale, conc. ant. Esse quod habetur per actum intellectûs divini, neg. ant. Ratio disparitatis est, quia cum intellectus creatus non sit perfectus in ratione intellectûs, non potest exprimere, seu producere perfectum verbum, seu perfectam imaginem objecti, de quo cogitat: è contra verò, cum intellectus divinus sit infinitè perfectus in ratione intellectûs, debet necessariò exprimere perfectum verbum, seu perfectam imaginem objecti, de quo cogitat; id autem non est perfecta Dei imago, quod habet tantum esse intentionale & creatum: oportet igitur, ut Pater æternus, qui se ipsum perfectè intelligit, perfectum sui verbum exprimat ac producat, ac proinde verbum, cujus esse sit divinum ac reale. Confirmatur ex eo, quòd Patris intellectio sit actus purissimus, qui proindè non possit recipere species à se ipso substantialiter distinctas: ergo species sui ipsius, quam efformat, dum se ipsum intelligit, debet esse substantialiter idem cum illius intellectione. Vide S. Thom. 1. p. q. 4. art. 2. in corpore.

**Objicies 2.** Tota ratio, cur processio Verbi sit generatio, petitur ex eo, quod procedat vi intellectiois quæ ex se tendit ad productionem rei planè similis objecto quod intelligitur: atqui illa ratio nulla est: siquidem cum intellectio & volitio in divinis sint omninò idem substantialiter, Verbum tam dici potest produci vi volitionis quàm vi intellectiois; ac proindè cum volitio non sit generativa, ita nec intellectio debet esse generativa: ergo, &c.

**Resp. ad 1. neg. min. Ad 2. dist. ant.** Intellectio & volitio in divinis sunt omninò idem actu, conc. ant. virtualiter, neg. ant. Se habent Dei operationes ad intra, sicut illius attributa: quemadmodum igitur ( ut harum institutionum primâ parte dictum est ) attributa Dei à se invicem distinguuntur virtualiter: ita etiam intellectio & volitio. Cum autem ( ut ibidem observatum est ) distinctio virtualis efficiat, ut idem attributum propter suam infinitatem ac eminentiam æquivalet multis attributis, realiter actu distinctis, sic etiam efficit ut una operatio æquivalet multis operationibus, realiter actu distinctis; ac proindè eadem operatio potest sub unâ formalitate, seu sub unâ ratione, considerata producere terminum, quem non producit considerata sub aliâ ratione seu formalitate: Hincque sequitur, eandem entitatem reduplicativè prout est intellectio, producere Verbum, licèt reduplicativè, prout est volitio, ipsum minimè producat.

**Argumenta quæ ex Spiritus Sancti processione moveri possunt adversùs conclusionem nostram vide pertractata ac soluta subsequente capite quarto.**



C A P U T IV.

*Cur processio Spiritus Sancti non dicatur generatio.*

*Not.* **T**Ria hîc expendenda sunt 1. an processio Spiritus Sancti dici possit generatio : 2. cur non possit dici generatio : 3. denique cur appelletur processio simpliciter ac sine addito.

**CONCLUSIO 1.** Processio Spiritus Sancti non potest dici generatio.

Probatur. Si processio Spiritus Sancti dici posset generatio, Spiritus Sanctus dici posset Filius Patris ac Filii; nimirum ab utroque procederet per generationem, cuius terminus essentialiter est filius: atqui Catholica fides docet, Spiritum Sanctum dici non posse Filium Patris & Filii. Scilicet 1. nec Scriptura nec Patres aliquando Spiritum Sanctum vocarunt Filium: 2. econtra eâdem Scripturâ docemur, unicum esse in Trinitate Filium: his enim similibusque sententiis Scripturæ passim utuntur: *Sic Deus dilexit mundum, ut Filium suum Unigenitum daret. Unigenitus qui est in sinu Patris, enarravit nobis.*

**CONCLUSIO 2.** Idè processio Spiritus Sancti non est generatio, quòd Spiritus Sanctus procedat per actum divinæ voluntatis.

Probatur. *Primò*, Spiritum Sanctum procedere per actum voluntatis, ostendunt Scripturæ ac Patrum textus, in quibus dicitur charitas, donum, amor Patris ac Filii: ii enim textus significant, eum esse terminum charitatis & amoris, quibus Pater & Filius sese mutuò diligunt.

*Secundò*, idè processionem illam non esse generationem, quòd sit per actum voluntatis, sic ostenditur. Per id Spiritus Sancti processio non est generatio, per quod ex Patre & Fi-

lio non oritur in similitudinem naturæ: siquidem ut actio sit generatio, necesse est, ut illius terminus sit similis principio, à quo oritur, vi ejusdem actionis: atqui Spiritus Sanctus non est similis principio, à quo oritur, vi actûs voluntatis. Nempè, ut esset similis vi actûs voluntatis, necesse esset, ut actus voluntatis ex naturâ suâ tenderet ad reddendum suum objectum simile voluntati, à quâ exoritur: Sed actus voluntatis ex naturâ suâ non tendit ad reddendum objectum simile voluntati: imò, cum ( ut præcedenti capite jam fuit observatum ) voluntas amans quasi exeat extra se ipsam, excurratque ad objectum quod prosequitur, ipsa per suum amorem fit similis objecto, & aliquâ etiam ratione in illud transformatur: unde tritum est axioma: *Anima magis est ubi amat, quàm ubi animat*. Hinc fit, ut qui hominem aliquem deperit, omnes illius affectiones induat: quamobrem rectè Augustinus ait, talem esse animam, qualis est illius amor, cœlestem quidem si cœlestia desideret, terrestrem verò si fluxæ ac labentis naturæ rebus affectu inhæreat; ergo, &c.

Objicies 1. Ille procedit per generationem, qui est perfectè similis suo principio: atqui Spiritus Sanctus est perfectè similis suo principio: eandem enim habet naturam, quam habent Pater & Filius à quibus procedit.

Resp. dist. maj. Qui est perfectè similis vi suæ processiois, conc. maj. aliundè quàm ex vi suæ processiois, neg. maj. Spiritus Sanctus est quidem perfectè similis Patri & Filio, sed id non habet vi suæ processiois, sed tantùm ex eo, quòd natura divina sit substantialiter idem cum impulsu, seu cum amore, per quem Spiritus sanctus producit.

Instabis. Primò, Spiritus Sanctus habet naturam divinam per suam à Patre Filioque processioem: secundò, procedit ut Deus: ergo vi suæ processiois est similis suo principio: tertio, pro-

procedit ut persona divina, quia procedit ut subsistens in naturâ divinâ: ergo, &c.

Resp. ad 1. dist. ant. Habet mediâtè, conc. ant. scilicet cum processio Spiritûs Sancti sit realiter idem cum naturâ divinâ, necesse est, ut processio, veluti per accidens, communicet naturam divinam Spiritui Sancto. Habet immediâtè, neg. ant. Siquidem amor præcisè ut est amor, non communicat Spiritui Sancto naturam divinam, neque enim ( ut sæpius observatum est ) amor est communicativus naturæ principii amantis.

Resp. ad 2. negando, quòd Spiritus Sanctus procedat ut Deus, procedit enim tantùm ut impulsus, qui licèt à parte rei sit Deus, tamen sub ratione qua est impulsus Patris ac Filii, non est Deus; sicut unum attributum, licèt cum alio sit idem realiter, non est tamen idem sub ratione formali talis attributi; sic misericordia reduplicativè prout est misericordia, non est justitia. Vide quæ de attributis hujusce operis tomo 1. dicta sunt.

Resp. ad 3. negando, Spiritum Sanctum procedere ut persona divina. Ratio est, quia licèt vi suæ processionis habeat subsistentiam relativam, per quam modificat mutuum Patris & Filii impulsus, non habet tamen subsistentiam divinam, quia subsistentia divina est modificatio naturæ divinæ; quam quidem naturam divinam Spiritus Sanctus non habet ( ut jam dictum est ) immediâtè, præcisè, & vi suæ processionis, sed tantùm ex eo, quòd impulsus sit idem entitativè cum naturâ divinâ.

Objicies 2. Ea processio dici debet generatio, vi cujus Spiritus Sanctus habet naturam divinam siquidem si vi suæ processionis habet naturam divinam, vi processionis erit similis suo principio, ac proindè genitus: atqui Spiritus Sanctus vi suæ processionis habet essentiam divinam; nempe vi suæ processionis habet existentiam divi-

nam, quæ ( ut docent theologi in tractatu de attributis ) ne per mentem quidem, ab essentiâ divinâ distinguitur: ergo, &c.

Resp. ad 1. conc. maj. neg. min. Ad 2. dist. ant. Spiritus Sanctus vi suæ processions habet existentiam, tanquam conditionem communem omnibus productionibus, conc. ant. tanquam terminum productioni Spiritus sancti specialem, neg. ant. existentia enim per quamcumque productionem communicatur. Ut res aliqua recipiat esse, ( ut reverà recipit per quamcumque productionem ) debet recipere existentiam; sed existentia non recipitur tanquam terminus specialis cuiusque productioni: alioquin omnes productiones essent ejusdem omnino speciei, quod est falsum; ac proindè quamvis Spiritus Sanctus vi suæ processions recipiat existentiam, non sequitur, cum vi ejusdem processions recipere essentiam divinam tanquam terminum specialem & proprium.

Objicies 3. Idem debet esse judicium de processione per voluntatem, ac de processione per intellectum; ergo quemadmodum in divinis processio per intellectum producit terminum perfectè sibi similem, ita etiam processio per voluntatem producit terminum perfectè unum cum principio amante: siquidem sicut intellectus reduplicativè, prout intellectus, tendit ad efficiendam similitudinem objecti, quod intelligitur cum principio intelligente; ita etiam voluntas reduplicativè, prout voluntas, tendit ad efficiendam unitatem objecti amati cum principio amante.

Resp. conc. ant. neg. conseq. Ratio disparitatis est, quia licèt voluntas ex se tendat ad unionem cum objecto amato, & quidem perfectissimam, si sit ( ut est in Deo ) voluntas perfectissima; non tendit tamen ad unitatem identicam, hoc est, ad efficiendum unum identicè ex principio amante & objecto amato; scilicet prout remanet  
in

in lineâ voluntatis, ac proindè per se, non ad aliam tendit unionem, non ad aliam unitatem, quàm ad unitatem per affectum; quæ quidem (ut patet) nusquam fit unitas per indentitatem: econtra intellectus, remanens in lineâ intellectus, ex se tendit ad similitudinem; ea autem similitudo est imperfecta, seu per speciem ab objecto cognito distinctam, si intellectus sit imperfectus; perfecta verò, seu per verbum quod sit ejusdem naturæ cum objecto cognito, si intellectus sit perfectus: ac proindè mirum non est, quòd Spiritus Sanctus vi suæ processionis, quæ est per voluntatem, non recipiat naturam similem principio, à quo producitur.

Objicies 4. Spiritus Sanctus prout procedens, est Deus: ergo vi suæ processionis recipit naturam similem suo principio, ac proindè procedit per generationem, cum differentia specifica generationis in eo posita sit, quòd per se communice esse simile principio, à quo oritur. Probat ant. Spiritus Sanctus prout procedens, non est creatura: ergo est Deus.

Resp. ad 1. neg. ant. Ratio est, quia Spiritus Sanctus (ut fuscè probatum est) prout procedens formaliter (ut loquuntur) non recipit esse divinum, licèt ipsum à parte recipiat, eò quòd impulsus qui terminat processionem per voluntatem, sit idem entitativè cum essentiâ divinâ. Ad 2. conc. ant. neg. conseq. siquidem datur medium inter Deum & creaturam; ens nimirum quod abstrahit ab utroque. Ejusmodi autem est Spiritus Sanctus, consideratus reduplicativè prout procedens: sic enim spectatus, non aliud est quàm impulsus quem actus voluntatis produxit, & producet semper. Sed hæc satis sint de questione maximè metaphysicâ, de quâ (ut suo loco dictum est) nihil certi ac evidentis statui potest.

CONCLUSIO 3. Processio Spiritûs Sancti dicitur processio simpliciter.

Proq.

Probatur tum ex Scripturâ, tum ex traditione quæ non alio quàm processione termino exprimunt originem Sancti Spiritus à Patre: *Spiritus* ( inquit Joannis 10. ) *qui à Patre procedit*. Eodem modo loquuntur authores symboli, quod editum est in Concilio Constantinopolitano I. *Et in Spiritum Sanctum Dominum & vivificantem* ( ajunt ) *qui ex Patre procedit*.

Quæres, cur emanatio Spiritûs Sancti dicatur simpliciter processio.

Resp. sic appellari penuriâ terminorum, hoc est, licet processionis nomen absolutè & sine addito prolatum, genericè sumatur; cum tamen de Spiritu Sancto dicitur, sumitur specificè, seu pro certâ processionis specie, quam defectu terminorum qui proprii sint, nomine generico cogimur exprimere.

## C A P U T V.

### *De principio divinarum processionum.*

Not. 1. **D**uplex distingui potest principium processionum divinarum. Unum quidem quod vocatur principium, *Quod*, & aliud quod appellatur principium, *Quo*. Principium, *Quod*, est suppositum, seu hypostasis, seu persona, cui ultimâ tribuitur operatio: tritum enim est axioma: *Actiones sunt suppositorum*: sic calefactio ultimâ refunditur in ignem, velut in suppositum à quo producitur. Principium, *Quo*, est virtus, per quam principium *Quod*, operatur: eâ de causâ calor est principium *Quo*, calefactionis: nempè est virtus, per quam ignis operatur.

Not. 2. Principium *Quo*, subdividitur in principium *Quo proximum*, & in principium *Quo remotum*. Prius est illud, per quod suppositum operatur immediatè; alterum verò est illud, per quod mediâtè tantùm operatur: sic manus est prin-

principium *Quo remotum*, & penicillus principium *Quo proximum* respectu tabellæ, scilicet pictor qui est principium *Quod*, immediatè per penicillum, & remotè per manum operatur. Hinc patet, principium *Quo remotum* non influere in actum, nisi per principium *Quo proximum*.

Not. 3. Certum est, in divinis admitti debere duplex illud principium *Quod* & *Quo*. Ratio est, quia, ex iis quæ mox observata sunt, principium *Quod*, est persona seu suppositum agens: atqui datur in divinis suppositum agens: nimirum Pater generat Filium, idemque Pater, idemque Filius producant Spiritum Sanctum. Principium *Quo* est virtus, per quam suppositum operatur: sed in divinis datur ejusmodi virtus: cum enim persona Patris & persona Filii reverà producant, sequitur, eis inesse producendi virtutem,

Not. 4. De principio *Quo*, sive proximo sive remoto, res non est æquè certa ac de principio *Quod*. Ut igitur tollatur ejusmodi dubium, quærendum est 1. utrum intellectus & voluntas sint principium *Quo proximum*, divinarum processionum: 2. utrum essentia divina sit principium *Quo remotum*: 3. utrum relationes paternitatis & filiationis sint quoque principium *Quo remotum*.



## ARTICULUS I.

*Virum intellectus & voluntas sint principium Quo proximum divinarum processionum.*

CONCL. **I**ntellectus & voluntas sunt principium *Quo proximum* divinarum processionum. Est contra Durandum, qui in 1. lib. Sent. dist. 6. quæst. 2. scribit, principium *Quo proximum* esse essentiam divinam, prout est fecunda.

Pro-

Probatur. Ut quid sit principium *Quo proximum*, duæ conditiones requiruntur, nimirum 1. ut sit saltem virtualiter distinctum, tum à principio *Quod*, tum à principio *Quo remotum*: 2. ut immediatè influat in actum: atqui ambæ illæ conditiones reperiuntur in intellectu & voluntate divinâ. Nam *primò*, licèt sint unum realiter actum cum personis Patris & Filii, tum cum essentiâ divinâ, virtualiter tamen ab eis distinguuntur: scilicet est fundamentum reale, petatum ex eminentiâ Dei, concipiendi intellectum & voluntatem divinam tum sine essentiâ, tum sine personis. *Secundò*, intellectus & voluntas immediatè influunt in productionem Filii & Spiritûs Sancti. Et sanè Filius tum in Scripturis tum in Patribus (ut jam superiùs observatum est) vocatur Verbum Patris. *In principio* (ait Joannes Evangelii cap. 1.) *erat Verbum*. Idem 1. Epist. cap. 1. hæc habet: *Quod fuit ab initio, quod audivimus, quod vidimus, quod manus nostræ contrectaverunt de Verbo vitæ*. Hæc quoque leguntur ejusdem Epist. cap. 5. *Tres sunt qui testimonium dant in cælo, Pater, Verbum, & Spiritus Sanctus*. Sed non ob aliud Filius appellatur Verbum, quàm quòd intellectus divinus in illius productionem influat immediatè: è contra verò Spiritus sanctus dicitur amor, charitas, quòd à voluntate divinâ immediatè producat.

Nec argumentum solvunt qui respondent, Filium & Spiritum sanctum aliis quàm Verbi & Amoris nominibus nonnunquam appellari. Non solvunt (inquam) quia alia nomina sunt essentialia: at Verbum & Amor sunt termini notionales, seu tum in Scripturis, tum in Patribus usurpantur ad designandas Filii & Spiritus sancti personas; unde eædem Scripturæ cum Filium vocant Verbum, ipsum opponunt aliis personis, ut in hoc Joannis textu videre est: *Tres sunt qui testimonium dant in cælo, Pater, Verbum, & Spiritus sanctus*, Scripturarum loquendi morem secuti



cuti sunt Patres : siquidem in suis adversus Arianos operibus eum, cujus divinitatem Ariani negabant, ferè semper Verbum appellant.

Confirmatur argumentum. Personæ SS. Trinitatis immediatè producuntur per actiones immanentes: si enim producerentur per actiones transeuntes, essent creaturæ; siquidem ea quæ producuntur per operationes transeuntes, sunt extra Deum: atqui actiones Dei immanentes non aliæ sunt quàm intellectio & volitio, quæ quidem (ut patet) non ab aliis potentiis, quàm intellectu & voluntate producuntur.

Objicies. Principium *Quo proximum* divinarum processionum, non debet esse commune omnibus personis SS. Trinitatis. Si enim sit commune, singulæ personæ producent alias personas: nimirum productiones in divinis, licèt sint voluntariæ, sunt tamen necessariae; ac proinde si in singulis sit principium *Quo proximum* processionum, singulæ producent alias personas: atqui intellectus & voluntas sunt communes omnibus personis SS. Trinitatis: ergo non sunt principium *Quo proximum* processionum divinarum.

Resp. Idist. maj. Principium *Quo proximum*, sumptum relativè, non debet esse commune omnibus personis SS. Trinitatis, conc. maj. sumptum absolutè, neg. maj. Intellectus & voluntas sumpta absolutè, sunt quidem communia omnibus personis SS. Trinitatis; sed non sunt communia, sumpta relativè: hoc posteriore, non autem priore modo sumpta, sunt principium *Quo proximum* processionum divinarum: Hoc est, intellectus præcisè prout est intellectus, non est principium *Quo proximum* divinarum processionum; sed prout connotat personam Patris, seu quatenus est intellectio Patris.

Instabis. Intelligere Patris generat Verbum: Amare Patris & Filii, producit Spiritum sanctum: ergo à pari intelligere Filii, intelligere Spi-

Spiritus ſancti, debent quoque generare Verbum; Amor quo Spiritus ſanctus ſeipſum & alias perſonas amat, debet alium Spiritum ſanctum producere: non enim eſt potior ratio, cur intelligere prout eſt intelligere Patris, ſit principium *Quo proximum* Verbi, quàm intelligere, prout eſt intelligere Filii aut Spiritus ſancti.

Reſp. ad 1. conc. ant. neg. conſeq. Ad 2. dicendum eſt, ideò intelligere, prout eſt intelligere Filii aut Spiritus ſancti, non producere Verbum ſicut intelligere, prout eſt intelligere Patris, illud producit, quòd intelligere Filii, intelligere Spiritus ſancti, ſint ſubſtantialiter ac realiter unum & idem cum intelligere Patris: at una & eadem actio non niſi unum adæquatum terminum producit; ac præindè, cum Verbum propter ſuam infinitatem ſit terminus adæquatus intellectiōis Patris, non poteſt eſſe terminus intellectiōis prout eſt intellectiō Filii aut Spiritus ſancti. Propter eandem rationem, cum Spiritus ſanctus ſit terminus adæquatus amoris, quo Pater & Filius ſeſe mutuò diligunt, non poteſt eſſe terminus amoris, quo Spiritus ſanctus ſeipſum ac alias SS. Trinitatis perſonas proſequitur.

## ARTICULUS II.

*Virum eſſentia divina ſit principium Quo remotum divinarum proceſſionum.*

CONCL. **E**ſſentia divina eſt principium *Quo remotum* divinarum proceſſionum.

Probatur. Illud eſt principium *Quo remotum* divinarum proceſſionum, in quo virtus earum remotè continetur: atqui virtus proceſſionum divinarum remotè continetur in eſſentiâ divinâ: Siquidem id quod proximè continetur in potentiis alicujus eſſentiæ, remotè continetur in eſſentiâ:

tiâ: idèd enim est in potentiis, quòd essentia exigat illud habere: sic idèd intellectus & voluntas hominis habent virtutem intelligendi & amandi quòd hominis natura exigat intelligere & amare: atqui, ex dictis in primâ conclusione, virtus divinarum processionum proximè continetur in potentiis divinis, intellectu & voluntate: ergo remotè continetur in essentiâ divinâ.

Confirmatur argumento S. Thomæ 1. p. q. 4. art. ... Illud est principium *Quo remotum*, divinarum processionum, cui assimilantur illarum termini: Siquidem terminus semper est similis principio à quo producitur: quælibet enim natura exigit producere sibi simile; sic homo genitus, est in humanâ naturâ similis naturæ producenti, quæ est illius principium: atqui termini divinarum processionum assimilantur naturæ divinæ: nimirum quilibet est Deus: ergo essentia seu natura divina, est principium *Quo remotum* divinarum processionum.

Objicies. Quod nec generat nec generatur, non est principium aut terminus divinarum processionum: atqui essentia divina nec generat nec generatur: nam in Concilio Lateranensi IV. quod anno 1215. habitum est sub Innocentio Papa III. damnatus est libellus, quo Abbas Joachim asseruerat, essentiam & generare & generari.

Ut vis argumenti pateat, describenda est tum libelli, tum damnationis historia.

Libello occasionem dederat dictum Petri Lombardi, qui libro 1. Sententiarum, distinct. 5. hæc scripserat: *Catholicis tractatoribus consentientes dicimus, quòd nec Pater divinam essentiam genuit, nec divina essentia genuit Filium, nec divina essentia genuit essentiam. Hic autem nomine essentiæ intelligimus divinam naturam, quæ communis est tribus personis & tota in singulis.*

Libellus ille prodierat in lucem sedente Alexan-

andro Papâ III. *Scriptis etiam* (inquit Matthæus Paris in Historia Anglicanâ anno 1179.) *Alexandri diebus contra eundem Petrum Lombardum Abbas Ioachim Florentis canobii* (ordinis Cisterciensis in Calabriâ) *libellum, vocans eum hæreticum & insanum, quòd, &c.* Lis quam dictus Abbas adversus Lombardum moverat, indecisa remansit usque ad Innocentium III. *Stetit autem* (verba sunt ejusdem Matthæi Paris) *hæc indeterminata altercatio à diebus Alexandri Papæ usque ad tempora Innocentii Papæ per annos multos, sedentibus inter eos in cathedra Romana Lucio III. Gregorio VIII. Clemente III. & Celestino III. Pontificibus Romanis. Verùm Innocentius III. ejusmodi liti finem imposuit in Concilio Lateranensi IV.*

Et sanè quartum Concilium Lateranense prescripsit 1. libellum de quo agitur : *Damnamus ergo* (verba sunt capituli secundi) *& reprobamus libellum, sive tractatum, quem Abbas Ioachim edidit contra magistrum Petrum Lombardum de unitate seu essentia Trinitatis, appellans ipsum hæreticum & insanum, pro eo quòd in suis dixit Sententiis, Quoniam quedam summa res est Pater, Filius, & Spiritus sanctus, & illa non est generans, neque genita, nec procedens: Unde asserit, quòd ille non tam Trinitatem, quàm quaternitatem adstruebat in Deo, videlicet tres personas, & illam communem essentiam quasi quartam.*

2. Refert ejusdem Abbatis doctrinam, Lombardi dictis planè contrariam: *Manifestè protestans, quòd nulla res est quæ sit Pater, & Filius & Spiritus sanctus, nec est essentia, nec substantia, nec natura, quamvis concedat, quòd Pater & Filius & Spiritus sanctus sunt una essentia, una substantia, unaque natura.*

3. Asserit, eundem Abbatem Joachimum inter Trinitatis personas non aliam unitatem admisisse, quàm unitatem impropriad, ei similem quæ  
inter

inter multos homines reperitur: *Verum unitatem huiusmodi non veram & propriam, sed quasi collectivam & similitudinariam esse fatetur, quemadmodum dicuntur multi homines unus populus, & multi fideles una ecclesia, juxta illud: Multitudinis credentium erat cor unum & anima una.*

4. Afferit, tenendum esse dogma, quod Joachimus Abbas damnaverat in Petro Lombardo: Nos autem, sacro & universali Concilio approbante, credimus & confitemur cum Petro, quod una quædam summa res est, incomprehensibilis quidem & ineffabilis, quæ veraciter est Pater & Filius & Spiritus sanctus, tres simul personæ, ac singulatim quælibet earumdem.

5. Rationem reddit, cur inde non sequatur admitti debere quaternitatem: *Et ideo in Deo Trinitas est solummodo, non quaternitas, quia quælibet trium personarum est illa res, videlicet substantia, essentia, sive natura divina, quæ sola est universorum principium, præter quod, aliud inveniri non potest.*

6. Docet, unam illam rem nec generare nec generari: *Et illa res non est generans, neque genita, nec procedens: sed est Pater qui generat, Filius qui gignitur, & Spiritus sanctus qui procedit, ut distinctiones sint in personis, & unitas in natura.*

7. Exponit, quâ ratione Pater generet Filium licet essentia nec generet nec generetur: *Pater ab æterno Filium generando, suam substantiam ei dedit, juxta quod ipse testatur: Pater quod dedit mihi, maius est omnibus: Ac dici non potest, quod partem suæ substantiæ illi dederit, & partem retinuerit ipse sibi.... Nec dici potest, quod Pater in Filium transfulerit suam substantiam generando, quasi sic dederit eam Filio, quod non retinuerit eam sibi.*

8. Solvit argumentum Abbatis Joachimi, docetque, verba Scripturæ, quæ ab ipso laudata fuerant

rant pro adstruendâ in divinis unitate impropriâ, locum habere quidem in creatis, non autem in divinis: *Cum ergo Veritas pro fidelibus suis ad Patrem orat: Volo (inquit) ut ipsi sint unum in nobis, sicut & nos unum sumus: hoc nomen unum, pro fidelibus quidem accipitur, ut intelligatur unio charitatis in gratia; pro personis verò divinis, ut attendatur identitatis in natura unitas. Solutionem à se datam confirmat alio Scripturæ testimonio: Quemadmodum Veritas alibi ait: Estote perfecti sicut & Pater vester cælestis perfectus est: ac si diceret manifestius: Estote perfecti perfectione gratiæ, sicut Pater vester cælestis perfectus est perfectione naturæ: utraque videlicet suo modo, quia inter creatorem & creaturam non potest tanta similitudo notari, quin inter eos major sit dissimilitudo notanda.*

9. Prohibet sub anathematis pœnâ, ne quis doctrinam Abbatis Joachimi audeat approbare: *Si quis igitur sententiam, sive doctrinam præfati Joachimi, in hac parte defendere, vel approbare præsumpserit, tanquam hæreticus ab omnibus confutetur.*

10. Tandem asserit, Abbatem Joachimum nullatenus hæreticum fuisse: *Cum (inquit) idem Joachim omnia scripta sua nobis assignari mandaverit, apostolicæ sedis judicio approbanda, seu etiam corrigenda, dictans epistolam, cui propria manu subscripsit, in qua firmiter confitetur, se illam fidem tenere, quam Romana tenet Ecclesia, quæ cunctorum fidelium, disponente Domino, mater est & magistra.*

Ex iis, quæ hucusque relata sunt ex Concilio Lateranensi IV. patet 1. libellum Abbatis Joachimi damnatum fuisse, quòd in eo assereretur reprobari debere doctrinam Petri Lombardi contententis, in Trinitate esse rem summam, quæ nec gignat nec gignatur. Patet 2. definitum fuisse tanquam fidei articulum, summam illam rem, quæ est essentia divina, nec generantem, nec genitam,

nitam, nec procedentem esse: ac proinde essentia divina non est principium *Quo remotum* divinarum processionum.

Respondent nonnulli ad 1. negando min. Ad 2. distinguunt ant. Concilium Lateranense definiit, essentiam non generare tanquam principium *Quod*, concedunt ant. tanquam principium *Quo*, negant ant.

Confirmant authores illi suam responsionem ex ipsomet Lateranensi Concilio, quod quidem ubi declaravit, essentiam divinam nec generare nec generari, nec procedere, statim subjicit verba, quæ probant, hanc illius definitionem: *Essentia non est generans, neque genita, neque procedens*, ad solum principium *Quod*, restringi: *Sed est Pater qui generat, Filius qui gignitur, Spiritus sanctus qui procedit*.

Confirmant iterum ex scopo Concilii. Sacra Synodus (inquiunt) definiit, essentiam nec esse generantem, nec genitam, neque procedentem in sensu quo Joachimus Abbas in suo libello contenderat, eam esse generantem, genitam, ac procedentem: contenderat verò, eam esse generantem tanquam principium *Quod*: Siquidem asseruerat, essentiam non esse quid unum commune tribus personis: id autem quod non est commune generanti & genito, non est principium *Quo*, sed principium *Quod*: nempe generans, vi actionis generativæ, debet sibi assimilare genitum in principio *Quo*, hoc est, in naturâ per quam generat; imperfectè quidem, id est, secundum speciem, cum generatio est imperfecta ut est in creatis; perfectè verò, seu secundum identitatem individualement & numericam, cum generatio, ut est in divinis, est perfectissima. Hinc autem patet maximum esse discrimen inter generationis principium *Quod*, & principium *Quo*: Illud nimirum debet esse necessario distinctum realiter à suo termino, ut sunt Pater & Filius, non verò istud; unde essentia quæ est in Patre, est idem  
rea-

realiter cum Filio genito, & cum Spiritu sancto procedente.

Respondent 2. alii theologi ad argumentum quod objectum est, concessâ majore, negando minorem. Ad ejus probationem, distinguunt ant. Concilium Lateranense definiit essentiam, sumptam in abstracto, nec esse generantem, nec genitam, nec procedentem, concedunt ant. sumptam in concreto, subdistinguunt, nec esse generantem, nec genitam, accipiendo generationis nomen strictè, concedunt antecedens; accipiendo latè, negant antecedens.

Joachimus Abbas (inquiunt) censuerat, Petrum Lombardum in hisce verbis, *Summa res est Pater, Filius & Spiritus sanctus, & illa non est generans, neque genita, nec procedens*, sumere rem illam summam, seu essentiam, in abstracto, hoc est, præcisam à Patre, Filio & Spiritu sancto; unde concluderat, Lombardum aditruxisse non trinitatem, sed quaternitatem, quæ constaret ex tribus personis & summâ illâ re, quæ nec esset generans nec genita. Eam verò rem summam, seu essentiam, sic acceptam, Concilium Lateranense definiit nec generantem esse, nec genitam, nec procedentem, quia de facto sic accepta, non existit realiter: essentia quippe realiter est idem cum tribus personis, nec cum illis (contra quod tamen finxit Joachimus) venit in numerum.

Præterea (addunt iidem authores) Concilium non definiit solum, essentiam in illo abstractionis statu non esse generantem; sed præterea definiit, eam etiam in concreto sumptam, nec generare, nec esse genitam, accipiendo strictè generationis nomen, seu pro actione quæ genito tribuat existentiam, ut sit in creatis, in quibus generans & genitum distincta sunt realiter; verum non definiit, eam in concreto sumptam, seu in personis modificatam, non esse generantem, aut genitam, aut procedentem, sumendo latè genera-

tio-



tionis nomen, nimirum pro actione per quam communicatur natura, quæ prius prioritate non quidem reali, sed rationis tantum, existit. Et sanè sacra Synodus unum tantum sibi proposuit, scilicet damnare voluit sensum, quem Joachimus Abbas huic sententiæ: *Essentia generat & generatur*, adscribebat: contendebat verò, essentiam in concreto sumptam, seu prout est in Patre, generare essentiam in Filio, sumendo strictè generationis nomen, seu, pro actione quæ tribueret existentiam essentiæ Filii. Ratio est, quia Joachimus Abbas assererat, essentiam Patris esse numero distinctam ab essentiâ Filii: ac proindè necesse erat, ut assereret, essentiam Filii quæ ab essentiâ Patris propriè generaretur ( cum esset ab eâ distincta ) existentiam ab eâ accipere: quod quidem est hæreticum. Vide hanc responsionem fusè pertractatam apud Petavium, de Trinitate libro sexto.

### ARTICULUS III.

*Vtrum Relationes sint principium Quo divinarum processionum.*

Not. 1. **N**omine relationum hîc intelliguntur Paternitas, Filiatio, & Spiratio activa: quæritur, utrum ejusmodi relationes sint virtus, per quam Pater generat Verbum, & per quam idem Pater cum Filio spirat Spiritum sanctum.

Not. 2. Circa propositam difficultatem tres sunt Scholasticorum sententiæ. Prior docet, relationes paternitatis, & spirationis activæ esse solum principium Quo tum proximum tum remotum divinarum processionum. Altera contendit, paternitatem & spirationē activam esse principium inadæquatum earundem processionum, ita ut ex æquo ad illas cum essentiâ, intellectu, ac voluntate divinâ concurrant. Tertia tandem asserit

relationes non esse principium, sed meram conditionem ad processiones requisitam; & hæc ultima sententia est Thomistarum post Doctorem Angelicum 1. p. q. 41. art. 5.

**CONCLUSIO 1.** Relationes paternitatis & spirationis activæ, non sunt adæquatum & solum principium *Quo* processionum divinarum.

Probatur. Ex dictis duobus præcedentibus articulis, essentia divina est principium *Quo* remotum; intellectus & voluntas sunt principium *Quo* proximum processionum divinarum: ergo falsò asseritur, relationes paternitatis & spirationis activæ, esse solum earum adæquatum principium *Quo* sive remotum sive proximum.

**CONCLUSIO 2.** Relationes paternitatis & spirationis activæ non sunt, etiam inadæquatum ac parziale, principium *Quo* divinarum processionum.

Probatur. Principium *Quo*, est illud, per quod agens producit sibi simile: nam propter eam rationem natura humana est principium *Quo* generationis humanæ: atqui relationes paternitatis & spirationis activæ non sunt id per quod agens, seu Pater, seu Filius, producit sibi simile: reverà enim nec Filius est similis Patri in ratione paternitatis, cum non sit Pater, nec Spiritus sanctus est similis Patri aut Filio in ratione spirationis activæ, cum ipse alium Spiritum minimè spiret. Confirmatur argumentum. Per id personæ SS. Trinitatis non producunt sibi simile, per quod distinguuntur realiter: atqui sic distinguuntur per relationes: ergo, &c.

Objicies 1. Illud solum est principium processionum, ratione cujus principium productivum & illius termini realiter distinguuntur; atqui principium productivum & illius termini distinguuntur tantum ratione relationum paternitatis & spirationis activæ: ergo relationes sunt solum

lum principium divinarum processionum. Major videtur vera : siquidem principium productivum & illius termini debent esse realiter distincta ; neque enim aliquid potest semetipsum producere. Minor non minus est certa , scilicet , Pater qui est principium Filii , non distinguitur à Filio , nisi ratione paternitatis ; & similiter Filius non distinguitur à Spiritu Sancto , nisi ratione spirationis activæ .

Resp. ad 1. neg. maj. Ad 2. dist. ant. Principium productivum *Quod* , & illius termini debent esse à se invicem realiter distincta , conc. ant. sic Pater , eò quòd Filii sit principium productivum *Quod* , realiter distinguitur à Filio : Principium productivum *Quo* , neg. ant. Ratio est , quia principium productivum *Quo* remotum , ut jam superius observatum est , est forma in quâ terminus productus redditur similis principio *Quod* producenti : sic in homine natura humana est principium *Quo* remotum generationis humanæ , quia individuum genitum redditur simile homini generanti , seu principio *Quod* , in humanâ naturâ . Ea verò forma in creatis non reddit terminum perfectè similem principio generanti , sed tantum ratione speciei : e contra in divinis reddit terminum perfectè similem in naturâ divinâ , ac proindè non efficit tantum identitatem specificam in naturâ , sed etiam individualement & numericam .

Objicies 2. Illud solum est principium processionum in divinis , per quod Pater & Filius constituuntur formaliter in esse principii : atqui Pater & Filius constituuntur formaliter in esse principii per relationes paternitatis & spirationis activæ : ergo , &c.

Resp. conc. maj. neg. min. siquidem Pater & Filius constituuntur in esse principii *Quo* , per essentiam , per intellectum ac voluntatem : per relationes verò paternitatis & spirationis activæ , constituuntur in esse suppositi

ti ac personæ, ut subsequenti conclusione dicetur.

Objicies 3. Si personæ non constituerentur in ratione principii productivi per relationes, in eâ constituerentur per aliquid absolutum; non enim in divinis datur medium inter relativum & absolutum: atqui personæ non constituuntur in ratione principii productivi per aliquid absolutum: in eâ nimirum suppositione, Spiritus sanctus esset principium productivum, cum nihil absolutum sit in Patre aut in Filio, quod in Spiritu sancto non reperiatur.

Resp. ad 1. conc. maj. neg. min. Ad 2. neg. ant. Ratio est, quia principium productivum, adæquatè sumptum, duo dicit, unum quod præcipuè & in recto significatur per potentiam producendi; & alterum quod per eam minùs præcipuè & in obliquo tantùm significatur. Id verò quod significatur in recto & magis præcipuè, est essentia divina; id è contra quod significatur in obliquo & minùs præcipuè, est relatio, seu connotatio ad certam personam; cum autem in quâlibet personâ non sit ejusmodi connotatio, mirum non est, quòd quælibet non sit principium productivum, sumendo principium productivum adæquatè, seu tam pro eo quod dicit in recto, quàm pro eo quod dicit in obliquo. Solutio illa est S. Thomæ qui 1. p. q. 41. art. 5. ad 3. sic loquitur: *Ad tertium dicendum, quòd cum dico potentiam generandi, potentia significatur in recto, & generatio in obliquo, sicut si dicerem essentiam patris. Unde quantum ad essentiam quæ significatur, potentia generandi communis est tribus personis: quantum autem ad notionem quæ connotatur, propria est personæ Patris.*

Objicies 4. Illud est principium Quo divinarum processuum, per quod Pater constituitur Pater, & Filius constituitur Filius: sicut illud est principium Quo creationis, per quod Deus constituitur creator: Atqui Pater constituitur Pater,  
&

& Filius constituitur Filius per aliquid relativum, non autem per aliquid absolutum : ergo principium *Quo* divinarum processionum est aliquid relativum.

Resp. neg. maj. Ratio est, quia id per quod Pater constituitur Pater, distinguitur à termino generationis: at principium *Quo* generationis distinguui non debet à suo termino secundum speciem in rebus creatis, nec secundum numerum in divinis, eò quòd principium *Quo* generationis tendat ad reddendum terminum sibi similem, & quidem perfectè, si generatio, ut in divinis contingit, sit perfectissima.

CONCLUSIO 3. Principium *Quo* divinarum processionum includit relationem tanquam conditionem, per quam modificetur.

Probatur 1. Illud non est principium *Quo* divinarum processionum sine relatione, quod abstractum à relationibus nec generat nec producit: atqui (ut superiùs adversùs Joachimum Abbatem ostensum est) natura, seu essentia, abstracta à relationibus nec generat nec producit: ergo principium *Quo* divinarum processionum (quod quidem, ut dictum est, non aliud est quam natura) includit relationem tanquam conditionem per quam modificetur.

Confirmatur ex eo, quòd principium *Quo* includat aliquid, per quod producens aliquo modo distinguatur à producto: neque enim idem potest esse sui ipsius principium: atqui id per quod producens distinguitur à producto, non est natura, cum natura ex se tendat ad reddendum terminum productum sibi similem, & reverà eadem sit numero in singulis SS. Trinitatis personis, ergo principium *Quo* in divinis includit relationem. Hincque patet, cur in Patre natura generet, non autem in Filio; cur in Patre & Filio spiret, non autem in Spiritu sancto. Vide Concilium Lateranense IV. cap. *Damnatus*.

## Q U Æ S T I O VI.

*Utrum processiones in divinis sint voluntariae.*

**Not. 1.** **Q**Uæstio, an processiones in divinis sint voluntariæ, movetur à theologis, ut solvant argumentum, quo hæretici, Verbi ac Spiritûs sancti divinitatem impugnabant : quâ arte illud proponerent, quâve ratione Catholicus quidam illud aliàs solverit, Augustinus libro 15. de Trinitate hisce verbis enarrat : *Acute sanè quidam respondit hæretico versutissimè interroganti, utrum Deus Filium volens, an nolens genuerit : ut si diceret, nolens, absurdissima Dei miseria sequeretur : si autem, volens, continuo quod insendebat, velut invicta ratione, concluderet, non naturæ esse Filium, sed voluntatis. At ille vigilantissimè vicissim quæsit ab eo, Utrum Deus Pater, volens an nolens, sit Deus : ut si responderet, nolens, sequeretur illa miseria, quam de Deo credere magna insania est : si autem diceret, volens, responderet ei : ergo & ipse, Deus est sua voluntate, non natura.*

**Not. 2.** SS. Patres ( ut videre est apud Augustinum lib. 3. contra Maximinum cap. 3. ) nonnunquam asseruerunt, divinas processiones esse voluntarias, aliquando verò ( ut apud eundem Augustinum lib. 15. de Trinitate, cap. 20. videre est ) negaverunt, esse voluntarias : utrumque illum dicendi modum niti veritate patebit ex iis quæ in subsequenti notâ proponentur.

**Not. 3.** Aliquid dici potest voluntarium duobus modis. Uno modo ( inquit Sylvius 1. p. quæst. 41. ) voluntate concomitante, sicut aliquis dicitur voluntariè homo, quia vult, eique pla-

placet, quòd sit homo. Alio modo, voluntate antecedente, hoc est, voluntate quæ se habeat per modum principii productivi: eo sensu amor est voluntarius, quia est à voluntate tanquam à principio sui productivo.

**CONCLUSIO 1.** In divinis processiones sunt voluntariæ voluntate concomitante.

Probatur. Ex observatis, illud est voluntarium voluntate concomitante, quod placet, quod non fit ab invito: atqui processiones divinæ placent, nec fiunt ab invito: Nam 1. cuilibet enti placet id quod confert ad illius perfectionem, ac proindè cum ad Dei perfectionem processiones multum conferant, necesse est, eas Deo infinite placere. 2. Divinæ processiones sunt generatio Verbi, & Spiratio Spiritus sancti: sed nec ea generatio, nec ea spiratio ab invitis fiunt: neque enim Pater non vult generare Filium, nec Pater & Filius nolunt spirare Spiritum Sanctum. Confirmatur ex Concilio Sardicensi, quod quidem apud Hilarium lib. de Synodis, anathemate damnavit eos, qui dicerent, *quòd neque consilio, neque voluntate Pater genuerit Filium*. Confirmatur iterum ex Concilii Syrmienensis canone 25. cujus (eodem Hilario teste) hæc sunt verba: *Si quis nolente Patre natum dicit Filium, anathema sit*.

**CONCLUSIO 2.** Generatio Verbi non est voluntaria voluntate antecedente.

Probatur. Ex observatis, illud solum est voluntarium voluntate antecedente, quod oritur à voluntate tanquam à principio: atqui generatio Verbi non oritur à voluntate tanquam à principio: neque enim (ut superius ostensum est) Verbum à voluntate, sed ab intellectu tanquam à principio *Quo*, immediatè procedit.

Objicies. Augustinus lib. 15. de Trinit. cap. 20. scribit, nonnullos non ausos fuisse dicere; Verbum esse de consilio & de voluntate Patris, ne cogerentur ipsum appellare filium consilii & volun-

eratis Patris : *Quidam ne Filium consilii, vel voluntatis Dei dicerent unigenitum Verbum, ipsum consilium, seu voluntatem Patris idem Verbum esse dixerint.* Addit, placere sibi magis oppositum loquendi modum : *Sed melius, quantum existimo, dicitur consilium de consilio, & voluntas de voluntate, sicut substantia de substantia, sapientia de sapientia : ergo, ex Augustino, generatio Verbi est voluntaria voluntate antecedente, seu oritur à voluntate tanquam à principio.*

Resp. dist. ant. Verbum, ex Augustino, dicitur voluntas de voluntate, veluti tanquam causæ materiali, conc. ant. tanquam causa productivæ, neg. ant. Ratio est, quia Augustinus eum loquendi morem, *voluntas de voluntate*, usurpat adversus Arianos qui asseriebant, Verbum ex nihilo, ex non extantibus, à Patre productum fuisse, cum è contra Catholici contenderent, ipsum ex ipsâ substantiâ, ex ipsâ voluntate ac sapientiâ Patris, hoc est ipsâ paternæ substantiæ, voluntatis & sapientiæ communicatione, produci nunc, ac ab æterno productum fuisse. Illi rationi robur additur ex ipsomet Augustino, qui ibidem expressè scribit hæreticos abuti solitos fuisse hac loquendi ratione, *Verbum est voluntas, Consilium, Sapientia Patris*, quasi Pater habeat à Filio voluntatem, consilium, ac sapientiam : Ne ( ait ibidem Augustinus ) *absurditate illa quam jam refellimus, Filius dicatur Patrem facere sapientiam, vel voluntatem, si non habet Pater in substantia sua consilium vel voluntatem.*

CONCLUSIO 3. Productio Spiritûs sancti est voluntaria voluntate antecedente.

Probatur. Ex observatis, illud est voluntarium voluntate antecedente, quod oritur à voluntate tanquam à principio : atqui processio Spiritûs sancti ab eâ sic oritur : nempè sicut Verbum generatur à Patre per infinitam sui cognitionem : ita ( ut superius ostensum est ) Spiritus sanctus pro-



producitur per infinitum amorem, quo Pater & Filius sese mutuò prosequuntur.

Objicies. Quod est voluntarium voluntate antecedente, est liberum: atqui processio sancti Spiritus non est libera: alioquin posset non esse: nempe liberum definitur, Quod est indifferens ad esse, aut ad non esse: ergo, &c.

Respondet nonnulli negando min. ad cujus probationem, negant, liberum rectè definiri: *Quod est indifferens ad esse aut ad non esse*: scilicet volunt, libertatem, si sumatur secundum essentiam, non verò secundum statum, hoc est, prout in homine per peccatum corrupto reperitur, nihil aliud dicere, quàm volitionem elicitam cum plenâ rationis advertentiâ; unde concludunt, quòd licet liberum non stet cum necessario naturali (ut sunt in homine corrupto primi motus concupiscentiæ) stet tamen cum necessario, quod plena rationis advertentiâ comitatur; ac proinde (inquiunt) cum Pater generet Verbum cum plenâ rationis advertentiâ; cum Pater & Filius cum eadem advertentiâ rationis producant Spiritum sanctum, Verbum liberè, licet necessario, generatur à Patre, & Spiritus sanctus liberè à Patre & Filio spiratur, quamvis necessario ab iis producat. Sed utrum illorum theologorum sententia veritate nitatur, expendemus agentes de actibus humanis. Satis est, ut hic moneamus, voluntarium necessarium, quamvis eliciatur ex plenâ ac integrâ rationis advenientiâ, non sufficere ad merendum aut demerendum in statu naturæ lapsæ, sed præterea requiri immunitatem à necessitate, non tamen à determinatione causæ superioris, sive sit, in rebus quidem ordinis naturalis, præmotio physica, sive sit, in rebus quæ spectant ad salutem, auxilium efficax ab intrinseco & ex naturâ suâ: unde Innocentius Papa X. cui subscripserunt omnes orbis Ecclesiæ, meritò tanquam hæreticam, in sensu obvio (ut loquitur Innocentius Papa XII. in suo Brevis ad Belgarum

Episcopus exponens ejusdem Innocentii X. & Alexandri VII. de quinque famosis propositionibus constitutiones ) meritò, inquam, tanquam hæreticam damnavit hanc propositionem, *Ad merendum & demerendum in statu naturæ lapsæ, non requiritur in homine libertas à necessitate, sed sufficit libertas à coactione.*

Respondendum est igitur ad argumentum, dist. maj. Quod est voluntarium voluntate antecedente, eligente, est liberum, conc. maj. non eligente, neg. maj. Productio sancti Spiritus est à voluntate antecedente per modum principii naturalis, hoc est, per modum principii quod ipsi necessariò tribuit esse, sed non est à voluntate eligente: ut enim sit electio, requiritur, ut id quod eligitur, possit non eligi: id autem ( ut patet ) locum non habet aut in generatione Verbi, aut in productione Spiritus sancti.



## DISSERTATIO TERTIA.

### *De Relationibus Divinis.*

**Not. 1.** **E**X Logicis, Relatio est habitudo unius ad aliud. Dividitur in relationem rationis, & in relationem realem. Prior est quæ fit per operationem mentis, unum cum alio comparantis: Realis è contra est ea quæ reperitur in subiecto independentè ab operatione mentis.

**Not. 2.** De posteriore illâ relationis specie, seu de relationibus realibus, quæremus 1. utrum sint in Deo; 2. quantus sit earum numerus; 3. quomodo ab invicem distinguantur; 4. an essentia sit de conceptu relationum, & vicissim relationes sint de conceptu essentiæ; 5. an relationes sint perfectiones; 6. utrum quælibet relatio pro-

propriam habeat existentiam; 7. tandem utrum  
in divinis sit absoluta subsistentia.

## QUÆSTIO PRIMA.

*Virum in Deo sint relationes.*

CONCL. I. **D**antur in Deo relationes.

Probatur 1. Dantur in Deo Paternitas, Filiatio, & Spiratio, quia (ut suo loco probatum est adversus Sabellium) dantur in Deo Pater, Filius, & Spiritus sanctus: atqui Paternitas, Filiatio, & Spiratio sunt relationes: siquidem, ex observatis, relatio est habitudo unius ad aliud: sed paternitas, filiatio, & spiratio sunt ejusmodi: nempe paternitas essentialiter refertur ad filiationem, neque enim Pater concipi potest sine Filio, nec Filius sine Patre, nec Spiritus sanctus sine principio, à quo realiter procedit.

CONCLUSIO 2. Relationes quæ in divinis admittuntur, sunt reales.

Probatur 1. Ex observatis, illæ relationes sunt reales, quæ existunt independentè à creatæ mentis operatione: atqui relationes quæ in Deo reperiuntur, existunt independentè à creatæ mentis operatione: nemine scilicet cogitante, paternitas, filiatio, & spiratio passiva, sunt in Deo, quia, nemine cogitante, in Deo sunt Pater, Filius, & Spiritus sanctus: ergo pariter in eo sunt nemine cogitante, paternitas, filiatio, & spiratio passiva; sunt enim formæ per quas Pater, Filius & Spiritus sanctus constituuntur.

Probatur 2. Datur realiter in Deo id per quod personæ Patris, Filii, & Spiritus sancti realiter distinguuntur: atqui id non aliud est, quàm relationes: siquidem non potest esse natura, cum omninò eadem sit in singulis personis: ergo sunt relationes.

Confirmatur argumentum ex Concilii Florentini sessione 18: in quâ theologus, qui Latinorum partes agebat, sic discurret: *Sola relatio apud omnes tam Græcos quàm Latinos doctores, divina processione personas multiplicat.* In Concilio Toletano XI. hæc etiam in fidei professione leguntur: *In relativis personarum nominibus, Pater ad Filium, Filius ad Patrem, Spiritus sanctus ad utrumque refertur. Quæ cum relativè tres personæ dicantur, una tamen naturalis substantia creditur.* Ex istum Florentini tum Toletani Concilii textibus sic confici potest argumentum: Quod personas in divinis realiter multiplicat, id per quod personæ referuntur ad invicem, id per quod constituitur personarum numerus, datur in Deo realiter: atqui, ex Concilio Florentino, & ex Concilio Toletano, relationes in divinis realiter multiplicant personas, per relationes personæ ad invicem referuntur, per relationes constituitur numerus personarum: *In relatione* (inquit Concilium Toletanum XI.) *personarum numerus cernitur*: ergo, &c.

Probatur 3. Ibi dantur relationes reales, ubi reperiuntur reales processiones: siquidem realis processio est origo unius ab alio: ex reali autem origine unius ab alio, relationes necessariò sequuntur; habitudines nempe principii ad principiatum, & vicissim principiatum ad principium: atqui (ut dissertatione 2. demonstratum est) in Deo reperiuntur reales processiones, Filii nimirum à Patre, & Spiritus sancti à Patre & Filio.

Obijciēs 1. Id in Deo non reperitur realiter, quod redderet personas à se invicem dependentes, quia, cum unaquæque persona sit Deus, à se invicem dependere non possunt: est enim de essentia Dei, ut sit ab omni alio prorsus independens: atqui relationes redderent personas à se invicem dependentes: scilicet relationis extrema (ut forent personæ) à se invicem dependent: ergo, &c.

Resp.

Resp. ad 1. conc. maj. neg. min. Ad 2. dist. ant. Extrema relationis à se invicem dependent per modum simplicis termini, conc. ant. ex suppositione nimirum quod inter duo sit mutua relatio transcendentalis, unum non potest esse sine alio: Penderent per modum effectus, aut per modum causæ, neg. ant. Relationes quæ reperiuntur in divinis, efficiunt quidem, ut personæ, quæ sunt earum termini, sibi invicem coexistent: si quidem ex suppositione quod Deus sit pater, necesse est, ut habeat filium; sed non efficiunt, ut personæ à se invicem pendeant, tanquam effectus à causâ pendet, quia (ut supra dictum est) producuntur actionibus, per quas unicuique personæ productæ communicatur eadem numero natura quæ in Patre reperitur, ac proinde natura prorsus independens.

Objicies 2. Relatio realis præsupponit extrema realiter distincta: atqui relationes in divinis non præsupponunt extrema realiter distincta: nam illud non præsupponit extrema realiter distincta, quod efficit realem extremorum distinctionem: atqui relationes in divinis efficiunt extremorum à se invicem distinctionem: scilicet in divinis extrema, seu personæ, non distinguuntur per essentiam, sed tantum per relationes: ergo, &c.

Resp. dist. maj. Relatio in creatis præsupponit extrema realiter distincta, conc. maj. in divinis, neg. maj. Ratio disparitatis est, quia relationes quæ in creaturis reperiuntur, sunt accidentia; ac proinde supponunt subjectum, cui inhaerent, prius existens: è contra in divinis, relationes non sunt accidens, sed substantia; & consequenter non supponunt suum subjectum præexistens; unde non per aliud, sed per seipsas, à se invicem distinguuntur.

Objicies 3. Relatio est ordo unius ad aliud: atqui in Deo non est ordo unius ad aliud; quidquid enim est in Deo, Deus est. Confirmatur ex  
Con-

Concilio Lateranensi IV. quod quidem capitulo 2. sic loquitur: *Licet igitur alius sit Pater, alius Filius, alius Spiritus sanctus; non tamen aliud, sed id quod est Pater, est Filius & Spiritus sanctus: idem omnino, ut secundum orthodoxam & catholicam fidem consubstantiales esse credantur.*

Resp. dist. maj. Relatio est ordo unius ad aliud, sumendo vocem, *Aliud*, aut adjectivè aut substantivè, conc. maj. sumendo substantivè tantum, neg. maj. Vox, *Aliud*, accepta substantivè, distinctam essentiam significat; adjectivè verò sumpta dicit distinctam personam. Priore sensu vox *Aliud*, admitti non debet in divinis, sed in eis locum habet accepta posteriore sensu, nempe prout significat personas à se invicem distinctas.

Objicies 4. Relationes non possunt dici realiter de subjecto, nisi aut secundum substantiam, aut secundum accidens: sed neutro modo sunt in Deo: Non quidem secundum substantiam, cum enim relationes efficiant distinctionem, efficerent, ut essentia divina non eadem esset in singulis personis: Non etiam secundum accidens, quia accidentia locum non habent in Deo; alioquin non esset actus purus, non esset ens omnino simplex ac immutabile.

Resp. 1. illud argumentum ab Arianis olim fuisse propositum adversus Catholicos: *Quidquid de Deo dicitur, vel intelligitur* (inquiunt apud Augustinum lib. 5. de Trinitate, cap. 3.) *non secundum accidens, sed secundum substantiam dicitur: Quapropter ingenitum esse Patri, secundum substantiam est, & genitum esse Filio, secundum substantiam est. Diversum est autem ingenitum esse, & genitum esse: diversa est ergo substantia Patris & Filii.*

Resp. 2. neg. maj. Ratio est, quia inter dici secundum substantiam, aut dici secundum accidens, datur medium, nimirum dici secundum esse relativum: nam esse relativum præcisè ut relativum, abstrahit à substantia, aut accidente, Quippè nihil aliud dicit

cit in suo conceptu, quàm referre unum ad aliud.

Quod mox traditum fuit responsum, desumptum est ex Augustino: *Si* (inquit lib. 5. de Trinitate, cap. 3.) *quidquid de Deo dicitur, secundum substantiam dicitur, ergo quod dictum est, Ego & Pater unum sumus, secundum substantiam* (quod tamen negabant Ariani) *dictum est. Una est igitur substantia Patris & Filii. At si hoc non secundum substantiam dictum est, dicitur ergo aliquid de Deo non secundum substantiam, & ideo jam non cogimur secundum substantiam intelligere ingenitum & genitum.* Ubi S. Doctor ostendit, non omnia de Deo dici secundum substantiam, demonstrat nihil prorsus de eo dici secundum accidens: *Accidens* (ait c. 4.) *non solet dici, nisi quod aliqua mutatione ejus rei cui accidit, amitti potest..... Nihil itaque accidens in Deo, quia nihil mutabile aut amissibile.* Verùm si nonnulla sint quæ in Deo dicantur, nec tamen dicuntur aut secundum substantiam, aut secundum accidens, quâ ratione dicuntur? Augustinus respondet, dici secundum esse relativum: *Dicitur enim ad aliquid* (ait cap. 5.) *sicut Pater ad Filium & Filius ad Patrem, quod non est accidens, quia & ille semper Pater, & ille semper Filius.* Illud autem, *Ad aliquid*, S. Doctor sub finem capitis vocat esse relativum: *Quamobrem quamvis diversum sit, Patrem esse, & Filium esse, non est tamen diversa substantia, quia hæc non secundum substantiam dicuntur, sed secundum relativum, quod tamen relativum non est accidens, quia non est mutabile.* Ad pleniorum eorum quæ huc-usque dicta sunt, intelligentiam, vide totum ejusdem Augustini librum quintum de Trinitate.

## Q U Æ S T I O   I I

*Quot sint relationes in Divinis .*

*Not.* **C**ertum est, nullam esse in Deo relationem realem ortam ex eo, quòd entia fluxu ac labentis naturæ creaverit, & nunc etiam conservet: nam licet creaturæ realiter in Deum referantur, ipse tamen ad eas non refertur per relationem quæ in eo sit, sed tantum per actionem transeuntem, quæ in eisdem creaturis recipitur. Status igitur quæstionis est de relationibus, quæ inter divinas personas reperiuntur.

**CONCLUSIO I.** Quatuor sunt in Deo relationes reales.

**Probatur I.** Tot sunt in Deo relationes reales quot sunt ordines, seu respectus: nempe relatio definitur, Ordo, seu respectus unius ad aliud: Sed in Deo quatuor sunt ordines, seu respectus, Paternitas nimirum, Filiatio, Spiratio activa, & Spiratio passiva: necessariò enim paternitas refertur ad filiationem, filiatio ad paternitatem, spiratio activa ad spirationem passivam, & vicissim spiratio passiva ad spirationem activam.

**Objicies.** Si essent in Deo quatuor relationes reales, esset in eo non trinitas, sed quaternitas: atqui non est in Deo quaternitas. *In Deo* ( inquit IV. Concilium Lateranense capitulo 2. ) *trinitas est solummodo, non quaternitas: ergo, &c.*

**Resp. neg. maj.** Ratio est, quia spiratio activa, quæ non aliud est quàm actio productiva Spiritûs sancti, non distinguitur realiter à paternitate aut filiatione; ac proinde quartam rem in Deo non constituit.

**CONCLUSIO 2.** In Deo non plures sunt quàm quatuor relationes reales.

**Pro-**



Probatur. Non plures sunt in Deo relationes quàm quæ ex processionebus resultant; siquidem processiones sunt fundamenta relationum: at qui quatuor tantùm relationes resultant ex processionebus: nempe ex processione per intellectum quæ generatio dicitur, resultant paternitas & filiatio: non enim potest esse generatio, quin illius principium sit pater, & illius terminus sit filius. Ex processione per voluntatem resultant spiratio activa & passiva: scilicet si sit principium spirans, est necessariò terminus spiratus; ac proinde est relatio inter principium spirans & terminum spiratum; & vicissim reperitur inter terminum spiratum, & principium à quo spiratus est.

### QUÆSTIO III.

*De distinctione relationum à se invicem,  
& ab essentia divina.*

Not. 1. **E**X logicis, multiplex est distinctio, realis nimirum, modalis, formalis, scotistica, virtualis, seu rationis ratiocinatæ, & tandem rationis ratiocinantis. Prior reperitur inter rem & rem; altera intera inter rem & ejus modum; tertia inter varias formas ad idem subiectum pertinentes; quarta inter ejusdem subiecti formas, sed cum fundamento in re; unde secundum se est opus mentis, unum ab alio, cum quo tamen est idem realiter, distinguentis; at secundum fundamentum est realis, seu independens est ab operatione mentis; quinta denique est opus solius rationis, objectum absque ullo fundamento in diversos conceptus dividens.

Not. 2. Gilbertus Porretanus, Episcopus Pictaviensis, docuit, inter essentiam divinam & relationes admittendam esse distinctionem realem. Durandus contendit, inter eas reperiri distinctionem

nem modalem : Scotus asseruit, in eis locum habere distinctionem actualem formalem : Nominales voluerunt, satis esse distinctionem rationis ratiocinantis : Thomistæ requirunt præterea distinctionem virtuales, seu distinctionem ( ut vocant ) rationis ratiocinatæ, hoc est, quæ supponat reale fundamentum ex parte tum essentiae divinæ, tum divinarum relationum .

CONCLUSIO 1. Relationes in divinis à se invicem realiter distinguuntur . Assertio hæc est de fide certa contra Sabellianos .

Probatur . Formæ per quas personæ à se invicem realiter distinguuntur, à se invicem distinguuntur realiter; nam propter quod unumquodque tale, & illud magis : atqui relationes sunt formæ per quas personæ à se invicem realiter distinguuntur : siquidem ideò prima persona distinguitur à secundâ, quòd sit Pater ; secunda quòd sit Filius ; tertia quòd sit Spiritus sanctus : Sed prima, secunda, tertia persona sunt Pater, Filius & Spiritus sanctus per relationes, prima nimirum per paternitatem, secunda per filiationem, tertia per spirationem passivam : ergo relationes ( quæ quidem sunt paternitas, filiatio, & spiratio passiva ) sunt formæ, per quas personæ SS. Trinitatis sunt Pater, Filius & Spiritus sanctus, disjunctivè .

CONCLUSIO 2. Inter essentiam divinam & relationes admitti non debet distinctio realis : est de fide contra Gilbertum Porretanum .

Probatur 1. Si relationes realiter ab essentiâ divinâ distinguerentur, in divinis non esset trinitas tantum, sed etiam quaternitas; nimirum tres personæ, seu tres relationes, & essentia divina : Sed in divinis est trinitas tantum, non autem quaternitas : *Et ideo* ( verba sunt capituli 2. Concilii Lateranensis IV. ) *in Deo trinitas est, solummodo, non quaternitas, quia qualibet trium personarum est illares, videlicet substantia, essentia, sive natura divina, quæ sola est universorum prin-*

*principium, præter quod aliud inveniri non potest. ergo, &c.*

Nec valet responsio quâ asseritur, in laudato Concilii Lateranensi IV. capitulo agi tantum de quaternitate personarum, non autem de quaternitate rerum. Non valet (inquam) scilicet de eâ quaternitate agitur, quam Joachimus Abbas contenderat sequi ex hâc Petri Lombardi propositione. *Quædam summa res est, Pater, Filius & Spiritus sanctus, & illa non est generans, neque genita, nec procedens*: Sed quaternitas quam Joachimus Abbas contenderat sequi ex illâ propositione, non est (ut patet) quaternitas personarum, sed quaternitas quæ constaret ex personis & summâ illâ re, quam Lombardus asseruerat, nec esse generantem, nec genitam, nec procedentem.

Probatur 2. Relationes, quas (ut observatum est) Gilbertus Porretanus realiter distinguere voluit ab essentiâ divinâ, non sunt ens rationis, sed ens verum ac reale: Illud autem ens ab essentiâ divinâ, in Gilberti systemate, realiter distinctum, vel esset increatum, vel creatum: Si primum, esset Deus, ac proinde idem realiter cum Dei essentiâ; increatum enim & Deus convertuntur: Si secundum, quælibet persona divina esset aliquid realiter compositum ex essentiâ divinâ, & aliquo ente creato, relatione nimirum: quod quidem falsum esse constat, tum ex iis quæ harum Institutionum tom. I. diximus agentes de simplicitate Dei, tum ex articulo tertio Concilii Remensis quod adversus Porretanum celebratum est: sic enim habet articulus ille: *Credimus, nullas omnino res, sive relationes, sive proprietates, sive singularitates, sive unitates dicantur, adesse Deo, quæ sint ab æterno, & non sint Deus.*

Objicies I. Relativum & absolutum non minus distinguuntur, quàm relativum & relativum, imò videtur, quod magis debeant distinguere, cum non sint ejusdem ordinis: atqui relativum & relativum in divinis distinguuntur realiter actu, siqui-

quidem in divinis relativa non aliud sunt, quàm formæ quę personas constituunt; ac proinde cum personæ realiter à se invicem distinguantur, necesse est pariter, relativa à se invicem realiter distinguui.

Resp. ad 1. neg. maj. Ratio est, quia licet absolutum & relativum sint ordinis diversi, tamen sibi invicem non opponuntur; è contra relativum & relativum in divinis sibi invicem ita opponuntur, ut unum excludat aliud: nempe qui patrem dicit, dicit filium ab eo distinctum; qui dicit principium, dicit terminum à principio distinctum. Confirmatur responsio 1. ex eo quòd eà usi sunt Patres, ut adversus Sabellianos realem personarum distinctionem in divinis adstruerent. Confirmatur 2. ex celebri hoc theologorum effato: *Omnia sunt unum in divinis, ubi non obviat relationis oppositio.*

Objicies 2. Ea de quibus dicuntur prædicata contradictoria, distinguuntur realiter actu: de unâ nimirum ac eâdem re dici non possunt prædicata contradictoria: atqui de essentiâ divinâ & de relationibus dicuntur prædicata contradictoria: nam de essentiâ dicitur, quòd communicetur; de relationibus verò dicitur, quòd non communicentur: scilicet Pater generando Filium, ei suam essentiam communicat, non tamen communicatâ relatione paternitatis. Sic etiam dicitur quòd persona Verbi, non autem natura Verbi, humanam naturam assumpserit in Incarnatione: ergo, &c.

Resp. ad 1. neg. maj. Ad 2. dist. ant. De unâ ac eâdem re dici non possunt prædicata contradictoria, si non sit virtualiter multiplex, conc. ant. si sit virtualiter multiplex, neg. ant. siquidem res quæ virtualiter est multiplex, æquivalet pluribus realiter actu distinctis, ut patet in Petro, ex suppositione, quòd in pluribus locis per reproductionem constitueretur: in uno enim loco idem Petrus, in eâ suppositione, mori posset, licet vi-

veret in alio. Essentia Dei licet actu maximè simplicissima, est tamen virtualiter multiplex propter sui eminentiam; proindeque de eâ secundum conceptum absolutum dici potest, quòd communicetur, quamvis de eâ secundum conceptum relativum dici etiam possit, quòd minimè sit communicabilis. Sic etiam de eadem essentiâ dici potest, quòd secundum conceptum absolutum non assumpserit humanam naturam, quamvis rectè dicatur, quòd secundum conceptum relativum, hoc est, prout est Verbum, eam assumpserit in Incarnatione. Vide solutionem fusiùs pertractatam harum institutionum tom. 1. iis locis ubi agitur de Dei simplicitate.

Objicies 3. Tritum est apud veteres axioma, naturam & personam in divinis idem non esse; dicit enim Theodoretus à Gilberto Porretano laudatus: *Qui naturam & personam idem esse intelligit, in divisionem Arii incidet, aut in confusionem Sabellii*; Hæc etiam apud eundem auctorem habet Hilarius: *Non est idem natura, quod res naturæ*; ergo natura & relationes realiter distinguuntur.

Resp. dist. maj. Idem non esse, virtualiter, conc. ant. realiter actu, neg. ant. hoc unum laudato axioma Patres volunt, quòd conceptus naturæ, prout est conceptus naturæ, non sit idem cum conceptu personæ, prout est conceptus personæ. Nec id mirum est: siquidem, cum natura divina sit infinita, præbet intellectui fundamentum eam attingendi modò sub conceptu naturæ, modò etiam sub conceptu personæ: utroque nimirum officio, naturæ & personæ, sed sub diversis respectibus considerata, fungitur.

CONCLUSIO 2. Relationes in divinis non distinguuntur ab essentiâ tanquam res & modus. Est contra Durandum.

Probatur 1. Distinctio quæ reperitur inter essen-

sentiam & modum, est quidem modalis, sed secundum Durandi principia, est quoque realis actualis: atqui inter relationes & essentiam divinam admitti non debet distinctio realis actualis quamvis solum sit modalis: Nam 1. in eâ suppositione quælibet persona in divinis esset realiter composita, ex essentiâ nimirum & relatione, quæ ab essentiâ realiter distingueretur. 2. Contra ejusmodi distinctionem, licet sit solum modalis, militant argumenta omnia, quæ tum ex Concilio Remensi contra Gilbertum Porretanum, tum ex Concilio Lateranensi contra Joachimum Abbatem prolata sunt. Scilicet vel illi modi relativi sunt quid creatum, vel increatum; Si primum, personæ divinæ erunt compositæ ex essentiâ increatâ & modo creato; Si secundum, erunt realiter idem cum essentiâ divinâ. Addendum est, quaternitatem fore in Trinitate, in divinis enim reperirentur quatuor, nempe tres relationes & essentia ab eis realiter, licet modaliter tantum, distincta.

**CONCLUSIO 3.** Relationes in divinis ab essentiâ divinâ non distinguuntur distinctione formali Scotisticâ.

Probatur 1. Distinctio formalis Scotistica præcedit actu mentis operationem: atqui distinctio quæ reperitur inter relationes & essentiam divinam, non præcedit actu mentis operationem: siquidem distinctio quæ præcedit actu mentis operationem, est realis actualis: sed inter essentiam divinam & relationes non reperitur distinctio realis actualis; sive sit realis major, id est inter rem & rem, ut voluit Gilbertus Porretanus; sive sit realis minor, hoc est inter rem & modum, ut contendit Durandus; sive sit realis formalis, seu inter rem & varias illius formas, ut Scotistæ contendunt: scilicet ejusmodi distinctiones realem compositionem arguunt in Deo, non trinitatem sed quaternitatem invehunt.

Dices, supponere illud argumentum, distinctionem

nem quam Scotistæ vocant distinctionem *Ex natura rei formalem*, esse distinctionem realem: ea verò suppositio veritate minimè nititur, nempe Scotistæ passim docent, eam distinctionem non esse realem.

Sed contra. *Primò*, non omnes Scotistæ negant distinctionem, de qua agitur, esse realem. *Secundò*, qui id negant, hoc argumento facile refelluntur. Distinctio Scotistica non est solum distinctio rationis, cum præcedat illius operationem: ergo est realis: neque enim datur medium inter distinctionem rationis, & distinctionem realem.

**CONCLUSIO 4.** Essentia divina & relationes non distinguuntur tantum distinctione rationis ratiocinantis.

Probatur. Distinctio rationis ratiocinantis est ea, cujus totum esse est ab operatione intellectus: atqui essentia divina & relationes non distinguuntur tantum distinctione, cujus totum esse est ab operatione intellectus: siquidem ejusmodi distinctio, cum nihil supponat ex parte objecti, factis non est ad explicandum, quomodo Pater naturam divinam communicet Filio, non communicatâ paternitate, quæ tamen realiter est idem cum naturâ: *Omnia quæ Patris sunt, ipse Pater unigenito Filio suo gignendo dedit* ( verba sunt Concilii Florentini in decreto unionis ) *præter esse Patrem*. Satis quoque non est ad explicandum, quâ ratione Verbum, quod essentialiter est sapientia, non sit Verbum quâ sapientia: *Non eo Verbum* ( inquit Augustinus lib. 7. de Trinitate, cap. 2. ) *quo sapientia: verbum enim relativè, sapientia verò essentialiter intelligitur*.

**CONCLUSIO 5.** Relationes & essentia divina distinguuntur distinctione virtuali, seu rationis ratiocinatae.

Probatur 1. Relationes & essentia divina distinguuntur aliquâ distinctione, cum in eis prædicat-

dicata contradictoria verificentur : sed ea distinctio non est realis , ut adversus Gilbertum Porretanum, Durandum, & Scotum ostendimus : non est quoque solius rationis ratiocinantis , ut contra Nominales probavimus : ergo est distinctio virtualis, seu rationis ratiocinatæ .

Probatur 2. Distinctio virtualis duo dicit, unum ex parte objecti, summam nimirum illius eminentiam, ratione cujus pluribus rebus actu distinctis æquivaleat ; & aliud ex parte intellectûs, nempe apprehensionem objecti sub unâ illius virtute, non apprehendendo, saltem explicitè, aliam illius virtutem : atqui duo illa admittenda sunt : Et quidem *Primò*, cum essentia Dei sit infinita, cum relationes sint infinitæ , necessariò sequitur sive essentiam , sive relationes , æquivalere pluribus rebus finitis ac distinctis . *Secundò*, apprehensio essentiæ secundum esse absolutum non est apprehensio ejusdem essentiæ secundum esse relativum : & vicissim apprehensio ejusdem essentiæ secundum esse relativum non est apprehensio essentiæ secundum esse absolutum .

Objicies. In Conc. Florentino sess. 13. Joannes Episcopus, qui Latinorum partes agebat, asserit *divinam substantiam & personam re quidem idem esse, secundum autem modum intellectiōis nostræ videri differre*: cui quidem Joannis effato, Ecclesiæ Græcæ nomine, subscripsit Marcus Ephesus. Ejusdem Concilii sess. 19. simpliciter asseritur substantiam ac personam in divinis *sola ratione ac intelligentia*, differre : ergo sola distinctio rationis ratiocinantis admitti debet inter essentiam & relationes .

Resp. dist. ant. Relationes & essentia videntur differre secundum modum intellectiōis, solâ ratione , solâ intelligentiâ , cum fundamento in re, conc. ant. sine fundamento in re, neg. ant. & consequentiam . Patres sive Latini sive Græci supposuerunt fundamentum distinctiōis, quam in divinis admisere, licet expressè ejusmodi fundamenti non meminerint .



## QUÆSTIO IV.

*Virum relationes & essentia sint de mutuo conceptu.*

*Not. 1.* **C**irca propositam quæstionem tres sunt Scholasticorum sententiæ: prior quæ plurimum est Thomistarum, docet, essentiam divinam esse de conceptu formali relationum, & vicissim relationes esse de conceptu formali essentiæ: ita ut qui concipit essentiam, distinctè etiam concipiat relationes; & vicissim qui concipit relationes, distinctè pariter essentiam concipiat. Altera, quæ priori planè est opposita, asserit, nec essentiam esse de conceptu relationum, nec relationes de conceptu essentiæ. Tertia quæ est Sylvii, negat, relationes esse de conceptu essentiæ; sed affirmat, essentiam esse de conceptu relationum.

*Not. 2.* Essentia divina duobus modis considerari potest, in se nimirum, seu prout est à parte rei; & respectu nostri intellectus, seu prout subest nostro intelligendi modo.

**CONCLUSIO 1.** Essentia divina sumpta in se, hoc est, prout est à parte rei, includit essentialiter relationes, & vicissim relationes includunt essentialiter divinam essentiam; unde in eo statu concipi non potest sine relationibus, nec relationes sine essentiâ.

**Probatur 1.** Essentia divina, prout existit à parte rei, includit essentialiter id, quod est omninò idem cum ipsâ: neque enim prout existit à parte rei, aliquid in eâ est per modum accidentis, scilicet quidquid est in ea, Deus est: atqui essentia divina, prout existit à parte rei, est omninò idem cum relationibus, & vicissim relationes omninò idem cum ipsâ: *Non aliud est Deo esse* (ait Augusti-

gustinus lib. 7. de Trinitate cap. 6. ) *aliud personam esse, sed omnino idem: cui quidem axiomati cohærent hæc verba Concilii Lateranensis IV. cap. 2. In Deo trinitas est solummodo, non quaternitas: quia qualibet trium personarum est illa res, videlicet substantia, essentia, sive natura divina.*

**CONCLUSIO 2.** Relationes non sunt de conceptu essentiae, sumptæ secundum nostrum concipiendi modum.

Probatur. Illud non est de conceptu essentiae sine quo, saltem explicitè cognito, essentia concipi potest: atqui essentia divina potest concipi sine relationibus. Nam quod prius est secundum nostrum intelligendi modum, potest concipi sine eo, quod posterius est secundum eundem nostrum concipiendi modum: sed essentia divina secundum nostrum intelligendi modum, est quid prius relationibus, & relationes secundum eundem nostrum intelligendi modum, sunt quid posterius essentiâ: scilicet illud est prius relationibus, cui relationes advenire concipiuntur: atqui relationes concipiuntur advenire essentiae, quia relativum advenire concipitur absoluto; absolutum quippè videtur esse fundamentum relativi: ergo, &c.

Confirmatur 1. Relationes concipiuntur sicut quædam divinæ essentiae contractiones, ac modificationes; essentia quippè communior est relationibus, reperitur enim in tribus personis, cum è contra omnes relationes in quâlibet personâ non reperiantur.

Confirmatur 2. ex S. Augustino & S. Thomâ. Ille lib. 5. de Trinitate cap. 7. scribit, relationes non dici de Deo secundum substantiam, sed ut ad aliquid. *Quamobrem ( inquit ) quamvis diversum sit, Patrem esse & Filium esse, non est tamen diversa substantia, quia hæc non secundum substantiam dicuntur, sed secundum relativum.* Lib. 7. c. 2. eadem prorsus ratione loquitur: *Non eò verbum* ( ait )

( ait ) quòd *sapientia*; *Verbum enim relativè, sapientia verò essentialiter intelligitur*. S. Thomas 3. p. q. 3. art. 3. hæc scribit: *Per hunc modum, cognoscendi Deum, non ut in se est, potest intellectus noster intelligere bonitatem & sapientiam divinam, & alia hujusmodi quæ dicuntur essentialia attributa, non intellecta paternitate vel filiatione quæ dicuntur personalitates*. Ex iis autem, tum S. Augustini, tum S. Thomæ textibus, sic conficitur argumentum. Illud non est de conceptu formali essentia divina, quod de Deo non dicitur secundum substantiam, seu quod in modo significandi non exprimit substantiam divinam: quod non eò est, quòd est substantia divina; quod potest intelligi sine substantiâ divinâ: atqui ex S. Augustino, & ex S. Thomâ, relationes de Deo non dicuntur secundum substantiam, non eò sunt, quòd est substantia divina, substantia divina potest intelligi sine ipsis: ergo relationes non sunt de conceptu formali essentia divina.

Confirmatur 3. ratione theologicâ. Illud potest concipi sine relationibus, quod virtualiter à relationibus distinguitur: propter eam enim rationem essentia divina ( ut primâ parte dictum est ) potest cum fundamento concipi sine attributis absolutis, ut sunt bonitas, sapientia, & alia hujusmodi: è contra verò essentia Dei non potest concipi sine existentia, quia inter essentiam divinam & existentiam nulla reperitur distinctio virtualis: atqui essentia divina distinguitur virtualiter à relationibus: siquidem vi ejusmodi distinctionis virtualis solvuntur contradictoria quæ de essentiâ & relationibus prædicantur, seu redditur ratio, cur Pater Filio essentiam divinam communicet, non communicatâ paternitate, quæ tamen est idem realiter actu cum ipsâ: ergo essentia divina potest concipi sine relationibus.

Objicies 1. Si essentia Dei posset concipi sine relationibus, in Deo conciperetur quaternitas,

tres nimirum personæ & essentia divivina: atqui in Deo concipi non potest quaternitas: *In Deo* (inquit Concilium Lateranense) *trinitas est summummodò, non quaternitas: ergo, &c.*

Resp. dist. maj. In Deo conciperetur quaternitas, quæ existeret tantum in intellectu creato, conc. maj. quæ existeret in Deo, neg. maj. In Concilio Lateranensi IV. capitulo 2. damnatus est Joachim Abbas, quòd contenderet, ex sententiâ Petri Lombardi sequi, esse realiter in Deo & à parte rei, non trinitatem, sed quaternitatem; tres nimirum personas & summam rem, sive essentiam quæ nec generaret, nec genita esset, nec procedens.

Objicies 2. Si essentia divina concipi posset sine relationibus, in Deo esset compositio rationis: atqui in Deo non est compositio rationis; nempe repugnat summæ illius simplicitati; ergo &c. Probatur maj. Ibi est compositio rationis ubi intellectus concipit potentiam & actum: sed in suppositione de quâ agitur, intellectus in Deo conciperet potentiam & actum: siquidem conciperet substantiam divinam, quæ posset recipere relationes, per quas veluti cœrctaretur & modificaretur: ergo, &c.

Resp. ad 1. neg. maj. Ad 2. dist. maj. Ibi est compositio rationis, ubi intellectus concipit potentiam & actum, quæ sese invicem excludant, conc. maj. quæ sese invicem non excludant, neg. maj. In Deo substantia seu essentia non concipitur ab intellectu quasi excludens relationes, licet non concipiatur prout eas includens; ac proinde non se habet per modum potentiæ propriè dictæ respectu relationum, sed se habet per modum abstrahentis ab illis: ea autem abstractio tantum abest, ut dicat imperfectionem in essentiâ divinâ, sicut potentia & genus dicunt imperfectionem in subjecto, de quibus prædicantur, quia excludunt actum & differentiam; quin potius summam dicat perfectionem, divinæ nimirum substantiæ.

stantiæ eminentiam, quæ quidem tanta est, ut uno conceptu attingi non possit ab intellectu creato.

CONCLUSIO 3. Divina essentia non est de conceptu formali relationum.

Probatur. Relationes concipi possunt sine essentia divinâ. Nam 1. ab eâ virtualiter distinguuntur: 2. Secundum nostrum modum concipiendi, relationes sunt essentia posteriores; siquidem prius concipimus rem esse, quam ad aliam referri, hoc est prius concipimus ens aliquod existere, quam operari, quam generare, quam producere. 3. Tam relationes concipi possunt sine essentia, quam non communicari, licet essentia communicetur; quam multiplicari non multiplicata essentia; quam produci non productâ essentia: atqui relationes non communicantur, licet essentia communicetur; multiplicantur non multiplicata essentia; producuntur, quamvis essentia minimè producat: siquidem ( ut ait Concilium Lateranense IV. ) *essentia non est generans, neque genita, nec procedens.*

Objicies 1. Illud est de conceptu relationum quod de illis essentialiter prædicatur: atqui divina essentia prædicatur essentialiter de relationibus, scilicet hæc propositio est vera: Paternitas, Filiatio, Spiratio passiva, sunt essentia divina: ergo, &c.

Resp. dist. maj. Illud est de essentia relationum quod de illis essentialiter prædicatur, tum ut sunt à parte rei, tum ut subsunt nostro modo concipiendi, conc. maj. quod de illis prædicatur tantum ut sunt à parte rei, non autem prout subsunt nostro modo concipiendi, neg. maj. Essentia divina prædicatur quidem de relationibus prout sunt à parte rei, sunt enim realiter unum & idem cum eâ; sed de eis non prædicatur prout subsunt nostro intelligendi modo, hoc est, idea quam intellectus effingit de substantia divinâ, reduplicativè prout est substantia, seu ut est radix & subjectum attributorum, tum absolutorum, tum relativorum,

non est idea, quam efformat de relationibus, re-  
 duplicativè prout sunt relationes, id est, prout  
 sunt habitudo unius ad alterum.

Confirmatur solutio ex S. Thomâ, qui quæst.  
 8. de Potentiâ articulo 2. ad sextum sic loquitur:  
*Per se prædicatur aliquid de aliquo, quod prædi-  
 catur de eo secundum propriam rationem: Quod verò  
 non secundum propriam rationem prædicatur, sed  
 propter rei identitatem, non etiam prædicatur per  
 se. Cum ergo dicitur: Essentia divina est paternitas,  
 non prædicatur paternitas de essentia divina propter  
 identitatem rationis, sed propter identitatem rei;  
 & similiter essentia de paternitate, quia alia est ra-  
 tio essentiae & relationis.*

Objicies 2. Idea, seu conceptus relationum est  
 idea entis increati; non enim esse potest idea entis  
 creati: atqui idea entis increati, est idea essentiae  
 divinæ: nempe idea essentiae divinæ non aliud  
 est, quàm idea entis increati, hoc est, existentis  
 per se & independentè à quovis alio: ergo idea,  
 seu, conceptus relationum, est idea, seu, con-  
 ceptus essentiae divinæ.

Resp. 1. Ideam relationum nec esse ideam  
 entis increati, nec ideam entis creati, sed ideam  
 rei ab utroque abstrahentis; hoc est, licet intel-  
 lectus, dum concipit relationes, concipiat à  
 parte rei ens increatum; tamen illud non concipit  
 sub ratione entis increati, sed tantum sub ra-  
 tione cujusdam habitudinis unius ad alterum.

Resp. 2. concessâ majore, disting. min. Idea  
 entis increati est idea essentiae divinæ, prout est  
 ens increatum & actus purus, conc. maj. prout  
 est essentia, sub ratione substantiae, neg. maj.  
 Equidem idea paternitatis v. g. est idea essentiae  
 divinæ, prout essentia consideratur ut ens increa-  
 tum & actus purus, sicut modi entis sunt ens  
 consideratum præcisè ut ens: at verò non est  
 idea essentiae sub ratione substantiae & naturæ,  
 quia sub ratione substantiae & naturæ, est veluti  
 subjectum, in quo relationes recipiuntur, & cui,  
 secun-

secundum imperfectum nostrum intelligendi modum, advenire concipiuntur. Vide quæ harum Institutionum tomo I. diximus, agendo de attributorum distinctione ab essentia, & vicissim essentia ab attributis.

## Q U Æ S T I O V.

*Virum relationes sint perfectiones.*

**Not. 1.** **I**N relationibus divinis duo possunt considerari; esse *In*, ut loquuntur, & esse *Ad*. Esse *In*, est relatio considerata, prout afficit subjectum in quo reperitur. Esse *Ad*, est eadem relatio, prout respicit terminum ad quem refertur.

**Not. 2.** Certum est, relationes divinas esse perfectiones, si considerentur secundum esse *In*: sic enim consideratæ, sumuntur vel ut sunt idem realiter actu cum essentia divinâ, vel prout ab eâ virtualiter distinguuntur: at utroque modo spectatæ, sunt perfectiones. Nemini dubium est, eas esse perfectiones priore modo spectatas: nimirum essentia divina est infinite perfecta. Eas quoque altero modo consideratas, perfectiones esse, patet ex eo, quod secundum nostrum concipiendi modum sic spectatæ, coarctent, modificent, & determinent naturam divinam ad esse Patris aut Filii aut Spiritûs sancti.

**Not. 3.** Licet theologi passim conveniant, relationes secundum esse *In*, spectatas, esse perfectiones; non conveniunt tamen, eas eodem frui jure, si secundum esse *Ad*, considerentur. Plures è scholâ Thomistarum contendunt, eas sic spectatas non esse perfectiones: è contra plures alii ex eâdem scholâ, quibus subscribit Sylvius, asserunt, eas etiam in eo statu, seu, prout dicunt

respectum ad alias personas, esse veras perfectiones : quid nos de eâ scholasticâ controversâ sentiamus, conclusio sequens aperiet.

**CONCLUSIO.** Relationes in divinis, etiam consideratæ secundum esse *Ad*, hoc est, prout dicunt respectum ad alias personas, sunt perfectiones.

Probatur I. Esse Patris ut Pater est, esse Filii ut Filius est, sunt esse relativum : neque enim concipi potest pater, quin concipiatur respectus ad filium : nec vicissim filius sine respectu ad patrem : unde meritò sic loquitur Augustinus lib. 6. de Trinitate, cap. 13. *Discitur ergo relativè Pater, idemque relativè dicitur principium, & si quid fortè aliud ; sed Pater ad Filium dicitur, principium verò ad omnia quæ ab ipsomet sunt. Item dicitur relativè Filius, relativè dicitur & Verbum & imago, & in omnibus his vocabulis ad Patrem refertur* : atqui esse Patris ut Pater est, esse Filii ut Filius est, sunt perfectiones : nam illud est perfectio sine quo divinitas esset imperfecta : sed divinitas sine esse Patris, esse Filii, esse Spiritus sancti, foret imperfecta : *Non potest* ( inquit Cyrillus lib. 2. Thesauri, cap. 1. ) *esse perfectâ divinitas, nisi Filium habeat, & fructum ex se pariat. Cyrillo subscribit Angelicus Doctor : Non posset* ( inquit in opusculo I. contra errores Græcorum cap. 7. ) *esse Pater perfectus, nisi Filium haberet, quia nec Pater sine Filio esset, nec esset Deus perfectus, nisi haberet Verbum.*

Probatur I. Quod distinguit & constituit perfectiones, est essentialiter aliqua perfectio : propter quod enim unumquodque tale, & illud magis : atqui relationes secundum esse *Ad*, seu prout dicunt respectum ad alias personas, distinguunt & constituunt veras perfectiones, personas nimirum & hypostases, ut subsequente dissertatione dicetur : ergo sunt veræ perfectiones.

Confirmatur argumentum I. ex eo, quòd relationes, etiam secundum esse *Ad*, sint aliquid reale,



le, scilicet nemine cogitante, est respectus primæ personæ ad secundam & tertiam: Sed quidquid est reale in Deo, est perfectio. 2. Relationes prout sunt respectus ad alias personas, sunt in Deo: at quidquid est in Deo, est perfectio: ergo, &c.

Objicies 1. Augustinus lib. 7. de Trinitate cap. 1. sic loquitur: *Deus ad se dicitur & magnus, & bonus, & justus*: unde sic arguitur: Ex Augustino, omnis perfectio in Deo est absoluta, ad se enim dicitur: ergo relationes, cum non sint quid absolutum, reduplicativè prout sunt relationes, non sunt perfectiones in divinis.

Resp. neg. maj. scilicet Augustinus eo loci loquitur tantum de perfectionibus absolutis, ut sunt magnitudo, bonitas, justitia, quarum exemplum adducit, ut probet, in divinis perfectiones dici ad se, non autem ad aliud.

Objicies 2. Si relationes essent perfectiones plura sequerentur absurda: nam 1. essentia sola non esset infinitè perfecta, ei nimirum deesset perfectio relativa: 2. Tres personæ simul sumptæ, plus continerent perfectionis, quàm una sola persona: 3. Filius esset perfectior Spiritu sancto: nam ei duæ relationes conveniunt, ad Patrem nimirum cujus est Filius, & ad ipsum Spiritum sanctum cujus est principium; cum è contra una tantum relatio, passiva nimirum, Spiritui sancto conveniat.

Resp. ad 1. neg. maj. Ad cujus probatione, negandum est sequi absurda, quæ contra thesim obijciuntur. Ratio est, quia infinita perfectio sive trium relationum simul, sive cujusque in particulari spectatæ, continetur in essentiâ divinâ, eò quod relationes sint actu realiter idem cum ipsâ: ita ut sicut quælibet trium relationum est ipsamet essentia divinâ, ita etiam essentia divinâ sit quælibet trium relationum. Eo principio nixus sanctus Augustinus lib. 6. de Trinitate, cap. 8. docet, tantum esse solum Patrem, vel solum Filium, vel so-

*lum Spiritum sanctum, quantum tres personæ simul sumptæ.*

Objicies 3. Thesis quâ docetur, relationes esse perfectiones, destruit æqualitatem personarum: scilicet eæ personæ non sunt æquales, quarum una habet perfectionem, quam altera nec habet, nec habere potest: atqui una ex divinis personis habebit perfectionem, quam altera nec habet, nec habere potest: prima persona v. g. habet perfectionem paternitatis, nec tamen habet, aut habere potest perfectionem filiationis, quia paternitas excludit filiationem: neque enim eadem persona potest esse simul Pater & Filius, cum nullum ens possit se ipsum producere.

Resp. ad 1. neg. ant. Ad 2. neg. min. Ad 3. dist. ant. Prima persona nec habet formaliter nec habere potest filiationem, conc. ant. nec habet, nec habere potest virtualiter seu eminenter, neg. ant. Ratio est, quia relationes non sunt perfectiones simpliciter simplices, ut loquuntur scholastici; sed perfectiones secundum quid, tum quia non sunt meliores ipsæ, quàm non ipsæ: nec enim in divinis melius est habere paternitatem, quàm filiationem; tum etiam quia ut perfectio sit simpliciter simplex, requiritur, ut non excludat aliam aut majorem aut æqualem; ac proinde cum relationes sese invicem excludant, non possunt esse perfectiones simpliciter simplices.

Objicies 4. Si relationes sint perfectiones, tres res erunt in Deo: sed in Deo non sunt tres res, alioquin essent tres substantiæ, quod damnatum est in Ario.

Resp. dist. maj. Tres res relativæ erunt in Deo, conc. maj. nempe cum tres personæ sint realiter distinctæ, reverà sunt tres res relativæ: Erunt tres res absolutæ, neg. maj. Damnatus est Sabelius quòd tres res relativas non admiserit; Arius verò, quòd tres res absolutas asseruerit: *Cum enim* (ait Augustinus lib. 7. de Trinitate, cap. 4.) *con-*  
nate

naretur humana inopia loquendo proferre ad hominum sensus, quod in secretario mentis pro captu tenet, de Domino Deo creatore suo, timuit dicere tres essentias, ne intelligeretur in illa summa æqualitate ulla diversitas. Rursus non esse tria quædam, non poterat dicere, quod Sabellius quia dixit, in hæresim lapsus est.

## Q U Æ S T I O VI.

*Verum cuilibet relationi propria conveniat  
existentia.*

Not. 1. **N**emo revocat in dubium, quin in Deo ante relationes intellecto, unica sit existentia, & quidem absoluta: siquidem in illo priori Deus concipitur essentiam absolutam habere, ac proinde existentiam absolutam, cum (ut harum Institutionum tomo II. dictum est) ne per mentem quidem essentia Dei distincta sit ab illius existentia.

Not. 2. Licet omnes theologi fateantur, in illo priori, in quo Deus antè relationes concipitur, unicam existentiam esse; non conveniunt tamen unam esse tantum, si cum relationibus intelligatur: scilicet nonnulli contendunt, tres in Deo, si consideretur in illo statu, existentias, non absolutas quidem, sed relativas admitti debere; è contra docent alii, nullam in Deo sic concepto existentiam esse relativam, sed unam tantum absolutam, quæ tribus relationibus conveniat.

**CONCLUSIO.** Deo concepto cum relationibus, nulla convenit existentia relativa.

Probatur. Nec Scripturæ nec Patres, cum agunt de SS. Trinitate, usquam meminerunt existentiaæ relativæ.

Primò, quoties Scripturæ Deo tribuunt exi-

stentiam, semper intelliguntur de existentia absolutâ: scilicet existentia nomine semper expriment absolutam illius essentiam: sic cum in Exodo Deus ipse dicit: *Ego sum qui sum*, vox hæc, *Sum*, in ultimo membro significat existentiam, seu actum existendi, & in priore significat essentiam, seu quidditatem Dei, hoc est, actus existendi prædicatur de Dei essentia, ita ut hic sensus sit, Dei essentia posita est in actu existendi necessario. Sic etiam apud Joannem cap. i. cum dicitur: *In principio erat Verbum, & Verbum erat apud Deum. Hoc erat in principio apud Deum*, verbum substantivum *Erat*, æternitatem, ac proinde existentiam absolutam significat.

*Secundò.* Eodem existentia nomine Patres usi sunt, ut Verbi quidditatem exprimerent. Asserebant Ariani, Verbum non habere Dei essentiam: contendebant contra Catholici, inesse Verbo essentiam Dei: Illi probabant, essentiam Dei non esse in Verbo, ex eo, quod semper non extitisset; isti verò demonstrabant, essentiam Dei, Verbo convenire, quod semper extitisset: *Eos autem* ( inquit Concilium Nicænum I. ) *qui dicunt, Erat quando non erat, & priusquam nasceretur, non erat, anathematizat Catholica & Apostolica Ecclesia*: ergo tum Catholici, tum hæretici existentiam sumebant pro ipsâmet Dei essentia, seu ( ut scholastici loquuntur ) pro ipsâ Dei quidditate.

*Tertiò.* Catholici qui labente quarto sæculo Antiochiæ contendebant, tres hypostases in Deo admitti debere, redierunt in concordiam cum iis qui unicam adittebant, postquam isti audierunt, illos hypostasis nomine existentiam intelligere, simulque cum illis confessi sunt, unicam in Deo existentiam, seu unicum esse reperiri: *Una est Dei, & sola natura quæ verè est* ( inquit Hieronymus in Epist. ad Damasum, pro unica hypostasi pugnans adversus Græcos ). *id enim quod subsistit, non habet aliunde, sed sum est.* Cætera

*tera quæ creata sunt, etiamsi videantur esse, non sunt, quia aliquando non fuerunt: & potest rursus non esse, quod fuit.*

*Quarto.* Augustinus asserit, existentiam in relationibus divinis dici in ordine ad subiectum, non autem in ordine ad terminum: *Quod enim est* (ait lib. 7. de Trinitate, cap. 4.) *ad se dicitur: Pater autem ad Filium:* unde sic conficitur argumentum: Omnis existentia convenit relationi in ordine ad subiectum, non autem in ordine ad terminum: ergo totuplex tantum est existentia relationum, quotuplex est earum subiectum; ac proinde cum in divinis unicum sit, divina nimirum essentia, cui relationes concipiuntur advenire, unica pariter est harum existentia, & quidem absoluta, cum Dei essentia sit absoluta.

*Quinto.* Si sint in divinis tres existentiaæ relativæ, tres erunt pariter essentiaæ relativæ; nam existentia proportionatur essentiaæ, hoc est, ejusdem cum essentia debet esse generis; erunt quoque tres durationes: nimirum existentia concipi non potest sine duratione; erunt etiam tres æternitates: siquidem quælibet existentia erit æterna: at si sint tres essentiaæ, si tres durationes, si tres æternitates, etiam relativæ, dici poterit, tres esse æternos, tres increatos, non adjectivè tantum, sed etiam substantivè: quod est contra symbolum quod Athanasio tribuitur: *Es tamen non tres æterni, sed unus æternus.*

Objicies 1. S. Augustinus in Psalmum 68. sic loquitur: *Quidquid est Pater, quod Deus est, hoc est Filius, hoc Spiritus sanctus: Cum autem Pater est, non illud est, quod illud est.* Hæc etiam habet lib. 7. de Trinitate, cap. 4. *Aliud est Deo esse, aliud Patrem esse.* Ex iis autem Augustini verbis sic arguitur: Ibi non est unica existentia relativa, ubi plures personæ habent distinctum esse relativum: sed in Deo personæ habent distinctum esse relativum: siquidem (Augustino teste)

teste) esse Patris quâ Pater est, non est esse Dei quâ Deus est: ergo, &c.

Resp. neg. maj. Ratio est, quia multiplex illud esse relativum dicit tantum plures terminos: at plures termini eâdem existentia possunt existere, & revera existunt in divinis. Nec aliud voluit Augustinus: siquidem cum asseruit, quod esse Dei quâ Deus est, non sit esse Patris quâ Pater est, non sumpsit verbum substantivum *Esse*, pro actu existendi, sed pro notione tantum, hoc est, docuit, Deum non dicere ordinem ad Filium, quâ Deus est præcisè, sed quatenus Pater, seu quatenus generat. Nec id mirum est, cum esse Dei ut Deus est præcisè, nec sit Pater, nec Filius, nec Spiritus sanctus, sed esse Dei tunc tantum est Pater, aut alia persona: cum adjunctum habet terminum notionalem.

Objicies 2. Tot sunt existentia, quot sunt entitates reales: siquidem non possunt esse plures entitates reales, quin sint plures entitates in actu: entitates autem non sunt in actu, nisi per existentiam, scilicet existentia est id, per quod res est in actu, seu extra suam causam, extra suum principium: atqui in divinis sunt plures entitates reales, paternitas nimirum, filio, & spiratio passiva: ergo sunt etiam plures existentia reales.

Resp. neg. maj. Ratio est, quia plures entitates reales possunt esse in actu, hoc est, extra suum principium, extra suam causam, aut per existentiam propriam, aut per adjunctam & communem: entitates absolutæ sunt in actu per propriam existentiam, relativæ verò per existentiam subjecti: nec id mirum est; siquidem relativum non aliud est, quàm modus seu modificatio, seu affectio subjecti: at modi, modificationes, affectiones subjecti, non existunt, nisi per existentiam subjecti, in quo recipiuntur.

Confirmatur responsum ex Cyrillo, qui Dialogo 2. probat, Ingenitum in divinis propriam existentiam non habere quòd sit proprium Dei Patris: *Ecquem ( inquit ) in Deo locum habere putandum est Ingenitum ? Nam si Ingenitum ipsum est per sese, & in extantia propria positum; est autem hoc, ut illi asserunt, proprium Dei & Patris, diversum quippiam erit ab eo, cuius est proprium. Nam quod alicujus est, & propriè constitutum existit, diversum plane est ab eo cuius est: atque ita duplicatur simplex natura Patris, eaque ex Patre & Ingenito componitur.*

Objicies 3. Id omne quod realiter produci-  
tur, propriam habet existentiam, nempe ter-  
minus productionis est existentia, seu positio  
rei extra suum principium, aut extra suam cau-  
sam: atqui relationes realiter produciuntur, Fi-  
lius v. g. realiter generatur à Patre, & Spiritus  
sanctus à Patre, Filioque simul produciuntur:  
ergo, &c.

Resp. ad 1. neg. maj. Ad 2. dist. ant. Terminus  
productionis est existentia, vel communis, vel  
propria, conc. ant. propria tantum, neg. ant.  
Equidem cum Filius produciuntur, recipit exi-  
stentiam, sed ea existentia non aliud est, quàm  
divinæ essentiae existentia, quæ illi cum essen-  
tiâ, à quâ ne virtualiter quidem distinguitur,  
communicatur. Terminus productionis se ha-  
bet in divinis respectu existentiae, sicut se habet  
respectu essentiae: ergo quemadmodum multi-  
plicato termino non multiplicatur essentia: ita  
etiam nec existentia multiplicatur multiplicato  
termino.

## Q U Æ S T I O VII.

*Vtrum in divinis sit absoluta subsistentia.*

**Not. 1.** **P**er subsistentiæ nomen intelligitur forma, à quâ res dicitur subsistens. Res verò duobus modis subsistens concipitur, vel in se, vel in alio: subsistit in se, cum non indiget alio, aut tanquam subjecto cui inhæreat, aut tanquam principio à quo recipiat suum esse, aut tanquam formâ per quam habeat certum existendi modum, per quem sit incommunicabilis, & fiat hypostasis sive persona: Econtra subsistit in alio cum eo indiget, aut tanquam subjecto inhæfionis, aut tanquam principio per quod suum esse recipiat, aut tanquam formâ per quam habeat certum existendi modum, per quem modum sit incommunicabilis, & fiat hypostasis seu persona.

**Not. 2.** Certum est apud omnes theologos 1. essentiam divinam, conceptam sine relationibus, esse subsistentem, si nomine subsistentis intelligatur res quæ non indiget alio, tanquam subjecto cui inhæreat: id nimirum proprium est cuilibet substantiæ, ut est essentia divina, etiam ante relationes concepta. Certum est 2. eandem essentiam in statu, de quo agitur, intellectam, esse subsistentem, si nomine subsistentis intelligatur ens quod non indiget alio, tanquam principio à quo suum esse recipiat: scilicet essentia divina ex se ipsâ & independentem à quolibet principio habet suum esse, suum existere. Certum est 3. essentiam divinam, in illo priori de quo est quæstio, conceptam, non esse subsistentem incommunicabiliter: neque enim sic apprehensa, est incommunicabilis, non est hypostasis, non est persona: si enim sic intellecta foret



foret incommunicabilis, nullæ forent in divinis processiones: quod est hæreticum.

**Not. 3.** Scholastici apud quos, quæ mox observavimus, certa sunt, non conveniunt, an quarto modo à tribus relatis diverso essentia divina, ante relationes concepta, sit subsistens. Pluribus Thomistis placet sententia quæ asserit, essentiam divinam conceptam ante relationes subsistere subsistentiâ absolutâ, quæ postea concipiatur tribus personis communicari: aliis è contra negans opinio videtur probabilior.

**CONCLUSIO.** Essentia divina ante relationes concepta nullam habet subsistentiam absolutam.

Probatur. Id admitti non debet in divinis quod nec Scriptura nec traditio admiserunt: sunt enim soli fontes, ex quibus erui debent conclusiones theologicæ: atqui nec Scriptura nec traditio subsistentiam absolutam admiserunt in divinis: ergo non debet admitti. Probatur min. Subsistentia est certus quidam modus existendi, qui essentiæ jam simpliciter existenti concipitur advenire: sed nec Scriptura nec Patres admiserunt modum existendi absolutum, qui essentiæ jam simpliciter existenti conciperetur advenire: siquidem admiserunt tres tantum existendi modos, & quidem relativos, qui essentiæ divinæ jam simpliciter existenti concipiuntur advenire; non enim alios existendi modos in divinis admiserunt, quàm quos vocibus, personæ, subsistentiæ, hypostasis, expresserunt: sed per personas, subsistentiam, hypostasim, modos relativos intellexerunt: hinc damnati sunt Sabelliani, quòd in Trinitate personas confunderent: hinc etiam Orientales litem olim intentarunt Occidentalibus, quòd tres hypostases admittere derectarent: hinc quoque factum est ut tunc tantum Occidentales dixerint, tres hypostases esse in Trinitate, cum certiores facti sunt, Orientales eo loquendi modo nō aliud intelligere, quàm quod Occidentales nomine personarum

in-

intelligebant. Vide, quæ subsequentis dissertationis quæstione primâ de hypostasis ac personæ nominibus dicentur.

Confirmatur argumentum 1. ex eo quod Patres ultrâ hypostases, personas, relationes, nihil in divinis admiserint præter essentiam, naturam, substantiam: iis enim nominibus idem significatum voluerunt. 2. Contenderunt, personis nihil aliud communicari, quàm essentiam, substantiam, naturam divinam; nec usquam asseruerunt, illis communicari substantiam illam absolutam quam postremis hisce temporibus excogitarunt scholastici. 3. Docuerunt, naturam, essentiam, substantiam in eo positam esse, quod sit communis, nec aliquâ proprietate singulari definita sit; substantiam verò, personam, hypostasim, dixerunt esse naturam singulari proprietate definitam, hoc est, in certâ, definitâque re consistentem; illam adversus Arianos asseruerunt esse unicam, istam verò adversus Sabellianos docuerunt esse triplicem tantum: ergo ne in illorum quidem mentem venit, esse substantiam aliquam, quæ communis sit & absoluta. 4. Si natura suam substantiam habeat sine personis, sine relationibus, Patres dicere potuissent, unum esse in Trinitate subsistentem, scilicet unum esset aliquod complexum, concretum, compositum ex naturâ & substantiâ: sed Patres tantum abest ut aliquando dixerint, unum esse in Trinitate subsistentem, quin expressis terminis id negaverint: Hilarius in libro de Synodis post expositam Sirmienfis Concilii fidem, docet in hoc positum esse dogma Catholicum, quod *non unus sit subsistens, sed una substantia non differens*. Hieronymus epist. 57. scribit, deitatem in tribus tantum personis subli flere: *Illâ (inquit) sola natura est perfecta, & in tribus personis deitas una subsistit*.

Objicies 1. Patres videntur in divinis admisisse quartam substantiam, quæ communis sit & absoluta. 1. Agatho Papa in epistolâ quæ legitur in  
sextâ,

sexta Synodo, actione quartâ, sic loquitur: *Confitemur trium subsistentiarum, sive personarum, unam subsistentiam.* 2. Augustinus lib. 7. de Trinitate, cap. 4. hæc etiam habet: *Omnis res ad se ipsam subsistit, quanto magis Deus? Si tamen dignum est, ut Deus dicatur subsistere.* 3. Sanctus Thomas quæstione 9. de potentiâ art. 5. ad 13. hæc in eundem scribit sensum: *In divinis proprietates personales hoc solum habent, quod supposita naturæ divinæ ab invicem distinguant, non autem sunt principium subsistendi divinæ essentiæ, ipsa enim divina essentia est secundum se subsistens: ergo, &c.*

Resp. neg. ant. Ad cujus priorem probationem dicendum est, Agathonem Papam nomine subsistentiæ intelligere ipsam divinam substantiam, ita ut docere voluerit, in hoc positum esse mysterium Trinitatis, quod in Deo tres sint personæ & una tantum substantia: nec ad mirum est, ut enim dicetur inferius, plures ex Patribus usi sunt subsistentiæ nomine, ut divinam essentiam, prout à relationibus virtualiter distinctam, exprimerent, quemadmodum usi sunt etiam substantiæ nomine ut significarent personam. *Quæsit* (apud Augustinum lib. 7. de Trinitate, cap. 4.) *quid tria diceret: Et dixit, substantias sive personas, quibus nominibus non diversitatem intelligi voluit, sed singularitatem noluit: ut non solum divinitas intelligatur ex eo, quod dicitur una essentia, sed & Trinitas ex eo, quod dicuntur tres substantiæ vel personæ.*

Ad alteram ejusdem antecedentis probationem, distinguenda sunt Augustini verba: *Omnis res ad se ipsam subsistit* improprie, conc. ant. proprie, neg. ant. Subsistentia improprie sumpta, idem est cum substantiâ: *Sicut enim* (ait ibidem Augustinus) *ab eo quod est esse, appellatur essentia, ita ab eo quod est subsistere, substantia dicitur.* E contra substantia proprie sumpta, significat certum substantiæ existendi modum: Priore modo

non

non autem posteriore, Augustinus sumpsit verbum *Subsistit*, hoc est, docuit, substantiam, prout est substantia, dici ad se ipsam, seu non dicere ordinem ad aliquem terminum; unde verbis quæ nobis objecta sunt, hæc alia præmittit: *Ab-surdum est autem, ut substantia relativè dicatur, om-nis enim res ad se ipsam subsistit*: at verò non sumpsit idem verbum *Subsistit* propriè, prout significat certum substantiæ existendi modum; pro quo tamen existendi modo sumitur, cum divinæ essentiae subsistentia tribuitur.

Ad tertiam ejusdem antecedentis probationem, distinguenda sunt pariter S. Thomæ verba: Ipsa divina essentia est secundum se subsistens, sumendo subsistentiam impropriè, hoc est, pro existentia simpliciter & absolutè, conc. ant. sumendo propriè, hoc est, pro certo existendi modo, neg. ant. Igitur non aliud loco nobis objecto vult S. Thomas, quàm quòd essentiae divinæ conveniat existentia independentè à relationibus: nec id mirum est, quippè quòd existere simpliciter præsupponatur certo existendi modo, qui per subsistentiam propriè dictam habetur. Confirmatur responsio ex simili loquendi ratione, quâ S. Doctor utitur in 3. dist. 6. quæst. 2. art. 2. ad 2. *In Deo (inquit) ipsa essentia, subsistens est: unde ei secundum se debetur esse, imò ipsa est suum esse subsistens*; eo autem in loco (ut patet) S. Thomas concludit, esse, seu existentiam, deberi essentiae divinæ, ex eo quòd sit essentia divina, imò ipsam esse suam existentiam, quia essentia divina concipi non potest sine actuali existentia: quemadmodum ergo in iis verbis vox *Subsistens*, sumitur pro *Existens*: ita & in iis quæ in argumento nobis objecta sunt.

Objicies 2. Terminus iste concretus: *Deus*, includit subsistentiam, & tamen non includit personas, cum ab illis præscindat: atqui non includit subsistentiam relativam, neque enim Deo, ut in instanti rationis ante relationes concepto, quid-

quidpiam relativum convenit: ergo sic intellectus convenit absoluta substantia. Major in qua posita est difficultas, sic ostenditur. Ille terminus includit substantiam, quo significatur ens habens divinitatem; neque enim ens concipi potest habens formam, nisi concipiatur subsistens: sed hocce termino concreto, *Deus*, significatur ens habens divinitatem: ac proinde includit substantiam.

Resp. ad 1. neg. maj. Ad 2. neg. ant. Ad 3. nego, ens concipi non posse habens formam, nisi concipiatur subsistens: satis nimirum, est ut sit simpliciter existens, seu non requiritur, ut existat certo aliquo modo, qui quidem modus (ut dictum est) per substantiam habetur; unde cum ens, quod in hac voce, *Deus*, significatur ut habens formam, existat ante relationes, potest præscisus ab illis, concipi habens formam deitatis, seu esse, non quidem simpliciter, sed esse à se, & independentem ab alio.

Objicies 3. Quod operatur, conceptum ante relationes, aliquam habet substantiam independentem à relationibus; siquidem actiones sunt suppositorum, seu substantiarum: atqui essentia divina, concepta ante relationes, operatur: nimirum creat, intelligit, vult: Si enim in illo statu non operaretur, creatio, intellectio, volitio non essent communes toti Trinitati: nempe communes sunt tantum, quod sint ab essentia quæ personis communis est: ergo, &c.

Resp. ad 1. neg. maj. Ad 2. dist. ant. Actiones sunt suppositorum, in causis in quibus sunt supposita, conc. ant. in causis in quibus non sunt supposita, neg. ant. scilicet ad operandum, absolute loquendo, satis est existentia, quæ quidem (ut sæpius observatum est) reperitur in essentia divinâ conceptâ ante relationes.

Confirmatur responsum ex eo quod in Christo natura humana per mentem præscisa à sui cum Verbo unione, concipiatur tamen ut operativa,  
pre-

proprium nimirum est intelligenti naturæ, ut cognoscat & amet,) & tamen sine supposito in eo statu concipitur; neque enim aliud habet suppositum, aliam hypostasim, aliam personam, quam personam, hypostasim, & suppositum Verbi.

Nec tamen ex principiis nostris sequitur, essentiam generare, quia intellectio non est generativa, nisi modificata sit per relationem paternitatis. Addendum est, essentiam divinam in illo priori habere suppositum, secundum entitatem sumptum, licet non secundum terminum: siquidem relationes, hypostases, personæ, sunt eadem realiter entitas cum essentiâ divinâ, ut fusè superius à nobis probatum est.



## DISSERTATIO QUARTA.

### *De Personis in communi.*

Not. **D**ivinarum personarum in communi exponemus 1. nomina; 2. essentiam; 3. proprietates.

---

### QUAESTIO PRIMA.

#### *De nominibus personarum in communi.*

Not. **D**icemus hîc 1. de nominibus, quibus Latini Patres usi sunt, ut personas divinas in communi sumptas exprimerent: 2. de nominibus quæ à Græcis adhibita sunt: 3. quæremus, quo tempore tum Latini, tum Græci Patres convenerint de adhibendo hypostasis nomine.

## CAPUT PRIMUM.

*De nominibus quibus Latini Patres usi sunt  
ut personas divinas exprimerent.*

CONCL I. **L**atini Patres variis nominibus  
usi sunt, ut divinas personas in  
communi sumptas exprimerent.

Probatur enumeratione. *Primò*, nonnunquam  
*Substantiæ* dicuntur à Patribus: *Cum enim* (in-  
quit Augustinus lib. 7. de Trinitate, cap. 4.) co-  
naretur humana inopia loquendo proferre ad homi-  
num sensus, quod in secretario mentis pro captu tenet,  
de Domino Deo creatore suo.... *timuit dicere tres*  
*essentias, ne intelligeretur diversitas. Rursus non*  
*esse tria quædam non poterat dicere, quod Sabellius*  
*quia dixit, in hæresim lapsus est.... Quæsit, quid*  
*tria diceret: Et dixit substantias sive personas,*  
*quibus nominibus non diversitatem intelligi vo-*  
*luit, sed singularitatem noluit. Verùm observan-*  
*dum est, Patres, cùm substantiam usurparunt*  
*pro persona, eam opposuisse essentiæ, ut pa-*  
*teret ex loco, quem mox ex Augustino laudavi-*  
*mus.*

*Secundò*; Personæ SS. Trinitatis à Latinis Pa-  
tribus aliquando *Subsistentiæ* dicuntur. *Sabellius*  
(verba sunt Ambrosii in Symbol. Apost. cap. 2.)  
*docuit, unam subsistentiam esse Patrem, & Filium,*  
*& Spiritum sanctum, unamque trinominem per-*  
*sonam: Sed dum omnes unam esse personam repu-*  
*tat, nihil esse unamquamque designat. Utitur*  
*eodem nomine Romana Synodus, quæ sub*  
*Agathone celebrata fuit; profitetur nimirum*  
*unitatem quidem essentiæ, trinitatem verò perso-*  
*narum, sive subsistentiarum. Anastasius Biblio-*  
*thecarius Præfatione in septimam Synodum hæc*  
*scribit: Sed & illud notandum, quoniam ubicum-*  
*que in hujus Synodi textu subsistentiam posui, per-*  
*sonam intelligi volui.*

Ter-

*Tertiò*, passim & ordinariè Latini Patres usi sunt *Personæ* nomine, ut id exprimerent, quod in Trinitate commune non est, sed singulare. Auctor libri de Trinitate, qui vulgò Novatiano tribuitur, auditque tanquam scriptor tertii sæculi, cap. 21. docet, Christum *secundam esse personam post Patrem*. Eandem vocem in ordinario Latinorum usu fuisse, testatur Alexandrina Synodus, quæ anno 362. celebrata est sub Athanasio. Hieronymus epistolâ 57. quæ est ad Damasum Papam, sic loquitur: *Sufficiat nobis dicere unam substantiam, tres personas subsistentes, perfectas, æquales, coæternas*. Augustinus lib. 7. de Trinitate, capite 4. eundem Latinorum usum hisce verbis exprimit: *Itaque loquendi causa de ineffabilibus, ut fari aliquo modo possemus, quod effari nullo modo possumus, dictum est à nostris Græcis, una essentia, tres substantiæ: à Latinis autem, una essentia vel substantia, tres personæ*. Symbolum quod Athanasio, sed falsò, tribuitur, eandem adhibet vocem: *Alia est enim (inquit) persona Patris, alia Filii, alia Spiritus sancti*. Concilium Lateranense IV. cum terminum pariter adhibuit: *Nos autem (ait capitulo 2.) sacro & universali Concilio approbante, credimus & confitemur cum Petro, quod una quedam summa res est, incomprehensibilis quidem & ineffabilis, quæ veraciter est Pater & Filius & Spiritus sanctus, tres simul personæ, ac singulatim qualibet earumdem*.

Quæres 1. quo tempore Latini personæ nomen usurpare cœperint ad id exprimendum quod non commune, sed singulare est in SS. Trinitate.

Respondet Facundus Hermianensis lib. 1. pag. 19. personæ ac subsistentiæ nomina tum primùm adhibita fuisse, cum orta est hæresis Sabellii: *Nam (inquit) sic Ecclesia Christi, etiam cum necdum ad distinctionem Patris, & Filii & Spiritus sancti interetur nomine personæ, tres credidit & prædicavit,*



cavit, Patrem & Filium & Spiritum sanctum. Personarum autem nomen, nonnisi cum Sabellius impugnaret Ecclesiam, necessario in usum prædicationis assumptum est, ut qui semper tres crediti sunt & vocati, Pater & Filius & Spiritus sanctus, uno quoque simul, & communi personarum nomine vocarentur.

## CAPUT II.

*De nominibus quibus Græci usi sunt  
ut divinas personas exprimerent.*

CONCL. **G**Ræci Patres Hypostasis nomine usi sunt, ut id exprimerent, quod Latini per personas.

Probatur. Primò, Dionysius Alexandrinus in responsione ad propositionem quartam Pauli Samosateni, de SS. Trinitate loquens, hæc scribit: *Due hypostases (Patris scilicet & Filii) inseparabiles sunt, & subsistens Patris Spiritus, qui erat in Filio.*

2. Alexander Episcopus Alexandrinus, à quo Arius primùm damnatus est, in Epistolâ ad Alexandrum Episcopum Constantinopolitanum scribit, proprio modo constantem hypostasim Filii significasse Ioannem his verbis: *In principio erat Verbum, & Verbum erat apud Deum. Ad- dit postea, Patris & Filii duas esse hypostasinaturas.*

3. S. Basilius Epistolâ 125. laudat S. Epiphani- um, quòd tres hypostases admittendas esse scripsisset in literis, quas Antiochiâ ad eum dederat: *Illud insuper & mentem meam benè satis habuit, quòd in reliqua egregiè accuratèque ( ut theologum decebat ) disputata adjecit tua diligentia, necessum esse omni modo confiteri tres hypostases.*

4. Concilium Oecumenicum II. in Synodicâ  
Tom. III. L ad

ad Damasum, agnoscit unam divinitatem *in tribus perfectis subsistentiis* ( græcè, hypostasibus ) sive *in tribus personis* . Concilium Ephesinum Anathematismo 4. eodem utitur nomine : *Si quis duabus personis, sive hypostasibus, eas voces attribuit, quæ in euangelicis & apostolicis scripturis passim occurrunt, & alias quidem homini, tanquam seorsim à Dei Verbo considerato, adscribit, alias verò tanquam Deo convenientes, soli Dei Patris Verbo adaptat, anathema sit.* Eandem loquendi rationem legere est in Concilio Chalcedonenſi actione 5. nec non in Epistolâ Agathonis Papæ ad sextam Synodum, quæque ejusdem sextæ Synodi actione 4. refertur.

Quæres 1. utrum omnes Græci Patres *hypostasis* vocem usurpaverint pro personâ, seu pro eo, quod in Trinitate commune non est, sed singulare.

Resp. negativè: nam 1. Nicæni Patres subsistentiam, seu ( ut habet exemplar Græcum ) hypostasim, cum substantiâ confudisse videntur in expositione fidei, ubi sic loquuntur : *Eos autem qui dicunt, Erat aliquando tempus, quando non erat, & antequam nasceretur, non erat: & quia ex nullis substantiis factus est, aut ex alia subsistentia vel substantia .... anathematizans Catholica & Apostolica Ecclesia.* 2. Epistola Synodica Concilii Sardicenis apud Theodoretum historiæ lib. 2. c. 6. ( si tamen sit Concilii Sardicenis, nec enim apud Athanasium reperitur ) fidem facit, damnatos esse Arianos, quod *differentes esse hypostasess assererent Patris & Filii & Spiritus sancti.* 3. Athanasius in Oratione quintâ contra Arianos hæc scribit: *Ut autem unum est principium, & ideo unus Deus; ita planè ac reverà una est, quæ verè est essentia & hypostasis.* 4. Cyrillus Hierosolymitanus in eundem sensum scribit Catechesi sextâ, Deum esse multinominem & omnipotentem & unius hypostasis.

Quæres 2. quo tempore Patres Græci hypostasim

statim frequentius usurpare cœperint pro eo, quod in Trinitate singulare est.

Respondet Baronius in Annalibus Ecclesiasticis ad annum 320. Græcos *Hypostasim*, pro eo, quod Latini personam appellant, frequentius usurpassè ab anno 319. Tunc scilicet Alexandriæ celebrata fuit Synodus, in quâ (eodem Baronio teste) Osius Episcopus Cordubensis author fuit Patribus, ut desinerent hypostasim usurpare pro substantiâ, eâque voce uterentur solùm ad exprimendum id, quod in Trinitate non commune, sed singulare est.

## CAPUT III.

*Quo tempore Latini convenerint de  
adhibendo hypostasis no-  
mine.*

CONCL. **L**atini Patres multis annis detrectarunt uti hypostasis nomine ad exprimendas personas SS. Trinitatis.

Probatur. *Primò*, ubi imperante Juliano Meletius Antiochenæ Ecclesiæ restitutus est, & Paulinus à Lucifero Calaritano ejusdem Ecclesiæ ordinatus est Episcopus, quòd omnes Catholicì cum Meletio, Catholico quidem, sed ab hæreticis ordinato, qui cum Semiarianismo favere censebant, convenire detrectarent, gravis inter Meletianos & Paulinianos orta est de hypostasi controversia. Contendebant illi, tres hypostases esse in divinis admittendas; asserere isti, unicam tantùm admitti debere; utrique sibi invicem hæreseos notam inurebant, Paulino quidem adhærentes, Meletianis Arianismum imponebant; Meletiani verò Sabellianismi Paulinianos infimulabant: *Qui* (verba sunt Basilii in Epistolâ 391.) *usiam & hypostasim idem esse statuunt, coguntur personas* (quâ voce Meletiani solas functiones intelligebant) *tantummodo fateri esse diversas, &*

in eo ipso, quòd hypostases tres dicere verentur, Sabellii impietatem non videntur effugere, qui & ipse passim propriam notionem confundens, personas (hoc est, ut intelligebat Basilii, functiones ac nomina) distinguere conatur, unam & eandem hypostasim affirmans, pro eo atque res tulerit, variè transformari. De eâdem lite hæc habet Gregorius Nazianzenus oratione 32. Diversæ fidei speciem præbuit levis illa & jejuna de vocum sono altercatio. Hic deinde & Sabellianismus ob tres personas excogitatus est, & Arianismus ob tres hypostases. Quorum utrumque pertinax contendendi studium effugerat.

Secundò, Athanasius litem de unâ, aut tribus hypostasibus, evocavit ad Concilium Alexandrinum, quod post obitum Constantii, imperante Juliano, anno 362. celebratum est.

Qui tres hypostases admitti debere contendebant, interrogati fuerunt in Alexandrinâ Synodo an per tres hypostases intelligerent tres essentias, tres substantias, tria principia; quemadmodum intellexerant Ariani: Interrogatique sunt (verba sunt Epistolæ Alexandrini Concilii) num pro Arianorum sententia alienas peregrinasque, ac diversæ à se invicem substantiæ personas esse velint, & unamquamque hypostasim per se ac seorsum divisam esse pro ratione cæterarum creaturarum, eorumque qui ex hominibus nascuntur, existiment. An sic intelligant diversas res, quale est aurum, argentum, æs. An, ut alii hæretici, sub istis vocibus tria principia, & tres maximos Deos constituent. Cui quidem interrogationi Meletiani responderunt, se nequaquam id intelligere, quod quæsitum fuerant: Cæterum illi affirmabant, se ita nec dixisse, nec sensisse. Addiderunt, se ideo tres hypostases admittere, ne nomine tenus tantum, sicut olim Sabelliani, Patrem Filium & Spiritum sanctum distinguere viderentur. Percurrentibus autem nobis, qua ratione ista dicerent, aut cur omninò istiusmodi vocabulis uterentur, res-

responsum dederunt, sese in Trinitatem credere, non quæ nomine tenus Trinitas, sed quæ verè Trinitas esset, & subsisteret .... Se scire, esse sanctam Trinitatem, ut tamen una sit deitas & unum principium: & Filium se agnoscere coessentialem suo Patri (ut dixerunt Patres) & Spiritum sanctum non creaturam, neque alienum, sed proprium & indisgregatum ab essentia Patris & Filii.

Econtra qui tres hypostasēs rejiciebant, contendebantque, unam tantum in SS. Trinitate admitti debere, interrogati sunt, num pro Sabelliano dogmate ea mente loquerentur, ut sublato vellet in Trinitate Filium & Spiritum sanctum, quasi Filius essentia careat, aut Spiritus sanctus non subsisteret. Ejusmodi autem quæstioni responderunt, se idem tantum tres hypostasēs rejicere, quod hypostasis nomine usiam sive essentiam aut naturam intelligi crederent: *Qui & ipsi quoque affirmarunt, neque ita se dicere, neque se ita sensisse unquam, sed hypostasim eos intelligere idem esse cum usia: unam autem ideo sese hypostasim intelligere, partim quia Filius ex essentia Patris sit, partim quia in tribus identitas sit naturæ: unam enim sese deitatem, & unam naturam credere, neque aliam Patris, aliam Filii, aliam Spiritus sancti esse naturam.*

Ubi sive Meletio, sive Paulino adhærentes audierunt sibi invicem datam hypostasim interpretationem, mutuam inter se pacem inierunt, sese habuerunt pro Catholicis: Illi (verba sunt Epistolæ Synodicæ) qui eo crimine postulati erant, quod tres hypostasēs inducerent, cum istis in eandem sententiam convenerunt: vicissimque illi qui unam hypostasim asseverarant, istorum interpretationi acquieverunt. & ambæ factiones pariter Arium execratæ sunt ut Christi hostem: Sabelliumque & Paulum Samosatensem ut impios; Valentinum item & Basilidem ut alienos à veritate; Manichæum quoque ut malorum machinatorem.

Tertiò, Paulinus (Epiphanio teste, hæresi 77.)

Alexandrinæ Synodi decretum approbavit, sibi-  
que adhærentibus permisit, ut tam hypostases  
tres, quàm unam hypostasim affirmarent: Econ-  
tra qui stabant à Meletii partibus, ejusdem Syno-  
di decreto non obtemperarunt, exagitarunt nimi-  
rum eos, qui tres hypostases admittere detrecta-  
rent: *Non igitur, prò dolor* ( inquit Hieronymus  
Epist. 57. quæ est ad Damasum Papam ) *post Ni-*  
*cænam fidem, post Alexandrinum juncto pariter Oc-*  
*cidente decretum, trium hypostaseon ab Arianorum*  
*præsule, & Compensibus* ( intelligit adhærentes  
Meletio, qui urbicis Ecclesiis ab Eudoxio, Arria-  
næ partis Antiochiæ Episcopo, exclusi, extra  
urbem in campis suos conventus celebrabant )  
*novellum à me homine Romano nomen exigitur.*  
*Qui, quæso, ista Apostoli prodidere? Quis novus*  
*magister gentium Paulus hæc docuit? Interroga-*  
*mus, quid tres hypostases posse arbitrentur intelli-*  
*gi. Tres personas subsistentes, ajunt. Responde-*  
*mus, nos ita credere. Non sufficit sensus, ipsum no-*  
*men efflagitant, quia nescio quid veneni in syllabis*  
*latet.*

Post expostas adversùs Meletianos suas que-  
rimonias, Hieronymus profitetur, se tres hypo-  
stases dicturum, si Damasus dici jubeat: *Decer-*  
*nite* ( inquit ) *si placet, obsecro. Non timebo tres*  
*hypostases dicere, si jubetis: condatur nova post Ni-*  
*cænam fide, & similibus verbis cum Arianis con-*  
*fiteamur orthodoxi.* Addit, ancipitem se hære-  
re, quòd vox græca *hypostasis*, apud Latinos scripto-  
res non aliud significet, quàm essentiam & sub-  
stantiam: *Tota secularium literarum schola nihil*  
*aliud hypostasim, nisi usiam novit. Et quis ore sa-*  
*crilego tres substantias predicabit? Optat, ut Da-*  
*masus prohibeat dici tres hypostases: Sufficiat*  
*nobis dicere unam substantiam, tres personas subsi-*  
*stentes, perfectas, æquales, coeternas. Tacean-*  
*tur tres hypostases, si placet, & una teneatur. Non*  
*vana suspensionis est, cum in eodem sensu verba dissen-*  
*tiunt. Sufficiat nobis memorata credulitas. Repe-*  
*tit*

tit deinde quæ dixerat initio: *Aut si rectum putatis, tres hypostases cum suis interpretationibus debere nos dicere, non negamus; sed mihi credite, venenum sub melle latet.*

Ex iis quæ huc usque dicta sunt, patet 1. Græcos pluribus annis non admisisse Latinorum de tribus personis, & unâ in Trinitate essentiâ, loquendi modum. Patet 2. Latinos pluribus etiam annis detrectasse Græcorum de tribus hypostasibus & unâ essentiâ loquendi morem. Patet 3. utrosque, sive Græcos, sive Latinos, non de re sed de nomine tantum litigasse; ac proinde æqualiter fuisse catholicos, & eos qui unam tantum hypostasim, & eos qui triplicem admittebant. Patet 4. græcam vocem, *Hypostasis*, & Latinam, *Persona*, solo usu Ecclesiastico, non autem sæculari & grammatico, adhiberi ad id exprimendum, quod in SS. Trinitate singulare est, Patrem nimirum, aut Filium, aut Spiritum sanctum. Patet denique 5. post quartum sæculum, sive Latinos sive Græcos *hypostasim* passim non sumpsisse pro essentiâ, sed tantum pro personâ, quam & substantiam ( ut superius observatum est ) nostri majores nonnunquam appellarunt.

## Q U Æ S T I O II

### *De personarum divinarum essentia.*

**Not.** **U**T quæ ad divinarum personarum essentiam pertinent, explicentur, querendum est 1. quid sit persona in genere: 2. utrum divinæ personæ per aliquid absolutum, an verò per relativum constituentur.

## CAPUT PRIMUM.

*Quid sit persona in genere sumpta.*

CONCL. **P**ersona in genere rectè definitur,  
*Individua substantia completa naturæ rationalis.*

Explicatur conclusio. Persona dicitur 1. *Substantia*, eò quòd soli substantiæ conveniat, scilicet accidentia non sunt personæ. Dicitur 2. *substantia individua*, seu non tantum quæ sit singularis, sed etiam quæ sit incommunicabilis alteri: unde essentia divina, prout est essentia, non est persona, quia sic considerata, communicari potest, & reverà Patri, Filio ac Spiritui sancto communicatur. Ob eandem rationem, licèt humanitas Christi sit humanitas singularis, non est tamen persona. Dicitur 3. *individua substantia completa*, neque enim pes, manus, imò nec anima rationalis, sunt personæ: nam licèt pes sit completus in ratione pedis, manus in ratione manûs, anima in ratione animæ; absolutè tamen loquendo, non sunt aliquid completum, nimirum pes & manus ordinantur ad corpus, cujus sunt partes, & animæ ad corpus, cum quo conjuncta constituit hominem. Dicitur 4. *individua substantia completa naturæ rationalis*, per quæ quidem verba substantiæ, quæ merè sunt materiales, excluduntur à ratione personæ.

Ex traditâ ac explicatâ eâ definitione personæ Sylvius colligit, quinque requiri ad rationem personæ, primum, quòd sit in genere substantiæ: Secundum, quòd sit naturæ intellectualis: Tertium, quòd sit ens completum: Quartum, quòd sit quid incommunicabile: Quintum, quòd subsistat per se separatim ab aliis, hoc est, in nullo alio supposito, à quo sustentetur.

Quæres, utrum suppositum, hypostasis, substantia, idem significant quod persona.

Resp.



Resp. affirmativè, cum hoc tamen discrimine quòd suppositum, substantia, hypostasis, latius pateant, quàm persona: nempe illa nomina conveniunt omni enti completo incommunicabili, persona verò soli naturæ intellectuali: nonnunquam tamen, cum de divinis agitur, pro eodem sumuntur: unde sicut dicitur, quòd in Trinitate sint tres personæ, ita dicitur, quòd sint tria supposita, tres substantiæ, tres hypostases. Vide, quæ de eorum nominum usu hujusce dissertationis quæstione primâ dicta sunt.

## C A P U T II.

*Per quid persona divina constituentur.*

CONCL. **I**N divinis, Personæ non constituentur per aliquid absolutum, sed per aliquid relativum: hoc est, Persona in divinis non significat aliquid absolutum, sed tantum aliquid relativum: seu nusquam sumitur pro essentiâ, naturâ, substantiâ divinâ, sed tantum in concreto, aut pro Patre, aut pro Filio, aut pro Spiritu sancto; & in abstracto, vel pro paternitate, vel pro filiatione, vel pro spiratione passivâ.

Probatur I. Personæ per id in divinis constituentur, per quod numerum faciunt; quod enim in divinis numerum non facit, non est persona sed natura: atqui id per quod in divinis personæ numerum faciunt, non est aliquid absolutum, sed relativum tantum; quod enim est absolutum in divinis, unum est omninò tum in Patre, tum in Filio, tum in Spiritu sancto: igitur in divinis personæ non constituentur per aliquid absolutum, sed tantum per aliquid relativum.

Confirmatur argumentum ex Patribus. Augustinus tractatu 39. in Joannem sic loquitur: *Hoc solo numerum insinuat, quòd ad invicem sunt,*

*non quod ad se sunt* : Sermone 58. de Verbis Domini, divisionem pariter, seu distinctionem repetit ab ingenito & genito, quæ haud dubiè sunt relativa: *Nec aliqua alia causa est ( inquit ) que divisionem faciat personarum, nisi quod hic ingenitus est, & ille genitus, id est, hic Pater est, & ille Filius.*

Fulgentius in libro de Trinitate, expressè docet, personas in divinis multiplicari, quòd relationem importent: *Pater ( ait ) non sibi est, sed Filio. Filius non sibi est, sed Patri. Spiritus alicujus est adspirantis, ergo ad Patrem, Filiumque refertur. Illa itaque relativa nomina Trinitatem faciunt: essentialia verò nullo modo multiplicantur.*

Toletanum Concilium XI. hæc in eundem habet scopum: *In relatione personarum numerus cernitur, in divinitatis verò substantia quid enumeratum sit, non comprehenditur. Ergo hoc solo numerum insinuant, quod ad invicem sunt, & in hoc numero carent, quod ad se sunt. Non alia Bernardo fuit mens, cum adversùs Petrum Abaelardum hæc scripsit Epist. 190. Nam quod alter ex altero, vel alter ad alterum veracissimè dicitur, personarum sanè designatio est, non unitatis divisio. Concilium Lateranense IV. cap. Damnamus, unitatem in Trinitate repetit ex absoluto, essentiali nimirum; sed numerum & multiplicationem repetit ex relativis: *Vna, ( inquit ) summa res est, quæ nec est generans, neque genita, nec procedens: sed est Pater qui generat, Filius qui gignitur, & Spiritus sanctus qui procedit, ut distinctiones sint in personis, & unitas in natura.* Ex laudatis Patrum textibus evidenter patet, ea tantum quæ sunt relativa, facere numerum in divinis; ac proindè ea sola constituere personas, à quibus ( ut dictum est ) numerus in Trinitate desumitur.*

Probatur 2. Per id tantum personæ divinæ constituuntur, quod in Trinitate singulare est,

non

Differt. IV. *De Person. in commun.* 241

non commune: scilicet quod est commune, essentialiam, seu naturam, constituit, ac proinde id tantum debet constituere personas, quod est singulare, cum ipsæ personæ non sint communes, sed singulares, ita ut sibi invicem minimè communicentur: atqui solum relativum in Trinitate singulare est, cum è contra omne quod est absolutum, sit commune: sic Paternitas primæ tantum personæ, Filiação secundæ tantum, Spiratio passiva Spiritui sancto dumtaxat convenit; è contra quidquid est absolutum, sive sit natura, sive sint attributa, communia sunt, cum ex æquo in singulis personis reperiantur.

Confirmatur argumentum ex Patribus. Basilii Epist. 391. sic loquitur: *Commune, est deitas; proprium, est paternitas.* Epistolâ 349. relationes paternitatis, filietatis, & sanctificationis vocat *separatas personæ cujusque notas & characteres.* Gregorius Nazianzenus Orat. 39. hæc scribit: *Adoramus Patrem, & Filium, & Spiritum sanctum; ita ut proprietates ( quæ non aliud sunt, quàm relationes ) distinguamus, divinitatem autem unam faciamus.*

Theodoretus Dialogo 1. hæc habet: *Mox ea quæ de divina natura dicuntur, communia sunt Patri & Filii & Spiritus sancti, ut sunt, Deus, Dominus, Omnipotens; & id genus alia: Quæ verò hypostases significant, non jam ea sanctæ Trinitatis communia sunt, sed illius hypostasis unumquodque est, cujus est proprium.* Cyrillus lib. xi. Commentariorum in Joannem, asserit, nihil esse quod Filium à Patre dividat, ac differre faciat, quo minus in omnibus similis, æqualisque sit, præter hoc unum, quod Pater est. Similem loquendi modum passim usurpat Augustinus in suis de Trinitate libris.

Probatur 3. Per id divinæ personæ non constituuntur, quod dicitur ad se, non ad alium: atqui quod dicitur ad se, non ad alium, est absolutum: ergo personæ divinæ non constituuntur per ali-

quod absolutum. Minor est evidens, unde probatur major. Per id personæ non constituuntur quod significat Dei substantiam: substantia enim Dei est communicabilis, cum è contra personæ sint incommunicabiles; unde Concilium Florentinum in decreto fidei asserit: *Omnia quæ Patris sunt, ipsum Patrem unigenito Filio suo, gignendo, dedisse, præter esse Patrem.* Atqui quod ad se dicitur, significat Dei substantiam: *Quapropter* (inquit Augustinus lib. 5. de Trinitate, capite 8.) *illud præcipuè teneamus, quidquid ad se dicitur præstantissima illa, & divina sublimitas, substantialiter dici; quod autem ad aliquid, non substantialiter, sed relativè.* Ex eo autem principio S. Doctor concludit, singula quæ ad se dicuntur, five sint natura, five sint attributa, substantiam non autem personas, significare: *Quidquid ergo* (ait) *ad se ipsum dicitur, Deus, & de singulis personis singulariter dicitur, id est, de Patre, & Filio, & Spiritu sancto, & simul de ipsa Trinitate non pluraliter, sed singulariter dicitur.*

Objicies 1. Personæ divinæ per id constituuntur, quod dicitur ad se: sed id quod dicitur ad se, non est relativum, sed absolutum, Augustino teste lib. 5. de Trinitate, cap. 8. ergo divinæ personæ constituuntur per aliquid absolutum, non autem per aliquid relativum. Probatur major ex Augustino, qui lib. 7. de Trinitate, cap. 6. sic loquitur: *Non enim est aliud Deo esse, aliud personam esse, sed omnino idem.*

Affertionem illam idem Augustinus probat ex eo, quod alioquin sequeretur, non alio modo dici tres personas in Trinitate, quàm quo in humanis dicuntur tres amici, tres propinqui, tres vicini: *Nam si esse ad se dicitur, persona verò relativè, sic dicamus tres personas, Patrem Filium & Spiritum sanctum, quemadmodum dicuntur aliqui tres amici, aut tres propinqui, aut tres vicini, quod sint adinvicem, non quod unusquisque eorum sit ad seipsum.*

Addit

Addit S. Doctor, eodem modo Patrem dici personam, quo dicitur Deus, & magnus, & bonus: *Quocirca ut substantia Patris ipse Pater est, non quo Pater est, sed quo est; ita & persona Patris non aliud quam ipse Pater est: ad se quippe dicitur persona, non ad Filium vel Spiritum sanctum; sicut ad se dicitur Deus & magnus, & bonus, & iustus, & se quid aliud huiusmodi: Ergo, ex Augustino, personæ divinæ per id constituuntur, quod dicitur ad se; proindeque per absolutum, non autem per relativum constituuntur.*

Resp. ad 1. neg. maj. Ad 2. dist. priorem partem antecedentis. Non aliud est Deo esse, aliud personam esse, à parte rei, conc. ant. nimirum esse Dei, sive sumatur pro essentiâ, sive pro existentia, non distinguitur realiter à personâ; quidquid enim est in Deo, Deus est: Ex parte nostri intellectûs, qui unum ab alio distinguit cum fundamento in re, neg. ant.

Ad alteram ejusdem antecedentis partem, respondendum est cum sequenti distinctione: Sequeretur, Patrem, Filium, & Spiritum sanctum dici tres personas, sicut aliqui dicuntur tres amici, tres vicini, quantum ad aliquid, conc. ant. quantum ad omnia, neg. ant. Totum esse amici, vicini, propinqui, est ad aliud: è contra in divinis totum esse Patris non est ad aliud: siquidem in eo persona & essentia idem sunt à parte rei; essentia autem reduplicativè prout essentia, seu, sub conceptu formali esse, non est ad aliud; ac proinde nec persona est ad aliud secundum totum ac adæquatum suum esse.

Ad tertiam partem ejusdem antecedentis respondendum est pariter cum distinctione: Pater ad se dicitur persona, sumendo personam indirectè & in obliquo, conc. ant. sic enim sumpta, est idem cum essentiâ: Sumendo personam directè & in recto, neg. ant. In Patre persona directè & in recto dicit ordinem ad Filium: non enim directè ac in recto persona in Patre aliud est, quam esse

**Patris:** at esse Patris est esse relativum: siquidem aliquis non potest habere esse Patris ad se ipsum. Itaque ex illo Augustini textu, qui adversus conclusionem objectus est, hoc unum tantum colligi potest, scilicet, idem à parte rei esse personam & essentiam in divinis; personam dici ad se, secundum indirectum sui conceptum, hoc est, prout est una ac eadem res cum essentiâ, non verò secundum directum conceptum: sic enim considerata, distinguitur virtualiter ab essentiâ, nec aliud habet esse, quàm esse ad aliud.

Jam verò quòd ea fuerit Augustini mens, ostendi potest ex scopo, quem S. Doctor eo loci sibi proponit. Quærit, cur in Deo potius dicantur tres personæ, quàm tres substantiæ: *Fortassis igitur* (inquit lib. 7. de Trinitate, cap. 5.) *commodius dicuntur tres personæ, quàm tres substantiæ?* Ubi verò tacitè subintellexit responsionem, quâ assereretur, ideo non dici tres substantias, quòd substantia sit idem cum essentiâ, ac proinde cum certum sit, unam tantum in Deo essentiam admitteri debere, ita etiam una tantum substantia dici debeat: ubi (inquam) responsionem illam implicitè præsupposuit, eam impugnat, asserens personam non minùs esse idem à parte rei cum essentiâ, quàm sit ipsa substantia: *Nam & in personis* (inquit cap. 6.) *eadem ratio est: non enim aliud est (à parte rei) Deo esse, aliud personam esse.* Rejectâ autem ejusmodi ratione, docet, non ob aliud apud Latinos dici tres personas, non autem tres substantias, quàm quòd sic usus apud eos invaluerit: sicut invaluit usus dicendi, Patrem, Filium, & Spiritum sanctum esse tres personas, non autem unam tantum, licèt in eis persona sit idem cum essentiâ: *Cur ergo* (inquit capite 6.) *non hæc tria simul unam personam dicimus, sicut unam essentiam & unum Deum, sed tres dicimus personas, cum tres Deos aut tres essentias non dicamus, nisi quia volumus, vel unum aliquod vocabulum servire huic significationi, qua*  
in-

*intelligitur trinitas, ne omninò tractaremus interrogati, quid tres, cum tres esse fateremur? In usum quoque liberum refert Græcorum loquendi morem, qui licet unum Deum confiteantur, trinitatem tamen tribus substantiis, tribus hypostasibus solent exprimere: Quanquam & illi si vellent, sicut dicunt tres substantias, tres hypostasēs, possent dicere tres personas, tria prosopa. Illud autem maluerunt, quod fortè secundum linguæ suæ consuetudinem aptius diceretur.*

Objicies 2. Persona prius est in divinis secundum nostrum concipiendi modum, quàm relativum: ergo persona non constituitur per relativum, sed per absolutum: neque enim quod prius est, constituitur per id quod est posterius. Probat. ant. Illud est prius relativo, quod est prius eo quod est principium relativi: sed persona in divinis prius est eo quod est principium relativi: scilicet est prior intellectu & volitione, quæ sunt principium Quo immediatum relativi, sive in Patre, sive in Filio, sive in Spiritu sancto.

Resp. ad 1. neg. ant. Ad 2. dist. min. Persona secundum aliquem respectum est prius eo quod est principium relativi, conc. min. est prius secundum omnem respectum, neg. min. Persona in divinis duo dicit, unum quod est veluti materiale, essentiam nimirum divinam, cum quâ personæ sunt realiter idem; & aliud quod est veluti formale, seu respectus ad aliud. Persona prior modo sumpta prius est secundum nostrum concipiendi modum intellectu & volitione, non autem si posteriore modo sumatur. Vide quæ ad argumentum simile superius dicta sunt quæst. 7. tertiæ dissertationis.

## QUÆSTIO III.

*De proprietatibus personarum in divinis.*

*Not.* **I**Nter proprietates divinarum personarum in communi, recenseri possunt appropriatio, æqualitas, circumincessio, notiones, missio, de quibus subsequenti multiplici capite seorsim est à nobis agendum, ad regulas & principia quæ i. p. traduntur à S. Thoma iis quæstionibus, in quibus de hujusmodi proprietatibus S. Doctor differit.

## CAPUT PRIMUM.

*De appropriatione in divinis.*

*Not.* **A**ppropriatio nihil aliud est, quàm modus loquendi, quo quædam attributa, quædam operationes, uni personæ potius quàm alteri tribuuntur.

**CONCLUSIO.** Appropriatio locum habet in personis divinis.

**Probatur.** Appropriatio est loquendi modus quo quædam, sive operationes, sive attributa, alioquin tribus personis communia, specialiter tamen uni personæ præ aliis tribuuntur: Sed in divinis locum habet ejusmodi loquendi modus, ut patet ex iis Scripturæ locis, in quibus omnipotentia Patri, sapientia Filio, bonitas Spiritui sancto tribuuntur: ergo appropriatio locum habet in personis divinis.

**Quæres I.** in quo fundetur appropriatio, quæ locum habet in divinis.

**Resp.** eam fundari tum in eminentiâ divinarum personarum, tum etiam in imbecillitate intellectus creati. Et sanè cum mens creata per-



personales Dei proprietates difficilè concipere possit, eò quòd in nullo ferè cum proprietatibus personalibus creaturarum conveniant, eas per essentiales proprietates, quòd magis notæ sint, apprehendit; servatis tamen quibusdam congruentiis.

Quæres 2. quænam sint eæ congruentiæ, quæ requiruntur ad appropriationem.

Resp. esse quadruplices, nimirum congruentiam esse, unitatis, virtutis, habitudinis; nam illa quatuor, esse, unitas, virtus, habitudo, considerari possunt in divinis.

Hinc fit 1. ut quæ nonnullam habent similitudinem cum esse personarum, illis specialiter tribuantur: Sic Hilarius lib. 2. de Trinitate, paulò post principium, æternitatem Patri, speciem Filio, usum Spiritui sancto specialiter appropriat: *Æternitas* (inquit) *est in Patre, species in imagine, usus in munere*; siquidem æternitas, species, usus, quandam habent analogiam cum esse Patris, Filii, ac Spiritûs sancti: scilicet quemadmodum Pater habet esse, quod est sine principio; ita & æternitas. Cum esse Filii in eo positum sit, quòd sit Verbum, seu imago, meritò species, hoc est, pulchritudo Filio tribuitur; non enim est imperfecta, sed perfectissima Patris imago. Cum esse Spiritûs sancti sit amor, usus illi tribuitur, eò quòd amor ad usum, sive fruitionem tendat.

Hinc etiam fit 2. ut quæ unitatem designant, Patri tribuantur, quæ verò æqualitatem Filio, quæ concordiam Spiritui sancto, juxta illud Augustini lib. 6. de Trinitate, cap. 10. *In Patre est unitas, in Filio æqualitas, in Spiritu sancto æqualitatis unitatisque concordia*. Nec mirum, nam quemadmodum unitas non præsupponit aliud: ita nec Pater præsupponit aliam personam, cum sit primum principium. Econtrà, cum æqualitas aliud supponat, cum quo sit æqualitas, convenit ut approprietur Filio, qui alium, Patrem nimirum, præ-

præſupponit. Tandem ſicut concordia eſt duorum unio, ita Spiritus ſanctus eſt Patris ac Filii vin- culum, ſcilicet eſt amor utriuſque.

Hinc quoque fit 3. ut quæ virtutem exprimunt, tribus perſonis, ſed diverſimodè convenient: ſic convenit, ut potentia tribuatur Patri, eo quòd po- tentia habeat rationem principii, quæ quidem ra- tio eſt intrinſeca Patri: ſapientia Filio; cum enim ſit Verbum, nihil aliud eſt, quàm conceptus ſa- pientiæ: bonitas denique Spiritui ſancto, eo quòd bonitas ſit objectum amoris, per amorem autem Spiritus ſanctus ſuum habet eſſe.

Hinc etiam fit 4. ut nomina quæ exprimunt habitudinem ad cauſam, modò Patri, modò Fi- lio, modò etiam Spiritui ſancto tribuantur. Quæ designant veluti cauſam materiale, ut hæc præpoſitio *Ex*, Patrem ſignificant, cum eſt quæſtio de operationibus, ad intra: ſic ſenſus huius propoſitionis, quâ Patres ſæpiùs uſi ſunt adverſus Arianos: *Pater Filium genuit ex ſe, ex ſua ſubſtantia*, eſt, quòd Pater Filium non genuerit ex nihilo, ut contendebant Ariani; ſed ex ſua ſubſtantia veluti cauſâ materiali, in quantum nempè propriam ſuam eſſentiam com- municavit. Cum autem eadem præpoſitio *Ex*, refertur ad operationes ad extra, ſignificat cauſam efficientem, ac proinde tribuitur Patri, cum ei approprietur potentia, quæ cauſæ effi- cienti propria eſt. Quæ ſignificant cauſam me- diam, ut præpoſitio *Per*, tribuuntur Filio; per eum enim Pater creaturas omnes eduxit ex nihilo, juxta illud Joannis capite 1. *Omnia per ipſum facta ſunt, & ſine ipſo factum eſt nihil.* Tandem quæ ſignificant Dei in res creatas pro- penſionem, appropriantur Spiritui ſancto: propter eam rationem præpoſitio *In*, non- nunquam illi tribuitur. Hinc patet, quàm me- ritò hæc ſcribat Auguſtinus lib. 6. de Trini- tate, cap. 10. *Non confuſè accipiendum eſt quod ait Apoſtolus, Ex ipſo, & per ipſum, & in ip- ſo;*

so: *Ex ipso dicens, propter Patrem; Per ipsum; propter Filium, & In ipso, propter Spiritum sanctum.*

Hinc denique fit 5. ut quæ aliquâ ratione conveniunt operationibus, per quas Filius & Spiritus sanctus producuntur, ipsis etiam specialiter approprientur: sic veritas, scientia, sapientia, Filio tribuuntur, quia veritas, scientia, sapientia sunt in intellectu, per quem Filius à Patre generatur; Propriè igitur locutus est Christus, cum ait Joannis 14. *Ego sum via, veritas, & vita.*

## C A P U T II.

### *De aequalitate divinarum personarum.*

Not. **Æ** Qualitas considerari potest vel ratione esse, vel ratione attributorum, vel ratione relationum.

CONCLUSIO I. Personæ divinæ sunt æquales tum in esse, tum in attributis.

Probatur. Ea sunt æqualia tum in esse, seu essentiâ, tum in attributis, in quibus eadem est numero essentia, eadem prorsus sunt attributa: atqui in unaquâque SS. Trinitatis personâ eadem est numero essentia, eadem prorsus sunt attributa: nimirum cum essentia & attributa sint quid absolutum, singulis personis communia sunt: ergo personæ divinæ sunt, &c.

Objicies 1. Esse, omnipotentia, tribuuntur specialiter Patri: nam Pater est qui sic loquitur in Exodo, *Ego sum qui sum*: sapientia Filio, & amor Spiritui sancto: ergo nec eadem essentia, nec eadem attributa conveniunt singulis personis SS. Trinitatis.

Resp. conc. ant. dist. conseq. Ergo nec eadem essentia, nec eadem attributa reperiuntur in singulis personis, secundum modum loquendi, quem theologi vocant appropriationem, conc. conseq. non reperiuntur à parte rei, neg. conseq. Solutio patet

patet ex iis quæ de appropriatione , superiori capite, dicta sunt .

Objicies 2. *Æternitas in divinis non convenit Filio & Spiritui sancto , licet conveniat Patri: ergo personæ SS. Trinitatis non sunt æquales . Probat*ur ant. *Æternitas non convenit iis quæ principium habent : nimirum æternitas non minus caret principio , quàm fine : atqui Filius & Spiritus sanctus habent principium ; neque enim sunt à se ipsis, cum ab alio procedant, ut supra dictum est : ergo nec Filio nec Spiritui sancto convenit æternitas .*

Resp. ad 1. neg. ant. Ad 2. dist. maj. Illis non convenit æternitas, quæ principium habent durationis, conc. maj. supponunt enim aliquam durationem ante se: Quæ principium habent originis, neg. maj. Hocce principii genus convenit Filio ac Spiritui sancto , non autem illud . Confirmatur ex eo, quod natura divina in Patre sit æterna , ac perfecta , ac proinde id operatur ab æterno, quod producit necessariò : ergo cum necessariò generet Filium, & spiret Spiritum sanctum , ab æterno illum generat , & istum spirat . Vide rationem illam fusè pertractatam apud S. Thom. 1. p. q. 42. art. 2. in corp.

Objicies 3. Illæ personæ non sunt æquales, in quorum aliquâ reperitur dignitas, quæ non est in aliis : atqui, in unâ ex divinis personis reperitur dignitas quæ non est in aliis : scilicet Paternitas est dignitas , sed paternitas quæ reperitur in Patre , non est in aliis personis : ergo, &c.

Resp. ad 1. conc. maj. neg. min. Ad 2. dist. maj. Paternitas secundum id quod dicit absolutum , est dignitas , conc. maj. secundum id quod dicit relativum, neg. maj. Ratio est, quia relationes in divinis , ut superius ostensum est, non sunt perfectiones simpliciter simplices, ac proinde non meliores sunt ipsæ quàm non ipsæ: non ex eis igitur, sed tantum ex absolutis , petitur ratio dignitatis : unde cum paternitas secundum id quod dicit

dicat absolutum, seu ratione essentiae, sit in singulis personis, id totum quod dignitatem importat, in singulis reperitur.

CONCLUSIO 2. In divinis, Personae sunt aequales ratione relationum.

Probatur. Ex personae sunt aequales ratione relationum, quarum relationes sunt prorsus aequales: atqui relationes divinarum personarum sunt prorsus aequales: siquidem cum (ut jam observatum est) non sint perfectiores simpliciter simplices, una non est dignior alia: ergo, &c.

Objicies. Unaquaeque relatio in Trinitate non est aequè perfecta, ac omnes simul sumptae: neque enim pars tantam habet perfectionem, quantum totum: ergo personae, saltem seorsim sumptae, non sunt aequales personis simul sumptis.

Resp. ad 1. neg. ant. Ad 2. dist. ant. Pars non tantam habet perfectionem, quantum totum, propriè sumptum, conc. maj. sic anima seorsim sumpta non habet totam perfectionem, quae convenit homini cujus est pars: Quàm totum impropriè sumptum, neg. maj. Relationes, etiam simul sumptae, non efficiunt totum priore modo sumptum, quia totum propriè sumptum constat partibus à se invicem quoad esse & existere distinctis: at relationes in divinis non sunt ejusmodi, habent enim eandem tum essentiam tum existentiam; unde mirum non est, quòd una relatio totam perfectionem habeat, quae in omnibus simul sumptis reperitur.

Confirmatur responsum ex eo, quòd (ut jam observatum est) perfectio aut imperfectio petantur ex esse & existere, seu ex absolutis; ac proinde & aequalitas aut inaequalitas: siquidem aequalitas aut inaequalitas nihil aliud sunt, quàm major vel minor quantitas perfectionis in aliquo subjecto per comparisonem ad aliud. Unde meritò S. Thomas 1. p. q. 42. art. 4. ad 3. sic loquitur. *Ad tertium dicendum, quòd relatio in divinis non est totum universale, quamvis de singulis relationibus*

*nibus prædicetur, quia omnes relationes sunt unum secundum essentiam & esse.... Unde neque omnes relationes sunt maius aliquod, quam una tantum, quia tota perfectio divinæ naturæ est in qualibet personarum.*

### C A P U T    III.

#### *De Circuminceptione personarum in divinis.*

**Not. 1.** **N**omine Circuminceptionis intelligitur inhabitatio mutua unius personæ in aliâ, aut ( ut alii loquuntur ) mutua personarum immeatio, aut penetratio.

**Not. 2.** Licet quæstio de Circuminceptione, merè scholastica videatur, non levis tamen est ponderis: ex eâ enim, si semel supponatur, invictum argumentum sumitur, tum adversus Arianos, tum etiam contra Sabellianos. Et quidem 1. si Pater sit in Filio, & vicissim Filius in Patre, necessario consubstantiales erunt: siquidem uterque immensus erit, uterque increatus: nempè qui non est immensus, esse non potest in omnibus locis, in quibus Deus existit; qui non est increatus, penetrare non potest divinam essentiam, intimè eam pervadere non potest. 2. Si unus non sit ab altero distinctus, dici non poterit esse in altero; asseri quoque non poterit, quòd alterum pervadat, penetret, inhabitet. *Eo ipso ( inquit Cyrillus Alexandrinus in libro Thesauri XII. ) quòd ait Christus, hunc in illo, & illum in hoc videri, identitatem deitatis, & unitatem substantiæ monstrari dicit: Cum autem alterum in altero inesse asserit, excludi illud, ne quis unum aliquid esse numero putet.*

**CONCLUSIO.** In personis divinis admitti debet Circuminceptio.

Probatur 1. ex Scriptura. Joannis 14. Christus sic Apostolos alloquitur: *Non creditis, quia ego in Patre, & Pater in me est* i Paulò post hæc etiam habet

habet: *Pater in me manens, ipse facit opera.* Capite 17. sic Patrem alloquitur: *Sicut tu Pater in me, & ego in te.* Ex iis autem textibus sic conficitur argumentum: Circuminceffio est proprietas, per quam personæ sunt invicem in se ipsis: atqui proprietas illa debet in divinis admitti, cum Christus expressè asserat, se esse in Patre, & Patrem in illo esse.

Probatur 2. ex Patribus. 1. Pentapolitani tertio, Ecclesiæ sæculo Dionysium Alexandrinum accusarunt, quasi in suis adversus Sabellianos epistolis Patrem à Filio & Spiritu sancto separasset; eam verò calumniam Dionysius Alexandrinus multis confutat in suâ ad Dionysium Romanum apologiâ. Vide textus, quos ex illo opere protulimus agentes de Verbi divinitate. 2. Athanasius adversus Arianos agens, ut videre est Oratione quintâ, sæpius asserit, Verbum *impartibile, & inseparabile esse à Patre, quòd Verbum sit in Patre & vicissim Pater in Verbo.* 3. Augustinus, ubi libro 6. de Trinitate, cap. ult. docuit, quòd tantam habeat unaquæque persona perfectionem, quantam tres simul sumptæ, hæc addit: *Ita & singula sunt in singulis, & singula in omnibus, & omnia in omnibus, & unum omnia.*

Probatur 3. ratione theologicâ. Illa sunt in se invicem, quæ eandem numero ac indivisibilem essentiam habent: siquidem quæ eandem ac indivisibilem habent essentiam, separari minimè possunt; ubi est unum, necesse est, ut sit aliud: atqui tres personæ SS. Trinitatis eandem ac indivisibilem habent essentiam, ergo sunt in se invicem.

Objicies 1. Si Pater sit in Filio, paternitas erit in Filio: siquidem Pater, quâ Pater est, habet necessariò formam per quam est Pater; ea autem forma non alia est, quàm paternitas: atqui paternitas non est in Filio: scilicet si paternitas sit in Filio, Filius erit Pater: Ille enim est Pater, in quo

quo est paternitas: Sed Filius non est Pater, ut fides docet: ergo, &c.

Resp. ad 1. conc. maj. neg. min. Ad 2. neg. sequelam majoris. Ad 3. dist. maj. Ille est Pater in quo est paternitas per modum formæ & proprietatis personalis, conc. maj. non per modum formæ & proprietatis personalis, neg. maj. Ut aliqua persona sit Pater, non sufficit, ut ei quoquo modo paternitas insit, sed præterea requiritur, ut in eo sit per modum formæ & proprietatis personalis: at sic non est in Filio, sed tantum per simplicem identitatem cum essentiâ. Hinc patet, personæ SS. Trinitatis non esse tantum in invicem secundum essentiâ, sed etiam secundum relationem; sed non per modum relationis, sed tantum per modum identitatis cum essentiâ, seu naturâ: hincque fit, ut Ecclesia meritò canat: *In Patre totus Filius, & totus in Verbo Pater.*

Objicies 2. Quæ se invicem excludunt, non possunt esse in se mutuo: atqui personæ SS. Trinitatis se invicem excludunt: nam quæ relativè opponuntur, sese invicem excludunt: sic terminus ad quem refertur fundamentum relationis, excludit fundamentum: nec mirum; idem enim ad se ipsum referri non potest: Sed personæ SS. Trinitatis opponuntur relativè, nimirum ratione paternitatis, filiationis, & spirationis passivæ: ergo, &c.

Resp. ad 1. conc. maj. neg. min. Ad 2. dist. maj. Quæ secundum omnia opponuntur relativè, sese invicem excludunt, conc. maj. quæ secundum aliqua tantum, neg. maj. Personæ SS. Trinitatis opponuntur quidem relativè secundum aliqua, hoc est, prout dicunt relationes, quæ se habent per modum formæ determinantis essentiâ divinam, ut sub tali ratione existat, seu sub ratione Patris aut Filii aut Spiritûs sancti: verum non opponuntur relativè secundum omnia, imò conveniunt secundum essentiâ: nam paternitas est realiter & entitativè idem cum essen-



sentiâ divinâ, quæ quidem est quoque realiter ac entitativè idem cum filiatione & spiratione passivâ. Quæ mox tradita est responsio, desumpta est ex S. Thomâ, qui 1. p. q. 42. art. 5. ad 3. sic loquitur : *Dicendum, quod Pater & Filius opponuntur secundum relationes, non autem secundum essentiam, & tamen oppositorum relativè unum est in altero, ut dictum est in corpore articuli.*

## C A P U T IV.

### *De notionibus personarum in divinis.*

**Not. 1.** **P**ER notiones hîc intelliguntur nomina, quæ characterem cuique personæ proprium exprimunt : sic paternitas, filiatio, spiratio passiva, dicuntur notiones, quia exprimunt characteres, qui non sunt communes tribus personis, sed cuique personæ proprii.

**Not. 2.** Ad notionem tria requiruntur. Primò necesse est, ut exprimat aliquam dignitatem : 2. ut dicat aliquid speciale ac distinctivum : 3. ut pertineat ad originem : nihil enim in divinis est distinctivum & speciale, nisi id quod ad originem pertinet.

**Not. 3.** De notionibus quæri potest 1. utrum personis divinis attribui debeant : 2. quantus sit earum numerus : 3. quænam sint earum proprietates.

**CONCLUSIO I.** Notiones attribui debent divinis personis.

Probatur. Ex observatis, notiones sunt nomina, quæ exprimunt characteres cuique personæ speciales : atqui ejusmodi nomina debent attribui personis divinis : iis enim tum à Scriptura tum à Patribus attribuuntur : nimirum prima persona dicitur Pater, altera Filius, tertia Spiritus sanctus. Prior dicitur generans, altera genita, tertia producta. Iis terminis notionalibus utuntur sym-

bola omnia, eos quoque legere est in Concilio Lateranensi IV. cap. *Damnatus*.

Quæres, utrum in divinis sit fundamentum reale, quo termini notionales nitantur.

Resp. affirmativè : siquidem in divinis sunt realiter processiones : nimirum à parte rei Filius producit à Patre, & Spiritus sanctus ab utroque simul : atqui processiones sunt fundamentum terminorum, quos notionales vocant : siquidem processiones sunt ( ut suo dictum est loco ) fundamenta relationum : at termini notionales nihil aliud sunt, quàm ipsæmet relationes, quæ variis modis exprimuntur : unde ( ut rectè refert S. Thomas ex Magistro Sent. *Generatio & nativitas, aliis nominibus dicuntur paternitas & filiatio* ).

CONCLUSIO 2. Nec plùs nec minùs sunt quàm quinque notiones in divinis : Innascibilitas nimirum, Paternitas, Filiatio, Spiratio activa & Spiratio passiva.

Probat. Ex observatis, tot sunt notiones in divinis, quot sunt characteres divinis personis speciales : Sed characteres illi nec plùs nec minùs sunt, quàm quinque, ii scilicet quos in conclusione recensuimus : siquidem characteres nec plùs sunt nec minùs, quàm qui oriuntur ex divinis processibus : nempe solæ processiones sunt in divinis principium multiplicationis & distinctionis : atqui nec plùs nec minùs quàm quinque characteres oriuntur ex processibus divinis : nam in processibus tria tantum considerari possunt, principium, terminus, negatio tum principii tum termini : atqui ex iis tribus nec plus nec minùs quàm quinque characteres oriuntur. Scilicet negatio tum principii tum termini constituit Innascibilitatem, quæ soli Patri convenit : Pater enim nec habet principium, à quo oritur, nec est terminus alicujus actionis. Ratio principii constituit Paternitatem & Spirationem activam : nimirum Pater est principium, à quo  
Filius

Filius oritur : Pater & Filius sunt principium à quo Spiritus sanctus producit. Terminus vel est respectu actionis generativæ quæ convenit Patri, vel respectu activæ spirationis quæ Patri Filioque convenit : si primum, constituit Filiationem; si verò secundum, constituit Spirationem passivam : ergo nec plùs nec minùs quàm quinque- characteres oriuntur ex iis quæ in divinis processibus considerari possunt.

Objicies 1. Negatio non potest esse notio alicujus divinæ personæ : siquidem notio debet nos deducere in cognitionem personæ, cui attribuitur; ad eam autem cognitionem negatio non deducit : neque enim positivum, ut est persona, innotescit per negativum; sic qui diceret, arbor non est lapis, nequaquam interrogantem, quid sit arbor, in arboris cognitionem deduceret : Atqui Innascibilitas est aliquid negativum : nihil enim aliud dicit, quàm non nascibilitatem, non productibilitatem, seu quod idem est, negationem nascibilitatis & productibilitatis : ergo, &c.

Resp. dist. maj. negatio quæ non fundatur in aliquo positivo, non potest esse notio alicujus personæ, conc. maj. quæ in eo fundatur, neg. maj. Innascibilitas non est negatio prioris generis, sed alteriùs, nempe fundatur in eo, quòd prima persona sit à se, cum è contra secunda & tertia sint ab alio, tanquam ab originis principio. Inde verò colligitur, Innascibilitatis conceptum non esse conceptum paternitatis reduplicativè, ut est paternitas : nam paternitas, ut paternitas est, dicit habitudinem ad filiationem, hoc est, Pater non concipitur sine Filio : innascibilitas è contra abstrahit à Filio.

Objicies 2. Notio non debet esse communis pluribus personis : siquidem significat characterem proprium ac specialem, ut videre est in paternitate & filiatione : sed spiratio activa communis est pluribus personis, Patri nimirum & Fi-

lio, cum uterque spiret Spiritum sanctum : ergo spiratio activa non est notio.

Resp. dist. maj. Notio non debet esse communis pluribus personis, si per plures intelligantur tres personæ, conc. maj. si intelligantur duæ tantum, neg. maj. nam in eâ suppositione notio excludet tertiam personam, ac proinde character erit specialis & proprius duarum.

Objicies 3. Inspirabilitas in Filio, & ingenerabilitas in Spiritu sancto sunt notiones Filii & Spiritus sancti : ergo præter innascibilitatem, paternitatem, filiationem, spirationem activam & passivam, sunt aliæ notiones. Probatur ant. Notio definitur character proprius significans dignitatem alicui personæ specialem : atqui inspirabilitas est character proprius Filio, & ingenerabilitas character proprius Spiritui sancto, & utraque significat dignitatem specialem : non enim potior est ratio, cur non significant dignitatem, quàm innascibilitas quæ specialis est Patris character.

Resp. ad 1. neg. ant. Ad 2. conc. maj. neg. min. Ad 3. nego paritatem. Ratio disparitatis est, quia vox hæc *Innascibilitas*, licet secundum syllabas quibus constat, negationem tantum significet : tamen secundum sensum realem, importat positivam, secundum nostrum concipiendi modum, dignitatem, nimirum esse à se & non ab alio : è contra inspirabilitas in Filio, & ingenerabilitas in Spiritu sancto, dicunt negationem meram, seu non fundatam in aliquâ dignitate : si enim ejusmodi negatio esset in aliquâ dignitate fundata, maximè quia ingenerabilitas fundatur in productione per voluntatem, & inspirabilitas in productione per intellectum : sed illa ratio nulla est. Nempè licet produci per intellectum sit perfectio & dignitas in Filio, & produci per voluntatem sit quoque perfectio & dignitas in Spiritu sancto, quia certo quodam modo actuant essentiam divinam, ex quâ omnis perfectio sumitur :

tur: tamen produci per intellectum, & produci per voluntatem, si ad se invicem comparentur, non sunt dignitas aut perfectio; ipsum enim (ut loquuntur scholastici) non est melius, quam non ipsum. Econtra esse à se, cum non sit aliquid relativum, sed aliquid tantum exclusivum prioris, à quo dicitur origo, ab intellectu nostro concipitur tanquam dignitas & perfectio, quæ quidem licet secundum modum quo est in primâ personâ, non sit in filiatione & spiratione passivâ, in eis tamen est realiter, quia filiatio & spiratio passiva sunt unum & idem cum essentiâ divinâ, quæ est à se: nec enim (ut loquitur Concilium Lateranense IV. cap. *Damnamus*) essentia divina generat aut generatur, producit aut producitur.

Objicies 4. Generatio, nativitas, verbum, imago, donum, amor, sunt notiones personales: scilicet possunt nos deducere in cognitionem specialem divinarum personarum: siquidem generatio, proprius est Patris character; nasci, uni convenit Filio, sicut & ratio tum verbi, tum imaginis: donum verò & amor propria sunt Spiritui sancto: igitur in personis divinis aliæ sunt notiones præter Innascibilitatem, Paternitatem, Filiationem, Spirationem tum activam tum passivam.

Resp. ad 1. dist. ant. Generatio & nativitas possunt nos deducere in cognitionem specialem divinarum personarum in fieri, conc. ant. personarum ut sunt ac existunt, neg. ant. Ratio est, quia prima persona non est Pater, nisi post generationem, sicut nec secunda Filius, nisi post nativitatem; ac proinde nec generatio, nec nativitas sunt characteres speciales personarum ut existentium. Ad 2. dicendum est, hæc nomina, Verbum, Imago, esse synonyma cum filiatione, sicut donum & amor cum spiratione passivâ.

## CAPUT V.

*De missione personarum in divinis.*

Not. **M**issionis personarum in divinis exponimus 1. existentiam; 2. essentiam; 3. divisionem.

**CONCLUSIO 1.** In divinis existit personarum missio.

Probat. Christus Joannis 8. ex eo probat suum testimonium esse verum, quod sit ipsummet testimonium Patris, à quo missus est: *Et si judico ego, judicium meum verum est, quia solus non sum: sed ego, & qui misit me Pater.* Joannis x. sic idem Christus de se ipso loquitur: *Quem Pater sanctificavit, & misit in mundum, vos dicitis: Qui blasphematur: quia dixi, Filius Dei sum.* Apostolus ad Galatas 4. meminit quoque missionis ad Christum comparatæ: *Quando venit (inquit) plenitudo temporis, misit Deus Filium suum.* Joannis 16. Christus pollicetur, se post ascensionem in cælum, missurum esse Spiritum sanctum: *Si autem abiero, mittam eum ad vos:* Ergo in divinis existit missio personarum.

Objicies 1. Ibi non existit missio, ubi omnimoda est æqualitas: eam nimirum æqualitatem tollit missio, cum missus sit minor mittente, ut patet in legato qui à rege mittitur: sed in divinis est omnimoda æqualitas: ergo, &c.

Resp. ad 1. neg. maj. Ad 2. dist. ant. Missus est minor mittente per consilium aut imperium, conc. ant. sic enim mittens est aut sapientior aut potentior missio: Mittente tantum per originem, neg. ant. nempe qui sic mittitur, consubstantialis est mittenti, eò quod illius essentiam vi suæ originis recipiat.

Objicies 2. Qui mittitur, separatur à mittente; siquidem missio est veluti emissio alicujus extra mittentem: atqui personæ SS. Trinitatis à se

Se invicem non separantur: ergo non convenit eis missio.

Resp. dist. maj. Qui mittitur, separatur à mittente, in creatis, conc. maj. in divinis, neg. maj. Ratio est, quia in creatis, qui mittitur, mittitur ad locum, in quo nec ipse, nec mittens prius erat: in divinis verò, & is qui mittit, & is qui mittitur, erant prius in loco, ad quem fit missio; licet tamen ( ut infra dicetur ) missus in eo incipiat esse secundum quid, hoc est, secundum modum extrinsecum.

CONCLUSIO 2. Essentia missionis personarum in divinis, continetur hac illius definitione: *Missio est processio unius personæ ab alia in ordine ad aliquem effectum ad extra de novo producendum.*

Explicatur definitio. Missio dicitur 1. processio unius personæ ab aliâ; nempe, missio est veluti emissio missi à mittente, ut patet in flore qui ab arbore emittitur: at divinæ personæ alio modo quàm per processionem emitti non possunt à personâ mittente. Dicitur 2. Ad aliquem effectum ad extra de novo producendum: siquidem missio est ad aliquid quod antè non erat; ac proindè ad aliquid operandum ad extra, cum operationes ad intra sint ab æterno.

Quæ mox tradita est divinæ missionis definitio, probatur autoritate Augustini, qui quidem duplex illius membrum, seu duplicem illius conditionem, processionem nimirum, & ordinem ad aliquid extrinsecum, lib. 2. de Trinitate, c. 5. hisce verbis complectitur: *Si ergo ( de Filio loquitur ) missus dicitur, in quantum apparet foris in creatura corporali, qui intus in natura spiritali oculis mortalium semper occultus est: jam in promptu est intelligere etiam de Spiritu sancto, cur missus & ipse dicatur. Facta est enim quedam creaturæ species ex tempore, in qua visibiliter ostenderetur Spiritus sanctus ....* Hæc operatio vi-

*fibiliter expressa, & oculis oblata mortalibus, missio Spiritus sancti dicta est.*

Objicies 1. Nonnulli Patres asserunt, Filii missionem à Patre, non aliud esse, quàm illius à Patre processionem. Cyrillus lib. 2. in Joannem, in hæc verba, *Quem enim misit Deus, verba Dei loquitur*, duplicem distinguit in Filio missionem; unam quæ est secundum incarnationis rationem, quia in hunc mundum cum carne venit; alteram per quem Pater Filium ex propria natura coruscare fecit, tanquam ex lumine splendorem, secundum ineffabilem & inexplicabilem divinæ generationis modum. Secundam illam missionem confirmat ex Euangelio: *Quod quidem & ipse nobis Unigenitus aperuit, dicens: Ego ex Patre exivi & veni. Exivit enim ex Patre in propriam existentiam Filius, etsi in ipso secundum naturam inest. Et quod apud nos illic exisse significat, hoc rursus illic missum esse demonstrat*: Ergo, ex Cyrillo, missio non aliud dicit, quàm æternam alicujus personæ processionem.

Resp. ad 1. neg. ant. Ad 2. dist. consequ. Ergo, ex Cyrillo, missio inadæquatè sumpta, non aliud dicit, quàm personæ alicujus æternam processionem, conc. consequ. Missio adæquatè sumpta, neg. ant. Solutio patet ex iis quæ in definiendâ missione dicta sunt superiùs.

Objicies 2. Patres missionem agnoscunt, ubi nulla est processio: non semel enim dicunt, mitti Filium tum à se, tum à Spiritu sancto. *Missus Filius* (inquit Toletana Synodus XI. in fidei Professione) non solum à Patre, sed & à Spiritu sancto missus esse credendus est, in eo quod per Prophetam dicitur: *Et nunc Dominus misit me, & Spiritus ejus. A se ipso quoque missus accipitur, pro eo quòd inseparabilis non solum voluntas, sed operatio totius Trinitatis agnoscitur*: ergo, &c.

Resp. ad 1. neg. ant. Ad 2. dist. ant. Patres non semel dicunt, Filium, ut homo est, tum à se ipso  
ut



ut Deus est, tum à Spiritu sancto mitti missione improprie sumptâ, conc. ant. missione proprie sumptâ, neg. ant. Toletana Synodus loquitur de Filio, ut est homo, & nomine missionis intelligit hypostaticam Verbi cum humanâ naturâ unionem, ad quam, sumptam efficienter, tres personæ SS. Trinitatis ex æquo concurrerunt. Confirmatur ex eo, quòd laudata Synodus ideò definiat, Filium à Spiritu sancto & à se missum esse, quòd inseparabilis sit non solum voluntas, sed operatio totius Trinitatis: at operationis nomine intelligit actionem, quæ à Trinitate tanquam causâ efficiente procedit.

Ex iis quæ hucusque dicta sunt, sequitur 1. missionem adæquatè, & proprie sumptam, æternum quid, & temporale simul, includere in suo conceptu. Sequitur 2. soli Filio, ac Spiritui sancto missionem convenire: illis enim solis in Trinitate processio convenit, sine quâ missio stare non potest. Sequitur 3. meritò Scripturam nusquam asseruisse, quòd Pater mittatur, ne impropria quidem missione, quæ posita est in operatione effectûs alicujus novi & sensibilis: scilicet ea improprie sumpta missio, supponit, tanquam fundamentum, processionem unius ab alio: *Pater* (inquit Augustinus lib. 2. de Trinitate, cap. 5.) *nusquam legitur missus*: cujus quidem effati rationem hanc reddit lib. 4. cap. 20. *Pater, cum ex tempore à quoquam cognoscitur, non dicitur missus: non enim habet, de quo sit, aut ex quo procedat.* Sequitur 4. quòd si Pater Filii loco incarnatus fuisset, etiam tunc non diceretur missus: *Quoniam* (ait Augustinus lib. 6. de Trinitate c. 4.) *non habet authorem, à quo genitus sit, vel à quo procedat.*

**CONCLUSIO 3.** Missio divinarum personarum dividitur in visibilem & invisibilem.

Probatur. Personæ quæ mittuntur, vel operantur aliquid sensibile, vel insensibile. Si primum, tunc mittuntur visibiliter: Si verò secundum,

mittuntur invisibiliter. Priore modo Filius per Incarnationem missus est, nec non Spiritus sanctus, cum sub linguarum specie Apostolis insedit; altero autem, cum interiùs nostram sanctificationem efficiunt per donorum & charitatis infusionem. Duplicis illius missionis meminit Augustinus lib. 4. de Trinitate, cap. 28. *Sed aliter mittitur* ( inquit de Sapientiâ loquens ) *ut sit cum homine : aliter missa est, ut ipsa sit homo.*

Quæres 1. quandonam missio in iis quæ ad nostram sanctificationem spectant, sit missio Filii, & quandonam sit missio Spiritûs sancti.

Resp. missionem esse Filii, cum ipsa Filii persona manifestatur in effectu, qui per appropriationem ei specialiter tribuitur : idem pariter dici debet de Spiritûs sancti missione : hinc autem concluditur, quòd sit missio Filii, quoties agitur de meritis quibus à peccato liberamur, & vicissim sit missio Sancti spiritus, quoties agitur de charitate, aliisque donis quæ ad nostram sanctificationem concurrunt : Siquidem per appropriationem ( ut suo loco dictum est ) dona illa Spiritui sancto specialiter tribuuntur.

Quæres 2. cuinam personæ ex SS. Trinitate tribui debeant Dei apparitiones, quarum vetus testamentum meminit.

Resp. 1. Arianos omnes asseruisse, solum Verbum Adamo, Moyse, Patriarchis ac Prophetis in antiquo testamento apparuisse : idque hæretici docebant, ut inde concluderent, Verbum non esse consubstantiale Patri, quem nec unquam exteriùs visum fuisse, nec posse videri docebant.

Resp. 2. plures ex Patribus antiquis, iis etiam qui docuerunt, Verbum ejusdem esse naturæ cum Patre, docuisse, Patrem nusquam se veteribus aspectabilem præbuisse, sed solum Verbum, & quidem in humanâ specie, quam tamen sibi ipsi  
non

non uniisset hypostaticè ; idque ut homines sensim sine sensu ad fidem de Incarnatione præpararet . Ita Justinus in Dialogo cum Tryphone , Irenæus lib. 4. cap. 26. Patres qui ex Antiocheno Concilio Synodicam ad Paulum Samosatenum scripserunt, Athanasius Orat. 4. Cyrillus Catechesi 14. Basilus lib. 2. adversus Eunomium , Chrysostomus hom. 58. in Genesim, Ambrosius lib. 1. de fide, capite quinto .

Verùm duplex inter recensitos Patres & Arianos discrimen est . Primò, isti contendebant Filium, etiam quâ Verbum, esse visibilem ; illi ècontra docebant, ipsum, quâ Verbum est, non minùs invisibilem esse, quàm ipse Pater : Secundò, illi ex apparitione Verbi factâ veteribus concludebant, ipsum non esse Deum, isti ècontra concludebant, ipsum esse Deum : *Ubi cumque* ( inquit Basilus lib. 2. contra Eunomium ) *& Angelus Deus appellatus est, unigenitus significatur, qui se ipsum per generationes hominibus manifestum facit, & voluntatem Patris sanctis suis denuntiat. Quamobrem & qui cum Moyse colloquens, eum se nominavit, Qui est, non alius quispiam intelligendus est, quàm Deus Verbum, qui in principio erat apud Deum.*

Resp. 3. Augustinum, & post illius tempora, ceteros Patres, præsertim Latinos, multa de quæstione, de quâ hìc agitur, docuisse : scilicet Augustinus asseruit 1. non solum Filium apparuisse veteribus, sed etiam Patrem ac Spiritum sanctum, interdum etiam totam simul Trinitatem .

Asseruit 2. non sine aliquâ specie temeritatis definiri posse, nisi Scriptura id in antecedentibus aut consequentibus innuat, quænam persona potius apparuerit, quàm alia .

Asseruit 3. ea omnia quæ Deo in illis apparitionibus tribuuntur, ipsi quidem ut causæ principi, angelis verò tanquam causæ ministeriali, meritò tribui posse,

Nec obest, quod in Scripturis Deus ipse loquens inducitur: *Quia* (inquit lib. 2. de Trinitate, cap. II.) *cum verba judicis præco pronuntiat, non scribitur in gestis, ille præco dixit, sed, ille judex: Sic etiam loquente Propheta sancto, etsi dicamus, Propheta dixit, nihil aliud quàm Dominum dixisse intelligi volumus. Et si dicamus, Dominus dixit, Prophetam non subtrahimus, sed quis per eum dixerit, admoneamus.*

Asseruit 4. eos meritò argui debere, qui quoties in Exodo aliisque veteris testamenti libris Scriptura Angelum nominat, ipsum per se ipsum Filium Dei volunt intelligi, quia propter annuntiationem paternæ ac suæ voluntatis, à Propheta dictus est Angelus. Id verò confirmat ex Epistolâ ad Hebræos, in quâ non Angelus singulari numero, sed Angeli memorantur: *Si enim* (ait Apostolus) *qui per Angelos dictus est sermo, factus est firmus; quibus cum verbis cohærent hæc quæ Actorum 7. in oratione Stephani leguntur: Qui accepistis legem in dispositione Angelorum, & non custodistis.*

Vide eundem S. Doctorem lib. secundo de Trinitate, capitibus 9. 10. 11. ubi argumentum, de quo est quæstio, fusè pertractat, eripitque Arianis argumentum, quod adversus Verbi consubstantialitatem maximi roboris arbitrabantur, quodque Patribus quatuor priorum sæculorum nonnihil negotii facesserat.



# DISSERTATIO QUINTA.

## *De personis divinis in particulari.*

*Not.* **H**Ujusce nostrarum Institutionum secundæ partis dissertatione primâ, adversus Sabellianos ostensum est, tres esse in SS. Trinitate personas realiter à se invicem distinctas, Patrem, Filium & Spiritum sanctum; tum adversus Arianos & Macedonianos dictum est de earum consubstantialitate. Dissertatione secundâ actum est de earum processionibus. In tertiâ dictum est de relationibus, quarum processiones sunt fundamentum, & quibus divinæ personæ constituuntur. Deinde dissertatione quartâ institutus fuit sermo de iisdem personis in communi. Igitur operæ pretium est, ut in hacce dissertatione quintâ de iisdem personis in particulari disseramus.

---

## QUÆSTIO PRIMA.

### *De prima persona SS. Trinitatis.*

*Not.* **I**N hac quæstione unum tantum quæremus, sed quod multa capita complectetur; nimirum, utrum primæ personæ rectè conveniant nomina Principii, Initii, Causæ, Auctoris, Radicis, Fontis, Capitis, Patris, Ingeniti.

## CAPUT PRIMUM.

*De nominibus Principii ac Initii.*

CONCL. I. **P**rima persona SS. Trinitatis rectè dicitur Principium.

Probatur. Illa persona rectè dicitur principium à quâ Filius & Spiritus sanctus suam ducunt originem: id nimirum, ex quo aliud oritur, est illius principium: atqui Filius & Spiritus sanctus suam originem ducunt à primâ SS. Trinitatis personâ: cum (ut docet fides) ab eâ procedant: ergo, &c.

Objicies. In suppositione conclusionis, Filius & Spiritus sanctus dici possent aliquid principiatum: quod enim oritur à principio, rectè dicitur principiatum; sicut quod oritur à causâ, rectè dicitur causatum: sed nec Filius, nec Spiritus sanctus dici possunt quid principiatum: ea nimirum vox de solis creaturis dicitur: ergo, &c.

Resp. conc. maj. dist. min. Nec Filius, nec Spiritus sanctus dici possunt quid principiatum, apud Latinos, conc. min. apud Græcos, neg. min. Apud illos vox *Principiatum*, sufficit ideam subjectionis, apud istos verò ab eâ abstrahit. *Ad secundum* (inquit S. Thomas 1. p. q. 33. art. 1.) *dicendum, quòd apud Græcos invenitur de Filio vel Spiritu sancto dici, quòd principientur: sed non est in usu doctorum nostrorum.*

Quæres, utrum terminus iste, *Principium*, sit terminus notionalis, seu, utrum nomen illud ita sit proprium primæ personæ, ut cæteris personis minimè conveniat.

Resp. 1. non esse terminum notionalem, si consideretur in ordine ad creaturas; scilicet tres personæ ex æquo sunt creaturarum principium: *Pater & Filius, & Spiritus sanctus* (inquit Augustinus lib. 5. de Trinitate, cap. 14.) *sunt unum prin-*

*principium, sicut unus creator & unus Dominus.*  
 Resp. 2. esse terminum notionalem, seu proprium soli primæ personæ, si consideretur in ordine ad Filium: siquidem sola prima persona est Filii principium, cum sola det esse Filio. Resp. 3. non esse terminum notionalem primæ tantum personæ, si consideretur in ordine ad Spiritum sanctum: nempe secunda persona est principium Spiritus sancti, siquidem non minus à secundâ quàm à primâ spiratur.

CONCLUSIO 2. Prima persona SS. Trinitatis dici non debet initium aliarum.

Probatur. Prima persona dici non debet principium durationis aliarum; neque enim alias personas antecedit duratione, cum omnes sint coæquales ac æternæ: atqui si prima SS. Trinitatis persona diceretur initium aliarum, diceretur principium durationis earum; scilicet secundum tritum apud Patres loquendi morem, initium sumitur pro principio durationis: unde veteres, cum adversus Arianos disputarunt, caverunt sedulo, ne dicerent, Filium aliquando initium habuisse; imò damnarunt eos hæreticos, quòd Filium initium habuisse contenderent.

Objicies. Æterna sapientia, quæ Verbum est, Eccles. 24. dicit se exiisse ab initio: *Ab initio & ante sæcula creata sum*: atqui nomine initii, ex quo æterna sapientia exiit, non aliud intelligitur quàm prima persona SS. Trinitatis, neque enim ab aliâ potest exire: ergo prima persona SS. Trinitatis rectè dicitur initium Filii.

Resp. ad 1. conc. maj. neg. min. siquidem per initium eo loci intelligitur initium durationis, non autem initium originis, ita ut sensus sit, æternam sapientiam genitam fuisse ante quodlibet tempus, antequam quidquam creatum existeret. Eum verò sensum hæc verba, *Ante sæcula*, non obscurè inuunt.

## CAPUT II.

*Virum prima persona rectè dicatur causa  
caterarum .*

CONCL. **P**rima SS. Trinitatis persona , pas-  
sim à Græcis Patribus , & non-  
nunquam à Latinis , dicitur causa Filii & Spiritûs  
sancti .

Probatur prior pars . Gregorius Nazianzenus  
orat. 24. causæ nomen , tanquam nomen pro-  
prium ac incommunicabile , tribuit primæ perso-  
næ : *Quod si ( inquit ) omnia , quæcumque Pater ha-*  
*bet , Filii sunt , excepta causa . Quidquid item Fi-*  
*lius habet , idem quoque Spiritus sanctus est , si filie-*  
*tatem excipias .* Basilii lib. 1. contra Eunomium  
utitur eodem loquendi modo : *Nos autem secun-*  
*dum causarum habitudinem ad ea , quæ ex illis oriun-*  
*tur , Patrem collocari ante Filium asserimus .* Gre-  
gorius Nyssenus , ad Ablabium Tom. 2. hæc quo-  
que scribit : *Cum dicimus causam & quod est causa ,*  
*his vocabulis naturam ( divinam ) minimè significa-*  
*mus .*

Probatur altera conclusionis pars . S. Augusti-  
nus lib. octoginta trium quæstionum , quæstione  
16. expressè asserit , quod Pater sit causa sapientiæ ,  
quæ quidem altera est SS. Trinitatis persona :  
*Deus ( inquit ) omnium quæ sunt , causa est .*  
*Quod autem rerum omnium causa est , etiam sapien-*  
*tiae suæ causa est .* Eandem vocem adhibet Hila-  
rius : *Et ex causa ( ait lib. XII. de Trinitate , lo-*  
*quens de æternâ Filii generatione ) licet perfecta*  
*atque indemutabili nascens , necesse est , causa in causæ*  
*ipsius proprietate nascatur : ergo , &c .*

Quæres , an Ecclesia probarit utrumque illum  
sive Græcorum , sive Latinorum , loquendi mo-  
rem .

Resp. affirmativè . Nempe Ecclesiæ persuasum  
fuit , Patres Græcos sumpsisse causæ nomen latè ,  
hoc



hoc est, pro eo omni à quo aliquid habet esse; non autem strictè, id est, pro eo à quo aliquid habet esse cum dependentiâ. Confirmatur 1. ex eo quòd Patres Græci, apud quos invaluit usus ille loquendi, constanter docuerint adversùs Arianos Verbum esse consubstantiale Patri: at consubstantiale non esset, hoc est, non esset ejusdem substantiæ cum Patre, si ab ipso penderet, sicut effectus pendet à causâ. Confirmatur 2. ex Concilio Florentino, in quo Eugenius in decreto unionis definit, *Filium esse, secundum Græcos quidem, causam, secundum Latinos verò principium substantiæ Spiritus sancti, sicut & Patrem.*

### C A P U T III.

*Utrum primæ personæ proprium sit authoris nomen.*

CONCL. **P**rima persona SS. Trinitatis potest dici auctor secundæ & tertiæ.

Probatur. Aliqui Patres Latini primæ personæ, nomen auctoris, aliarum respectu, tribuerunt. Hilarius lib. 6. de Trinit. sic de Verbo loquitur: *Ex Patre enim exiens, neque aliam nativitatis habuit naturam, neque nullam: sed eum sibi testatur auctorem, ex quo se proficitur exisse.* Hæc etiam habet lib. 9. *Naturalis igitur Filio Dei, & congenita omnis potestas est; quæ cum data sit, non alienata est per id ab auctore, quia data est, cum, quod est auctoris, datum sit.* Lib. 12. hæc etiam scribit de eodem Dei Filio: *Cum natus sit, Patrem testatur auctorem.* Confirmatur. Is dici potest auctor alterius, qui ei communicat esse: sed prima SS. Trinitatis persona communicat esse secundæ & tertiæ: ergo, &c.

Objicies 1. S. Thomas in 1. Sent. dist. 29. quæst. 1. art. 1. negat, auctoris nomen tribui debere primæ personæ SS. Trinitatis. 2. Nulli Patres Græci eâ loquendi ratione usi sunt. 3. Præter Hila-

Hilarius vix alium Latinum Patrem reperire est qui auctoris nomen aut Patri respectu Filii, aut Filio respectu Spiritus sancti tribuerit.

Resp. ad 1. S. Thomam in suâ Summâ theologicâ (quæ postremum est illius opus) prætermisisse questionem, an auctoris nomen Patri proprium sit; unde consequens est (ajunt nonnulli) quòd tunc ipsi displicuerit, quòd olim scribens in Sententias asseruerat. Ad 2. respondet Petavius Græcos nullum habere nomen quòd nomini Latino, de quo agitur, respondeat: unde hanc elicit conclusionem lib. de Trinitate, cap. 5. *Quamobrem frustra sunt recentiores quidam de schola theologi, qui ut Patrem auctorem appellari posse demonstrent, testes Græcos Patres adhibent, Dionysium, Athanasium, Gregorium Nazianzenum, Eusebium, & ceteros: nam eorum dumtaxat interpretes auctoris nomen assumpserunt.* Ad 3. dicendum est, unum Hilarium, cui Patres alii non contradixerunt, satis esse, ut loquendi modo, de quo hîc agitur, concilietur auctoritas: scilicet (Hieronimo teste, ad Lætam) Hilarii de Trinitate libri inoffenso pede decurri possunt.

Quæres, utrum prima persona SS. Trinitatis absolutè ac sine addito dici debeat auctor secundæ & tertiæ. Ratio verò dubitandi petitur ex eo quòd *Auctoris* nomen apud Latinos scriptores interdum significet eum, qui jure ac dignitate antecedit, ac penes quem est potestas in alium: *Majores nostri*, (verba sunt Livii Dec. 4. lib. 4.) *nullam ne privatam quidem rem agere feminas sine auctore* (hoc est, tutore) *voluerunt.* In eundem sensum Tertullianus lib. de Fugâ in persecutione, cap. 11. Ecclesiæ ministros, quibus haud dubiè convenit potestas in plebem, auctores vocat: *Sed* (inquit) *cum ipsi auctores, id est, ipsi diaconi, presbyteri & episcopi fugiunt, quomodo laicus intelligere poterit, qua ratione dictum, Fugite de civitate in civitatem?*

Resp.

Resp. ne hæretici Auctoris nomine in sensum grammaticalem abutantur adversus fidem, satius esse illud Patri respectu Filii, aut Filio respectu Spiritûs sancti, non tribuere, nisi cum subiectâ explicatione: Scilicet ita sese gessit Augustinum lib. 3. contra Maximinum Arianum, cap. 14. ubi solvens ejusdem Maximini adversus Verbi divinitatem argumentum petitum ex eo, quod Verbum Patrem habeat authorem: *Sed habet (inquit) Dei Filius auctorem Patrem, sic loquitur: Si propterea Deum Patrem Deo Filio dicis auctorem, quia ille genuit, genitus est iste, quia iste de illo est, non ille de isto, fateor & concedo: Si autem per nomen auctoris minorem vis facere Filium, Patremque majorem, nec ejusdem substantiæ Filium, cujus est Pater, detestabor & respuam quia & Filius hominis, in quantum est Filius, habet auctorem, de quo natus est.*

#### C A P U T IV.

*Utrum nomina fontis, originis, capitis, conveniant primæ personæ.*

**Not.** **P**rima persona dici potest fons, origo, caput, vel personarum, vel deitatis: hinc igitur quærendum est: 1. utrum prima persona rectè dicatur fons, origo, caput aliarum personarum: 2. utrum rectè etiam dicatur fons, origo, caput Deitatis.

**CONCLUSIO 1.** Prima SS. Trinitatis persona propriè dici potest fons, origo, caput, radix aliarum ejusdem SS. Trinitatis personarum.

Probat 1. Tertullianus eam, de quâ agitur, loquendi rationem adhibuit: *Nec dubitaverim (inquit lib. contra Praxeam, cap. 8.) Filium dicere & radicis fruticem, & solis radium.* 2. Ambrosius lib. 4. de fide, eodem utitur loquendi modo: *Fons (ait) Pater Filii est, radix Pater Filii est.*

est. 3. Hæc etiam habet Basilius hom. 27. contra Sabellianos: *Est quidem Pater, perfectum habens esse, & nullius egens, radix & fons Filii & sancti Spiritus*. 4. Secunda & tertia persona se habent respectu primæ, sicut lumen respectu solis, sicut fluvius respectu fontis, sicut frutex respectu radice: sicut enim lumen à sole, fluvius à fonte, frutex à radice suum esse recipiunt: ita etiam secunda & tertia persona SS. Trinitatis suum esse recipiunt à primâ: ergo sicut sol dicitur fons luminis, fons origo fluvii, radix principium & caput fruticis: ita prima persona propriè dicitur fons, origo, radix, caput aliarum personarum.

CONCLUSIO 2. Prima SS. Trinitatis persona dicitur quidens fons, origo, radix, caput deitatis, sed *impropriè* tantum.

Probatur prior pars 1. auctoritate, tum Dionysii, cap. secundo de divinis nominibus; tum Concilii Toletani XL. in professione fidei, tum denique S. Thomæ, qui 1. p. q. 33. art. 1. sic loquitur: *Sed contra est quod dicit Augustinus in quarto de Trinitate, Pater est principium* (quod quidem nomen idem est cum istis nominibus) *totius Deitatis*.

Probatur altera pars. Id tantum potest propriè dici fons, origo, radix, caput, principium deitatis, à quo deitas procedit: idem enim sol, fons, radix, sic appellantur respectu luminis, fluvii, fruticis, quod lumen, fluvius, frutex à sole, fonte, radice procedant: atqui deitas à Patre non procedit: siquidem deitas supponit pro essentiâ: quæ quidem (ut definiit Concilium Lateranense IV.) nec est generans, nec genita, nec procedens: ergo, &c.

Quæres 1. quænam sit idea sensus illius improprii, in quo prima persona dicitur fons, origo, radix, principium, caput totius deitatis.

Respondent nonnulli, Patrem sic appellari quia

quia est principium, fons, radix, origo, caput Filii & Spiritus sancti, in quibus singulis est tota deitas. Sed nimis probat ea responsio: probat enim, Filium rectè etiam dici posse principium, fontem, originem, radicem deitatis: scilicet est principium Spiritus sancti, in quo tota est deitas. Respondendum est igitur, primam personam dici principium, fontem, originem totius deitatis, vel quòd in eâ sit deitas tanquam in primo principio, quòd eam aliis personis communicet; vel quòd sit principium omnium, præter quàm sui ipsius, divinarum personarum.

Quæres 2. quis sit sensus hujus sententiæ: *Pater est fons & origo totius Trinitatis*, quæ in Concilio VVormatiensi legitur: nimirum aperte falsa videtur: siquidem voces illæ, *totius Trinitatis*, ipsam etiam primam personam complectuntur; ita ut literalis & obvius sensus sit, quòd Pater sit sui etiam ipsius fons & origo.

Respondemus cum Sylvio, commodè exponendam esse laudatam ex Concilio VVormatiensi sententiam, nempe Patrem dici totius Trinitatis fontem, eodem modo, quo Adamus dicitur principium, fons, origo, caput totius humani generis: itaque sicut nullus est homo, qui ab Adamo non prodierit, ipse autem à nullo alio prodiit; ita ex primâ SS. Trinitatis personâ aliæ prodierunt, ipsa verò non prodiit ab aliâ.

## C A P U T V.

*Utrum Patris nomen sit proprium primæ personæ.*

Not. **V**Ox hæc *Pater*, in divinis sumitur vel personaliter, vel essentialiter; seu vel sumitur pro primâ personâ SS. Trinitatis, vel pro omnibus personis, in quantum conveniunt in eâdem naturâ, easdemque actiones operantur ad extra.

C O N-

CONCLUSIO 1. Vox hæc *Pater*, propriè dicitur de primâ personâ.

Probatur 1. ex Scripturâ. Psal. 2. hæc de Christo prædixit Deus *Pater*: *Ipse invocabit me, Pater meus es tu*; unde & ipse Christus ait Matthæi cap. 10. *Confitebor & ego eum coram Patre meo*. Cap. 11. *Confiteor tibi Pater*. Cap. 16. *Caro & sanguis non revelavit tibi, sed Pater meus qui in calis est*. Cap. 28. *Baptizantes eos in nomine Patris & Filii & Spiritus sancti*. Is autem quem Christus Patrem appellat, est prima persona SS. Trinitatis, ab aliâ nimirum subsistentiam ac filiationem non accepit: ergo Patris nomen propriè & personaliter tribuitur primæ personæ SS. Trinitatis.

Probatur 2. ratione theologicâ. Illud nomen propriè tribuitur primæ personæ, quod eam à cæteris distinguit; quod enim rem aliquam à cæteris distinguit, eam constituit: atqui vox hæc *Pater*, primam personam à secundâ & tertiâ distinguit, cum ipsa sola Filium habeat ac habere possit, eò quòd sola (ut suo loco dictum est) generet ac generare possit.

Quæres, cur prima persona potiùs dicatur *Pater*, quàm genitor vel generans.

Resp. Sic appellari, quòd genitor & generans perfectè primam personam non exprimant: non enim est prima persona, nisi per completam relationem ad Filium: at completa non est, quamdiu prima persona concipitur actu generare: in eâ nimirum suppositione, concipitur eam esse tantum in viâ ad habendum Filium: è contra verò cum dicitur *Pater*, cum Filio jam existente, jam genito, concipitur à nobis.

CONCLUSIO 2. Prima persona essentialiter tantum dicitur creaturarum *Pater*.

Probatur. Quod significat aliquid commune tribus personis, de primâ non dicitur personaliter, sed essentialiter tantum, cum essentia sit omnibus personis communis: atqui vox hæc, *Pater*,  
ad

ad creaturas comparata, significat aliquid tribus personis commune, creationem nimirum, providentiam, & alia hujusmodi; quæ cum creaturas respiciant, sunt ad extra, ac proinde toti Trinitati communia.

Quæres, utrum de Deo propriè, an impropriè tantum prædicetur, quod sit creaturarum Pater.

Resp. Deum impropriè tantum, seu metaphoricè, dici creaturarum Patrem. Ratio est, quia is tantum Pater est propriè, qui fœtui suo similem naturam communicat: nempe generatio (ut superius dictum est) definitur, processio viventis à vivente in similitudinem naturæ: atqui Deus creaturis similem naturam non communicat, sed omninò diversam, creatam nimirum & finitam: ergo, &c.

Ex iis quæ huc-usque dicta sunt, colligitur 1. antiquos scriptores meritò Patris nomine usos fuisse, ut tum distinctionem personarum contra Sabellianos, tum Verbi consubstantialitatem adversùs Arianos adstruerent: neque enim is qui solus est, dici potest Pater, cum non dicatur Pater, qui Filium nec habet nec habuit. Neque eæ personæ diversæ sunt substantiæ, quarum una est generans & altera genita: nempe generatio (ut multoties observatum est) producit in similitudinem naturæ, & quidem perfectam, si generatio, ut est in divinis, perfectissima sit. Colligitur 2. hæc Apostoli verba: *Ex quo omnis paternitas in celo, & in terra nominatur*, intelligi de paternitate, quæ convenit primæ personæ SS. Trinitatis: nimirum paternitas in creatis non est exemplar ad quod exacta sit divina paternitas, sed potius paternitas divina est creatæ paternitatis exemplar; quod quidem imperfectè tantum in eà repræsentatur, cum per paternitatem creatam, non eadem numero, sed similis tantum in specie, natura genito communicetur: *Paternitatis nomen* (ait Hieronymus in cap. 3. epistolæ ad Ephesios)

*ex semetipso Deus largitus est hominibus : Sicut ergo solus immortalis , immortales facit : ita solus Pater , qui creator est omnium , præstat cæteris , ut patres esse dicantur .*

## CAPUT VI.

*Vtrum ingeniti nomen primæ personæ conveniat .*

**Not. 1.** **I**ngeniti nomen tribus modis sumitur . Et quidem 1. pro eo omni quod non est creatum , aut factum ab externo principio : 2. pro eo quod non producit per viam generationis : 3. denique pro eo quod caret omni principio .

**Not. 2.** Certum est, ingeniti nomen priore modo sumptum, non esse nomen proprium primæ personæ : scilicet duæ aliæ non minùs sunt quid increatum , & non factum ab externo principio,quàm prima . Certum est pariter, idem nomen altero modo sumptum, non esse proprium eidem primæ personæ; sic enim acceptum convenit Spiritui sancto, cum ( ut superius ostensum est ) non procedat per viam generationis . Hic igitur quæstio est , utrum acceptum tertio modo sit terminus notionalis primæ personæ per exclusionem aliarum .

**CONCLUSIO.** Nomen ingeniti sumptum pro eo quod caret omni prorsùs principio , nomen est notionale , seu, soli primæ personæ proprium est .

Probat. **1.** auctoritate Patrum. Basilii lib. 2. adversùs Eunomium , hæc ait : *Ingenitum est quod nullum principium habet , neque causam existendi . Æternum verò , quod omni tempore ac seculo secundum esse antiquius est . Unde Filius neque ingenitus est , & est æternus .* Augustinus lib. 5. de Trinitate , idem nomen soli primæ personæ vindicat, ipsumque capitibus 5. & 6. liberat  
variis



variis hæreticorum cavillationibus. Athanasius in Epistolâ ad Serapionem hæc scribit: *Non est ingenuus Spiritus sanctus, quia in principium esse, & ingenuum, soli Deo Patri Catholica Ecclesia congregata apud Nicænam rectè & fideliter attribuit, & de solo Patre esse credendum & prædicandum, toti mundo sub anathemate mandavit. Patres toti fuerunt, tum labente sæculo quarto, tum in eunte quinto, in hæreticis, Aetio præsertim & Eunomio, confutandis, quod contenderent, Verbum non esse ejusdem substantiæ cum Patre, quia, etiam ex suppositione catholicorum, Pater est ingenuus, Verbum è contra genitum est: Quidquid de Deo dicitur, vel intelligitur, non secundum accidens, sed secundum substantiam dicitur (argumentum est Arianorum apud Augustinum lib. 5. de Trinitate c. 3.) Quapropter ingenuum esse, Patri secundum substantiam est; & genitum esse, Filio secundum substantiam est. Diversum est autem ingenuum esse, & genitum esse. Diversa est ergo substantia Patris & Filii: ergo, &c.*

Probatur 2. ratione theologicâ. Illud nomen est primæ personæ proprium, quod eam ab aliis distinguit: sed ingenui nomen id præstat; siquidem (ut observatum est) ingenui nomen significat id, quod expers est cujuscunque principii, siue creationis, siue effectiōis, siue originis: atqui nomen quod significat id, quod expers est cujuscunque principii, primam personam ab aliis distinguit: scilicet aliæ non sunt sine principio: suum enim esse secunda ducit à primâ, tertia verò à primâ & secundâ simul.

Objicies 1. Athanasius lib. 2. contra Arianos, ingenui nomen rejicit à primâ SS. Trinitatis personâ, tum quia, cum in Scripturis non legatur, suspectum est, tum etiam quod ethnicis institutionem suam debeat: ergo nomen ingenui non est proprium primæ personæ SS. Trinitatis.

Resp. dist. ant. Athanasius rejicit à primâ personâ  
Tom. III. N sonâ

sonâ nomen ingeniti sumptum in sensu Ariano-  
rum, conc. ant. sumptum in sensu Catholico-  
rum, neg. ant. Ariani per ingeniti nomen intel-  
legebant id solum, quod creatum non est ; unde  
concludebant, Filium esse quid creatum, eo quod  
non sit ingenitus. Econtra Catholici per ingeni-  
ti nomen non tantum id intelligebant, quod crea-  
tum non est, sed etiam id omne, quod expers est  
cujuscumque principii ; unde concludebant, quod  
licet Filius non sit ingenitus, non sequatur, eum  
esse creatum aliquid. Ingeniti nomen priore mo-  
do sumptum, non autem posteriore, rejicit Atha-  
nâsius : *Postquam* ( inquit lib. 2. contra Aria-  
nos ) *non amplius illis fiducia superest, ut dicant*  
*ex non entibus eum* ( Filium Dei ) *extitisse, neque*  
*prius extitisse, quàm fieret, vocabulum ingeniti sibi*  
*confinxerunt, ut illum genitum, hoc est, creatum,*  
*apud simplices dicitantes, eadem illa verba,*  
*Ex non entibus, & non erat priusquàm fieret, denuò*  
*subinducunt : in istis enim creata & condita intelligi*  
*volunt :*

Objicies 2. Ingeniti nomen, vel substantiam  
significat, vel relationem : Non primum, alio-  
quin tribus personis ex æquo conveniret : quæ  
enim significant substantiam, absoluta sunt ;  
ac proinde toti Trinitati communia. Non etiam  
secundum, quia quæ significant relationem,  
dicunt respectum ad alias personas : eum au-  
tem respectum non dicit ingeniti nomen : ergo,  
&c.

Resp. Ingeniti nomen, nec substantiam, nec  
relationem significare, sed negationem, non  
quidem substantiæ, sed relationis. Itaque pri-  
ma persona, reduplicativè prout est ingenita, nec  
est Pater, nec Filius, nec Spiritus sanctus ; siqui-  
dem Pater, Filius & Spiritus sanctus sunt positi-  
væ relationes ; sed sic accepta, est negatio rela-  
tionis ad principium superius, à quo suum esse re-  
cipiat, sicut è contra nomen *Geniti*, quod illi op-  
ponitur, quodque convenit secundæ personæ,  
imò

imò & tertiæ, prout dicit productionem in genere, est nomen relativum, nimirum dicit habitudinem ad principium, à quo Filius generatur, & à quo Spiritus sanctus producit. Quæ mox tradita fuit responsio, desumpta est ex Augustino quilib. 5. de Trinitate, c. 6. sic loquitur: *Ingenitus porro, quid est, nisi non genitus? Non ergo receditur à relativo prædicamento, cum ingenitus dicitur. Sicut enim genitus non ad se ipsum dicitur, sed quod ex genitore sit: ita cum dicitur ingenitus, non ad se ipsum dicitur, sed quod ex genitore non sit, ostenditur.* Ea verò Augustini sententia nititur hoc philosophorum axioma: *Negatio ad genus affirmationis reducitur*, hoc est, si prædicamentum quod negatione tollitur, pertineat ad substantiam, negatio ad eam quoque pertinet: si è contra prædicamentum pertineat ad relationem, ad relationem quoque pertinet negatio.

Objicies 3. Prima persona non dicitur inspirabilis: ergo pariter dici non debet ingenua: siquidem non minor est oppositio inter primam personam & spirabilitatem, quæ convenit Spiritui sancto, quàm inter eandem primam personam & generabilitatem, quæ Filio tribuitur.

Resp. conc. ant. neg. conseq. Ratio disparitatis est, quia inspirabilitas sequitur ex ingenito: siquidem ingenuum, ut hìc sumitur, non accipitur tantum, prout opponitur genito specificè sumpto, hoc est, prout dicit productionem per modum generationis; sed accipitur prout opponitur cuicumque productioni passivæ, sive sit generatio, sive spirabilitas.

Objicies 4. Ingenitum dicit privationem, ex S. Thomâ 1. p. q. 3. art. 4. ad 2. ergo dici non debet de Patre, cum privatio sit imperfectio; est enim carentia formæ debitæ subjecto.

Resp. dist. ant. Ingenitum dicit privationem latè sumptam, conc. ant. strictè sumptam, neg. ant. Privatio priore modo sumpta dicit carentiam

tiam formæ, quæ debetur alicui supposito ejusdem generis, non tamen omni ejusdem generis supposito: sic visio quæ debetur alicui animali, non debetur talpæ. Privatio altero modo sumpta dicit carentiam formæ debitæ subjecto, cui inest. Porro ingenitum est privatio prioris generis, non autem posterioris: *Sic autem* ( hoc est, priore modo ) *ingenitum non dicitur de Patre, sed secundo modo, prout scilicet aliquod suppositum divinæ naturæ non est genitum, cujus tamen naturæ aliquod suppositum est genitum.* Verba sunt S. Thomæ 1. p. q. 33. art. 4. ad 2.

---

## Q U Æ S T I O   I I .

### *De secunda personæ SS. Trinitatis.*

**Not.** **S**ECUNDÆ PERSONÆ SS. TRINITATIS varia tum in Scripturis tum in Patribus nomina tribuuntur: nimirum dicitur, Verbum, Filius, Imago, Sapientia Patris: de iis verò nominibus agendum nobis incumbit sequentibus capitibus.

### C A P U T   P R I M U M .

#### *De nomine Verbi.*

**Not.** **D**E nomine Verbi quæremus 1. utrum conveniat secundæ personæ SS. Trinitatis; 2. utrum ita proprium sit secundæ, ut alibi tribui non possit; 3. utrum sit nomen relativum, an verò absolutum; 4. denique, utrum Verbum procedat non tantum ex cognitione, quæ Pater habet de suâ essentiâ, sed etiam de cognitione creaturarum.

**CONCLUSIO** 1. Verbi nomen convenit secundæ personæ SS. Trinitatis.

Pro-

Probatur. Primò, sic appellatur Joannis c. 1. *In principio erat Verbum .... Verbum caro factum est & habitavit in nobis.* 2. Patres Latini, qui floruerunt ante Concilium Nicænum I. eandem adhibuerunt vocem, ut secundam SS. Trinitatis personam exprimerent. Tertullianus lib. de Præscriptionibus, cap. 13. scribit, *Patrem omnia condidisse per Verbum suum primò omnium emissum. Id Verbum Filium ejus appellatum.* Lactantius lib. 4. cap. 8. hæc ait: *Contestans (in hisce vocibus, Eructavit cor meum verbum bonum) nulli alii opera Dei esse nota, nisi Filio soli, qui est Verbum Dei.* 3. Qui post Nicænam Synodum scripsere, nusquam ferè alio quàm Verbi nomine secundam Trinitatis personam appellarunt, ut videre est in Hilarii, Augustini, aliorumque Latinorum, qui de Trinitate scripserunt, operibus.

Quæres 1. cur Latini secundam Trinitatis personam vocarunt potius Verbum, quàm Sermonem: nempè nomen *Logos*, qui legitur in Græco Evangelii textu, quodque Græci Patres adhibuerunt, Latine non minùs per Sermonem, quàm per Verbum redditur.

Resp. Latinos ita se gessisse, quòd cum sermo pluribus vocibus constet, minùs aptus sit, quàm Verbi nomen, ad significandum, quòd Pater unico ac simplicissimo cognitionis actu secundam personam produxerit. Hinc patet, arguendum esse Erasmus, quem eo in capite imitati sunt Calvinus & Beza, quòd in Latinâ novi Testamenti versione posterioris editionis, nomen *Logos* verterit per Sermonem, scribens: *In principio erat Sermo.*

Quæres 2. in quo Verbi nomen, quod secundæ personæ SS. Trinitatis tribuitur, conveniat cum nomine verbi, quod creatæ cognitionis termino tribuitur; & in quo ab eo discrepet.

Resp. ad primum convenire, quòd utrumque sit expressa objecti imago, utrumque sit terminus

actualis intellectio-  
nis, utrumque sit cujuscum-  
que passionis expers, hoc est, citra perpe-  
ssionem aliquam intelligentis, à mente oriatur.

Resp. ad secundum, differre 1. quòd verbum creatum non ex substantiâ mentis, sed ex ejus scientiâ, quæ qualitas est adventitia, nascatur : cum è contra Verbum divinum oriatur ex ipsâ divinx substantiæ cognitione : 2. Creatum Verbum non est perpetuum, divinum verò perpetuum est : hinc S. Augustinus lib. 15. de Trinitate, cap. 16. scribit, idèd non dici cogitationem *ne aliquid esse quasi volubile credatur in Deo, quod nunc accipiat, nunc recipiat formam, ut Verbum sit, eamque possit amittere* : 3. Creatura verba, multa sunt : neque enim unicuique par esse potest omnibus rebus exprimendis, aut efficiendis : at divinum idèd singulare est & unum, quòd per se satis sit ad omnia : 4. Verbum creatum, nullum opus extrinsecum per se ipsum operatur : unde artifices non verbo, sed manibus utuntur : è contra Dei Verbum per sese efficax est : *Omnia enim per ipsum facta sunt, & sine ipso factum est nihil*. Tandem 5. Verbum creatum non est quid per se subsistens : at divinum per se subsistit, per se hypostasim habet.

Quæres 3. utrum Verbi nomen, quod secundæ Trinitatis personæ tribuitur, intelligatur de Verbo interno, seu de illo verbo quod mens efformat internè ; an verò de prolatitio, hoc est, de verbo quod ore profertur exterius.

Resp. Verbum quod alteri Trinitatis personæ tribuitur, intelligi de interno primæ personæ verbo : scilicet cum secunda Trinitatis persona sit æterna, ac necessariò producta sit à primâ, oportet, ut verbum quod illi tribuitur, sit æternum, ac necessariò productum : at ejusmodi non est verbum prolatitium, nempè dictum est in tempore, tum in rerum creatione, tum in cæteris Dei operationibus ad extra.

Dices. Ex veteribus aliqui secundam personam

nam Trinitatis conferunt cum verbo prolatitio : *Verbum Patris* idè dictum est ( ait Augustinus lib. de Fide & Symbolo, cap. 3. ) quia per ipsum innotescit Pater. Sicut ergo verbis nostris id agimus, cum verum loquimur, ut noster animus innotescat audienti, & quidquid secretum in corde gerimus, per signa hujusmodi ad alterius cognitionem proferatur : sic illa sapientia, quam Deus Pater genuit, quoniam per ipsam innotescit animus secretissimus Patris, Verbum ejus convenientissime nominatur : ergo, &c.

Resp. dist. ant. Ex veteribus aliqui secundam personam Trinitatis cum nostro verbo prolatitio conferunt quoad officium, conc. ant. quoad entitatem, neg. ant. Hoc est, veteres illi non dicunt, secundam personam Trinitatis sumptam secundum entitatem esse idem cum verbo nostro ; neque enim est sonus aliquis exterior ; nec cum verbo prolatitio Patris, id est, cum termino extrinseco, quem Pater in tempore produxit ; siquidem terminus exterior non aliud est, quàm creatura. Igitur Patres de quibus in argumento, contulerunt verbum Patris sive cum verbo nostro, sive cum ejusdem Patris prolatitio verbo, quoad officium : nempè ( ut liquet ex laudato Augustini testimonio ) quemadmodum verbum, seu sermo noster, nostrum verbum interius, hoc est, cogitationem, manifestat ; sicut etiam exterius Dei verbum, quod non aliud est, quàm terminus ad extra, est manifestatio interioris illius verbi, seu cogitationis : ita secunda Trinitatis persona manifestat Dei Patris mentem, internam illius cogitationem aperit : *Ut enim* ( ait Origenes Tom. I. in Joannem p. 166. ) *apud nos sermo nuntius est earum rerum, quæ à mente cernuntur : sic ille Dei sermo, qui Patrem agnovit, Patrem agnitum revelat.*

Si quis verò roget, cur aliqui ex antiquis Patribus secundam Trinitatis personam, etiam secundum entitatem sumptam, nonnunquam dixerint

esse prolatitium Patris Verbum, duplex afferri poterit responsio. Nam 1. sic se gesserunt, quod prolatitium manifestius sit interno. 2. Veteres cum egerunt de secundâ personâ SS. Trinitatis, plerumque tum contra Sabellianos, tum adversus Arianos disputarunt. Sabelliani ultrò fatebantur dari Verbum in divinis, sed contendebant, illud Verbum personâ non distingui à principio illius productivo, sicut in humanis cogitatio personâ non distinguitur ab homine cogitante. Ariani fatebantur quoque existere Verbum, addebantque cum Catholicis, ipsum esse non nomine tantum, & officio, sed etiam personâ distinctum à Patre; sed docebant, ipsum præterea naturâ ab æterno Patre distingui. Patres verò cum adversus Sabellianos conseruerunt manus, nonnunquam dixerunt, secundam personam esse prolatitium Verbum Patris, quod scilicet Verbum prolatitium quod imago est interni, illudque manifestat, minus pateret Sabellianorum calumniis. E contra cum rem egerunt adversus Arianos, eandem secundam personam dixerunt internum Verbum Patris, ne si dixissent prolatitium, ut contra Sabellianos aliquoties, licet perrarè, dixerant, Ariani inde causam arriperent asserendi, ut assererent, Verbum non personâ tantum, sed etiam naturâ à Patre distingui.

**CONCLUSIO 2.** Verbi nomen proprium est secundæ personæ Trinitatis.

Probatur. Nomen quod significat modum, quo secunda persona SS. Trinitatis procedit, illi proprium est: siquidem nomina quæ modum illum significant, sunt nomina personalia; cum personæ non distinguantur, nisi per relationes, & aliundè relationes in processibus fundentur: atqui Verbi nomen significat modum, quo secunda persona SS. Trinitatis procedit: nempe significat, secundam personam procedere per generationem; significat enim illius productionem per intellectum, quia Verbum est terminus intelle-

ctio-



ctionis: at intellectus divinus ( ut suo loco dictum est ) producit in similitudinem naturæ , proindeque generat.

Objicies. Ambrosius non minùs primæ,quàm secundæ personæ, Verbi nomen tribuit: *Hæc est autem* ( ait in libro de Filii divinitate , cap. 5. ) *nominis ratio , ut in Patre & Filio unitatem substantiæ credas .... ut sive Lumen de Lumine dicas , sive Verbum de Verbo , sive Spiritum de Spiritu , sive Dominum de Domino ; quodcumque de eo dixeris , unius tamen essentiæ Patrem & Filium credas : Ergo Verbi nomen , ex Ambrosio , non est proprium secundæ personæ SS. Trinitatis .*

Resp. ad 1. neg. ant. Ad 2. dist. ant. Ex Ambrosio , secunda persona est de Verbo , sumendo verbum pro ratione , seu principio intelligente , conc. ant. pro termino producto per rationem , neg. ant. Nomen græcum *Logos* , quod latinè vertitur per *Verbum* , duo significat , rationem intelligentem , seu ipsummet actum intelligendi , & terminum intellectiois. Prima persona est verbum , sumendo verbum in priore sensu : unde veteres adversùs Arianos contententes Filium in tempore productum fuisse , docuerunt, Patrem semper fuisse *logicalem* , seu intelligentem , & nusquam *alogon* , hoc est , non intelligentem ; indeque concluderunt , eundem Filium esse æternum , quia Pater non potest esse *Logos* , hoc est , intelligens , quin Filium producat , cum sit necessarius intellectiois paternæ terminus . Secunda persona sola dicitur Verbum in altero sensu , nec enim Pater aut Spiritus sanctus sunt *Logos* , seu Verbum , sumendo voces illas pro termino per divinam intellectioem producto : *Verbum de Verbo dici non potest* ( inquit Augustinus lib. 6. de Trinitate , cap. 2. ) *quia non simul ambo Verbum , sed solus Filius .*

CONCLUSIO 3. Verbi nomen non est absolutum , sed relativum .

Probatur. Verbum, ex dictis superius, est terminus intellectiōis paternæ: atqui terminus ille est aliquid relativum; in suo nimirum conceptu dicit processionem ab eo, cuius est verbum: sed quod in suo conceptu processionem dicit, est relativum: ergo Verbi nomen non est nomen absolutum, seu quod essentiam aut naturam significet; sed nomen est relativum, quod significet personam.

Confirmatur ex Augustino, qui lib. 7. de Trinitate, cap. 2. sic loquitur: *Sicut Filius ad Patrem refertur, non ad se ipsum dicitur; ita & Verbum ad eum, cuius Verbum est, refertur, cum dicitur Verbum. Eò quippè Filius quò Verbum, & eò Verbum quò Filius .... Verbum non ad se dicitur, sed tantum relativè ad eum cuius Verbum est, sicut Filius ad Patrem.*

**CONCLUSIO 4.** Verbum non procedit à Patre per solam cognitionem quam Pater habet de suâ essentiâ, sed etiam per cognitionem quam habet de creaturis possibilibus.

Probatur. Verbum procedit à Patre per cognitionem perfectissimam, cum illius processio sit omnium perfectissima: atqui perfectissima cognitio complectitur cognitionem non solius essentiae divinæ, sed etiam creaturarum possibilem: ergo, &c.

Confirmatur. Verbum procedit per cognitionem intuitivam, quam Pater habet de suâ essentiâ: scilicet intuitiva cognitio perfectior est abstractivâ: atqui intuitiva divinæ essentiae cognitio non potest haberi sine cognitione creaturarum possibilem; siquidem essentia non est quid realiter actu distinctum ab omnipotentia: proindeque comprehensivam omnipotentiae cognitionem complectitur. At comprehensiva omnipotentiae cognitio includit cognitionem omnis termini, ad quem omnipotentia sese potest extendere: ergo Verbum producit non solum per cognitionem divinæ essentiae; sed etiam per cogni-

tionem omnium omninò creaturarum possibile. Dixi, creaturarum possibile, non autem existentium, quia in illo priori nondum existunt creaturæ.

Quæres, utrum Verbum procedat à Patre non solum per cognitionem divinæ essentiae & creaturarum omnium, sed etiam per cognitionem ipsiusmet Verbi ac Spiritus sancti. Ratio dubitandi petitur ex eo, quòd Verbum & Spiritus sanctus sint idem realiter cum essentiâ divinâ; ac proindè sine eis haberi non potest intuitiva ejusdem essentiae divinæ cognitio.

Resp. Verbum non procedere per cognitionem ipsiusmet Verbi actu producti: scilicet si per eam cognitionem procederet, esset, secundum nostrum intelligendi modum, prius se ipso, id enim per quod quis procedit, prius est termino processionis: at nec Verbum, aut aliquod aliud ens, potest se ipso prius esse. Nec obstat ratio dubitandi, quæ in quæstione fuit proposita: siquidem in illo priori, in quo concipimus, Patrem nondum producere Filium, Filius est quidem in essentiâ divinâ secundum esse absolutum, sed nondum est in eâ secundum esse relativum: unde cognitio, quam tunc Pater habet de suâ essentiâ, non se extendit ad esse relativum Filii. Verum si Verbum objectivè sumatur, dicendum erit, ipsum produci per ipsam cognitionem Verbi; sicut & per cognitionem Spiritus sancti.

## C A P U T II.

*Vtrum nomina Filii, Sapientiae, Imaginis convenient secundæ personæ  
SS. Trinitatis.*

CONCL. I. **F**ilii nomen convenit soli secundæ personæ SS. Trinitatis.

Probatur. Illi soli personæ convenit Filii nomen, quæ sola generatur; nempe Filius est terminus

nus generationis: atqui sola secunda persona SS. Trinitatis generatur ( ut superius ostensum est ) ergo soli secundæ personæ Trinitatis convenit nomen Filij.

CONCLUSIO 2. Sapientiæ nomen non convenit propriè secundæ personæ SS. Trinitatis, sed appropriativè tantum.

Probatur prior pars. Quod significat aliquid absolutum, non convenit propriè, hoc est, per exclusionem, secundæ personæ; scilicet quæ sunt absoluta, singulis personis communia sunt: atqui Sapientiæ nomen significat aliquid absolutum; sicut enim immensus est Pater, immensus Filius, immensus Spiritus sanctus; ita sapiens est Pater, sapiens Filius, sapiens Spiritus sanctus.

Confirmatur ex Augustino, qui lib. 1. de Trinitate, cap. 2. opponit Sapientiam Verbo: aitque illam esse Patri ac Filio communem, istud verò proprium Filio: *Pater igitur ( inquit ) & Filius simul una essentia, & una magnitudo, & una veritas, & una sapientia. Sed non Pater & Filius simul ambo unum Verbum, quia non simul ambo unus Filius.* Cur autem Patri ac Filio communis sit Sapientia, non autem Verbum, asserit Augustinus, id ex eo oriri, quòd illa sit quid absolutum, istud verò aliquid relativum: *Et hac duo ( inquit ) cum dicuntur, id est, nata sapientia; in uno eorum, quòd nata est, & Verbum & Imago, & Filius intelligatur, & in his omnibus nominibus non ostendatur essentia, quia relativè dicuntur. At in altero, quod est Sapientia, quoniam & ad se dicitur, se ipsa enim sapiens est, etiam essentia demonstratur; & hoc ejus esse, quod sapere. Unde Pater & Filius simul una Sapientia, quia una essentia, & singillatim Sapientia de Sapientia, sicut essentia de essentia.*

Probatur altera conclusionis pars autoritate Pauli, qui 1. ad Corinth. 1. de Christo ait, quòd sit *Dei virtus & Dei sapientia.* Jam verò nomen illud

illud per appropriationem de Filio dici, sic ostenditur: Illud nomen per appropriationem de Filio dicitur, quod licet rem tribus personis communem significet, analogiam tamen habet cum modo peculiari, quo Filius à Patre procedit: atqui nomen, de quo agitur, est hujusmodi: siquidem Filius à Patre per intellectum procedit: at sapientia, aut est ipse intellectus, aut illius operatio, aut virtus.

**CONCLUSIO 3.** Imaginis nomen convenit secundæ personæ SS. Trinitatis, & quidem propriè.

Probatur prior pars. Scriptura non semel Filium vocat imaginem Patris. Apostolus sic loquitur ad Colossenses 1. *Qui est imago Dei invisibilis, primogenitus omnis creaturæ.* Hæc etiam habet ad Hebræos 1. *Qui cum sit splendor gloriæ ejus, & figura substantiæ ejus.* 2. Patres (ut videre est in Augustini libris de Trinitate, in Basilii operibus adversus Eunomium, in Oratione IV. Athanasii contra Arianos, in Chrysostomo in laudatum Apostoli locum) eadem utuntur loquendi ratione.

**CONCLUSIO 4.** Imaginis nomen convenit soli secundæ personæ SS. Trinitatis.

Probatur. Illud nomen convenit soli secundæ personæ Trinitatis, quod de eâ dicitur relativè, non autem absolutè: scilicet (ut sæpiùs dictum est) quæ sunt absoluta, toti Trinitati communia sunt: atqui nomen imaginis de secundâ personâ dicitur relativè, non autem absolutè: Nam id expressè docet Augustinus lib. 5. de Trinitate, cap. 13. *Relativè (inquit) dicitur Filius, relativè dicitur Verbum & Imago.* Idem hisce verbis asserit lib. 7. cap. 1. *Quid autem absurdius, quàm imaginem ad se dici.* At quod ad se non dicitur, dicitur ad aliud; ac proinde non est nomen absolutum, sed relativum.

Objicies 1. Homo dicitur imago Dei, juxta illud Scripturæ: *Faciamus hominem ad imaginem & similitudinem*

& *similitudinem nostram*: ergo vox hæc, *Imago*, non est propria secundæ personæ Trinitatis.

Resp. dist. ant. Homo dicitur improprie imago Dei, conc. ant. dicitur proprie, neg. ant. Imago proprie sumpta, dicit similitudinem secundum speciem; sumpta verò improprie, dicit similitudinem secundum aliquam tantum perfectionem. Homo non est in priore sensu imago Dei: neque enim Dei & hominis natura sunt ejusdem speciei; sed est imago Dei in altero tantum sensu, nempe sicut Dei natura est intelligens, ita etiam intelligens est hominis natura. Econtra Verbum divinum in priore sensu est imago Patris: habet nimirum naturam non tantum eandem specie cum naturâ Patris, sed etiam eandem numero.

Objicies 2. Imaginis nomen convenit Spiritui sancto: ergo non est proprium soli secundæ personæ Trinitatis. Probatur ant. Imago proprie sumpta definitur similitudo duorum in naturâ: atqui Spiritus sanctus est æterno Patri similis in naturâ; imò, sicut & Filius, eandem cum ipso naturam habet: ergo, &c.

Resp. dist. maj. Imago proprie sumpta definitur similitudo duorum in naturâ, vi processionis, conc. maj. non vi processionis, neg. maj. Ad imaginem proprie sumptam requiritur quidem similitudo in specie, sed id satis non est; unde licet ovum sit alteri simile, non dicitur tamen illius imago: *Si gemini* (inquit Augustinus lib. 83. quæstionum, quæst. 74.) *inter se similes sint, similitudo dici potest alterius cujuslibet in altero, non imago*; & ovum alteri ovo quam maxime simile est, nec imago tamen ejus est, quia de illo expressum non est. Igitur ad rationem imaginis præter similitudinem in natura, requiritur processio, & quidem ita, ut ea similitudo, ea imago reperiatur in supposito vi originis ac processionis: at sic similitudo in naturâ non convenit Spiritui sancto; scilicet (ut superius dictum est)

vi actûs, seu vi amoris, per quem producitur, non procedit ut verbum, in naturæ similitudinem.

Objicies 3. Verbum non potest dici simile Patri: ergo nec dici potest illius imago. Probatur ant. Verbum non potest esse simile Patri, nisi vel secundum personam, vel secundum naturam: atqui nec secundum personam, nec secundum naturam est simile Patri. Non quidem secundum personam: tantum enim abest, ut filiatio sit similis paternitati, quin potius sit omnino diversa. Non etiam secundum naturam: nimirum ubi est identitas naturæ, non est similitudo in naturâ; ac proinde cum Verbum eandem omnino cum Patre naturam habeat, non potest dici simile Patri in naturâ.

Resp. ad 1. neg. ant. Ad 2. conc. maj. neg. min. Ad 3. dicendum est, Filium esse similem Patri secundum essentiam, seu secundum naturam, secundum substantiam. Siquidem Filius est similis Patri secundum formam quæ communis est utrique; sic enim in humanis Filius dicitur suo genitori similis non secundum rationem Patris, sed tantum secundum naturam, quod utrique communis sit, non quidem ratio Patris, sed humana natura: Sed in divinis essentia sola cum attributis absolutis communis est Patri ac Filio: ergo &c. Ad 4. dist. maj. Ubi est identitas in naturâ, non est similitudo in naturâ, si eadem quoque sit persona, conc. maj. si non sit eadem persona, neg. maj. Ad similitudinem duo requiruntur, unum, in quo ea quæ similia sunt, convenient; & alterum, in quo disconvenient. Non est necesse ut id in quo conveniunt, seu forma in quâ similitudo fundatur, sit distinctum; sed satis est, ut subjecta, in quibus ea forma reperitur, sint distincta: sic si in nive & lacte esset eadem numero albedo, lac & nivis perfectè similia dicerentur, quia forma, seu albedo, in quâ convenirent, esset utrique subjecto communis. Propter eandem rationem  
per-

persona Filii quæ realiter distinguitur à personâ Patris, est Patri perfectè similis in essentiâ, eò quòd forma seu essentia, in quâ ejusmodi similitudo fundatur, sit in utroque subjecto, seu, in utrâque personâ, eadem omnino.

Confirmatur responsum 1. ex Scripturâ, quæ ad Hebræos 1. docet, Christum esse figuram divinæ substantiæ: *Qui cum sit splendor gloriæ & figura substantiæ ejus*. Nec est, quòd quis opponat græcum textum pro voce, *Substantiæ*, legere, *Hypostasis*. Nam 1. ante Sabellianorum hæresim, vox *Hypostasis* apud Græcos (ut superiùs pag. 231. probatum est) sumebatur pro essentiâ, naturâ, substantiâ. 2. Vox ista *Gloriæ*, non intelligitur personaliter, sed essentialiter; ergo nec ista *Substantiæ*, intelligitur personaliter, sed essentialiter: itaque quemadmodum licet eadem sit gloria, seu majestas, tum in Patre, tum in Filio, Filius tamen dicitur spendor paternæ gloriæ: ita etiam licet eadem sit in utroque substantia, Filius tamen rectè dicitur substantiæ figura.

Confirmatur 2. ex S. Patribus: scilicet asseruerunt 1. Filium esse quid per se subsistens, sicut & Pater, eò quòd sit figura paternæ substantiæ, hoc est, sit, non minùs quàm Pater, substantia, cujus proprium est non indigere alio, tanquam subjecto cui inhæreat: *Addidit* (ait Chrysostomus in Comment. in epist. ad Hebræos) *Figura substantiæ ejus, ut ostenderet, quemadmodum subsistens est Pater, & ad subsistendum nullius est egens, & esse Filium*. At si Patres usi sunt nomine substantiæ, ut adversùs Sabellianos ostenderent, Filium non esse quid inherens alteri, sed substantiam per se, sicut Pater, consistentem, idem substantiæ nomen quo Paulus utitur, sumpserunt non pro personâ, sed pro essentiâ. Asseruerunt 2. post Apostolum, Christum esse in formâ Dei simul & in formâ servi: *Qui cum in forma Dei esset* (ad Philippeneses 2.) *non rapinam arbitratus est esse se æqualem Deo, sed semetipsum exinaniv-*



*manivit, formam servi accipiens, in similitudinem hominum factus, & habitu inventus ut homo:* At Christus est in forma servi, seu imago hominis servi, ratione humanæ naturæ; neque enim ratione personæ, quæ Verbum est, potest esse imago servi: ergo à pari est forma, seu imago Dei, non ratione personæ, sed ratione essentiae divinæ. Afferuerunt 3. præsertim Hilarius, fidei confessionem, quâ Semiariani dixerant, Filium esse *Omoousion*, hoc est similem in substantiâ cum Patre, esse veram: ergo illis Patribus persuasum fuit, Filium esse imaginem Patris, ratione substantiæ, non autem ratione personæ.

### QUÆSTIO III.

#### *De tertia persona SS. Trinitatis.*

**Not.** **A** Gemus hîc 1. de nominibus quæ tertiæ personæ Trinitatis tribuuntur; 2. de illius processione à Patre & Filio; 3. de particulâ *Filioque*, quæ inserta est symbolo. De illius autem consubstantialitate cum aliis personis divinis, ac reali ab illis distinctione, hujusce tomi dissertatione 1. fusè dictum est.

#### CAPUT PRIMUM.

##### *De nominibus quæ tertiæ personæ tribuuntur.*

**Not.** **N** Omina quæ passim tribuuntur tertiæ personæ, hæc sunt, Spiritus sanctus; Donum; Amor. De iis autem nominibus quæri potest 1. utrum convenient tertiæ personæ; 2. utrum ei propria sint.

C O N-

**CONCLUSIO 1.** Hæc nomina, Spiritus sanctus, Donum, Amor, conveniunt tertiæ personæ SS. Trinitatis.

Probatur. Ea nomina conveniunt tertiæ personæ SS. Trinitatis, quæ illi tribuuntur aut in Scripturis aut in Patribus: atqui ea, de quibus in conclusione, tertiæ personæ tribuuntur in Scripturis. Et quidem *primò*, Spiritus sancti nomen illi tribuitur, tum Matthæi 28. *Baptizantes eos in nomine Patris, & Filii, & Spiritus sancti*, tum etiam 1. Joannis 5. *Tres sunt qui testimonium dant in cælo, Pater, Verbum, & Spiritus sanctus*. Tribuitur *secundò* nomen Doni: *Si scires* (ait Christus, Joannis 4. alloquens mulierem Samaritanam) *Donum Dei*. De eadem tertiâ personâ intelliguntur hæc Actorum 8. ubi Petrus arguit Simonem magum, quòd vellet emere Spiritum sanctum: *Existimasti Donum Dei pecunia possideri posse*. Tribuitur *tertiò* nomen Amoris seu charitatis: *Si ergo propriè* (inquit Augustinus lib. 15. de Trinit. cap. 17.) *aliquid horum trium charitas nuncupanda est, quid aptius, quàm ut hoc sit Spiritus sanctus?*

**CONCLUSIO 2.** Spiritus sancti nomen propriè convenit tertiæ personæ S. S. Trinitatis.

Probatur. Illud nomen propriè convenit tertiæ personæ SS. Trinitatis, quod illi tribuitur per oppositionem ad alias personas: atqui Spiritus sancti nomen tribuitur tertiæ personæ per oppositionem ad alias personas, ut patet ex textibus quos ad primæ conclusionis probationem laudavimus.

Objicies 1. Prima & secunda persona SS. Trinitatis non minùs sunt Spiritus, & quidem sanctus, quàm tertia: neque enim in eis aliquid est quod aut materiam aut impuritatem sapiat: ergo Spiritus sancti nomen non est tertiæ personæ proprium.

Resp. dist. ant. Non minùs sunt Spiritus sanctus,

ctus,quàm tertia, sumendo voces istas *Spiritus sanctus*, secundùm sensum grammaticum conc. ant. secundùm sensum Ecclesiasticum, neg. ant. Sensu grammatico, qui ex duplici hâc dictione *Spiritus sanctus* petitur, non aliud significatur quàm ens immateriale ac cujusvis impuritatis ex- pers: sensu verò ecclesiastico significatur perso- na quæ in divinis spiratur, hoc est, per amorem tanquam principii spiritualis impulsus, produ- citur. Ideò autem tum Scriptura tum Patres alium sensum eis vocibus, *Spiritus sanctus*, affin- xerunt, quàm is quem illis grammatici tribue- runt, quòd sicut defectu terminorum, productio tertiæ personæ non exprimitur nomine speciali, sed generali tantùm, *productionis* nimirum voca- bulo: ita tertia persona defectu termini specialis in Scripturâ & traditione significatur hocce no- mine generali *Spiritus sanctus*.

Objicies 2. Nomen quod non significat rela- tionem, non est proprium alicui personæ; quæ enim relationem non significant, sunt absoluta, ac proinde communia singulis personis: atqui Spiritûs sancti nomen non significat relationem: ergo, &c.

Resp. dist. maj. Nomen quod relationem non significat, neque secundùm sensum grammati- cum, neque secundùm sensum Ecclesiasticum, non est proprium, conc. maj. quod non significat secundùm sensum grammaticum, sed significat secundùm Ecclesiasticum, neg. maj. Responsum illud est S. Thomæ, qui 1.p.q.36.art.1. sic loquitur: *Ad secundum dicendum, quod licet hoc quod dico, Spiritus sanctus, relativè non dicatur, tamen pro re- lativo ponitur, in quantum est accommodatum ad si- gnificandam personam sola relatione ab aliis distin- ctam*. Addi potest, vocem de quâ agitur, significa- re relationem, si ad alias personas comparetur: siquidem ( ut ibidem observat S. Thomas ) potest intelligi quasi spiratus, ac proinde relationem di- cit ad Patrem & Filium à quibus spiratur.

CONCLUSIO 3. Donum, est nomen, quod propriè convenit tertiæ personæ SS. Trinitatis.

Probatur. Illud nomen propriè convenit tertiæ personæ SS. Trinitatis, quo exprimitur modus, quo procedit à Patre & Filio: nimirum modis quibus personæ procedunt, iis tantum proprii sunt: atqui hoc nomine, *Donum*, exprimitur modus, quo tertia Trinitatis persona procedit à Patre & Filio: siquidem modus, quo tertia persona procedit, est per amorem: sed processio per amorem exprimitur per hoc nomen, *Donum*: scilicet ipsemet amor est donum, cum in eo positus sit, quòd alicui objecto velimus bonum; est etiam principium aliorum donorum, nempe iis tantum conferuntur dona, qui diliguntur: ergo, &c.

Objicies 1. Dari convenit etiam Filio, juxta illud Isajæ 9. *Filius datus est nobis*: ergo donum non est nomen, quod propriè, hoc est, soli tertiæ Trinitatis personæ conveniat.

Resp. dist. ant. Dari impropriè, convenit etiam Filio, conc. ant. dari propriè, neg. ant. Ratio est, quia id tantum propriè datur, quod datur vi suæ processionis, quemadmodum id tantum propriè generatur, quod vi processionis procedit in similitudinem naturæ: at tertia persona datur vi suæ processionis, non autem Filius; nam Filius datur ex amore quo Pater hominem diligit, juxta illud Joannis 3. *Sic Deus dilexit mundum, ut Filium suum unigenitum daret*: amor verò non est ratio, per quam Filius à Patre procedit.

Objicies 2. Vel tertia Trinitatis persona est donum respectu aliarum personarum, vel respectu creaturarum: atqui neutrum dici potest. Non primum, neque enim tertia persona aliis datur: Non etiam secundum, quia alioquin, non esset donum, nisi in tempore; quod est absurdum.

Resp.

Resp. ad 1. tertiam personam esse sub utroque respectu donum: & quidem 1. respectu aliarum personarum, tanquam principium à quo datur; 2. etiam respectu creaturarum, tanquam subiectum cui communicatur, juxta illud Apostoli: *Charitas Dei diffusa est in cordibus vestris per Spiritum sanctum, qui datus est vobis.* Ad 2. dist. ant. Tertia persona esset in tempore tantum, donum in actu, conc. ant. neque enim actu creaturis data est, nisi in tempore: donum in potentiâ, seu quod ex se dari possit, si sit subiectum cui datur, neg. ant. Vide S. Thomam 1. p. q. 38. art. 2. ad 1. Vide etiam Augustinum lib. 15. de Trinitate, cap. 19.

CONCLUSIO 4. Amor est nomen quod propriè convenit tertiæ personæ.

Probatur autoritate & argumento Augustini, qui lib. 15. de Trinitate, cap. 17. sic loquitur: *Si ergo propriè aliquid horum trium charitas nuncupanda est, quid aptius, quàm ut hoc sit Spiritus sanctus?* Nec obstat, quòd in Trinitate aliud non sit substantia, & aliud charitas; ac proinde sicut substantia communis est, ita & charitas. Nam tum in Scripturis tum in Patribus usus invaluit, ut charitas, seu amor, tribueretur tertiæ personæ eò quòd (ut sæpius observatum est) per amorem à Patre ac Filio procedat. Tamen (ait ibidem Augustinus) *propriè Spiritus sanctus charitas nuncupatur.*

Confirmat S. Doctor comparatione, quæ ex lege ducitur. Quemadmodum quamvis lex nunquam universaliter, hoc est, pro integro codice veteris testamenti sumatur; aliquando tamen sumitur propriè & singulariter pro ejusdem veteris testamenti libro aliquo particulari: sic etiam charitas, quamvis toti Trinitati conveniat, *Deus charitas est*, invaluit tamen usus, ut tertiæ personæ propriè tribueretur. *Hæc ideo dixi* (verba sunt, quæ Augustinus mox allatæ comparationi subjicit) *ne quisquam propterea nos inconven-*  
*nien-*

*menter existimet charitatem appellare Spiritum sanctum, quia & Deus Pater, & Deus Filius potest charitas nuncupari. Sicut ergo unicum Dei Verbum propriè vocamus nomine Sapientiæ, cum sit universaliter & Spiritus sanctus, & Pater ipse sapientiæ: ita Spiritus sanctus propriè nuncupatur vocabulo charitatis, cum sit universaliter charitas & Pater & Filius.*

## CAPUT II.

*De processione Spiritus sancti à Patre & Filio.*

**Not. 1.** PRIMUS qui apertè negavit, Spiritum sanctum à Patre Filioque procedere est post Nestorium Theodoretus. Siquidem in confutatione Anathematismi noni Cyrilli damnavit Cyrillum, quòd asseruisset, proprium esse Filii Spiritum, addiditque, id esse blasphemum & impium, si ita intelligeret, ut vellet ipsum aut ex Filio aut per Filium extantiam habere. Photius qui per vim abjecto Ignatio, sedem Constantinopolitanam invaserat, idem quod antea Theodoretus post suam à Nicolao Papa dejectionem, asseruit circa annum 863. Photio deinceps adhæserunt Græci: scilicet articulum, quo negatur Spiritum sanctum à Patre Filioque procedere, jactarunt olim & nunc etiam jactant tanquam tesseram quâ se discernant à Latinis.

**Not. 2.** Post Photii mortem Græci sæpiùs cum Latinis de quæstione, de quâ agitur, manûs conseruerunt. In Concilio Barenfi, quod Urbano Papa II. celebratum est, Anselmus Episcopus Cantuariensis pro Latinis adversus Græcos strenuè decertavit. In Concilio Lateranensi IV. Græci abjuratâ suâ hæresi redierunt in Ecclesiæ Catholicæ communionem: verùm post annos circiter triginta sex in pristinum schisma & antiquum errorem relapsi sunt. Imperante Michaelē

Palæologo, iterum concordiam cum Latinis injecerunt in Concilio, quod sub Gregorio X. anno 1274. Lugduni habitum est. Post Michaelis Palæologi mortem, quæ contigit anno 1283. Græci imperante Andronico Michaelis filio, errorem de processione Spiritûs sancti à solo Patre rursus amplexi sunt. Imperante Joanne Palæologo, anno 1439. celebrata est generalis Synodus, in quâ Græci post multas disputationes tum Ferrariæ, tum Florentiæ habitas, iterum subscripsere dogmati Catholico; sed post Concilium operâ Marci Ephesini præsulis, qui Florentino decreto subscribere noluerat, Græci ad antiquum suum errorem redierunt.

*Not. 3.* Ut cum methodo controversia, de quâ est quæstio, pertractetur, quærendum est, utrum dogma Catholicum demonstrari possit 1. ex Scripturâ; 2. ex Patribus Græcis; 3. ex Patribus Latinis; 4. ex Conciliis Oecumenicis; ac tandem 5. qua ratione solvi debeant Græcorum schismaticorum objectiones.

## A R T I C U L U S I.

*Vtrum processio sancti Spiritus à Filio, Scripturis demonstrari possit.*

**C O N C L.** **P**rocessio sancti Spiritûs à Filio potest Scripturis demonstrari.

Probatur. Scripturæ asserunt 1. Spiritum sanctum mitti à Filio: scilicet, Christus sic loquitur Joannis 15. *Cum venerit Paracletus, quem ego mittam vobis à Patre, Spiritum veritatis, qui à Patre procedit, ille testimonium perhibebit de me: sic etiam cap. 16. Si non abiero, Paracletus non veniet ad vos: si autem abiero, mittam eum ad vos.* Asserunt 2. Spiritum sanctum de Filio accipere: *Ille me clarificabit* (ait Christus Joannis 16.) *quia de meo accipiet, & annuntiabit vobis: Quâ autem ratione accipiat, sic exponit: Omnia quæ*

*quæcumque habet Pater, mea sunt; propterea dixi quia de meo accipiet.* Afferunt 3. Spiritum sanctum esse Spiritum Filii: *Misit Deus Spiritum Filii sui in corda vestra:* verba sunt Pauli ad Galatas 4. *Tentabant ire in Bithiniam* (inquit Lucas Act. 16.) *& non permisit eos Spiritus Iesu.* Afferunt 4. Christum insufflandi, seu inspirandi cæremoniâ usum fuisse, cum Spiritum sanctum post resurrectionem Apostolis infudit: *Hæc cum dixisset* (Joan. 20.) *insufflavit & dixit eis: Accipite Spiritum sanctum.* Atqui ea loca demonstrant sancti Spiritûs à Filio processionem: ergo ea processio potest Scripturis demonstrari.

Minor propositio, in quâ vis argumenti sita est, sic per partes ostenditur.

Primò, Missio in divinis supponit processionem: ideò enim Pater non mittitur, quia ab alio non procedit. Pater (inquit Augustinus lib. 4. de Trinitate, cap. 19.) *cum ex tempore à quoquam cognoscitur, non dicitur missus: non enim habet de quo missus sit, aut de quo procedat:* ergo, si Spiritus sanctus à Filio mittitur, ut eum mitti fidem faciunt Scripturæ, à Filio procedit. Athanasii est illud argumentum: sic enim in epist. ad Serapionem loquitur: *Hic est ordo naturæ divinæ à Patre & Filio, ut qui à nullo est, à nullo mittatur; & qui est ab alio, in nomine suo non veniat, sed in nomine illius, à quo existit. Ita & Spiritus sanctus, qui à se non est, à se venire non debuit, sed in nomine illius à quo est, & à quo habet, ut hypostasis sit, Deus, quemadmodum de eo dicit Filius, Paracletus Spiritus sanctus, quem mittet Pater in nomine meo.*

Nec alicujus est momenti quod Græci respondent, contententes, Scripturæ verba, quibus asseritur Spiritum sanctum à Filio mitti, intelligi debere non quidem de ipsâ Spiritûs sancti personâ, sed de donis quæ per quandam appropriationem (ut loquuntur theologi) tribuuntur Spiritui sancto. Non est (inquam) alicujus momenti. Nam



1. supponit ea responsio, personas divinas nobis non dari; sed tantum communicari nobis earum effectus: at ea suppositio repugnat hisce Christi verbis, Joannis 14. *Si quis diligit me, sermonem meum servabit, & Pater meus diligit eum, & ad eum veniemus, & mansionem apud eum faciemus.* 2. Quod solum habet rationem effectus, non dicitur mitti, sed dari tantum aut communicari: ergo Spiritus missio, de qua loquitur Evangelium, est missio ipsiusmet personæ Spiritus sancti.

*Secundò*, Persona quæ recipit esse à Filio, à Filio procedit: nimirum processio nihil aliud est, quam receptio esse, seu essentiae & existentiae: atqui Spiritus sanctus recipit esse à Filio: siquidem, ex Scripturâ, quidpiam recipit à Filio: at id quod recipit, non est quid accidentale, cum accidentia locum in Deo non habeant; est ergo aliquid substantiale: sed substantiale non aliud est, quam essentia & existentia, quæ quidem in divinis ne per mentem quidem separari possunt.

Nec audiendi sunt Græci, cum reponunt, Christum non dixisse, *De me accipiet*, sed *De meo*, hoc est, *De meo Patre*. Non sunt (inquam) audiendi. Nam 1. Si Spiritus sanctus de substantiâ Filii à Patre recipiat, recipit quoque ab ipsâ Filii personâ; quæcumque enim, exceptâ paternitate, Pater habet, Filii sunt: ergo cum Pater, fatentibus Græcis, sit principium Spiritus sancti, Filius est pariter illius principium.

*Tertiò*, Ille procedit à Filio, qui dicitur Spiritus Filii. Nam 1. ideo asseritur à Patre procedere, quod in Scripturis dicatur Spiritus Patris: ergo pariter ex eo quod dicatur Spiritus Filii, dici debet à Filio procedere. 2. Spiritus sanctus non potest esse Filii, nisi aut tanquam superior, aut tanquam inferior, aut tanquam æqualis: Non est Filii in duplici priore sensu, sed in posteriore

tantum: at res æqualis, non dicitur esse alterius nisi ab eâ procedat: Atqui ( ut probatum est ) Spiritus sanctus in Scripturis dicitur Spiritus Filii, ergo ab eo procedit.

*Quartò*, qui insufflavit, ut daret Spiritum sanctum, est principium Spiritus sancti: quid enim aliud inusitatâ illâ cæremoniâ potest significari, quàm quòd sicut flatus ex ore procedit, ita Spiritus sanctus procedit à Filio? *Nisi procederet & de ipso* ( inquit Augustinus lib. 3. contra Maximinum, cap. 14. ) *non diceret discipulis, Accipite Spiritum sanctum, eumque insufflando daret, ut à se quoque procedere significans, apertè ostenderet flando, quòd spirando dabat occultè.*

## ARTICULUS II.

*Utrum processio sancti Spiritus à Filio possit ex Patribus Græcis demonstrari.*

CONCL. **P**rocessio sancti Spiritus à Filio potest ex præcipuis Patribus Græcis demonstrari.

Probatur. Græci Patres & explicitè & implicitè docuerunt, Spiritum sanctum à Filio procedere: ergo illius processio à Filio potest ex Patribus Græcis demonstrari. Prior antecedentis pars ostenditur variis Græcorum Patrum textibus.

*Primò*, hæc habet Epiphanius in Ancorato, numero 67. *Iam verò cum Christus ex Patre credatur Deus de Deo, & Spiritus ex Christo, sive ab ambobus, ut Christus his verbis asserit: Qui à Patre procedit, & hic de meo accipiet.* Unde sic conficitur argumentum: Ille censuit, Spiritum sanctum à Filio procedere, qui asseruit, eum esse Deum ex Christo, sicut ipse Christus est Deus ex Patre: atqui Epiphanius id asseruit, idque confirmavit verbis Euangelicis, *De meo accipiet,*

piet, quibus Latini contra Græcos utuntur: ergo, &c.

Confirmari potest argumentum pluribus aliis ejusdem Epiphanii textibus, sed satis sit iste, quem in Ancorato, num. 72. legere est: *Igitur si à Patre procedit, & de meo ( ut ait Dominus ) accipiet, quemadmodum nemo novit Patrem, nisi Filius; neque Filium, nisi Pater: & ita dicere audeo, neque Spiritum, nisi Pater, & Filius à quo procedit, & à quo accipit: & neque Filium ac Patrem, nisi Spiritus sanctus, qui verè glorificat, & qui docet omnia, qui testatur de Filio, qui à Patre, & ex Filio. Vide in actis Concilii Florentini plurima alia Epiphanii loca, quibus Latini in eâ Synodo contra Græcos usi sunt.*

Secundò, Cyrillus Alexandrinus lib. qui de lapsu & conversione hominis inscribitur, probat Spiritum sanctum non esse mutabilem eò, quòd sit *Dei Patris & Filii ille qui substantialiter ex utroque, nimirum ex Patre per Filium, profluit Spiritus*. Eum autem locum de ipsomet Spiritu sancto, non autem de illius donis, intelligi debere, probant hæc verba: *Qui substantialiter ex utroque profluit*: neque enim dona sancti Spiritus ex Dei Patris & Filii substantiâ profluunt. Præterea, si in laudato textu nomine Spiritus intelligatur temporalis missio per dona & effectus, ineptum erit argumentum, quod Cyrillus adhibuit, ut probaret, mutabilem non esse Spiritum sanctum: *Mutabilis autem nullo modo Spiritus est, siquidem est Dei Patris & Filii*. Nempè nihil magis obnoxium est mutationi, quàm missio per externa dona, tum quòd temporalis sit, tum etiam quòd modò fiat, modò verò non fiat illa missio.

Idem S. Doctor in Commentariis in Joelem cap. 2. hæc etiam habet, quæ litem planè dirimunt: *Nam qua Deus, & ex Deo secundum naturam est Filius .... proprius ipseus est, & in ipso & ex ipso Spiritus*. Libro 34. Thesauri hæc cite-

rum habet, quæ non minùs sunt evidentiâ, quàm quæ mox laudata sunt ex commentariis in Joëlem: *Cum ergo Spiritus sanctus in nobis existens conformes nos efficiat Deo, procedat autem Patre & Filio; perspicuum est, divinæ ipsum esse substantiæ, substantialiter in ipsa & ex ipsa procedentem, quemadmodum utique flatus ille qui ex ore hominis excurrit.* Manifestè constat, Cyrillum eo in textu loqui de ipsomet Spiritu sancto, cum asserat Spiritum, de quo loquitur, divinæ esse substantiæ, & ex ipsâ procedere: at asserit, Spiritum de quo loquitur, non minùs ex Filio quàm ex Patre procedere, idque confirmat exemplo flatus, qui ex ore hominis excurrit: ac proindè quemadmodum flatus ille verè ex hominis ore procedit: ita etiam Spiritus sanctus verè ex Filio procedit.

*Tertio*, Basilii libro 3. contra Eunomium docet, Spiritum sanctum esse, tum ordine tum dignitate, secundum à Filio, eo quòd *esse ab illo habeat, & ab ipso accipiat, & annuntiet nobis, & omninò ex illa causa pendeat*: atqui habere, accipere esse à Filio, est ab eo procedere: ergo, &c.

Respondit olim Marcus Ephesius in Concilio Florentino: 1. Basilium equidem innuisse, Spiritum sanctum esse ordine ac dignitate secundum à Filio, sed id asseruisse non ex propriâ sententiâ, sed ex sententiâ Eunomii, qui inde colligebat, Spiritum sanctum esse non personâ tantum, sed etiam naturâ secundum à Filio. Marcus responsionem confirmavit ex his verbis, quæ in laudato Basilii textu leguntur: *Pietatis sermo fortasse tradit.* Idem Marcus Ephesius respondit, verba quæ laudata sunt, non legi in germano Basilii textu; sed esse addita & inserta ab aliquibus Latinis.

Verùm inanes sunt ambæ illæ Marci responsiones. Nam 1. Basilii pluribus aliis in locis constanter asseruit, Spiritum sanctum esse secundum

dum à Filio, & tertium in Trinitate, ut videre est in illius Epistolâ centesimâ quæ est ad Canonicas, ubi ordinem illum probat ex traditâ à Christo Baptismatis formulâ: *Spiritus verò sanctus* ( inquit ) *eo collocatur ordine, quem nos in Evangelio Dominus edocuit, dicens: Euntes, baptizate &c.* 2. Verba de quibus agitur, reperiuntur in codicibus qui ante sexcentos annos, quàm Florentina Synodus haberetur, scripti sunt: ac proinde ante exortam de Spiritus sancti processione controversiam, ut probat Joannes, qui pro Latinis adversus Græcos egit in Concilio Florentino.

Jam verò quod spectat ad alteram partem antecedentis, scilicet, Patres Græcos implicitè docuisse, Spiritum sanctum à Filio procedere, vario rationum genere demonstrari potest.

Græci Patres asseruerunt 1. Filium esse fontem Spiritus sancti. Nimirum passim aquam vivam, quam Joannis sexto Christus ipse testatur à se profluere, interpretantur de Spiritu sancto. Vide Athanasium in libro de humanâ naturâ susceptâ, veteris editionis, pag. 469. Cyrillum lib. 5. in Joannem, Chrysostomum qui sic loquitur tom. 5. pag. 684. *Vides fontem aquæ Deum; aquam autem vivam Spiritum sanctum. Fons aquæ vivæ Pater est; flumen ex fonte procedens Filius; aqua fluminis Spiritus sanctus.*

Asseruerunt 2. Spiritum sanctum esse ex substantiâ Filii: *Hinc habes* ( inquit Cyrillus lib. 13. Thesauri ) *ex Salvatoris substantia Spiritum sanctum esse, nec alienum ab unus deitatis essentia.*

Asseruerunt 3. Spiritum sanctum proprium esse Filii, vel ( ut alii loquuntur ) substantiæ Filii: *Credere namque debemus* ( ait Cyrillus Alexandrinus libro decimo Commentariorum in Joannem ) *quoniam Spiritus sic proprius Filii est, sicut sanè ipsius quoque Dei Patris.* Asseruerunt

4. Spiritum sanctum esse *Omoousion*, hoc est, consubstantiali Filio: *Consubstantialis est Deo &*

*Patris* ( inquit Cyrillus lib. 4. in Nestorium ) *nec non & Filio ipsi*. Afferuerunt 5. Spiritum sanctum esse Filii veluti odorem, vaporem, flatum, halitum: *Quod si Spiritus est bonus odor, & forma Filii* ( inquit Athanasius in Epistolâ ad Serapionem ) *perspicuum est, Spiritum non posse esse creaturam*.

Ex iis verò quæ hucusque prolatae sunt, Patrum Græcorum sententiis, sic conficitur argumentum: Illi docuerunt, Spiritum sanctum à Filio procedere, qui afferuerunt, Filium esse fontem à quo Spiritus sanctus profluit; Spiritum esse ex substantiâ Filii; ipsum esse Filii proprium; esse consubstantialem Filio; esse Filii veluti odorem, vaporem, flatum, halitum. Siquidem 1. idea fontis in eo posita est, quod sit originis principium respectu ejus, quod ex ipso profluit: 2. Nullum ens potest esse ex alterius substantiâ, nisi ab eo procedat: scilicet eâ ratione Patres utuntur, ut adversus Sabellianos probent, personas à se invicem esse realiter distinctas, & unam esse principium alterius; hincque concludunt, unum fratrem non posse dici esse ex alterius substantiâ, quod ab eo non procedat: 3. Ob eandem rationem duo fratres non dicuntur consubstantiales; principium enim consubstantialitatis est processio: *Substantiæ porro identitas* ( ait Basiliius Homiliâ contra Sabellianos ) *ideo inest, quoniam ex Patre Filius non jussione factus est, sed natura genitus*: 4. Odor, sapor, halitus, sunt energię, seu, productiones ejus, cujus sunt odor, sapor, halitus: Atqui Græci Patres ( ut patet ex locis proximè laudatis ) ea omnia afferuerunt: ergo docuerunt, Spiritum sanctum à Filio procedere.

Respondebis, quæ prolata sunt ex Patribus loca ad probandum, Spiritum sanctum à Filio procedere, id nequaquam probare: Nam vel intelliguntur de solâ consubstantialitate Spiritûs cum Filio, non autem de illius productione; vel si de pro-

productione, vox, *Spiritus*, non accipitur pro personâ divinâ, sed pro virtute Spiritus sancti, seu pro donis, quæ per quandam appropriationem Spiritui sancto tribuuntur. Itaque sensus Patrum est 1. Spiritum sanctum esse consubstantialem Filio, quia est ex substantiâ Filii, quæ ipsi à Patre communicatur; unde Christus non dicit de Spiritu sancto, *De me accipiet*, sed *De meo*, seu *de mea essentia*: 2. Cum Patres scribunt, Spiritum sanctum à Patre ac Filio mitti, procedere, oriri, id intelligitur non de missione ipsius personæ, sed de collatione donorum externorum: ergo, &c.

Sed inanes sunt ejusmodi responsiones. Ad 1. enim negari debet antecedens; ad cujus priorem probationem, nego, loca de quibus est quæstio, probare tantum consubstantialitatem Spiritus cum Filio. Nam 1. in eâ suppositione tam Filius dici potest procedere à Spiritu sancto per Spiritum sanctum, quàm Spiritus à Filio per Filium: siquidem Pater non minùs communicat Filio substantiam quæ est in Spiritu sancto, quàm Spiritui sancto substantiam quæ est in Filio: verum id dici non potest, Gregorio Nysseno teste, qui Oratione 3. in Orationem Dominicam expressè scribit, *Filium Spiritus sancti neque esse, neque dici, neque hanc relativam consecutionem converti, cum tamen Spiritus Christi nominetur*. 2. Quæ secundum relationem dicuntur, substantiam non significant, sed personas: atqui voces istæ: *A Patre: Per Filium: Deo meo accipiet: Quem ego mitto vobis à Patre*, dicuntur secundum relationem, quia exprimunt ordinem & habitudinem quam personæ ad se invicem habent. 3. Patres non idèd dixerunt, Spiritum procedere à Filio, ut ipsi consubstantialis sit; è contra idèd asseruerunt, ipsum esse consubstantialem, quòd à Filio procedat, quemadmodum cum adversùs Arianos disputarunt, asseruerunt, idèd Verbum esse consubstantiale Patri, quòd à Patre procedat, ut vide-

re est hujusce tomi dissertatione 1. ubi actum est de Verbi consubstantialitate cum Patre. 4. quamvis Filius sit ex eâdem substantiâ, quæ reperitur in Spiritu sancto, nusquam scripserunt, Filium esse proprium Spiritus sancti : quod tamen de Spiritu sancto respectu Filii docuerunt.

Ad alteram antecedentis, de quo agitur, probationem, neg. loca de quibus est quæstio, non intelligi de ipsâ Spiritus sancti personâ. sed de collatione donorum. Siquidem 1. Spiritum produci à Spiritu per Spiritum, nusquam dixerunt Patres; id tamen dicere debuissent, cum charismata, seu dona, non minùs sint propria Spiritus sancti quàm Filii; imò semper invaluit usus ea per appropriationem Spiritui sancto tribuere. 2. Cum vox, *Spiritus*, dicitur per oppositionem ad Patrem & Filium, non charismata, sed personam significat: atqui cum Patres dicunt, Spiritum à Filio, aut à Patre per Filium procedere, vocem, *Spiritus*, proferunt cum oppositione ad Patrem & Filium, ut videre est in textibus quos ex Patribus suprâ laudavimus, ac præsertim ex Epiphanio qui cum in Ancorato scribit Filium esse Deum ex Deo; tam ipsum quàm Spiritum sanctum ex eadem esse divinitate; Spiritum ex Filio procedere; vocem, *Spiritus*, reliquis personis opponit.

Idem etiam patet ex Basilio, qui libro quinto contra Eunomium quærit, cur Spiritus sanctus quem asserit à Patre per Filium procedere, non sit Filius Filii: scilicet evidens est, Basilium in eâ quæstione Spiritum aliis personis opponere: Itaque ( inquit ) *Spiritum quidem in Deo esse disertè prædicavit Apostolus dicens, Spiritum qui ex Deo est, accepimus; & per Filium prodisse perspicuum fecit, Filii Spiritum nominans ipsum, sicut & Dei.* Præterea impertinens esset Basilii quæstio, si Spiritus nomine dona, non personam, intellexisset: Cui enim potest in mentem venire, Spiritum sanctum esse Filium Filii, si sit ipsi persuasum



sum, aut Spiritus sancti personam à Filio non produci, aut nomine Spiritus qui à Filio produci dicitur, intelligat non personam, sed effectus, ut sunt charitatis, sapientiæ, aliaque virtutum dona?

Addendum est, quòd si Basilius illam quæstionem, insulsam alioquin, aliquorum nomine, qui rem non intellexissent, proposuisset, debuisset respondere, Spiritum non esse Filium Filii, quia iis locis ubi dicitur ab eo produci, exire, scaturire, manare, non intelligitur tertia SS. Trinitatis persona, sed charismata, quorum productio toti Trinitati ex æquo conveniunt: Eam tamen, facilem alioquin, responsionem non dedit Basilius; sed istam, quæ invictè probat, eum nomine Spiritus, non charismata, sed ipsam sancti Spiritus personam intellexisse: *Non quòd non sit ex Deo per Filium, sed ne Trinitas in infinitam abire multitudinem putetur, dum filios ex filiis, ut in hominibus usurenit, eam habere suspicantur.*

Idem denique videre est tum in ipso Basilio tum in aliis Græcis Patribus, qui verba, *procedere, exire, manare*, de processione unius personæ ab aliâ, non autem de communicatione donorum, semper interpretantur: *Et profunditur quidem* (ait Cyrillus de Spiritu loquens, in Epistolâ ad Monachos) *sive procedit tanquam à fonte, à Deo & Patre: tribuitur autem creaturæ per Filium.*

### ARTICULUS III.

*Vtrum processio sancti Spiritus à Filio possit ex Patribus Latinis demonstrari.*

CONCL. **L** Atini Patres docuerunt, Spiritum sanctum à Filio procedere.

Probatur. Tertullianus lib. adversus Praxeam hæc scribit: *Tertius est Spiritus à Deo, & Filio.*

at inter divinas personas non est alius ordo, quàm ordo originis: ergo, &c.

Hilarius lib. 2. de Trinitate, hæc habet de Spiritu sancto: *Loqui de eo non necesse est, quia de Patre, & Filio auctoribus confitendus est*. Hæc etiam Ambrosius lib. 1. de Spiritu sancto, cap. x. *Spiritus quoque sanctus, cum procedit à Patre & Filio, non separatur à Patre, non separatur à Filio*. Augustinus lib. 4. de Trinitate idem dogma sæpius proficitur: *Nec ( inquit ) possumus dicere, quòd Spiritus sanctus & à Filio non procedat: neque enim frustra idem Spiritus, & Patris & Filii Spiritus dicitur*.

Leo Magnus Epistolâ 93. docet, *aliu[m] esse qui genuit, aliu[m] qui genitus est, aliu[m] qui de utroque processit*. Gennadius Massiliensis lib. de Ecclesiasticis dogmatibus, cap. 2. sic de eodem articulo loquitur: *Credimus, unum esse Deum Patrem & Filium & Spiritum sanctum; Patrem eo quòd Filium habeat; Filium eo quòd Patrem habeat; Spiritum sanctum eo quòd sit ex Patre & Filio procedens*.

Nec audiendi sunt Græci, cum reponunt, *litem de quâ agitur, dirimi non debere ex Patrum Latinorum sententiis*. Siquidem 1. Patres Latini qui mox laudati sunt, iis temporibus vivere, quibus Græci Catholicos habebant Occidentales. 2. Synodi quas Græci pro Oecumenicis agnoscunt, vim multam in definiendis fidei dogmatibus tribuerunt Latinis Patribus. Tertia, quæ est Ephesina, par. 2. act. 1. Cypriani & Ambrosii testimoniis utitur. In quartâ, actione 8. ac aliis, Leoni Magno omnia ferè tribuuntur. In sextâ, Ambrosius, Augustinus, Leo Magnus summâ cum laude proferuntur. 3. Ex illâ Græcorum responsione sequitur, Ecclesiam Occidentalem, cum semper docuerit, Spiritum à Filio procedere, pessimâ hæresi quovis sæculo laborasse: quod tamen ipsimet Græci vix ( ut suspicamur ) asserere poterunt, cum Ecclesia Occiden-

Differt.V. *De person. div. in part.* 313  
dentalis homines omnium doctrinæ, tum pietatis genere præditos, imò & miraculis illustres in suo aluerit sinu.

## ARTICULUS IV.

*Quid Oecumenica Concilia definierint de processione sancti Spiritus à Filio.*

CONCL. **O**Ecumenica Concilia, quibus ipsi etiam Græci adfuerunt, definierunt tanquam articulum fidei, Spiritum sanctum à Filio procedere.

Probatur. Articulus de quo est quæstio, definitus fuit 1. in Concilio Lateranensi IV. cap. 1. De fide Catholicâ, ubi hæc leguntur: *Pater à nullo, Filius autem à solo Patre, ac Spiritus sanctus ab utroque pariter, absque initio semper & sine.*

Definitus fuit 2. in altero Concilio Lugdunensi sub Gregorio Papâ X. In eo nimirum à Latinis Latinè decantatum est symbolum cum additione, *Filioque*; Græcè quoque cum eâdem additione decantatum est à Græcis, ut in ejusdem Concilii actis videre est.

Definitus fuit 3. in Concilio Florentino: sic enim habet Definitio Concilii, quæ quidem promulgata est pridie nonas Julii, anno 1439. In nomine igitur sanctæ Trinitatis, *Patris & Filii & Spiritus sancti*, hoc sacro universali approbante Florentino Concilio, definimus, ut hæc fidei veritas ab omnibus Christianis credatur & suscipiatur, sicque omnes profiteantur, quòd Spiritus sanctus ex Patre & Filio æternaliter est, & essentiam suam, suumque esse subsistens habet ex Patre simul & Filio, & ex utroque æternaliter tanquam ab uno principio & unica spiratione procedit.

Catholicæ definitioni Concilium Florentinum subjecit responsum ad argumentum ex nonnullis

nullis veteribus desumptum adversus processionem sancti Spiritus à Filio : *Declarantes* ( inquit ) quòd id, quod sancti doctores & Patres dicunt, ex Patre per Filium procedere Spiritum sanctum, ad hanc intelligentiam tendit, ut per hoc significetur, Filium quoque esse, secundum Græcos quidem, causam, secundum Latinos verò principium subsistentiæ Spiritus sancti, sicut & Patrem. Deinde idem Concilium reddit rationem, per quam definitio ab illo tradita confirmetur : *Et quoniam* ( ait ) omnia quæ Patri sunt, Pater ipse unigenito Filio suo gignendo dedit, præter esse Patrem, hoc ipsum quod Spiritus sanctus procedit ex Filio, ipse Filius à Patre æternaliter habet, à quo etiam æternaliter genitus est. Eam Concilii definitionem omnes Græci, uno excepto Marco Ephesiorum Episcopo, amplexi sunt; eâ tamen lege, ut licet faterentur, particulam, *Filioque*, rationabiliter à Latinis insertam fuisse symbolo, eam tamen ipsi non infererent.

## ARTICULUS V.

*Utrum rationibus theologicis demonstrari possit Spiritum sanctum à Filio procedere.*

**CONCL. I.** **R**ationibus theologicis demonstrari potest, Spiritum sanctum à Filio procedere.

Probatur. Id demonstrari potest rationibus theologicis, quod potest demonstrari duobus his principiis: *Quicumque Patri propria sunt, excepta paternitate, propria sunt & Filio*: In divinis sola processio est fundamentum distinctionis: atqui duobus illis principiis demonstrari potest, Spiritum sanctum à Filio procedere: ergo demonstrari potest rationibus theologicis.

Prior pars minoris propositionis, in qua posita est difficultas, sic ostenditur: Spiritus sanctus  
ab

ab eo procedit, cui convenit actio, per quam producit: atqui Filio convenit actio, per quam Spiritus sanctus producit: siquidem ea actio est spiratio activa: sed spiratio activa convenit Filio: nempe, ut habet prius principium, id omne, excepta paternitate, convenit Filio, quod convenit Patri: *Ceterum* ( inquit Cyrillus Alexandrinus lib. 2. Dialogorum ad Hermiam ) *credimus Patri Filium, & quodlibet aliud habentem ex æquo, eo solo excepto, quod non genuit. Quæ quidem Cyrilli & aliorum Patrum sententia videtur esse desumpta ex his Christi verbis in euangelio: Omnia quaecumque habet Pater, mea sunt.* Atqui spiratio activa convenit Patri: ergo convenit quoque Filio.

Altera ejusdem minoris propositionis pars sic ostenditur. Ille procedit à Filio, qui à Filio realiter distinguitur: atqui Spiritus sanctus realiter à Filio distinguitur: ergo, &c.

Minor est de fide, unde probatur major. In divinis sola processio unius ab alio est fundamentum realis distinctionis: siquidem illud solum in divinis est fundamentum realis distinctionis, quod solum est fundamentum relationis: scilicet sola relatio est principium multiplicationis, numeri, ac distinctionis: unde trita sunt apud Patres axiomata: *In divinis non est distinctio, nisi ubi obviat aliqua relationis oppositio.* Hoc solo numerum insinuant, verba sunt Augustini tract. 30. in Joannem, quod ad invicem sunt, non quod ad se sunt: cui quidem Augustini sententiæ adhæret Fulgentius libro de Trinitate, ubi sic loquitur: *Illa relativa nomina Trinitatem faciunt: essentialia verò nullo modo triplicantur.* Atqui ( ut superius de processionibus agentes ostendimus ) processio solum est ac unicum fundamentum relationis: ergo est quoque solum fundamentum distinctionis; ac proinde si Spiritus sanctus à Filio realiter distinguitur, necesse est, ut ab eo procedat.

Quæ

Quæres, utrum si per impossibile Spiritus sanctus à Filio non procederet, ab eo tamen distingueretur.

Resp. circa eam quæstionem varias esse scholasticorum opiniones. Scotus in 1. dist. 12. q. 9. art. 2. docet, Spiritum sanctum fore realiter à Filio distinctum, etiam si ab eo non procederet; è contra Sanctus Thomas 1. p. q. 36. art. 2. docet, non fore distinctum. Cuiam ex iis sententiis subscribamus, conclusio subsequens aperiet.

CONCLUSIO 2. Si Spiritus sanctus à Filio non procederet, ab eo non foret realiter distinctus.

Probatur. Ille non distingueretur à Filio, in quo non esset fundamentum distinctionis: atqui in Spiritu sancto non esset fundamentum distinctionis à Filio; scilicet proximum fundamentum distinctionis in divinis est oppositio relativa: *Hoc solo* (ait Augustinus, ad probationem primæ conclusionis laudatus) *numerus insinuant, quod ad invicem sunt*. Sed si Spiritus sanctus à Filio non procederet, inter eum & Filium non esset oppositio relativa: non enim in eo esset ejusmodi oppositionis relativæ fundamentum: cum (ut jam observatum est) illud fundamentum non aliud sit, quàm processio unius ab alio: ergo, &c.

Argumento quod mox propositum est, usi sunt olim Latini Patres, ut sancti Spiritus à Filio processionem adversus Græcos adstruerent. Anselmus in libro quem inscripsit, De Processione Spiritus sancti, cap. 3. quærit: *Quomodo indivisibilis unitas, & insociabilis pluralitas in Deo se ad invicem habeant*: eum verò nodum hisce verbis solvit: *Sic ergo unitatis & hujus relationis consequentiæ se contemperant, ut nec pluralitas quæ sequitur relationem, transeat ad ea, in quibus prædicta simplicitas sonat unitatis, nec unitas cohibet pluralitatem, ubi eadem relatio signifi-*

*ficatur: quatenus nec unitas amittat aliquando suam consequentiam, ubi non obviat aliqua relationis oppositio: nec relatio perdat quod suum est, nisi ubi obstitit unitas inseparabilis. Idem argumenti genus adhibuit Joannes theologus, pro Latinis adversus Græcos agens in Concilio Florentino, sess. 18. Ita etiam Patres Concilii Toletani XI. in professione fidei.*

Objicies 1. Si Spiritus sanctus à solo Patre procederet, adhuc à Filio distingueretur: nam ille distingueretur à Filio, qui aliâ viâ, quàm Filius, à Patre procederet; nempe diversus productionis modus satis est, ut termini diverso illo modo producti, à se invicem distinguantur: atqui Spiritus sanctus aliâ viâ, quàm Filius, à Patre procederet: scilicet procederet per amorem quo Pater se ipsum diligeret, cum è contra Filius procedat per cognitionem quam Pater habet de se ipso: ergo, &c.

Confirmatur argumentum ex Anselmo, qui cap. 3. libri quem de processione Spiritus sancti contra Græcos exaravit, docet 1. Filium & Spiritum sanctum non habere esse à Patre eodem modo: *Habent (inquit) utique à Patre esse Filius & Spiritus sanctus, sed diverso modo, quia alter nascendo, alter producendo. Docet 2. propter eum diversum procedendi modum, non posse nasci unum, cum producitur alius; nec alium produci cum alius nascitur: Et ideo (ait) cum nascitur unus, non potest cum eo nasci ille qui per hoc alius est ab eo, quia non similiter nascitur, sed procedit. Et cum unus procedit, nequit ille simul procedere, qui per hoc est alius ab illo, quia non similiter procedit, sed nascitur. Docet 3. per hoc solum, seu quod unus producaturs nascendo, alter procedendo, unum fore diversum ab alio, quamvis nullum discrimen aliunde peti posset: Et ideo (inquit) non habet hic unitas illa vim consequentia, quia pluralitas obviat, quæ ex nativitate nascitur & processione. Nam etsi per aliud non essent plu-*

*plures Filius & Spiritus sanctus, per hoc solum essent diversi: ergo ex Anselmo, solus processio- nis modus esset principium distinctivum Spiritus sancti, si Spiritus sanctus à solo Patre procederet.*

Resp. ad 1. neg. ant. Ad 2. neg. maj. Ad 3. neg. ant. seu diversum productionis modum satis esse ut termini diverso modo producti, à se invicem distinguantur: nimirum unus & idem terminus diversis ac variis modis produci potest: Adamus v. g. qui per creationem à Deo productus est, ab alio homine per generationem produci potuisset.

Ad confirmationem dicendum est, simpliciter admitti debere duo priora, quæ tribuuntur Anselmo, tertium verò cum hacce distinctione: Per hoc solum essent diversi hypoteticè, conc. ant. absolutè, neg. ant. hoc est, Anselmus voluit Filium & Spiritum sanctum per nativitatem & productionem fore quidem diversos, sed ex suppositione, quòd unus ab alio procederet: Ratio est, quia (ut ex ipso Anselmi textu patet) Anselmus jam asseruerat, Spiritum sanctum suam à Filio originem habere, cum scripsit, eos per nativitatem & processionem esse diversos. Itaque ex Anselmo, qui jam diversi sunt origine, diversi sunt postea diverso originis modo; Filius quidem ratione nativitatis, & Spiritus sanctus ratione processionis. Ita laudatum Anselmi locum interpretatur S. Thomas 1. p. q. 36. art. 2. ad 7. ubi sic loquitur: *Ad septimum dicendum, quòd Spiritus sanctus distinguitur personaliter à Filio, in hoc, quòd origo unus distinguitur ab origine alterius: Sed ipsa differentia originis est per hoc, quòd Filius est solum à Patre, Spiritus sanctus verò à Patre & Filio. Non enim aliter processionem distinguerentur, sicut supra ostensum est.*

Objicies 2. Si Spiritus sanctus à solo Patre procederet, adhuc opponeretur Filio: siquidem esset cum Filio, respectu Patris, terminus disparatus;



tus: termini autem disparati, hoc est, qui licet ab eodem principio procedant, ut patet in duobus fratribus, ad se invicem tamen non referuntur, sibi opponuntur; unus enim non includit alium: atqui quæ opponuntur, distinguuntur à se invicem: ergo si Spiritus sanctus à solo Patre procederet, adhuc à Filio distingueretur.

Resp. ad 1. dist. maj. Opponeretur Filio, disparatè, conc. maj. relativè, neg. maj. Disting. pariter minorem: Quæ opponuntur relativè, conc. min. quæ opponuntur disparatè, subdistinguo, in creatis, conc. in divinis, nego. Ratio est, quia in creatis unum disparatum, cum sit finitum, non habet aut perfectiones aut entitatem alterius: è contra in divinis unus terminus disparatus, Filius v. g. in suppositione de quâ agitur, foret adhuc infinitus, ac proindè contineret tum entitatem tum perfectiones alterius termini disparati, seu Spiritus sancti: siquidem infinitum in ente, in perfectione, in relatione, includit omnes entitates, omnes perfectiones, omnes relationes, quæ sese invicem non excludunt: at in suppositione, de quâ est quæstio, entitas, perfectiones, relatio Filii, non excluderent entitatem, perfectiones, relationem Spiritus sancti: ea enim tantum sese excludunt, quæ relativè opponuntur, non autem quæ disparatè: sic perfectiones & entitas unius è fratribus posset, saltem divinitus, in alio fratre reperiri.

Objicies 2. Filius foret persona distincta à personâ Spiritus sancti, etiam ex suppositione, quod Spiritus ab eo non procederet: siquidem ille foret persona distincta à personâ Spiritus sancti qui independenter à personâ Spiritus sancti haberet constitutivum propriæ personæ: idem enim, ex logicis, est distinctivum, quod constitutivum: sic edò quod animal rationale sit constitutivum hominis, est pariter illius à quolibet alio ente distinctivum: atqui in eâ suppositione Filius haberet constitutivum propriæ personæ: scilicet

con-

constitutivum secundæ personæ est filiatio : sed Filius eam haberet, quippè qui procederet in similitudinem naturæ : ergo, &c.

Resp. ad 1. neg. ant. Ad 2. datâ maj. neg. min. Ad 3. dist. maj. Constitutivum secundæ personæ est filiatio perfecta, conc. maj. imperfecta tantum, neg. maj. In suppositione de quâ agitur filiatio perfecta non conveniret secundæ personæ, scilicet perfecta filiatio est processio in perfectam similitudinem naturæ cum Patre : at processio secundæ personæ non esset hujusmodi ; nec enim esset similis in virtute spirandi, quam tamen Pater haberet.

Objicies 4. Si per impossibile Spiritus sanctus à solo Filio procederet, Pater esset adhuc distinctus à Spiritu sancto ; iste enim esset procedens, ille verò minimè procedens : ergo à pari, si Spiritus sanctus à Patre solo procederet, adhuc esset à Filio distinctus.

Resp. conc. ant. neg. conseq. Ratio est, quia in eâ suppositione Spiritus sanctus, mediatè saltem, à Patre procederet : siquidem Filius & suum esse & virtutem spirandi accepisset à Patre ; ac proinde inter Spiritum sanctum & Patrem esset adhuc oppositio relativa, sicut reperitur inter avum & nepotem : at verò si Spiritus sanctus à Filio non procederet, nulla inter utrumque reperiretur oppositio relativa.

Objicies 5. Idèò Spiritus sanctus est persona distincta à Filio, & Filius persona distincta à Spiritu sancto, quòd iste procedat ut datus, ille verò ut natus ; ita enim ratiocinatur Augustinus lib. 5. de Trinitate, cap. 14. Atqui licèt à solo Patre procederet, adhuc procederet ut datus, & Filius ut natus : ergo essent personæ à se invicem distinctæ.

Resp. conc. maj. neg. min. Ratio est, quia processio per modum doni, non potest esse nisi ex duobus : siquidem processio per modum doni, est processio per voluntatem ; processio  
verò

verò per voluntatem supponit processionem per intellectum; quæ quidem cum in divinis debeat esse perfectè assimilativa, necessariò complectitur virtutem spirandi, quæ in primâ personâ continetur.

## ARTICULUS VI.

### *Solvuntur argumenta Græcorum adversus Spiritus sancti processionem à Filio.*

**Not.** **A**RGUMENTA Græcorum adversus processionem sancti Spiritus à Filio, reducuntur ad Scripturæ de ejusmodi processione silentium; ad nonnulla veterum Patrum loca, & tandem ad quasdam rationes theologicas: Ea verò secundum illum ordinem, hîc proponenda sunt ac solvenda.

#### *Solvuntur argumenta ex Scripturis petita.*

**Objicies** 1. Dogma non est admittendum, quod Scripturis non continetur: atqui istud, quod est de processione sancti Spiritus à Filio, Scripturis non continetur: ergo, &c.

**Resp.** 1. neg. maj. Ratio est, quia non solum scriptum Dei verbum, sed etiam traditum (ut harum institutionum priore tomo dictum fuit) est fidei ac morum regula: unde ipsi etiam Græci, ut in Concilio Florentino suum de processione Spiritus à solo Patre dogma statuerent, non provocarunt tantum ad sacram Scripturam, sed etiam ad authoritatem Patrum: & ubi intellexere Patres Latinos cum Græcis eo in capite convenire, injerunt cum Ecclesiâ Romanâ concordiam: *Quoniam sanctorum Patrum Occidentalium & Orientalium dicta audivimus* (verba sunt, quibus Josephus Patriarcha Constantinopolitanus in Synodo Florentinâ suam de unione sententiam expressit) *Occidentales suscipimus asserentes, Spiritum sanctum esse ex Patre & Filio.*

**Resp.**

Resp. 2. datâ majore. dist. min. Atqui istud , quod est de processione Spiritus à Filio , Scripturis non continetur explicitè, conc. min. non continetur implicitè, neg. min. scilicet continetur iis locis, in quibus Spiritus sanctus dicitur mitti à Filio , accipere de Filio , esse Spiritum Filii . Vide quæ hujusce capituli articulo primo observata sunt in ea Scripturæ loca .

Instabis . Si dogma de quo agitur , vel implicitè Scripturis contineretur , afferri non posset ratio, cur cum agitur de sancti Spiritus processione , solius Patris fiat mentio : *Cum autem venerit Paraclitus , quem ego mittam vobis à Patre , Spiritum veritatis qui à Patre procedit* : Sed absurdum est consequens : ergo , &c.

Resp. 1. neg. maj. Ratio est 1. quia ea est Scripturarum consuetudo, ut quæ pluribus personis communia sunt , uni tribuantur, non tamen cum aliarum exclusionem : sic Joannis 1. de Filio dicitur : *Erat lux vera* , licet id quoque Patri & Spiritui sancto conveniat : sic etiam Actorum 1. de Patre dicitur : *Non est vestrum nosse tempora , quæ Pater posuit in sua potestate* , quamvis tempora sint ex æquo in Patris, Filii , ac Spiritus sancti potestate . Mirum igitur non est, quod processio Spiritus , Patri, nulla Filii factâ mentione , tribuatur ; præsertim cum ex ipsis Scripturis constet, ea omnia quæ Patris sunt , esse quoque Filii ubi non obviat relationis oppositio .

Confirmatur responsio ex Latinis Patribus , qui licet expressè defenderint Spiritus à Filio processionem , nonnunquam tamen eam Patri, tacito Filio , tribuerunt : *Fontem* (ait Bernardus, Sermone IV. in Vigiliam Nativitatis Domini ) *assigna Patri, ex quo nascitur Filius , & procedit Spiritus sanctus* .

Resp. 2. Scripturam, cum agit de processione sancti Spiritus , nonnullis in locis ideò meminisse solius Patris, quod docere vellet, Patrem esse aliarum personarum fontem & originem; unum esse,  
non

non multiplex in Trinitate principium, quod tamen Patri & Filio commune sit: Si ergo & de Patre & Filio procedit Spiritus sanctus, cur Filius dixit, De Patre procedit? (quæstio est, quam sibi proponit Augustinus, tractatu 99. in Joannem.) Cur putas, nisi quemadmodum ad eum solet referre & quod ipse est, de quo & ipse est? Unde illud est, quod ait, Mea doctrina non est mea, sed ejus qui misit me. Si igitur intelligitur hic ejus doctrina, quam tamen dixit non suam, sed Patris: quanto magis illic intelligendus est & de ipso procedere Spiritus sanctus, ubi sic ait, De Patre procedit, ut non diceret, De me non procedit?

*Solvuntur argumenta ex Patribus desumpta.*

Objicies 1. Theodoretus in Confutatione Anathematismi noni, quem Cyrillus in Nestotium intorserat, hisce verbis hoc ejusdem Cyrilli dictum, *Proprium esse Filii Spiritum*, carpit. Quod autem Spiritum Filii esse proprium asserit, siquidem ut ejusdem cum eo naturæ, & ex Patre procedentem dixit, simul confitebimur, & tanquam piam suscipimus vocem. Si verò tanquam ex Filio, aut per Filium extantiam habeat, hoc ut blasphemum, & impium rejiciemus: Fidem enim adhibebimus dicenti Domino: Spiritus qui ex Patre procedit: nec non divinisimo Paulo similiter loquens: Nos autem non spiritum mundi accepimus, sed spiritum qui ex Deo Patre est. Ergo Theodoretus censuit, Spiritum sanctum à Filio non procedere.

Resp. concesso antecedente, dist. conseq. Et eo in capite Theodoretus recessit ab aliorum Græcorum doctrinâ, conc. conseq. Et ab eâ non recessit, neg. conseq. Theodoretus in Confutatione, de quâ agitur, tuebatur adversus Cyrillum Nestorii partes: mirum igitur non est, quodnaverit dogmati, quod Nestorius antea diserte propugnauerat: Hincque factum, est ut Ecclesia Catho-

tholica in quintâ & sextâ Synodo generali Theodoretî adversus Cyrillum scripta damnaverit.

Instabis. In Concilio Ephesino publicè recitatum fuit Nestorîi symbolum, recitata quoque fuit confutatio noni anathematismi Cyrilliani à Theodoretò conscripta: at sive Nestorîi symbolo, sive Theodoretî confutatione expressè assereretur, Spiritum à Filio non procedere: Et tamen nec Synodus, in suâ fidei definitione, nec Cyrillus, in declaratione sui noni anathematismi, id in symbolo Nestorîi aut in Theodoretî confutatione reprehenderunt: ergo Synodo & Cyrillo persuasum fuit, Spiritum à solo Patre procedere.

Resp. 1. argumentum illud, si valeat, plus probaturum, quàm velint Græci: scilicet Græci, sive ante Concilium Florentinum, sive in ipso Concilio Florentino, contenderunt, & nunc etiam contendunt, Spiritum sanctum à Patre *per* Filium procedere: at Theodoretus in confutatione noni anathematismi editi à S. Cyrillo, non minùs apertè professus est, id esse blasphemum & impium, quàm asserere, eundem Spiritum ex Filio procedere: id tamen nec Synodus, nec Cyrillus arguerunt in Theodoretò.

Resp. 2. Falsum esse, quòd Synodus id non damnarit, quod de processione Spiritûs à solo Patre tum Nestorius in suo symbolo, tum Theodoretus in suâ Confutatione docuerant: Nam 1. sacra synodus tanquam Catholicam admisit epistolam à Cyrillo & Alexandrinâ Synodo scriptam ad Nestorium: at in eâ epistolâ capitulo x. expressè asseritur, Spiritum sanctum à Filio procedere: Nam (verba sunt epistolæ) *est Spiritus in propria persona subsistat, eatenusque in se ipso consideretur, quatenus spiritus est & non Filius; non est tamen ab eo alienus, quando quidem Spiritus veritatis nominatur, Christus autem veritas est, & proinde quoque ab illo, atque à Deo*

& Deo Patre procedit . 2. Ipse Cyrillus in declaratione anathematismi noni, quem Theodoretus confutarat , asseruit, Filium omnia præter paternitatem habere cum Patre communia : *Esti ( inquit ) unigenitum Dei Verbum homo factum est , mansit tamen Deus , omnia præter solam paternitatem cum Patre communia habens* : Verùm qui , exceptâ paternitate, omnia habet communia cum Patre , habet communem cum eo spirationem activam . Asseruit iterum, Spiritum sanctum idèd non esse extraneum, sed proprium Filio , quòd Spiritus ex ipso sit : *Spiritus sanctum qui ex ipso est, ipsique essentialiter inest, proprium habens, divinæ potentiæ signa operabatur* .

Resp. 3. dato antecedente, seu dato, quòd nec Synodus, nec Cyrillus arguerint, quod de processione Spiritus à solo Patre Theodoretus in suâ Confutatione docuerat , neg. conseq. Ratio est, quia articulus de processione sancti Spiritus sive à Patre solo , sive à Patre simul & Filio , erat articulus incidens , seu, de quo inter Cyrillum & Nestorium præcipuè non agebatur ; mirum igitur non est, quòd Cyrillus quæstionem præcipuam de substantiali Christi divinitate, quam Nestorius impugnaverat, quamque ipse Cyrillus in anathematismo suo defenderat, ad aliam quæstionem non evocarit : Nempe scriptores, ut omnino incumbant scopo quem sibi proposuerunt, plerumque quæstiones incidentes , licèt sæpiùs gravissimi sint momenti, solent omittere .

Objicies 2. Concilii Constantinopolitani 1. Patres particulam, *Filioque* , non inseruerunt symbolo : ergo non crediderunt, Spiritum sanctum à Filio procedere .

Resp. neg. conseq. Ratio est , quia Patres illi convenerant, ut adstruerent divinitatem Spiritus sancti : sed ad id satis erat declarare, Spiritum ex Patre procedere : nam processio ex Patre, seu, ex substantiâ Patris, clarè significat personæ proceden-

dentis consubstantialitatem cum Patre producente, ut ostendimus, cum superius adversus Arianos de Verbi divinitate disseruimus. Addendum est, argumentum, si valet, probaturum, Nicænos Patres non credidisse S. Spiritus divinitatem; neque enim suo symbolo de eâ quidquam inseruerunt.

Objicies 3. Si Spiritus sanctus à Filio procederet, solus Pater non esset fons divinitatis: scilicet Filius esset quoque fons ejusdem divinitatis: is enim fons & est & dicitur, à quo alius procedit, à quo alius suam sumit originem: atqui solus Pater est fons divinitatis, juxta illud Dionysii de divinis nominibus cap. 2. *Pater solus est fons substantialis divinitatis*: ergo, &c.

Resp. ad 1. neg. maj. Ad 2. dist. ant. Is est fons à quo alius procedit, si ipse non procedat ab alio, conc. ant. si procedat ab alio, neg. ant. Filius à quo Spiritus sanctus procedit, procedit ab alio, Patre nimirum; ac proinde dici non potest, quod sit substantialis divinitatis fons & origo: id igitur soli Patri convenit, cum reliquæ personæ ab eo procedant, ipse verò à nullâ aliâ procedat.

Objicies 4. Gregorius Nazianzenus, Orat. ad Episcopos Ægypti, sic loquitur: *Omnia quæ habet Pater, Filii sunt, præter principium: omnia quæ habet Filius, Spiritus sunt, excepta generatione*: Unde sic arguitur: Ab eo Spiritus sanctus non procedit, qui cum Patre communem non habet rationem principii: atqui, ex Gregorio Nazianzeno, Filius cum Patre communem non habet rationem principii: ergo ab ipso Spiritus sanctus non procedit.

Resp. dist. maj. Ab eo Spiritus sanctus non procedit, qui cum Patre communem non habet rationem principii spirativi, conc. maj. principii generativi, neg. maj. Gregorius sumpsit principii nomen in hoc secundo sensu, non autem in primo; hoc est, docuit, omnia quæ Patris sunt, exceptâ paternitate, esse Filio communia. Nec mirum



mirum, id enim passim alii Græci Latinique Scriptores asseruerunt: *Mansit tamen Deus*, (inquit Cyrillus, mox in responsione ad primam objectionem laudatus) *omnia, præter solam paternitatem, cum Patre communia habens.*

Objicies 5. S. Joannes Damascenus qui floruit imperante Leone Isaurico, hoc est, octavo sæculo, asserit 1. Ecclesiam Græcam non dicere quòd Spiritus sit ex Filio: Porro (inquit lib. primo de fide Orthod. cap. 11.) *Spiritum sanctum tam ex Patre esse profiteamur, quàm Patris appellamus Spiritum. Ex Filio autem Spiritum non dicimus, sed eum Filii Spiritum nominamus.* Asserit 2. Spiritum ita per Filium procedere, ut tamen ex ipso non sit: *Sed & Filii* (inquit cap. 13.) *Spiritus est, non tanquam ex ipso, sed quòd per ipsum ex Patre procedat.* Asserit 3. ideò Spiritum ex Filio non procedere, quòd soli Patri principii ratio conveniat: *Solus enim Pater* (ait) *principium est.* Ex iis autem textibus sic conficitur argumentum: Ille docuit, Spiritum sanctum à Filio non procedere, qui conceptis terminis asseruit, Spiritum dici non debere, *Ex Filio*; qui asseruit, ipsum ex Patre per Filium procedere, opponendo præpositionem, *Per*, præpositioni, *Ex*; qui ideò asseruit, Spiritum dici non debere, *Ex Filio*, quòd in Trinitate solus Pater sit principium: atqui ea omnia Joannes Damascenus asseruit: ergo, &c.

Resp. 1. nonnullos propter illud argumentum censere, Damascenum Græcorum errori favisse, sicut & antea ipsi Theodoretus faverat: *Ad tertium dicendum* (inquit S. Thomas 1. p. q. 36. art. 2.) *quòd Spiritum sanctum non procedere à Filio, primò fuit à Nestorianis introductum..... Et hunc errorem secutus est Theodoretus Nestorianus & plures alii post ipsum: Inter quos fuit etiam Damascenus. Vnde in hoc ejus sententiæ non est standum. Quamvis à quibusdam dicatur quòd Damascenus, sicut non confitetur Spiritum*  
 Tom. III. P san-

*sanctum esse à Filio, ita etiam non negat ex vi illorum verborum.*

Resp. 2. disting. maj. Ille docuit, Spiritum sanctum à Filio non procedere, qui asseruit, Spiritum non debere dici ex Filio, & tanquam à secundo, & tanquam à primo principio, conc. maj. tanquam à primo principio tantum, neg. maj. Damascenus non docuit, Spiritum sanctum non esse ex Filio tanquam à secundo principio, sed tantum tanquam à primo, hoc est, non esse ex Filio tanquam à principio, quod rationem principii ab alio non acceperit. Ratio est *primò*, quia ejusdem libri cap. 9. scribit, *omnia quæ habet Pater, esse Filii, hoc solo excepto, quòd Filius ingenuitus non est*; ac proindè virtus spirandi quam Pater habet, est etiam Filii. Scribit *secundò* Spiritum à Patre per Filium procedere: at procedere per Filium idem est (ut mox dicetur) ac procedere ex Filio tanquam à principio producente, quod tamen suum esse ab alio principio receperit.

Hinc patet 1. quâ ratione intelligi debeat oppositio, quam idem S. Doctor statuit inter procedere per Filium & procedere ex Filio: nempe procedere per Filium, est procedere à personâ quæ ab aliâ procedit, & è contra procedere ex Filio, esset, in authoris sensu, procedere ex Filio tanquam à personâ quæ ab aliâ non procedit. Patet 2. quo sensu idem scriptor dicat, solum Patrem esse principium, scilicet eo sensu vult eum solum esse principium, quòd à nullo alio suum esse recipiat, sitque (ut Patres loquuntur) totius Deitatis caput & origo. Patet denique 3. nihil esse in laudatâ Damasceni sententiâ, quod cum processione sancti Spiritus à Filio non cohæreat. Vide caput sextum orationis dogmaticæ editæ à Cardinale Bessarione. Vide etiam Petavium lib. 8. de Trinitate cap. 17. ubi fusè pertractat tradita à Bessarione principia.

Objicies 6. Si Patres Græci credidissent, Spiritum

ritum sanctum ex Filio procedere, passim usque fuissent præpositione, *Ex*, ut circa articulum illum fidem suam exprimerent, quemadmodum eam adhibuerunt, cum egerunt de relatione quam Spiritus sanctus habet ad Patrem: *Qui ex Patre* (ajunt in symbolo Constantinopolitano) *procedit*: Sed usque non sunt præpositione, *Ex*, sed præpositione, *Per*; idque variis momentis ostendi potest. Athanasius in sermone qui inscribitur, *Redargutio simulationis Meletii & Eusebii*, sic loquitur: *Erat autem impossibile, Spiritum inter Trinitatem cum gloria numerari, si non esset emanatus ex Deo per Filium, sed per modum creaturæ ex Deo factus, ut autumant*. Sic etiam Basilus solvens hanc Eunomii quæstionem, *Cur Spiritus sanctus non dicatur Filii Filius?* loquitur: *Non ideo quia non est ex Deo per Filium, sed ut Trinitas non in multitudinem infinitam incidat*. Græci in Concilio Florentino non semel professi sunt, se credere Spiritum sanctum ex Patre per Filium procedere, vixque post multas disputationes adduci potuerunt, ut eum *Ex* Filio procedere faterentur: ergo, &c.

Resp. ad 1. neg. maj. Ad 2. neg. paritatem. Ratio est 1. quia ideo dixerunt, Spiritum *Ex* Patre procedere, quod ab eo procedat per actionem ab alio principio minimè receptam; è contra verò ideo scripserunt, *Per* Filium procedere, quod actio spirativa non sit in Filio tanquam in primo principio, cum actionem illam Filius à Patre receperit. Ratio est 2. quia præpositio, *Ex*, æqualitatem significat; unde Patres ut adversus Arianos probarent, Verbum esse æquale Patri, usi sunt hoc argumento, quod *Ex Patre* esset: è contra præpositio *Per*, significat ordinem, seu relationem quam unus habet ad alium. Cum ergo Filius, etiam cum spirat Spiritum sanctum, ordinem habeat ad Patrem, Græcis visum est expedire, ut ordo ille exprimeretur in fide de processione Spiritus à Filio; Latini verò judicarunt convenire, ut

tacito illo ordine, per præpositionem, *Ex*, exprimeretur æqualitas Filii cum Patre: ita tamen ut sicut ordo non officit æqualitati, ita nec æqualitas officiat ordini.

Instabis. Præpositio, *Ex*, significat actionem causæ efficientis; præpositio verò, *Per*, non significat actionem hujusmodi, sed merum medium, per quod actio ad terminum transeat: ergo cum Patres Græci asseruerunt, Spiritum sanctum à Patre, per Filium procedere, negarunt, actionem principii efficientis Filio respectu Spiritus sancti convenire.

Resp. negando secundam partem antecedentis, hoc est, præpositionem, *Per*, non aliud significare, quàm medium per quod actio principii operantis transit ad terminum: Scilicet in Scripturis non minùs significat actionem principii operantis, quàm medium per quod transit actio principii operantis, ut in hisce textibus videre est: *Genesis 4. Possedi hominem per Deum: Joannis capite 1. Omnia per ipsum facta sunt: Primæ ad Corinth. 8. Nobis unus est Deus Pater ex quo omnia, & nos in illum, & unus Dominus Iesus Christus per quem omnia, & nos per ipsum: Ad Colossenses cap. 1. Omnia per ipsum & in ipso creata sunt.* Eodem pariter sensu, seu pro præpositione, *Ex*, sumitur à Patribus. Cyrillus in Epistolâ ad Theodosium Imperatorem, de Christi incarnatione loquens, hæc scribit: *Natus est per sanctam Deiparam Virginem.* Gregorius Nazianzenus libro 1. contra Eunomium scribit, Spiritum sanctum produci per Filium, sicut creaturæ per ipsum creatæ sunt: *Per ipsum (inquit) Filium apparuit.* Rursus autem à creatura quæ per Filium est producta, distat, &c.

Jam verò, cum constet tum ex Scripturâ tum ex Patribus, præpositionem, *Per*, non minùs sumi pro actione principii efficientis, quàm præpositio, *Ex*: si quis quærat, cur frequentius, cum actum est de processione Spiritus sancti, adhibita fuerit,

fuerit, quàm præpositio, *Ex*: Dicendum erit, id factum fuisse, quòd ( ut jam superiùs observavimus ) Græci potiùs notiones personarum, quàm earum inter se ipsas identitatem exprimere voverint. Basilii est ea responsio, qui libro de Spiritu sancto cap. 3. sic loquitur: *Hæc voces, Ex, Per, non præscribentis legem sunt, sed-hypostasēs discernentis: Non enim ut naturæ diversitatem introducat; sed ut minimè confusam Patris & Filii notionem præbeat, pronuntiavit Apostolus.*

*Solvuntur argumenta ex ratione petita.*

Objicies 1. Si Spiritus sanctus à Patre Filioque procederet, essent duo sancti Spiritus principia: tot enim forent principia, quot sunt personæ, à quibus suum esse sumeret: atqui non sunt duo Spiritus sancti principia: nempè si duo forent principia, Spiritus sanctus duplici actione produceretur, sicque à se ipso divisus esset: quod quidem est impium dictu.

Resp. ad 1. neg. maj. Ad 2. neg. ant. Ratio est, quia ad multiplicitem principiorum satis non est multiplicitas suppositorum, sed præterea requiritur multiplicitas formarum & actionum: idèd enim Pater, & Filius, & Spiritus sanctus non sunt tria principia creationis rerum, quòd licèt sint tria principia realiter distincta, in eis non reperiatur multiplicitas formarum creationis; scilicet per unam & eandem naturam, quasi per formam, Pater, Filius & Spiritus sanctus in esse principii creativi constituuntur. In Filio autem & in Patre non est multiplicitas formarum, per quas constituentur in esse principii spirativi, sed est unica tantum, unitas nimirum voluntatis; ex eo enim quòd unam ac eandem habeant voluntatem, unam ac eandem eliciant volitionem, sunt ( ut loquuntur Græci ) causa, aut ( ut ajunt Latini ) principium Spiritus sancti.

Eam de unitate principii respectu sancti Spiritus fidem; eam de modo explicandi unitatem

huiusmodi doctrinam Ecclesia quovis sæculo professæ est : *Fideli ac devota professione fatemur* ( verba sunt Concilii Lugdunensis sub Gregorio X. ) *quod Spiritus sanctus æternaliter ex Patre & Filio, non tanquam ex duobus principiis, sed tanquam ex uno principio, non duabus spirationibus, sed unica spiratione procedit .* Hanc professæ est hæcenus , prædicavit & docuit ; hoc firmiter tenet , prædicat , profitetur , & docet sacrosancta Romana Ecclesia , mater omnium fidelium & magistra ; hoc habet orthodoxorum Patrum , atque Doctorum , Latinorum pariter & Græcorum incommutabilis & vera sententia . Non ab simili ratione loquitur Concilium Florentinum in Decreto Unionis : *Definimus* ( inquit ) *ut hæc fidei veritas ab omnibus Christianis credatur & suscipiatur, sicque omnes profiteantur, quod Spiritus sanctus ex Patre & Filio æternaliter est, & essentiam suam, suumque esse subsistens habet ex Patre simul & Filio, & ex utroque æternaliter tanquam ab uno principio, & unica spiratione procedit.*

Instabis. Filius non potest producere Spiritum sanctum ratione substantiæ sibi ac Patri communis : alioquin enim cum substantia sit quoque communis Spiritui sancto , sequeretur, Spiritum sanctum esse sui ipsius principium , quod ( ut patet ) fidei ac rationi repugnat : ergo Filius producit Spiritum sanctum ratione personæ , seu prout est Filius ; ac proinde non unicum erit, in Latinorum sententiâ , ejusdem sancti Spiritus principium : Filius enim, quâ Filius , realiter à Patre distinguitur .

Resp. 1. nimis probare illud Græcorum argumentum : si enim valeret , probaret, Patrem æternum non producere Filium ratione suæ substantiæ : at id falsum est : nempe unanimis est Patrum tum Latinorum tum Græcorum sententia, Filium ex substantiâ Patris genitum esse : *Iesum Christum* ( verba sunt Nicæni Symboli ) *Filium*

*lium Dei, genitum ex Patre, unigenitum, hoc est e substantia Patris.*

Resp. 2. dist. ant. Filius non potest producere Spiritum sanctum ratione substantiæ sibi ac Patri communis, prout communis est; siquidem sic accepta nec est generans, nec genita, nec producens, nec producta, conc. ant. non prout est communis, neg. ant. Filius equidem producit Spiritum sanctum ratione substantiæ sibi ac Patri communis, non tamen prout communis est, sed tantum prout est modificata, seu aliquo modo contracta per filiationem; sicut Pater, licet ex substantiâ communi generet Verbum, ipsum tamen non generat ex substantiâ communi, ut communis est, sed tantum prout est affecta paternitate.

Objicies 2. Vel productio Spiritus sancti est personalis proprietas, vel substantialis: Si primum, non potest esse communis duabus personis; personales enim, seu notionales proprietates uni tantum personæ conveniunt: sic activa generatio soli Patri convenit, sicut generatio passiva convenit soli Filio. Si secundum, ipsi etiam Spiritui sancto conveniet: nimirum quæ substantialia sunt, toti Trinitati tribuuntur: ergo, &c.

Resp. ad 1. productionem sancti Spiritus esse personalem. Ad 2. dicendum est, personales proprietates non esse quidem communes toti Trinitati, sed falsum est, nullam duabus personis convenire: siquidem (ut jam observatum est) duabus personis convenit amor quo sese mutuò prosequuntur, ille autem amor est principium quo duæ istæ personæ spirant seu producant tertiam personam quæ est Spiritus sanctus: Hincque patet, argumentum Græcorum meram esse petitionem principii.

Objicies 3. Vel virtus spirandi quæ reperitur in Patre, satis est ad productionem Spiritus sancti, vel satis non est. Si primum, frustra requiri-

tur in Filio virtus spirativa: Si secundum, virtus spirativa quæ est in Patre, non erit infinita; quod est absurdum.

Resp. 1. argumentum illud, si valeat, probaturum esse, nec Filium nec Spiritum sanctum quidquam contulisse ad universi creationem: nempe ad id operis plusquam sufficiens fuit virtus creativa quæ est in Patre.

Resp. 2. concedendo, virtutem spirativam satis fuisse in Patre ad producendum Spiritum sanctum, sed inde non sequitur, inutilem esse virtutem spirativam in Filio, quia eadem est omnino cum virtute spirativâ quæ est in Patre: scilicet omnia quæ Pater habet, unâ exceptâ paternitate, unigenito Filio suo communicat nunc, ac communicavit ab æterno.

### C A P U T III.

#### *De particula Filioque inserta Symbolo.*

Not. **D**E particulâ, *Filioque*, insertâ Symbolo quæremus 1. utrum jurè inserta sit; 2. quo tempore insertio illa contigerit; 3. utrum omnes Ecclesiæ Occidentales illam insertionem statim admiserint.

### A R T I C U L U S I.

#### *Utrum particula, Filioque, jurè sit inserta Symbolo.*

CONCL. **P**articula, *Filioque*, jurè fuit inserta symbolo.

Probatur. Ea particula jurè fuit inserta symbolo, quæ continet necessariam ac veram hujus de Spiritu sancto articuli, *Qui ex Patre procedit*, expositionem: atqui particula, *Filioque*, continet necessariam & veram hujus articuli, *Qui ex Patre procedit*, expositionem: ergo jurè inserta fuit



fuit symbolo. Minor propositio quoad primam partem certa est: siquidem cum particula, *Filioque*, inserta fuit symbolo, nonnulli reperiuntur, qui contendebant, hæc symboli Constantinopolitani verba, *Qui ex Patre procedit*, intelligi debere cum exclusione Filii, ita ut Spiritus sanctus à solo Patre procedat: necessaria igitur erat expositio, quâ falso ejusmodi sensui occurreretur. Altera ejusdem minoris propositionis pars non est minùs certa: nempe, si Spiritus sanctus à Patre Filioque procedat, ut præcedenti capite fusè probatum est eum procedere, particula, *Filioque*, veram continet articuli, *Qui ex Patre procedit*, expositionem. Itaque tota difficultas posita est in majore argumenti propositione, quæ quidem subsequenter momentis demonstratur.

*Primò.* Ecclesia potest ex traditâ à Christo doctrinâ symbolum condere: ergo à fortiori, jam condito potest veram ac necessariam expositionem inferere. Consequentia videtur evidens: qui enim potest id quod majus est, potest id quod est minus in eodem genere: condere verò symbolum, majus est, quàm eidem jam condito veram ac necessariam expositionem inferere: Itaque probatur ant. Condere symbolum, nihil aliud est quàm certos fidei articulos ad doctrinæ formulam redigere, ad cujus normam infideles ad baptismum, hæretici ad Ecclesiam admittantur: atqui id potest Ecclesia: siquidem 1. id omne potest Ecclesia, quod nullum jus divinum vetat; id verò de quo agitur, nullo divino jure vetatur. 2. Licet Apostoli articulos, qui symbolo, quod vulgò inscribitur eorum nomine, prout Apostoli, hoc est, prout testes doctrinæ quam Christus prædicaverat, tradiderint; eos tamen ad brevem illam quâ nunc utimur, formulam redegerunt non tanquam Apostoli, sed tanquam Ecclesiæ pastores: at id jam temporis potest Ecclesia, quod Apostoli tanquam Ecclesiæ pastores præstiterunt: ergo, &c.

*Secundò*, Id Ecclesia jurè potuit tempore quo particula, *Filioque*, inserta fuit symbolo, quod temporibus Conciliorum, Nicæni primi & Constantinopolitani I. potuerat; una nimirum est quovis tempore Ecclesia, seu quæ nunc floret, eadem est cum e.: quæ floruit antiquitus: ac proinde eadem fruitur potestate, iisdem potitur jurebus, quibus olim fructa est: atqui temporibus Conciliorum Nicæni I. & Constantinopolitani I. jurè potuerat particulam, *Filioque*, symbolo inferere: non enim est potior ratio de particula, *Filioque*, quàm de aliis particulis: sed alias particulas inseruit symbolo temporibus eorum Conciliorum: siquidem tempore Nicæni I. inseruit vocem, *Consubstantialem*, tempore Constantinopolitani I. inseruit articulum de divinitate Spiritus sancti, qui in Nicæno symbolo non legitur: *Et in Spiritum sanctum Dominum vivificantem qui ex Patre procedit. Qui cum Patre & Filio simul adoratur & conglorificatur.*

*Tertio*, Ecclesia potest ea omnia inferere symbolo, quæ necessaria sunt, ut Catholici ab hæreticis discernantur: eum nimirum ob finem symbola conscripta sunt, seu edita sunt, quasi tessera quâ fideles distinguantur ab iis quæ extra Ecclesiam positi sunt. Ecclesia potest ea inferere symbolo, quorum professionem potest ab hæreticis ad unitatem Catholicam redeuntibus exigere: Atqui particula, *Filioque*, potuit esse necessaria, ut Catholici ab hæreticis discernerebuntur; Ecclesia potuit fidei quæ illâ particulâ exprimitur, professionem exigere ab hæreticis ad unitatem Catholicam redeuntibus: scilicet ex suppositione, quòd sit hæresis asserere, Spiritum sanctum non procedere à Filio, Ecclesia post damnatam illam hæresim potuit fidei oppositæ professionem exigere à redeuntibus ad unitatem Catholicam: ergo, &c.

Objicies 1. Tertium Concilium Generale, quod est Ephesinum, part. 1. actione 6. recitato Nesto-

Nestorii impio symbolo, prohibuit, ne aliud à Nicæno symbolum conderetur: vetuit, ne quis aliam à Nicænâ fide formulam componeret: *His igitur prælectis* ( verba sunt sacri Concilii ) *statuit sancta synodus, alteram fidem nemini licere proferre, aut conscribere, aut componere, præter definitam à sanctis patribus qui in Nicæa cum Spiritu sancto congregati fuerunt. Qui verò ausi fuerint, aut componere fidem alteram, aut proferre, vel offerre conver- ti volentibus ad agnitionem veritatis, sive ex genti- litate, sive ex Iudaismo, sive ex qualicumque hære- si; hos quidem, si sunt Episcopi aut clerici, alienos esse Episcopos ab Episcopatu, & clericos à clericatu decrevit; si verò laici fuerint, anathemati subjici.* Ex eo autem Concilii decreto sic in formâ confi- citur argumentum. Ea additio jurè facta non fuit in symbolo, quam Ephesina Synodus sub ana- thematis pœnâ fieri prohibuit: Sed Ephesina Sy- nodus sub anathematis pœnâ prohibuit additio- nem particulæ, *Filioque*. Siquidem additio parti- culæ, *Filioque*, est prolatio alterius fidei à Nicænâ; est compositio formulæ præter Nicænam: atqui Ephesina Synodus prohibuit prolationem alte- rius fidei à Nicænâ, compositionem formulæ præter Nicænam: ergo, &c.

Resp. I. dist. maj. Ea additio jurè facta non fuit in symbolo, quam Ephesina Synodus pro- hibuit, si facta non fuerit autoritate Ecclesiæ, conc. maj. si facta fuerit autoritate Ecclesiæ, neg. maj. Ratio est, quia licet homines privati non possint rescindere aut mutare Conciliorum generalium decreta, quæ spectant ad disciplinam, ut ad eam revera spectat Ephesina prohibitio de quâ agitur; id tamen universalis Ecclesia potest cum expedire judicat, imò id quoque possunt in- signes Ecclesiæ particulares, certis ac necessariis occurrentibus circumstantiis. Hoc enim est in- ter decreta quæ pertinent ad disciplinam, & ea quæ spectant ad fidem aut mores, quòd ista ( cum Ecclesia Deo major non sit ) obnoxia non sint

mutationi ; illa è contra pro variis temporum aut locorum circumstantiis mutationem patiantur.

Resp. 2. concessâ maj. neg. min. Ad cujus probationem dist. maj. Additio particulæ, *Filioque*, est prolatio alterius fidei à Nicænâ ; est compositio formulæ præter Nicænam, si voces istæ, *Alterius, Præter*, non sumantur contrariè, conc. maj. si sumantur contrariè, neg. maj. Synodus Ephesina prohibuit quidem prolationem fidei, compositionem formulæ, quæ contraria esset ei quæ in Concilio Nicæno proposita est ; sed non prohibuit eam, quæ licèt addita Nicænæ, ei tamen non esset contraria. Ratio solutionis petitur ex facto, quod occasione fuit decreto Concilii Ephesini : illud verò factum, est oblatio Nestoriani symboli facta à Charisio presbytero, quem Photius & Anastasius à Nestorio Philadelphiam missi, à fidelium communione, quòd illi symbolo subscribere noluisse, segregaverant : at illud symbolum, ad cuius normam Nestorius recipi decreverat eos, qui aut ex infidelibus aut hæreticis Ecclesiæ Catholicæ darent nomen, planè contrarium erat Nicænæ fidei : eo nimirum, præter Nestorii circa Verbi incarnationem errores, expressè asserèbatur, Spiritum sanctum nec à Filio, nec per Filium procedere : *Sed nec Filium illum putamus, neque per Filium suam subsistentiam habentem*. Cum igitur Concilium Ephesinum prohibuit, ne quis aliam à Nicænâ fidem componeret, intellexit fidem quæ, ut Nestoriana, Nicænæ contraria foret. Altera nostræ solutionis ratio petitur ex eo, quòd Charisius, ut se synodo probaret Catholicum, recitaverit symbolum quod multis in capitibus idem non esset, sive cum Nicæno, sive cum Constantinopolitano : & tamen ob id Charisius culpatus non est à sacrâ synodo ; id non impediit, quin ut Catholicus admitteretur.

Instabis, Cyrillus in Epistolâ ad Joannem Antio-

tiochenum, quæ incipit, *Latentur teli*, quæque continet Orientalium fidei confessionem, sic loquitur: *Nullo autem modo patimur, ut ab aliquo fides illa, sive fidei symbolum concutiat, quod à sanctis quondam Patribus Nicanis editum est. Neque enim aut nobis, aut ulli omnino alteri, vel unam voculam ibi positam immutare, aut unam etiam syllabam præterire permittimus.* 2. Actione II. Concilii Chalcedonensis, cum à iudicibus rogati essent Patres, ut exponerent fidem, responderunt: *In scriptis expositionem non facimus. Regula est, quæ prædicat, sufficere quæ sunt exposita. Regula vult, aliam expositionem non fieri. Ea quæ sunt Patrum, teneantur.* 3. Septima Synodus, post fidei definitionem, hæc habet: *Nos leges Patrum custodimus. Nos eos qui addunt quid, vel adimunt, anathematizamus.* Ex iis autem textibus sic conficitur argumentum: Qui asserunt non licere vel voculam quidem in symbolo Nicæno immutare; qui docent, nullam fieri debere expositionem, eò quòd id regula vetet; qui anathematizant eos qui addunt vel adimunt, censent decretum Ephesinum intelligi debere de additione, quæ cum Nicæno symbolo cohareat: atqui Cyrillus, Concilium Chalcedonense, septima Synodus generalis id asserunt: ergo, &c.

Resp. concessâ maj. dist. min. Cyrillus asseruit, non licere vel voculam quidem in Nicæno symbolo mutare per additionem aut detraktionem, quæ sit contraria Nicænæ fidei, conc. min. quæ non sit contraria, neg. min. Ratio solutionis est, quia Cyrilli tempore, ac aliis etiam sequentibus, usus invaluerat dicendi, nihil, ne voculam quidem, in Nicæno symbolo mutari, etsi fieret additio alicujus articuli qui cum Nicænâ fide cohereret, & à fortiori, qui ex eâ colligeretur; idque potest ostendi ex confessione fidei Episcoporum Orientalium, quam Cyrillus probat in epistolâ ad Joannem Antiochenum, ex quâ desumptus est textus qui nobis objectus est. In eâ autem fidei  
con-

confessione Joannes Antiochenus & Episcopi qui illi adhærebant, protestantur, se nihil in suâ confessione addituros Nicenæ fidei: *De virgine autem Dei genitrice quomodo sentiamus & loquamur, deque unigeniti Filii Dei incarnationis modo breviter dicemus, nihil omnino addentes fidei in Nicæa à sanctis Patribus expositæ: Illa namque, ut prius dictum est à nobis, ad omnem pietatis cognitionem, omnisque hæreticæ pravitatis refutationem sufficit.* Post solemnem illam protestationem Orientales Episcopi debuerunt (in adversariorum suppositione) symbolum Nicænum simpliciter, & prout jacet, recitare; non recitarunt tamen, sed amplissimam scripserunt fidei confessionem, in quâ plures sunt tum de Incarnatione, tum de aliis capitibus articuli, quorum in Concilio Nicæno nulla planè sit mentio. Quæ mox ad Cyrilli textum adhibita est solutio, adhiberi quoque debet ad textus, qui tum ex Concilio Chalcedonensi, tum ex septimo generali laudata sunt.

## ARTICULUS II.

*Quandonam, & à quibus, particula Filioque inserta fuerit symbolo.*

CONCL. **I**N Hispaniarum Ecclesiis particula *Filioque* inserta fuit symbolo sexto labente sæculo; apud Gallos & Germanos octavo; & tandem in Ecclesiâ Romanâ desinente nono.

Probatur prior pars. Additionem de quâ agitur, legere est in Concilio Toletano III. quod sub Reccaredo Rege, anno 589. celebratum est: scilicet in symbolo Constantinopolitano, quod laudatus princeps, ut fidem suam manifestam faceret, recitavit, inserta erat particula, *Filioque: Credimus & in Spiritum sanctum, Dominum &*  
vivi-

*vivificatorem, ex Patre & Filio procedentem.* Eadem additio reperitur quoque in Concilio Toletano IV. quod habitum est anno 633. non quidem inserta symbolo Constantinop. cum in eâ synodo recitatum non fuerit, sed in Expositione fidei quam capitulo 1. legere est : *Spiritum verò sanctum, nec creatum, nec genitum, sed procedentem ex Patre & Filio profitemur.* Reperitur quoque in Concilio Toletano VI. quod habitum est anno 639. nempe in Expositione fidei capitulo 1. hæc habentur : *Spiritum verò sanctum, neque genitum, neque creatum, sed de Patre, Filioque procedentem, &c.* Eam pariter, & quidem insertam symbolo, legere est in Concilio Toletano VIII. quod anno 639. celebratum est : *Credimus in Spiritum sanctum, Dominum, vivificatorem, ex Patre & Filio procedentem.* Octavi Toletani Concilii vestigiis inhæsit Concilium Toletanum XII. habitum anno 681. nempe in symbolo Constantinopolitano, quod capitulo 1. recitatur, hæc leguntur : *Credimus & in Spiritum sanctum, Dominum, & vivificatorem, ex Patre & Filio procedentem.* Tandem eadem additio, & quidem inserta symbolo, legitur in Conciliis Toletano XIII. & XV. quæ annis 683. 688. celebrata sunt.

Probatur altera conclusionis pars. De particulâ, *Filioque*, additione actum est in Concilio Aquisgranensi, quod Gallorum ac Germanorum Episcopi anno 809. celebrarunt. Ex eo nimirum Concilio Bernarius VVormatiensium, Jesse Ambianensium, Episcopi, & Adalardus Corbeiensis Abbas missi sunt ad Leonem Papam III. tum ut ab eo probaretur additio, quam symbolo Patres Aquisgranensis inseruerant, tum etiam ut suaderent, symbolum cum ejusmodi additione inter missarum solemnias Romæ cantari debere : Verùm cum in Aquisgranensi synodo additio illa facta fuerit nullo ex Patribus contradicente, colligi potest, eam aliquibus ante  
Con-

Concilium annis jam apud Gallos ac Germanos obtinuisse.

Probatur tertia pars. Ineunte nono sæculo, Leo Papa III. probare noluit additionem, de quâ agitur, quamvis idenixè postularent Aquisgranensis Concilii legati : *Si prius quàm ita cantaretur, interrogatus essem ( inquit Leo ad legatos ) ne infereretur, utique respondissem .* Ut autem declararet apertiùs, quantum esset alienus ab ejusmodi additione , tabulis argenteis insculpi jussit symbolum , prout à centum quinquaginta Episcopis editum fuerat in secundâ generali synodo . *Leo junior ( inquit Photius in epistolâ ad Patriarcham Aquilejensem ) pietatis fervens zelator , ut nullo pacto barbara lingua corrumpetur immaculata nostræ fidei doctrina ; Græca lingua Occidentalibus sanctam Trinitatem glorificandam & celebrandam tradidit . Et non solum sermone & mandato id faciendum curavit ; verum etiam quibusdam ancilibus , quasi clipeis constructis , & columnis erectis , illam inscripsit , & in conspectu omnium statuens , ad Ecclesiæ valvas collocavit , ut hoc pacto facile & incorruptè possent omnes pietatem ediscere .*

Additio, quæ , ut mox dictum est , initio noni sæculi , à Leone III. tam constanter rejecta fuerat, eodem jam adulto sæculo à Romanis probata est : eò nimirum trahi possunt , quæ scribit Photius adversus Nicolaum Papam I. ad omnes Orientis Episcopos, ubi sic loquitur : *Præter illa quæ commemoravimus absurda , sacrum etiam & sanctum symbolum , cui Synodica omnia , Oecumenica suffragia inexpugnabile robur addiderunt, adulterinis sermonibus , non sine incredibili audacia, falsare aggressi sunt . O mali dæmonis medicamenta ! Spiritum sanctum non ex Patre solum , sed etiam ex Filio procedere , vanissimè prædicantes .*

Idem quoque videre est in Ratramno Corbejensi monacho : is enim Nicolai Papæ I. temporibus , hoc est, circa annum 853. lib. 2. quem ad-

ver-



versus Græcos pro Ecclesiâ Romanâ conscripsit, confutat argumenta, quibus Photius, eique adhærentes Episcopi aggressi fuerant Occidentales qui particulam, *Filioque*, symbolo inseruerant. *Hanc quoque blasphemiam propellendam* (ait loquens de Photii circa Spiritum sanctum errore) *decernentes Ecclesiæ doctores, superaddidere symbolo, Spiritum sanctum à Filio quoque procedere.*

Objicies. Manuel Calecas in libro contra Græcos, Damasum facit auctorem additionis particulæ, *Filioque*; idque (inquit) *ut illud refelleret, quod gigni dicebatur à Filio.* Manueli Calecæ adhæserunt Genebrardus, nonnullique alii scriptores. 2. Idem author diffidens de facto, quod mox ex ipso relatum est, suspicatur, additionem de quâ est quæstio, factam fuisse sexti generalis Concilii temporibus, hoc est, circa annum 680. idque probat ex epistolâ sancti Maximi ad Marinum. 3. Julianus Cardinalis sessione 5. Concilii Florentini, & Andreas Colottiensis sess. 7. contenderunt, additionem de quâ agitur, fuisse factam jussu septimæ Synodi generalis anno 787. *Prolatum à nobis symbolum, in septima synodo scriptum est in vetustissimo codice* (verba sunt Juliani Cardinalis ad Græcorum Imperatorem) *& impossibile est suspicari, aliquam in eo factam fuisse mutationem.* Habemus porro & antiquum historicum virum doctum, qui quidem inter multa alia narrat, hoc etiam, symbolum videlicet, ita esse à septima synodo expositum & lectum, quod etiam ex ejus testimonio probamus: ergo particula, *Filioque*, ubique, saltem apud Occidentales, inserta fuit symbolo Constantinopolitano ante nonum sæculum.

Resp. ad 1. Calecam nullo teste probare factum quod narrat. Præterea si (ut vult ille scriptor) Damasus & Romana synodus sub eo celebrata, post Concilium secundum Oecumenicum, particulam, *Filioque*, symbolo inseruissent, qui fieri potuisset, ut Leo III. à Gallis de eâ additione

ne consultus, eam reprobasset. Addendum est, in Synodica Concilii Romani sub Damaso nihil esse quo factum illud confirmetur.

Resp. ad 2. in epistolâ Maximi contineri quidem dogma Latinorum de processione sancti Spiritus à Patre & Filio, sed de additione ad symbolum nihil omninò reperiri.

Resp. ad 3. historicum quo nitebatur Julianus Cardinalis, non multam mereri fidem. Nam 1. si septima synodus generalis additionem illam decrevisset, decretum non potuisset fugere Græcos, qui summâ cum curâ laudatæ synodi servabant acta. 2. De illo septimæ synodi decreto altum est silentium apud Anastasium Bibliothecarium; qui annis septuaginta post, Græcum illius Concilii textum in linguam Latinam transtulit.

Ex iis quæ tum in hoc articulo, tum in præcedenti dicta sunt, patet 1. Græcos, post Photium, immeritò Latinis vertiisse crimini, quòd particulam, *Filioque*, symbolo inseruerint: patet 2. illam insertionem, desinente sexto sæculo, primùm factam fuisse ab Episcopis Hispaniarum & Galliæ Narbonensis, quæ tunc Hispanorum regibus parebat: patet 3. Germanos & Gallos in Concilio Aquisgranensi additionem illam probasse, & cum eâ, inter missarum solemnias, symbolum decantasse: patet 4. eandem additionem non fuisse statim ab Ecclesiâ Romanâ probatam: patet denique 5. probabilem esse sententiam quæ docet, Ecclesiam Romanam Nicolai Papæ I. temporibus particulam, de quâ est quæstio, inseruisse symbolo.



## DISSERTATIO SEXTA.

*De modo loquendi circa Trinitatem .*

*Not.* **I**N hâc dissertatione quæremus 1. quibus nominibus exprimi debeant numerus, distinctio, unitas personarum in divinis; 2. utrum essentialia de relativis, & vicissim relativa de essentialibus prædicari possint; 3. utrum essentialia pro relativis supponere possint; 4. utrum abstracta de concretis, & concretâ de abstractis prædicentur.

---

### QUÆSTIO PRIMA.

*De nominibus quibus numerus personarum exprimitur .*

*Not.* **P**Ræcipua nomina quibus personarum numerus exprimitur, sunt pluralitas, multiplicitas, trinitas: necesse est igitur, ut hîc ea explicemus.

**CONCLUSIO I.** Pluralitatis nomen admitti debet in divinis.

Probatur. In divinis est vera ac realis pluralitas: sunt enim in Deo tres personæ: ergo pluralitatis nomen debet in divinis admitti.

Objicies. Illud nomen non debet in divinis admitti, quod, nisi aliquid addatur, tam potest intelligi de naturis, quàm de personis: atqui nomen, *Pluralitas*, nisi aliquid addatur, tam potest intelligi de naturis, quàm de personis; nec enim magis unum significat quàm aliud, sed in se sumptum abstrahit ab utroque: ergo nomen illud,   
sal-

saltem simpliciter, & sine addito, admitti non debet in divinis.

Resp. neg. maj. Ratio est, quia cum nihil additur nomini, quod est indifferens ad significandum unum potius quam aliud, illius significatio determinatur per subjectum de quo prædicatur; ac proinde cum Deus, in quo dicitur esse pluralitas, excludat in suo conceptu pluralitatem naturarum, vox, *Pluralitas*, ratione subjecti restringitur ad pluralitatem personarum, quæ realiter & à parte rei in Deo reperitur: Hinc patet, hanc propositionem: *In Deo est pluralitas*, esse simpliciter veram.

CONCLUSIO 2. Multiplicitas, five sine addito, five cum hoc addito, *Personarum*, admitti debet in divinis.

Probatur. Multiplicitas sine addito, non includit multiplicitem naturarum, quia (sicut dictum est de pluralitate) abstrahit à multiplicitate, five naturarum, five personarum; ac proinde nihil dicit quod Deo repugnet: atqui quod nihil dicit quod Deo repugnet, simpliciter ac sine addito potest in divinis admitti: ergo, &c. Jam verò si simpliciter admitti possit, à fortiori potest cum addito, *Personarum*, admitti. Confirmatur ex eo, quòd in Deo reverà sit multiplicitas personarum; ac proinde cum dicamus multiplicem processionem, multiplicem relationem, eò quòd in Deo reverà sit multiplicitas processionum, multiplicitas relationum: ita etiam cum reverà in eo sit multiplicitas personarum, possumus dicere multiplicitem personarum in divinis admitti debere.

Objicies. Si multiplicitas in abstracto, simpliciter ac sine addito, admitti posset in divinis, ista propositio, *Deus est multiplex*, simpliciter admitti posset: siquidem ille dici potest multiplex, de quo multiplicitas potest prædicari simpliciter: atqui, &c. ergo, &c.

Resp. ad 1. & 2. neg. maj. Ratio est, quia vox  
ista,

ista, *Deus*, non abstrahit à natura, sed illam formaliter ( ut ajunt ) includit : scilicet *Deus*, idem est ac habens divinitatem ; habens autem divinitatem, est habens naturam divinam : è contra multiplicitas simpliciter prolata, non includit naturam ; ac proinde de *Deo* simpliciter potest prædicari.

CONCLUSIO 3. cùm de divinis simpliciter, hoc est sine addito, loquimur, rectè utimur nomine Trinitatis.

Probatur. Primò, Patres cum locuti sunt de divinis, usi sunt nomine Trinitatis, ut videre est in authore symboli, quod passim quidem, sed falsò, tribuitur Athanasio : *Unitas in Trinitate, & Trinitas in unitate veneranda sit* ; in Hilario qui libros inscripsit *De Trinitate* ; in Augustino qui eadem usus est inscriptione ; in professione fidei Concilii Toletani XI. sic enim incipit : *Confitemur & credimus sanctam atque ineffabilem Trinitatem* ; in Concilio Lateranensi IV. *Et ideo* ( inquit capitulo 2. ) *in Deo Trinitas est soluinmodo, non quaternitas* ; in Concilio Florentino : *In nomine igitur sanctæ Trinitatis*, inquit Eugenius titulo *Definitio Synodi*. 2. Idem evincitur ratione. Siquidem simpliciter eo uti possumus, cum de mysterio loquimur, in quo est determinatus numerus ex tribus personis constans : atqui in mysterio de quo agitur, est determinatus ille numerus : ergo, &c.

Objicies 1. Concilium Toletanum XI. quod anno 675. celebratum est, sic in fidei professione loquitur : *Nec rectè dici potest, ut in uno Deo sit Trinitas* : Ergo Trinitatis nomen non debet in divinis admitti.

Resp. dist. conseq. Trinitatis nomen quod pro essentia supponat, non debet in divinis admitti, conc. conseq. quod supponat pro personis, neg. conseq. Concilium Toletanum XI. priore modo non autem posteriore, loco laudato sumpsit Trinitatis nomen ; unde postquam dixit : *Nec rectè di-*

*ci potest, ut in uno Deo sit Trinitas, mox addit: Sed unus Deus Trinitas.*

Objicies 2. Si Trinitas de Deo diceretur, affirmari posset Deum esse Trinum: atqui id dici non potest: si enim dici posset, quod Deus sit Trinus, dici etiam posset, quod sit triplex: atqui dici non potest, quod Deus sit triplex, Augustino teste lib. 6. de Trinit. cap. 7. ergo nec dici potest, quod sit Trinus.

Resp. ad 1. conc. maj. neg. min. Ad 2. neg. maj. Ratio est, quia *Trinitas, Trinus*, dicunt unum quid tribus distinctis modis existens: at verò triplex dicit non tantum tres distinctos existendi modos, sed etiam tres, saltem secundum numerum, essentias: nimirum triplex nihil est aliud quam esse triplicatum; unde sequitur, id quod est triplex, esse majus eo quod est aut duplex aut simplex tantum. Augustinum movit ea ratio, sic enim loquitur lib. 6. de Trinit. cap. 7. *Nec quoniam Trinitas est, ideo triplex putandus est; alioquin minor erit Pater solus, aut Filius solus, quam simul Pater & Filius.* Idem repetit cap. 8. *Cum itaque tantus est solus Pater, vel solus Filius, vel solus Spiritus sanctus, quantus est simul Pater, & Filius, & Spiritus sanctus, nullo modo triplex dicendus.* Augustini loquendi modum adhibuit Concilium Toletanum XI. *Hæc est (inquit in professione fidei) Trinitatis relata narratio: quæ non triplex, sed Trinitas & dici & credi debet.*

Objicies 3. Illud nomen, cum de divinis loquimur, adhiberi non debet, quod nec substantiam, nec relationem significat: nempe nihil est in Deo præter substantiam, & relationes: atqui Trinitatis nomen neque substantiam, neque relationes significat: non primum, alioquin enim de singulis personis prædicaretur, seu quælibet persona diceretur Trinitas: non etiam secundum, quia relatio est ordo unius ad aliud: at nomen Trinitatis illum ordinem non significat: ergo, &c.

Resp.

Resp. ad 1. neg. maj. Ad 2. neg. in Deo nihil esse præter substantiam & relationem, nam præterea est numerus relationum seu personarum, qui quidem numerus significatur per nomen Trinitatis, ac proinde de unaquâque personâ dici non potest, quòd sit Trinitas; neque enim in unâquaque ternarius est personarum numerus.

Quæres 3. utrum essentia dici possit Trina.

Resp. affirmativè: nempe deitas & essentia sunt idem: at deitas dicitur trina: *Te trina deitas, unaque poscimus*, verba sunt Ecclesiæ in hymno, *Sacris solemniss*, qui in festo corporis Christi recitatur: verùm non eo sensu deitas dicitur trina, quòd essentia, seu deitas, ex se multitudinem importet; falsus nimirum esset sensus ille sed quòd deitas una ac indivisa, sit tribus personis communis, eisque revera insit, & cum eis identificetur.

Quæres 2. utrum dici possit Trina unitas, seu Unitas trina.

Resp. affirmativè, idque non aliud significat quàm quòd una essentia in tribus personis existat.

Quæres 3. utrum Trinitas dici possit trina, idque probari possit ex his verbis Concilii Toletani XI. in professione fidei: *Hæc est sanctæ Trinitatis relata narratio, quæ non triplex, sed trina dici & credi debet.*

Resp. negativè. Ratio est, quia trinitas significat numerum ex tribus constantem; ac proinde si trinitas diceretur trina, sensus esset, quòd numerus ex tribus constans, ter esset in Deo, ac proinde quòd novem essent in Deo personæ. Ad probationem petitam ex Concilio Toletano, respondendum est, genuinam non esse lectionem, sed dicendum est, loco hujus vocis, *Trina*, legi debere, *Trinitas*: ita restituta est lectio in Labeanâ Conciliorum editione, ubi hæc habentur: *Hæc est sanctæ Trinitatis relata narratio: quæ non triplex, sed Trinitas dici & credi debet.*

Quæ-

Quæres 4. Utrum admitti debeat is loquendi modus: *Unitas in Trinitate, Trinitas in unitate*. Ratio dubitandi petitur ex professione fidei Concilii Toletani XI. ubi hæc habentur: *Nec rectè dici potest, ut in uno Deo sit Trinitas, sed unus Deus Trinitas*.

Resp. affirmativè: eum enim loquendi modum adhibet author symboli, quod Athanasio tribuitur: *Fides autem Catholica hæc est, ut unum Deum in Trinitate, & Trinitatem in unitate veneremur..... Ita ut per omnia & unitas in Trinitate, & Trinitas in unitate veneranda sit*. Confirmatur ex eo, quòd tres divinæ personæ sint realiter in unâ essentiâ divinâ, eâ ferè ratione, quâ supposita alicujus naturæ, in illâ naturâ esse dicuntur; ac proinde sequitur, Trinitatem, seu tres personas in unâ essentiâ existentes adorari debere.

Addendum est, quòd cum una sit ac indivisibilis essentia in tribus personis, sequatur quoque unitatem essentiae in Trinitate personarum colendam esse. Quod autem spectat ad rationem dubitandi desumptam ex Concilio Toletano XI. dicendum est, sensum esse, quòd in uno Deo non sit Trinitas essentiae, sed quòd Deus unus, seu essentia una, sit idem cum tribus personis, quarum numerus Trinitatem constituit.

Quæres 5. an dicendum sit: *Sancta Trinitas unus Deus*.

Resp. tum Calvino, tum ipsi adhærentibus displicuisse morem illum loquendi: sed immeritò. Nam 1. argui non potest vox hæc *Sancta*, quasi sufficiat ideam alicujus Sanctæ; ut cum dicitur, *Sancta Catharina*: scilicet Latini Græco nomini, *ἁγία*, quòd est idem ac *ternarius* vel *ternio*, nomen *Trinitas*, ipso etiam genere simile, substituerint. 2. Carpi quoque non potest vox, *Trinitas*, nihil enim aliud dicit, quàm pluralitatem personarum, quæ à parte rei reperitur in divinis; unde scholastici concludunt, nomen, *Trinitas*, esse nomen



men quasi collectivum, seu cum nominibus collectivis in eo conveniens, quòd designet multitudinem suppositorum, & quandam unitatem; ab eis verò disconveniens, quòd cum collectiva significant imperfectam tantum unitatem, ordinis nimirum, Trinitas è contra perfectam unitatem, seu identitatem essentiae supponat. Tandem 3. reprehendi non potest, quòd Trinitas dicatur *unus Deus*: siquidem sensus est, quòd tres personae, licet realiter distinctae, non habeant plures essentias, sed unam & eandem, ac proinde unus sint Deus, non dii plures, ut Augustinus hisce verbis explicat tractatu 39. in Joannem: *Quamvis nec ille qui est Pater, sit Filius: nec ille qui est Filius, sit Pater: nec Spiritus sanctus Patris & Filii, sit vel Filius, vel Pater: tres Deos tamen esse non dicimus: quamvis de singulis si queratur, necesse est, de quocumque interrogati fuerimus, Deum esse fateamur*: scilicet ut plures dii dicantur, satis non est multiplicitas personarum; sed præterea requiritur multiplicitas, saltem numerica, naturarum. Vide Concilii Alexandrini sub Athanasio Synodicam, ubi Græci asserunt, quòd licet tres in divinis hypostases admittant, nusquam tamen in eorum mentem venerit, quòd tres dii aut dici aut admitti debeant. Vide etiam priorum apologistarum nostrorum opera, in quibus Deorum pluralitatem impugnant, licet personas distinguant. Videri quoque potest Epistola Sophronii Hierosolymitani adversus Petrum Syrum, & Sergium Armenum: eam nimirum Epistolam, quam omnes Concilii sexti patres probarunt pluribus argumentis rejicitur Tritheitarum hæresis in eo posita, quòd tres Deos & dici & admitti debere contenderet, hoc falso nixa principio, cuius authores fuerunt Philoponus, Eugenius, Conon, *In Deo tres sunt naturae non specie quidem sed numero distinctae, sibi que in omnibus aequales.*

## Q U Æ S T I O II.

*De nominibus, quibus numerus & distinctio personarum exprimuntur.*

Not. **N** Omina, quibus numerus personarum exprimi potest, sunt hæc, distinctus, discretus, secretus, alius, alter, non unus, dissimilis, alienus, dispar, discrepans, diversus, differens, divisus, separatus, solus. De iis autem quærendum est, quomodo iis uti liceat, cum de divinis loquimur.

**CONCLUSIO 1.** Tres personæ rectè dicuntur distinctæ, discretæ, secretæ, non una.

Probatur. Primò, hæc habet Concilium Toletanum XI. *Trinitatem igitur in personarum distinctione agnoscimus.* Hæc etiam Concilium Lateranense IV. capitulo 2. *Ut distinctiones sint in personis, & unitas in natura.* Præterea in eo posita fuit Sabellii hæresis, quòd Trinitatis personas ab invicem non distingueret. 2. Discernere, secernere, idem sunt quod distinguere; ac proindè cum personæ sint ac dicantur distinctæ, rectè etiam discretæ, & secretæ dicuntur.

**CONCLUSIO 2.** Tres personæ rectè dicuntur aliæ ab invicem, sed non aliud.

Probatur 1. ex Concilio Lateranensi IV. quòd quidem capitulo II. sic loquitur: *Licet igitur alius sit Pater, alius Filius, alius Spiritus sanctus, non tamen aliud.* 2. Vox, *Alius*, significat personam, è contra vox, *Aliud*, significat naturam ut hisce verbis probat S. Thomas 1. p. q. 31. art. 2. ad 4. *Vnde etiam in rebus humanis si queratur, Quis est iste? respondetur, Socrates, quod nomen est suppositi. Si autem queratur, Quid est iste? respondetur, Animal rationale & mortale.* 3. Ex diver-

diversâ illâ significatione vocis, *Alius*, & vocis, *Aliud*, Patres concludunt, quòd in Incarnatione sit aliud & aliud, non autem alius & alius, quia Christus qui ex duabus naturis constat, non constat tamen ex duabus personis; è contra in Trinitate non est aliud & aliud, licèt alius & alius reperiantur: *In Trinitate alius atque alius, non aliud atque aliud*: (verba sunt Vincentii Lirinensis) *in Salvatore aliud atque aliud, non alius atque alius*. 4. Quæ ex Concilio Lateranensi, S. Thomâ, Vincentio Lirinensi, mox laudata sunt, variis in locis docuit Augustinus, cujus hæc sunt verba tractatu 36. in Joannem: *Quid vis ire in alteram partem, ut dicas, Aliud est Pater, Filius aliud? Alius est, rectè dicis; Aliud, non rectè. Alius enim est Filius, quia non est ipse qui Pater; & alius Pater, quia non est ipse qui Filius: non tamen aliud, sed hoc ipsum est & Pater & Filius*.

CONCLUSIO 3. Personæ SS. Trinitatis dici non possunt dissimiles, alienæ, dispares, discrepantes, differentes, divisæ, separatæ.

Probatur. Termini de quibus agitur in conclusione, significant naturam, non personam; ac proindè cum fide certum sit, personas non differre naturâ, termini illi de personis prædicari non possunt. Confirmatur ex S. Thomâ, qui 1. p. q. 36. art. 2. in Corpore, sic loquitur: *Ne tollatur simplicitas divinæ essentiae, vitandum est nomen separationis & divisionis, quæ est totius in partes. Ne autem tollatur æqualitas, vitandum est nomen disparitatis. Ne verò tollatur similitudo, vitandum est nomen alieni & discrepantis*. Iis quæ mox dicta sunt, lux addi potest ex iis, quæ superiùs de personarum in divinis consubstantialitate, circuminceptione, & æqualitate disputavimus.

CONCLUSIO 4. Dictio exclusiva, *Solus*, categorematicè sumpta, locum habere non potest in divinis: è contra accepta syncategorematicè, adhiberi potest.

Probatur prior pars. Dictio exclusiva, *Solus*, categorematicè sumpta, exclusionem ponit in subiecto, seu efficit, ut subiectum sit solitarium, ut cum dicitur, *Joannes est solus*: atqui quod ponit exclusionem in subiecto, seu quod efficit, ut subiectum sit solitarium, non potest dici de Deo; neque enim Deus est solitarius: scilicet est in Deo beatissimum trium personarum consortium. Hinc autem concluditur, hanc propositionem, *Deus est solus*, esse omninò falsam.

Probatur altera conclusionis pars. Dictio, *Solus*, syncategorematicè sumpta, non aliud denotat, quàm ordinem prædicati ad subiectum, seu significat, prædicatum non convenire alteri, quàm subiecto: atqui sic accepta, locum habet in divinis, ut patet in hac propositione: *Solus Deus est æternus*: neque enim in eâ propositione solitudinem inducit in Deo, sed removet prædicatum, *Æternus*, à quolibet ente, quod non sit Deus.

Quæres, utrum dictio exclusiva, *Solus*, æquè conjungi possit cum termino essentiali, & cum termino notionali.

Resp. dictionem exclusivam, *Solus*, cum utroque termino, essentiali nimirum & notionali, conjungi posse. Sic rectè dicitur: *Solus Deus est omnipotens*. *Solus Pater generat*. *Solus Filius generatur*.

### Q U Æ S T I O III.

*De nominibus adhibendis, ut unitas divinarum personarum explicetur.*

Not. **N** Omina quibus suspicari quis posset divinarum personarum unitatem explicari posse, sunt ista, *Idem*, *Unus*, *Solitarius*,  
Sin-

Singularis, Unicus, Unitus, Conjunctus de  
iis igitur hic nobis agendum incumbit.

CONCLUSIO 1. Nomen, *Idem & Unum*,  
in neutro genere de divinis personis dici possunt,  
non autem in masculino, si jungantur termino re-  
lativo, secus verò si absoluto.

Probatur prior pars. *Idem & Unum* in neu-  
tro genere significant essentiam: ergo cum in tri-  
bus personis una ac eadem sit essentia, *Unum &  
Idem* in neutro genere dici possunt de personis  
divinis: Hincque colligitur, veram esse hanc pro-  
positionem: *Pater, Filius, & Spiritus sanctus  
sunt unum & idem*. Altera pars patet ex eo, quòd  
*Idem & Unus* cum junguntur termino relativo,  
significant unitatem suppositi: at in Deo non est  
unitas suppositi, seu non unum est, sed multiplex  
suppositum: Hinc ista propositio: *Pater & Filius  
sunt unus & idem*, est omninò falsa, utpotè Sa-  
belliana. Tandem tertia conclusionis pars colligi-  
tur ex eo, quòd voces, *Idem, Unus*, conjunctæ  
cum termino absoluto, significant naturam aut  
attributa, quæ naturam, secundum nostrum con-  
cipiendi modum, consequuntur: atqui personæ  
divinæ sunt quid unum & idem in naturâ & in at-  
tributis quæ illam consequuntur: ergo, &c.  
Hinc autem concluditur, hanc propositionem,  
*Pater, Filius, & Spiritus sanctus sunt unus & idem  
creator, unus & idem omnipotens*, esse veram;  
quia sensus est, vim creativam, & omnipotentiam  
esse unum & idem in tribus personis.

CONCLUSIO 2. Vox, *Solitarius*, non po-  
test dici de personis divinis.

Probatur. Vox, *Solitarius*, excludit non naturæ  
tantum, sed etiam personarum pluralitatem:  
hinc Augustinus lib. 6. de Trinitate, cap. 7. me-  
ritò negat, dici posse, personas in divinis esse so-  
las, seu solitarias: *Quamquam* (ait) *non inve-*  
*nitur, quomodo dici possit, aut Pater solus, aut Fi-*  
*lius solus, cum semper atque inseparabiliter & ille*  
*cum Filio sit, & ille cum Patre: non ut ambo*

*sint Pater, aut ambo Filius; sed quia semper in invicem, neuter solus.*

Præterea, eadem vox, *Solitarius*, separabilitatem significat, hoc est unam personam posse sine aliis esse: at separabilitas locum non habet in divinis, juxta illud Concilii Toletani XI. in professione fidei: *Tria ergo ista unum sunt, natura scilicet, non persona: nec tamen tres istæ personæ, separabiles æstimandæ sunt; cum nulla ante aliam, nulla post aliam, nulla sine alia vel extitisse, vel quidpiam operasse aliquando credatur: inseparabiles enim inveniuntur, & in eo quod sunt, & in eo quod faciunt.*

CONCLUSIO 3. Vox, *Singularis*, adhiberi non debet, cum de divinis loquimur.

Probatur. Vox, *Singularis*, in sensu obvio significat naturæ, de quâ prædicatur, incommunicabilitatem: at Dei natura non est incommunicabilis, cum in tribus personis reperiatur: ergo, &c. Indè verò concluditur, hanc propositionem: *Pater est Deus singularis*, esse falsam: nempè significat, naturam divinam inesse Patri tantum, non autem cæteris personis.

Confirmatur argumentum ex S. Thomâ, qui 1. p. q. 31. art. 2. in Corp. sic loquitur: *Ad vitandum Sabellii errorem, vitare debemus singularitatem, ne tollatur communicabilitas essentiae divinae. Vnde Hilarius dicit 7. de Trinitate, Patrem & Filium, singularem Deum prædicare, sacrilegium est.*

Objicies 1. Vox, *Singularis*, significat naturam individua, seu hanc aut illam naturam in particulari: atqui de naturâ divinâ potest dici, quòd sit individua natura: ergo dici quoque potest, quòd sit natura singularis.

Resp. dist. maj. Vox, *Singularis*, significat naturam individua incommunicabilem, conc. maj. communicabilem, neg. maj. Natura divina est quidem individua natura, sed non est incommuni-

municabilis; ac proinde vox, *Singularis*, de illâ prædicari non potest.

Objicies 2. Adverbium, *Singulariter*, admitti debet, cum de divinis loquimur: ergo debet pariter admitti vox, *Singularis*. Probatur ant. ex Concilio Toletano XI. quod quidem in professione fidei sic loquitur: *Deus ergo Pater, Deus Filius, Deus Spiritus sanctus singulariter dicitur..... Singulariter ergo, ut unaquæque persona plenus Deus, & totæ tres personæ unus Deus confitetur. & creditur.*

Resp. concesso antecedente, ac ejus probatione, neg. conseq. Ratio disparitatis est, quia adverbium, *Singulariter*, opponitur multiplici naturæ; vox verò, *Singularis*, opponitur illius communicabilitati: unde rectè dicitur, quòd tres personæ sint singulariter Deus, hoc est; quòd sint unus Deus, non plures dii: è contra non dicitur quòd tres personæ sint Deus singularis, quia sensus esset, unamquamque personam esse Deum singularem, hoc est, habere naturam quæ cæteris personis non conveniret. Eum autem esse Concilii Toletani sensum, patet ex verbis quæ in argumento laudatis subjunguntur: *Deus ergo Pater (inquit) Deus Filius, Deus Spiritus sanctus, singulariter dicitur: nec tamen tres dii, sed unus est Deus.*

CONCLUSIO 4. Vox, *Unicus*, non debet in divinis admitti.

Probatur. Vox, *Unicus*, & vox, *Singularis*, idem omnino significant; proindèque cum ista (ut conclusione præcedenti dictum est) admitti non debeat, ita nec illa.

Confirmatur ex S. Thomâ, qui 1. p. q. 31. art. 2. sic loquitur: *Debemus etiam vitare nomen Unici, ne tollatur numerus personarum.* Assertionem suam probat S. Doctor ex Hilario: *Vnde (inquit) Hilarius in eodem libro dicit, quòd à Deo excluditur singularitas atque unica intelligentia.*

Objicies 1. Dici potest, Unicus Filius: ergo dici quoque potest, Deus unicus. 2. Hæc propositio: Unicus est Deus, est vera: ergo, &c.

Resp. ad 1. conc. ant. neg. conseq. Ratio disparitatis est, quia, *Unicus*, in Filio singularitatem significat, hoc est, significat unum tantum, non plures esse filios in Trinitate: è contra cum de Deo dicitur, significat unam esse in Deo personam. Ad 2. dicendum est, æquivocam esse propositionem de quâ agitur, potest enim significare unum tantum esse Deum, & sic vox, *Unicus*, cadit in naturam: potest quoque significare unam esse in Deo personam; unde simpliciter & sine explicatione admitti non debet illa propositio. Quæ mox data est solutio, desumpta est ex S. Thomâ qui 1. p. q. 31. art. 2. sic loquitur; *Dicimus unicum Filium, quia non sunt plures Filii in divinis: neque tamen dicimus unicum Deum, quia pluribus divinitas est communis.*

CONCLUSIO 5. Voces istæ, *Vnitus*, *Conjunctus*, *Quid unitum*, admitti non debent in divinis.

Probatur. Voces quæ compositionem arguunt, in divinis admitti non debent, cum Deus sit ens maximè simplex: atqui voces de quibus in conclusione, compositionem arguunt: neque enim quid dici potest unitum, conjunctum, nisi sese cum alio, cui unitum sit, per modum partis habeat: ergo, &c.

Objicies. Tres personæ non sunt divisæ à se invicem, licèt sint distinctæ: ergo sunt unitæ, proindèque voces istæ, *Vnitus*, *Conjunctus*, *Quid unitum*, debent in divinis admitti.

Resp. conc. ant. neg. conseq. Ratio est, quia ad unionem requiritur, ut id in quo extrema dicuntur conjuncta, ab iis sit distinctum: at natura divina, ratione cujus personæ dici possent unitæ, à personis realiter non distinguitur: Nam ( ait Concilium Toletanum XI. in professione fidei )

Et si



& si de singulis personis interrogemur, Deum necesse est fateamur.

## QUÆSTIO IV.

*Utrum omnia nomina in divinis de se invicem prædicari possint.*

Not. 1. **N**omina absoluta sunt ea quibus essentia divina, aut illius attributa significantur. Nomina verò relativa sunt ea quibus personæ, vel notiones exprimuntur.

Not. 2. Nomina, siue sint absoluta, siue sint relativa, sunt vel abstracta vel concreta. Priora sunt ea quæ exprimunt formam sine subiecto, ut sunt deitas, sapientia, paternitas, filiatio, & alia huiusmodi: posteriora è contra significant formam cum subiecto, seu subiectum habens formam.

Not. 3. Concreta subdividuntur in adjectiva ut sunt sapiens, bonus: & in substantiva, ut Deus, Dominus. Quæri igitur potest 1. utrum & quomodo nomina absoluta siue in abstracto, siue in concreto, prædicari possint de relativis: 2. utrum relativa de absolutis.

## CAPUT PRIMUM.

*Utrum absoluta de relativis prædicentur.*

CONCL. 1. **N**omina absoluta abstracta, de personis non prædicantur in plurali, sed tantum in singulari numero.

Probatur prior pars. Nomina prædicantur de subiecto, ad quod se habent per modum formæ: quælibet enim forma de suo subiecto potest prædicari: sic humanitas idè potest prædicari de ho-

mine, quòd homo sit illius subjectum; scilicet homo idem est, ac subjectum habens humanitatem: atqui nomina absoluta abstracta, se habent respectu relationum, tanquam formæ respectu subjecti: quamvis enim sine subjecto seu sine personis concipiuntur, tamen à parte rei sunt in personis, quæ concipiuntur per modum subjecti, in quo recipiuntur: sic hæc propositio est vera: *Tres personæ sunt deitas, immensitas, omnipotentia.*

Probatur altera pars. Formæ quæ non multiplicantur, prædicari non possunt in plurali numero; nimirum pluralis numerus essentialiter includit multipliciter: atqui (ut jamjam observatum est) nomina absoluta abstracta, sunt respectu personarum, veluti formæ: ergo de personis prædicari non possunt in plurali numero. Inde verò concluditur, hanc propositionem esse falsam: *Tres personæ sunt deitates, immensitates, omnipotentie.*

CONCLUSIO 2. Nomina absoluta concreta, si substantiva sint, de tribus personis prædicantur in numero singulari, non autem in plurali.

Probatur. Nomina absoluta concreta, si substantiva sint, significant formam per modum substantiæ, seu per modum rei quæ non indiget alio, tanquam subjecto, cui inhæreat: atqui quod significat formam per modum substantiæ, de personis divinis prædicari non potest in plurali numero, sed tantum in singulari: nam si prædicaretur in plurali numero, multiplicari posset: at quod significat formam per modum substantiæ, multiplicari non potest, cum in divinis substantia sit immultiplicabilis: ergo, &c. Hinc autem concluditur, falsam esse hanc propositionem: *Tres personæ sunt tres dii*; siquidem in eâ propositione Deus dicitur substantivè, ac proindè prædicari non potest in plurali numero. Patres eo principio nixi, constanter asseruerunt, tres personas unum dici Deum, non plures dii. *Omnes, quos legere possis*

*potui, qui ante me scripserunt de Trinitate, quæ est Deus, divinorum librorum veterum & novorum Catholicæ tractatores hoc intenderunt (verba sunt Augustini lib. 1. de Trinitate c. 4.) secundum Scripturas docere, quod Pater, & Filius, & Spiritus sanctus unius ejusdemque substantiæ, inseparabili æquitate divinam insinuent unitatem: Ideoque non sint tres dii, sed unus Deus.*

Objicies 1. Terminus iste, *Res*, est nomen substantivum: atqui, *Res*, de tribus personis prædicatur in plurali numero, nempe rectè dicitur quòd tres personæ sint tres res: ergo nomina substantiva de personis prædicantur in plurali numero. Minor propositio, in quâ posita est difficultas, videtur esse Augustini, qui lib. 1. de Doctrinâ Christianâ, cap. 5. sic loquitur: *Res quibus fruendum est, sunt Pater, & Filius, & Spiritus sanctus.*

Resp. disting. maj. Terminus iste, *Res*, est nomen substantivum transcendens, quia tum in absolutis tum in relativis imbibitur, quemadmodum ens imbibitur (ut ajunt) & in substantiâ & in accidente, conc. maj. Est nomen substantivum, & non est transcendens, neg. maj. Ex eo principio sequitur, vocem, *Res*, prædicari posse & de relativis & de absolutis; cum hoc tamen discrimine quòd in plurali numero prædicetur de relativis, quia relativa sunt plura; è contra verò de absolutis prædicetur in singulari numero, quia (ut sæpiùs à nobis dictum est) in divinis absoluta non multiplicantur, sed sunt unum & idem. Hinc autem colligitur, hanc propositionem: *Tres personæ sunt tres res*, esse veram, si, *Res*, sumatur relativè, tunc enim sensus est, quòd in Deo sint tres res relativæ; esse è contra falsam, si, *Res*, substantialiter & absolutè sumatur.

Objicies 2. Ut nomina dicantur in plurali numero, sufficit, ut supposita multiplicentur: ergo, cum in SS. Trinitate supposita, seu personæ, multiplicentur, nomina substantiva concreta de personis

sonis divinis in numero plurali prædicari possunt. Probatur ant. Si per divinam potentiam una numero albedo in tribus subjectis reperiretur, posset de illis subjectis in numero plurali prædicari, quia licet non esset multiplex albedo, esset tamen multiplex suppositum: quemadmodum igitur, in eâ suppositione, hæc propositio: *Tria sunt alba*, esset vera: ita & in divinis illa, *Tres sunt Domini*, debet esse vera.

Resp. dist. ant. Ut nomina adjectiva dicantur in plurali numero, sufficit, ut supposita multiplicentur, conc. ant. nomina substantiva, neg. ant. Ratio est, quia nomina substantiva significant formam & suppositum tanquam unum subsistens, proindeque, ut multiplicentur, necesse est, ut tum forma tum suppositum multiplicentur; adjectiva verò significant tanquam duo, formam scilicet ut in supposito existentem: Unde cum album sit adjectivum nomen, Dominus contra sit substantivum, mirum non est, si album in casu, de quo agitur in argumento, dicatur pluraliter, Dominus verò dici non possit nisi in singulari numero. Ex eo discrimine quod inter adjectiva, & substantiva nomina reperitur, Sylvius colligit, quòd si tres personæ assumerent unam naturam, tres personæ essent unus homo propter unitatem naturæ assumptæ; & si una tantum persona assumeret duas humanas naturas, esset quoque unus homo tantum propter unitatem suppositi. In utràque illâ suppositione nomen substantivum, *Homo*, non multiplicaretur, quia (ut dictum est) ad multiplicationem nominis substantivi, satis non est, quòd aut forma aut suppositum multiplicetur, sed præterea requiritur ut utrumque, forma nimirum & suppositum multiplicentur.

Objicies 3. Nomen istud, *Persona*, est nomen concretum substantivum: atqui prædicatur in plurali numero: quemadmodum enim vera est hæc propositio: *Tres personæ sunt unus Deus*; ita  
etiam

etiam vera est hæc alia: *Vnus Deus est tres personæ*: ergo nomina concreta, quamvis sint substantiva, prædicantur in plurali numero.

Resp. dist. maj. Nomen, *Persona*, est nomen concretum, relativum, conc. maj. non relativum, neg. maj. Nomina relativa, quæ Patri, Filio, & Spiritui sancto communia sunt, ut est persona in genere, prædicantur in plurali numero, quia formæ quæ per illa nomina relativa significantur, à parte rei multiplicantur in divinis: unde cum plures sint personalitates, quæ sunt formæ per vocem, *Persona*, significatæ, mirum non est quòd personæ in plurali numero prædicentur: at idem de nominibus absolutis, seu, essentialibus, dici non potest, cum forma, quam significant, reverà non multiplicetur in divinis.

CONCLUSIO 3. Nomina adjectiva concreta, de divinis personis prædicantur in plurali numero.

Probatur. Ea prædicantur de personis plurali numero, quæ multiplicatis suppositis, concipiuntur multiplicari: atqui nomina adjectiva, multiplicatis suppositis, concipiuntur multiplicari, quia (ut dictum est) significant duo, formam nimirum & subjectum, in quo forma reperitur: Hincque concludendum est, hanc propositionem. *Totæ tres personæ sunt coæternæ & coæquales*, quæ legitur in symbolo quod Athanasio tribuitur, veram esse. Nec mirum; sensus enim illius est quòd tres divinæ personæ habeant unam ac eandem æternitatem: unde propter multiplicationem suppositorum, seu personarum, coæternum, cum nomen sit adjectivum, prædicatur in plurali numero.

Objicies. Increatus, immensus, æternus, sunt nomina adjectiva, & tamen, licet in divinis multiplicentur supposita quibus tribuuntur, non prædicantur in plurali numero, sed in singulari tantum. *Increatus Pater*, (inquit author Athanasiani symboli) *increatus Filius*, *increatus Spiritus sanctus*.

*sanctus : Immensus Pater, immensus Filius, immensus Spiritus sanctus : Æternus Pater, æternus Filius, æternus Spiritus sanctus . Et tamen non tres æterni, sed unus æternus : Sicut non tres increati, nec tres immensi, sed unus increatus & unus immensus : Ergo falsa est regula, quâ statuitur, nomina adjectiva prædicari pluraliter, cum de multis suppositis prædicantur.*

Resp. dist. ant. Increatus, immensus, æternus, sunt nomina adjectiva, quæ nonnunquam sumuntur substantivè, conc. ant. quæ nusquam sumuntur substantivè, neg. ant. Nomina de quibus agitur, sunt quidem in se adjectiva; sed quæ tamen ab auctore Athanasiani symboli substantivè sumuntur : *Dicimus enim ( inquit S. Thomas 1. p. q. 39. art. 3. ) vel tres sapientes & tres æternos & increatos & immensos, si adjectivè sumantur . Dicimus unum increatum, immensum & æternum, ut Athanasius dicit .* Igitur Athanasiani symboli sensus est, quòd tres sint, de quibus eadem sapientia, eadem æternitas, eadem immensitas prædicari possunt . Eadem quoque ratione, hoc est, substantivè, sumitur nomen, *Onnipotens*, à Patribus Concilii Toletani XI. qui in fidei professione sic loquuntur : *Item & Pater omnipotens & Filius omnipotens, & Spiritus sanctus omnipotens, singulariter dicitur ; nec tamen tres omnipotentes, sed unus omnipotens ; sicut & unum lumen, unumque principium prædicatur .* Econtra idem Athanasiani symboli auctor eadem nomina, paulò post, adjectivè sumpsit, dicens : *Totæ tres personæ, coæternæ sibi sunt & coæquales .* Adjectivè pariter sumpta sunt à Concilio Lateranensi IV. cap. 1. ubi hæc habentur : *Pater generans, Filius nascens, & Spiritus sanctus procedens ; consubstantialis & coæquales, coomnipotentes & coæterni .*

C A P U T II.

*Vtrum in divinis relativa de essentialibus prædicentur.*

**C O N C L. I.** **I**N divinis nomina relativa, si adjectiva sint, de essentialibus non prædicantur.

Probatur 1. Si nomina relativa, quæ adjectiva sunt, de essentialibus prædicarentur, *Generans, Spirans, Generata, Spirata, Procedens*, dici possent de essentiâ divinâ; illa enim nomina sunt relativa & adjectiva simul: atqui (ut adversus Joachimum Abbatem definiit Concilium Lateranense IV. cap. 2.) *Generans, Spirans, Generata, Spirata, Procedens*, dici non possunt de essentiâ: ergo, &c.

**C O N C L U S I O 2.** In divinis relativa, si substantiva sint, possunt de essentialibus prædicari.

Probatur. Quæ sunt realiter idem cum essentialibus, de iis prædicari possunt: atqui in divinis relativa, siue sint abstracta, siue concreta, sunt idem realiter cum essentialibus, cum Deus sit ens maximè simplex, ac expers omnis compositionis, siue realis, siue mentalis: ergo, &c. Ex eo autem argumento concluditur, istas propositiones esse veras: *Essentia est tres personæ. Essentia est Pater. Essentia est Filius. Essentia est personalitas. Essentia est Paternitas. Essentia est Filiatio, Spiratio:* Et ita de cæteris.

Objicies 1. Trinitas est nomen relativum: atqui trinitas prædicari non potest de essentiâ: siquidem quod prædicatur de essentiâ, prædicatur de singulis personis; scilicet quod essentiæ convenit, est commune tribus personis: sed trinitas non prædicatur de singulis personis: alioquin (quod absurdum est) vera esset hæc propositio: *Pater est trinitas.*

Resp.

Resp. ad 1. neg. min. Ad 2. dist. maj. Quod prædicatur de essentiâ conceptâ sine notionibus, prædicatur de singulis personis, conc. maj. de essentiâ conceptâ cum notionibus, neg. maj. In hac propositione, *Essentia est trinitas*, essentia non supponit pro essentiâ sine notionibus, sed pro essentiâ cum notionibus conceptâ; siquidem nomen istud, *Trinitas*, quod in propositione adjungitur essentiæ, determinat hoc aliud nomen, *Essentia*, ad essentiam cum notionibus conceptam: at falsum est, essentiam cum notionibus, hoc est cum Paternitate, Filiatione, & Spiratione passivâ conceptam, non esse Trinitatem.

Objicies 2. Inferiora non prædicantur de superioribus: sic homo, cum sit quid inferius respectu animalis, non prædicatur de animali, saltem essentialiter, alioquin omne animal deberet esse homo: Atqui in divinis nomina relativa sunt inferiora respectu essentialium: nempe quod est minus commune, est inferius respectu ejus quod est magis commune: sed relativa sunt minus communia, quàm essentia, cum relativa in singulis personis non reperiuntur: neque enim in Patre est filiatio, e contra verò essentia singulis tribus personis communis est: ergo, &c.

Resp. ad 1. conc. maj. neg. min. Ad 2. neg. min. Ad 3. dist. ant. Relativa in singulis personis non reperiuntur secundum modum significandi, conc. ant. secundum entitatem, neg. ant. Paternitas v. g. sumpta secundum modum significandi, non est in Filio, quia sic accepta, dicit personam generantem; at est in Filio secundum entitatem, cum à parte rei non distinguatur ab essentiâ, quæ eadem est in tribus personis: Hinc autem patet, essentiam & personas non se habere in divinis, sicut universale & singulare. Desumpta est illa responsio ex S. Thomâ qui 1. p. q. 39. art. 6. sic loquitur: *Ad secundum dicendum, quod*



quòd cum dicitur, Deus, vel Divina essentia est Pater, est prædicatio per identitatem; non autem sicut inferioris de superiori: quia in divinis non est universale & singulare. Unde sicut est per se, (hoc est, essentialiter) ista, Pater est Deus: ita & ista, Deus est Pater, & nullo modo per accidens.

## Q U Æ S T I O V.

*Virum nomina essentialia supponant pro relativis.*

**Not.** **P**Ræsuppositâ divisione nominum essentialium in abstracta & concreta, querendum est 1. utrum nomina essentialia abstracta supponant, seu, in propositionibus quarum sunt subjectum, sumantur pro relativis, hoc est, pro personis: 2. utrum idem dici possit de iisdem nominibus essentialibus, si sint concreta.

## C A P U T P R I M U M.

*Virum nomina essentialia abstracta pro personis supponant.*

**CONCL.** **N**OMINA essentialia abstracta non supponunt pro personis.

Probatur. Essentia, deitas, sapientia, bonitas, sunt nomina essentialia abstracta, quippe quæ significant formam sine subjecto: atqui nomina illa non supponunt pro personis: nempe si pro personis supponerent, istæ propositiones essent veræ: *Essentia generat, Essentia spirat*: atqui veræ non sunt eæ propositiones. Nam 1. id definit Concilium Lateranense IV. cap. 2. ubi sic de substanti-

stantiâ, seu essentiâ, seu naturâ divinâ loquitur : *Et illa res non est generans, neque genita, neque procedens*: ergo, &c. 2. Essentia generaret se ipsam, eadem scilicet numero est essentia in tribus personis: atqui idem se ipsum generare non potest; docet enim ratio naturalis, produciens distinguendum à producto.

Objicies 1. Patres qui adversus Arianos pugnarunt, sæpius asseruerunt, hoc esse discrimen inter Verbum & creaturas, quòd istæ sint ex nihilo, illud verò sit de substantiâ Patris. Qui manûs cum Sabellianis conseruerunt, non rarò scripserunt, Patrem esse fontem ac principium totius deitatis. Symbolum Constantinopolitanum docet, Verbum esse lumen de lumine. Ex iis autem locis sic conficitur argumentum: In mox laudatis textibus substantia, deitas, lumen, quæ sunt nomina abstracta, pro personis supponunt: alioquin dicendum esset, substantiam Patris generare, deitatem habere principium, lumen oriri à lumine, quod tamen ex Concilio Lateranensi IV. est omninò falsum: ergo nomina abstracta supponunt pro personis.

Resp. ad 1. neg. maj. seu, nego, in laudatis Patrum textibus nomina *Substantiæ, Deitatis, Luminis*, pro personis supponere. Ad 2. neg. sequentiam maj. seu, nego, sequi quòd alioquin substantia generaret, quòd Deitas haberet principium, quòd lumen, hoc est, essentia, oriretur à lumine. Ratio est 1. quia cum Patres dicunt Verbum esse *de substantia Patris*, non sumunt præpositionem, *De*, pro præpositione quæ denotet, substantiam Patris esse principium productivum, sed tantum pro aliquo quod significet veluti causam materiale, ita ut sensus sit, quòd, cum creaturæ sint ex nihilo, Verbum è contra non sit (ut contendebant Ariani, cum quibus iis in locis Patres manûs conferebant) ex nihilo, sed ex Patris substantiâ, non quidem per excisionem aut partitionem, ut frutex ex arbore (ut iidem Ariani sequi

sequi contendebant ex Catholicorum doctrinâ) sed per communicationem: Ita ut Pater suam substantiam integrè ac perfectè Verbo communicet. 2. Eodem modo intelligendi sunt S. Doctores, cum asserunt, Patrem esse totius Deitatis principium: nimirum *Deitatis* nomen sumunt pro essentiâ, non quidem quòd velint, deitatem à Patre aut generari, aut spirari, sed quòd deitas, hoc est, essentia, ceteris personis communicetur à Patre, tanquam à principio primo, seu quod à nullo alio suum esse recipiat. 3. Non aliud etiam volunt iidem S. Doctores, cum scribunt, Verbum esse lumen de lumine, hoc est lumen pro essentiâ sumunt, ita ut Verbum, suum esse recipiat à Patre, in quo est primigenia totius esse divini origo.

Objicies 2. Voces istæ, *Res generans*, non supponunt pro essentiâ, sed pro personâ, quia (ut sæpiùs dictum est) essentia nec generat, nec generatur: atqui voces illæ, *Res generans*, non aliud sunt, quàm nomina abstracta; neque enim dicunt formam in subjecto, seu essentiam in aliquâ personâ: ergo nomina abstracta pro personis supponunt.

Resp. conc. maj. neg. min. Ratio est, quia voces de quibus agitur, *Res generans*, dicunt essentiam, non quidem simpliciter & in se sumptam, sed reduplicativè, prout est idem cum personâ Patris; ac proinde mirum non est, quòd ea nomina pro personis supponant, siquidem abstracta non sunt, sed concreta; dicunt enim essentiam prout est in Patre. Vide S. Thom. 1. p. q. 39. art. 5. ad quintum argumentum.

## CAPUT II.

*Virum nomina essentialia concreta supponant pro personis.*

CONCL. **N**omina essentialia concreta pro personis supponunt.

Probatur. Deus est nomen essentialiale concretum: significat enim divinam essentiam ut in habente, quippe vox, *Deus*, nihil aliud est, quàm habens divinitatem: atqui nomen, *Deus*, supponit pro personâ: siquidem illud nomen pro personâ supponit, cui tribuuntur generatio tum activa tum passiva: scilicet (ut non semel dictum est) essentia in se sumpta, nec generat, nec generatur: atqui nomini, *Deus*, tribuuntur generatio, tum activa tum passiva: hæc enim in symbolo leguntur: *Deum verum de Deo vero*: hæc etiam apud Augustinum lib. 15. de Trinit. c. 14. *Verbum ergo Dei Patris unigenitus Dei Filius, per omnia Patri similis & æqualis, Deus de Deo, lumen de lumine, sapientia de sapientia, essentia de essentia, &c.*

Objicies 1. In hac propositione, *Deus creat*, nomen, *Deus*, supponit pro essentiâ, non autem pro personâ: siquidem vox, *Creat*, non est terminus relativus, aut notionalis, sed absolutus: ergo nomina concreta essentialia non supponunt pro personis.

Resp. conc. ant. dist. conseq. Ergo nomina concreta essentialia non supponunt pro personis per accidens, conc. conseq. per se, neg. conseq. Nomina concreta, per se, hoc est, in se considerata, significant personas, quia (ut dictum est) significant naturam divinam ut in habente: per accidens tamen significant essentiam, cum nimirum aliquid additur, quod illa nomina ad ideam essentiæ determinet: Ejus autem generis est vox *Creat*, seu determinat vocem, *Deus*, ut pro essentiâ supponat.

In-

Instabis. Vox, *Creat*, significat actionem: atqui voces quæ significant actionem, supponunt pro personâ, quia (ut ajunt) actiones sunt suppositorum: ergo, &c.

Resp. conc. maj. dist. min. Voces quæ significant actionem, supponunt pro personâ, minùs præcipuè, & indirectè, conc. min. præcipuè & directè, neg. min. Actio præcipuè ac directè significat formam, ratione cujus effectus producitur, minùs verò præcipuè ac indirectè personam, quia persona non per se, sed tantùm per formam, quæ in eâ veluti in subjecto recipitur, operatur: proindeque cum personæ divinæ non agant ad extra ratione sui; neque enim Pater v.g. ut Pater est, mundum produxit, sed tantùm ratione Deitatis, necesse est, ut actiones ad extra præcipuè significant essentiam divinam, minùs verò præcipuè personas, in quibus supponitur existere.

Objicies 2. Si vox, *Deus*, quæ nomen est concretum, pro personâ supponeret, ista propositio, *Vnus Deus est Pater & Filius & Spiritus sanctus*, esset falsa: sed absurdum est consequens: ergo, &c. Probatur maj. Propositio de quâ agitur, est omninò idem cum istâ, *Vna persona est Pater, Filius & Spiritus sanctus*: in istâ enim, sicut & in illâ, persona est subjectum propositionis, idem pariter est prædicatum: atqui hæc falsa est: ergo & illa.

Resp. ad 1. neg. maj. Ad 2. neg. pariter maj. Ad 3. dist. ant. In istâ propositione persona est subjectum diverso modo, quo in aliâ, conc. ant. eodem modo, neg. ant. In istâ: *Persona est Pater & Filius & Spiritus sanctus*, vox persona, quæ est subjectum, determinatè sumitur, hoc est, pro unâ tantùm personâ: è contra verò in istâ aliâ: *Vnus Deus est Pater, Filius & Spiritus sanctus*, vox *Deus*, suppenit pro personis indeterminatè, ita ut sensus sit, tres personas, quæ nnam habent essentiam esse Patrem, Filium, & Spiritum sanctum.

Quæ-

Quæres, utrum sint aliquæ regulæ ad cognoscendum, quandonam vox, *Deus*, in aliquâ propositione supponat pro personâ, & quandonam pro naturâ.

Resp. plures esse regulas, quibus cognosci potest, quandonam vox, *Deus*, aut pro personâ, aut pro naturâ supponat. Eas autem regulas Sylvius ad subsequentes reducit.

### Regula I.

Quando huic nomini, *Deus*, nihil adjungitur quod ejus significationem restringat vel determinet, supponit pro naturâ communi, sive pro illo singulari simplicissimo, quod est natura divina ut communis, imò ut realiter idem cum tribus personis; ac per consequens æquè principaliter & primò supponit pro personâ ac pro naturâ, ut videre est in hac propositione: *Soli Deo honor & gloria*.

### Regula II.

Quando isti nomini, *Deus*, tribuitur actus essentialis qui personis convenit ratione essentie, tunc nomen, *Deus*, principaliter, ac primariò supponit pro essentiâ; minùs autem principaliter, & secundariò pro personis; ut in hac propositione, *Deus creat*: nam creare non convenit Patri, quia est Pater; aut Filio, quia Filius est: sed singulis personis competit ratione divinæ naturæ.

### Regula III.

Quando eidem nomini, *Deus*, tribuitur talis actus vel proprietas essentialis, quæ convenit essentie secundum quod ipsa distinguitur à personis, tunc supponit tantum pro essentiâ: ut in his propositionibus, *Deus est communis tribus personis*, *Deus est Trinus*, *Deus est Trinitas*, videre est.

## Regula IV.

Quando eidem nomini, *Deus*, tribuitur actus vel proprietas notionalis, tunc supponit pro personâ, eâque vel unâ, vel pluribus, secundum quod exigit proprietas ipsi attributa. Unde in hâc propositione, *Deus generat Deum*, subjectum supponit pro personâ Patris, & prædicatum pro personâ Filii: In istâ verò, *Deus spirat Deum*, subjectum supponit pro Patre & Filio, prædicatum verò pro solo Spiritu sancto. Hactenus laudatus author.

Tota fuit hæc sexta Dissertatio in assignandis, exponendisque terminis, quibus, cum de trinitate loquimur, uti debemus, ne dicendi modus aut Sabellii, aut Arii, aut Macedonii erroribus faveat: nempe præ oculis habuimus verissimam hanc Augustini de hocce mysterio agentis sententiam lib. i. de Trinitate, cap. 3. *Nec periculosius alicubi erratur, nec laboriosius aliquid quæritur, nec fructuosius aliquid invenitur*. Sed hæc de tanto mysterio sint satis.





INSTITUTIONES  
THEOLOGICÆ  
AD USUM  
SEMINARIORUM.

---

PARS TERTIA.

*De Deo Creatore.*



**I**N duplici nostrarum Institutionum priorē parte secuti S. Thomæ methodum, Deum in se, hoc est, prout est unus in essentiâ, & trinus in personis, perpendimus: in hac, quæ tertia est, de eo, prout per creaturarum productionem veluti exit à semetipso, differemus.

Cum autem inter creaturas nonnullæ sint quæ sunt omninò spirituales, ut angeli; aliquæ prorsus materiales, ut corpora; aliæ verò ex spiritu & corpore constantes, ut homo, necesse est, ut hanc operis nostri partem in tres dissertationes dividamus. In priorē dicemus de Angelis; in alterâ de aspectabilis hujus universi productione; & in tertiâ de homine, ad cuius usum condita sunt omnia quæ sub sensibilibus cadunt.





## DISSERTATIO PRIMA.

*De Angelis.*

*Not.* **A**ngelorum nomine intelligimus substantias, quarum species inter Deum & hominem media sit: ita ut, Deo sit inferior, & superior homine. Quæ autem ad ejusmodi substantias pertinent, reduci possunt ad earum existentiam, naturam, authorem, proprietates, meritum, peccatum, ordines.

---

## QUÆSTIO PRIMA.

*De existentia Angelorum.*

*Not. 1.* **P**lures ex veteribus Philosophis negarunt Angelorum existentiam. Ejusmodi autem erroris hanc causam tradit S. Thomas 1. p. q. 50. art. 1. Ignorantes (inquit) vim intelligendi, & non distinguentes inter sensum & intellectum, nihil esse existimaverunt in mundo, nisi quod sensu & imaginatione apprehendi potest. Et quia sub imaginatione non cadit, nisi corpus, existimarunt, quod nullum ens esset, nisi corpus. Sadducæi inter Judæos in eundem errorem impegerunt: nempe palmarium erat apud ipsos principium, nullum ens creatum existere, quod corpus non esset: Sadducæi dicunt (verba sunt Scripturæ, Actorum 23.) non esse resurrectionem, neque Angelum, neque Spiritum.

*Not. 2.* Ut in capite de quo agitur, philosophos confutemus, ex naturali ratione petenda

sunt argumenta; è contra ut impugnemus Sadducæos, proferendi sunt Scripturarum textus, & quidem præcipuè ex quinque libris Moysis, quos solos ( ut scribit Hieronymus in caput 28. Matthæi ) inter divinos admittebant. Igitur quærendum est 1. utrum Angelorum existentia possit probari ratione naturali: 2. utrum ex Scripturâ demonstrari possit.

**CONCLUSIO 1.** Angelorum existentia, probabiliter quidem, sed non demonstrativè, potest ostendi ratione naturali.

Probatur prior pars 1. Conveniens fuit, ut Deus creaturas produceret, quæ remanentes in esse creaturæ, ejus essent speciei quæ Deo perfectè similis esset: Id enim universi à Deo creati decus expetere videbatur. Atqui angeli, ex suppositione quòd existant, sunt ejusmodi: scilicet intellectu & voluntate præditi sunt, & præterea materiæ cujuslibet sunt expertes: ergo, &c. Desumptum est illud argumentum ex S. Thomâ 1. p. q. 50. art. 1. in Corpore. 2. Iplis sensibus patet, energumenos existere, seu, homines qui ea faciunt aut dicunt, quæ probant eos ab aliquâ superiore intellectuali causâ moveri: scilicet illi homines ignotis linguis loquuntur, res maximè absconditas retegunt, narrant quæ in dissitis regionibus aguntur: atqui ea causâ superior est angelus; neque enim quæ mox relata sunt, homo per se facere potest; ea quoque Deus non operatur, cum plerumque contingat, homines illos obsessos, licèt alioquin pios, in enormes blasphemias erumpere: ac proindè causa illa superior non est alia quàm angelus nequam.

Probatur altera conclusionis pars. *Primò*, ut ratione naturali quæ sit à priori, seu per causam, demonstretur Angelorum existentia, necesse est ut ostendatur, eam necessariò sequi ex Dei existentia, ita ut hoc enthymema sit verum: *Deus existit: ergo existunt Angeli*: atqui Angelorum existentia non sequitur necessariò ex Dei existentia:

tiâ: siquidem Angeli non necessario, sed liberè à Deo creati sunt: nec mirum; illius enim tum esse tum beatitudo nequaquam ab Angelorum esse dependent.

*Secundò*, existentia Angelorum demonstrari non potest demonstratione quæ sit à posteriori, seu ex effectis: Argumentum enim quod petitur ex convenientiâ, non est demonstrativum, sed probabile tantum: scilicet Dei respectu, nec est conveniens, ut producat creatura quæ perfectè, in quantum creatura potest, esse Dei repræsentet. Non majorem habet vim aliud argumentum, quod ab energumenis desumptum est: ea enim quæ in iis facultatem naturalem superare videntur, absolutè loquendo, aut in Deum, si per se mala non sint, aut in hominis corruptionem, si mala sint, refundi possunt.

Objicies. Nonnulli philosophi agnoverunt angelorum existentiam. Plato tum in *Timæo*, tum in *Convivio*, sæpius Angelorum meminit, eosque inter Deum & hominem medios facit. Aristoteles lib. 8. *Physicorum* scribit, astra ab Angelis moveri: ergo existentia Angelorum solâ ratione naturali potest ostendi.

Resp. dist. conseq. Existentia Angelorum solâ naturali ratione potest ostendi probabiliter, conc. conseq. demonstrativè, neg. conseq. Solutio patet ex iis, quæ hucusque dicta sunt. Addendum est, Platonem ex Moyse pentateucho, quem, Augustino teste, legerat, Angelorum existentiam desumpsisse.

CONCLUSIO 2. Angelorum existentia potest adversus Sadducæos Scripturis demonstrari.

Probatur 1. Non est dubium, quin ex novo testamento demonstretur Angelorum existentia: *Angeli eorum* (ait Christus Matthæi 18.) *semper vident faciem Patris*. Apostolus ad Hebræos 1. docet, Christum idè esse majorem Angelis, quod

isti sint administratorii spiritus; ille è contra fit Dei Filius: *Tantò* (inquit) *melior Angelis effectus, quantò differentius præ illis nomen hæreditavit*. Hinc Augustinus concludit, fas non esse, sanctorum illorum spirituum existentiam in dubium revocare: *Angelos* (ait in Psal. 103.) *novimus ex fide, & multis apparuisse scriptum legimus, & tenemus: nec inde dubitare fas nobis est*.

2. Non minùs efficacia argumenta peti possunt ex Pentateucho Moyſis, quem solum inter veteris testamenti libros admittebant Sadducæi. Geneſeos cap. 16. Angelus Domini Agari persuadet, ut redeat ad Abrahami domum. Capite 19. Duo Angeli Sodomam proficiscuntur, & apud Loth Abrahami nepotem hospitantur. Capite 24. Abrahamus famulum suum mittens in Mesopotamiam, sic loquitur, *Dominus Deus cæli mittet Angelum suum coram te*. Eorum quoque fit mentio Exodi 14. Numerorum 22. unde sic arguitur. Illi existunt, de quibus tanquam de personis existentibus Pentateuchus loquitur: atqui Pentateuchus de Angelis loquitur tanquam de personis existentibus: ergo, &c.

Dices cum Sadducæis, Pentateuchum Angelorum nomine non intelligere spiritus, personas aut substantias per se subsistentes; sed inspirationes occultas, quibus quasi Dei nunciis homines de Dei voluntate certiores facti fuerint.

Verùm facillè refelli potest ea responsio. Siquidem Pentateuchus, non minùs quàm alii veteris testamenti libri, de Angelis tanquam de personis, sive substantiis per se subsistentibus, loquuntur: nimirùm eis facta ac officia tribuunt, quæ solis personis, non autem meris animi cogitationibus, convenire possunt; v.g. cum dicunt Angelos aliquibus apparuisse patriarchis, in viâ fuisse comites sub humanâ specie latentes, cum hominibus manducasse, Dei ministros esse, non-

nunquam beneficiis homines cumulasse, aliquando verò castigasse pœnis.

Objicies 1. cum Sadducæis. Si Angeli essent personæ, seu substantiæ per se subsistentes, Moyses Genesis 1. recensens Mundi ac partium ejus creationem, debuisset angelorum mentionem facere: scilicet periculum alioquin fuisset, ne Judæi, pro quibus præsertim Genesis scribebatur, ex illo Moysis silentio colligerent, Angelos non fuisse creatos; ac proinde deos esse, quibus divinus cultus deberetur: atqui Moyses rerum creationem describens, angelorum mentionem non facit: ergo, &c.

Resp. neg. maj. Ratio est, quia ut idololatriæ periculum Judæis eriperetur, satis fuit earum rerum creationem expressè recensere, quæ idololatriæ causam præbere potuissent: ut ejusmodi erant solæ res corporeæ, ut sol, luna, stellæ, ejusque generis alia: compertum est enim præteritorum temporum experienciâ, Judæos non ad rerum insensibilium, ut sunt anima & angelus, sed tantum ad rerum quæ sub sensu cadunt, adorationem fuisse propensos. Præterea par fuit, ut Moyses apud Judæos merè carnales de spiritualibus, ut sunt angeli, sileret. *Nihil* (inquit Chrysostomus hom. 2. in Genesim) *de invisibilibus virtutibus* (expressè) *differit, neque dicit, In principio fecit Deus Angelos vel Archangelos. Non simpliciter neque temerè hanc nobis doctrinæ viam paravit: Judæis enim loquebatur, qui toti præsentibus rebus inhiabant, neque spirituale quidquam comprehendere valebant. Itaque eos à sensibilibus ad cognoscendum universi opificem inducit.*

Instabis. Moyses qui rerum creationem Genesis cap. 1. describens, de angelis tacuit, sæpiùs in aliis ejusdem libri capitibus de eis loquitur: ergo ne Judæis viderentur dii, Moyses eorum creationem antea expressè recensere debuisset, si Angeli aliud sint, quàm cognitiones à Deo hominibus infusæ.

Resp. neg. conseq. Ratio est, quia Moyſes, cum poſtea de Angelis loquitur, ea dicit quæ leſtorem determinent ad judicandum, Angelos non eſſe deos, ſed creaturas: ſcilicet eorum mentionem non facit, niſi tanquam miniſtrorum ac nunciatorum unius ac veri Dei: unde licet à Moyſe ad Sadducæos uſque Judæi omnes Angelorum tanquam ſubſtantiarum per ſe ſubſiſtentium exiſtentiam agnoverint, nuſquam tamen leguntur divinum eis cultum exhibuiſſe.

Objicies 2. Illi non exiſtunt, quorum nomen non eſt nomen perſonæ, ſed nuncii tantum: atqui nomen Angelorum non eſt nomen perſonæ, ſed nuncii tantum, juxta illud Auguſtini lib. 5. de Geneſi ad litteram cap. 19. *Nuncii, Græcè, Angeli dicuntur*; unde Chriſtus Matthæi xi. docet, Joannem Baptiſtam eſſe illum qui Malachiæ 3. hiſce verbis dictus fuerat Angelus: *Ecce ego mitto Angelum meum*: ergo, &c.

Respondet Eſtius, aſſeritque 1. quòd quamvis apud Græcos authores Angelus ſit nomen officii, apud Hebræos tamen ei, ſubſtantix ac perſonæ nomen respondeat.

Aſſerit 2. quòd etſi, *Angelus*, officii nomen eſſe ſupponatur, inde tamen colligi non poſſit Angelum non eſſe perſonam; quemadmodum ex oratoris aut legati nomine colligi non poſteſt, eum qui oratoris aut legati munere fungitur, non eſſe perſonam aut ſubſtantiam quæ per ſe ſubſiſtat.

Aſſerit 3. ideam, quæ tum in Scripturis, tum in Patribus voci, *Angelus*, reſpondet, eſſe ideam quæ non officium tantum, ſed perſonam officio fungentem menti exhibeat: unde ( ut jam dictum eſt ) Auguſtinus lib. 5. in Geneſim, cap. 19. ſic loquitur: *Nuncii, Græcè, Angeli dicuntur: quo nomine generali univerſa illa ſuperna civitas nuncupatur.*

## Q U Æ S T I O II

*De Angelorum natura.*

*Not.* **U**T cum methodo quæstio de Angelorum naturâ pertractetur, quærendum est 1. utrum Angeli naturâ sint spirituales; 2. an sint immortales; 3. utrum omnes Angeli specie differant.

## C A P U T P R I M U M.

*Utrum Angeli natura sint spirituales.*

*Not.* 1. **D**Uobus modis res aliqua dici potest spiritualis. Primò, quòd ipsa non sit corpus: secundò, quòd per se nullum ordinem dicat ad corpus, ita ut neque sit corporis forma, seu cum eo, tanquam materiâ, compositum efficiat; neque eo, tanquam instrumento, ad suas operationes indigeat: hîc igitur est exponendum, utrum angelica substantia sit eo duplici modo spiritualis.

**CONCLUSIO I.** Angelica substantia est spiritualis, prout spirituale opponitur corpori.

Probatur. Substantia intelligens & volens, est spiritualis, sumendo spirituale prout opponitur corpori: atqui substantia angelica est intelligens & volens: ergo, &c. Minor est certa; unde probatur major. Corpus nec intelligere, nec velle potest: id enim nec intelligere nec velle potest, quod capax est soliûs motûs localis: sed corpus, quantumcumque subtile supponatur, capax est soliûs motûs localis, nempe præter illam capacitatem nihil in eo concipimus: ergo, &c.

Objicies. Augustinus pluribus in locis docet Angelos esse corporeos: atqui sic voluit eos esse corporeos, ut nihil sit in eis spirituale: si enim credidisset, spirituale quid eis inesse, dixisset esse in angelis animam, quemadmodum dicitur esse in homine, qui spiritu & corpore constat: sed Augustinus nusquam dixit animam in Angelis esse: imò libro secundo Retractionum cap. xi. quòd in calce libri sexti de Musicâ, angelos appellasset *animarum beatarum atque sanctarum* vocabulo, sic corrigit: *Quando quidem hîc non nisi angelos sanctos intelligi volui: quos habere animas nusquam me legisse in divinis eloquiis, canonicisque recolo: ergo, &c.*

Resp. ad 1. neg. min. Ad 2. neg. maj. Ratio est, quia ea fuit Augustini consuetudo, ut substantiis de quibus Scriptura loquitur, non alia nomina tribueret, quàm quæ Scriptura eis tribuit; unde quòd Scriptura angelos nusquam appellaret *animarum* nomine, idè S. Doctor lib. 2. Retractionum corrigit eum loquendi modum. Jam verò Augustinum nusquam censuisse, Angelicam substantiam non aliud esse quàm corpus, demonstrari potest ex eo, quòd innumeris in locis docuerit, Angelorum naturam multò esse excellentiorem humanâ: at id in suppositione de quâ agitur, falsum esset: nempe lib. 1. de Animâ, & ejus origine, ad Renatum cap. 5. Vincentium Victorem redarguit, quòd asseruisset animam hominis esse corpus: *Quod verò (inquit) eam non spiritum, sed corpus esse contendit, quid aliud vult efficere, quàm nos non ex anima & corpore, sed ex duobus, vel etiam tribus constare corporibus?*

CONCLUSIO 2. Angelorum substantia non constat ex spiritu & corpore.

Probatur 1. ex Scripturâ. Sacri codices Angelos vocant Spiritus: Hæc enim habentur Psal. 103. *Qui facit Angelos suos spiritus*; quem quidem locum Apostolus ad Hebræos 1. exponit non de



de ventis, quos tamen aliunde constat esse aliquâ ratione Dei nuntios, sed de Angelis: Et ad Angelos quidem dicit: *Qui facit Angelos suos spiritus, & ministros suos flammam ignis.* Hæc iterum ad Hebræos 1. *Nonne omnes sunt administratorii spiritus?* Sic etiam idem Apostolus ad Ephesios 6. de spiritibus nequam loquitur: *Non est nobis colluctatio adversus carnem & sanguinem, sed adversus spiritualia nequitie in cœlestibus.* Atqui iis locis Spiritus nomine intelligitur substantia, quæ non constat ex spiritu & corpore. Nam 1. iis in locis Scriptura per synecdochen, hoc est, sumendo partem pro toto, non loquitur; scilicet nihil adjungit, quod Spiritus nomen ad incompletam substantiam restringat. 2. Scripturæ, cum angelos vocant Spiritus, de iis eodem modo loquuntur, quo de hominibus, eos nimirum spiritus exhibent nobis tanquam personas, quæ Dei nomine quibusdam ministeriis funguntur; ergo, quemadmodum hominis nomine, Scripturæ completam substantiam intelligunt; ita & nomine Spiritus cum Angelos eo nomine designant. 3. Si Spiritus una esset Angelicæ substantiæ pars, & corpus altera, Scriptura alicubi proprio nomine expressisset completam illam substantiam, ex spiritu & corpore constantem, sicut innumeris in locis, cum de homine loquitur, asserit eum ex animâ & corpore constare: atqui Scriptura, cum de angelis loquitur, nullibi proprio nomine expressit completam illam substantiam, quæ ex spiritu & corpore constet: ergo Spiritus nomen sumpsit pro completâ ac integrâ Angelorum naturâ.

Probatur 2. ex Patribus. Ignatius Martyr in Epistolâ ad Trallianos, angelos vocat *incorporeas naturas*. Basiliius libro de Spiritu sancto cap. 1. ut probet, omnem substantiam creatam esse obnoxiam mutationi, utitur argumento petito tum ex substantiâ corporeâ tum ex incorporeâ, aitque

angelum hujus esse, hoc est, substantiæ incorporeæ. Gregorius Nyssenus lib. 12. contra Eunomium, Angelos pariter nominat *incorpoream creaturam*. Eusebius Cæsariensis lib. 4. de Demonstratione Euangelicâ, cap. 1. scribit, *incorporeas quasdam & intelligentes ac divinas virtutes esse angelos & archangelos, materia carentes & puros omnino spiritus*. Chrysostomus eâdem ratione loquitur hom. 22. in Genesim, & primâ in Matthæum. Theodoretus quæstione 20. in Genesim, hanc affert rationem, cur homo idè non sit imago Dei, quòd sub sensus non cadat: *Alioquin* ( inquit ) *potius imagines Dei vocarentur Angeli & Archangeli, & omnes incorporeæ, utpotè corporibus vacuæ, & sine ulla mixtione minime aspectabiles*. Joannes Damascenus lib. 2. de Fide c. 3. Angelum definit *Substantiam intelligentem, materiæ atque corporis expertem*. Idem apud Dionysium, si tamen author sit libri de cœlesti hierarchiâ, videre est.

Laudatis Græcis Patribus subscribunt plures Latini. Hieronymus in Epistolâ ad Avitum refellit Origenem, quòd docuisset, *dæmones ob delicta aereis corporibus esse vestitos*. Leo Magnus in Epistolâ ad Turibium, cap. 6. scribit, *fidem veram quæ est Catholica, omnium creaturarum, sive spiritualium, sive corporearum, bonam confiteri substantiam*. Gregorius Magnus in quarto Moralium cap. 19. conceptis terminis asserit, Angelos cujusque corporis expertes esse: *Angelus namque* ( ait ) *solummodo spiritus est: homo verò & spiritus est & caro*. Concilium Lateranense IV. idem, quod mox laudati Patres, sensit de Angelorum naturâ: *Creator omnium* ( inquit cap. 1. de Fide Catholicâ ) *qui sua omnipotente virtute simul ab initio temporis utramque de nihilo condidit creaturam, spiritualem & corporalem, angelicam videlicet & mundanam; ac deinde humanam quasi communem ex spiritu & corpore constitutam*, Qui post Lateranense Concilium scribere

psere scholastici, in eandem abierunt sententiam, seu docuerunt, angelos esse corporis expertes, uno tamen excepto Cajetano, qui in Annotationibus ad secundum caput epistolæ ad Ephesios, scribit, dæmones (de sanctis autem angelis idem non docet) ex spiritu & subtili quodam corpore compositos esse.

Ex iis verò tum Græcorum, tum Latinorum Patrum textibus sic conficitur argumentum. Illi censuerunt, Angelos non esse substantias ex spiritu & corpore constantes, qui eos vocarunt incorporeas naturas; qui dixerunt, eos carere materia; corporibus esse vacuos; materiæ atque corporis expertes; eos esse merè spirituales: atqui Patres tum Græci tum Latini sic angelos vocarunt, dixerunt eos ejusmodi esse: ergo censuerunt, eos non esse substantias ex spiritu & corpore constantes.

Probatur 3. rationibus. Primò, si angeli habeant corpora, specie ab hominibus non differunt: neque enim subtile & crassum specie differunt. 2. Quoties angeli è cœlo in terram mittuntur, aut cœlum divideretur, aut fieret corporum penetratio. 3. Angeli moventur in instanti, aut saltem motu maximè celeri; ac proinde, si corpus habeant, necesse foret, aerem quem pertranseunt, maximâ celeritate dividi, & postea claudi: at nec dividitur, nec postea clauditur; id enim fieri non posset sine magno sonitu & ingenti sibilo, quem tamen nusquam percipimus, quamvis angelorum & dæmonum motus frequentissimè contingant. 4. Vix concipi posset, quomodo integra dæmonum legio unum hominem (ut habetur Lucæ 6.) obsedisse potuerit.

CONCLUSIO 3. Angeli non indigent corpore tanquam instrumento, per quod suas naturales operationes eliciant.

Probatur. Naturales angelorum operationes sunt intellectio & volitio: sed angeli corpore tanquam instrumento non indigent, ut ejiciant

intellectionem & volitionem: non minùs enim independenter à corpore duplicem illum actum eliciunt, quàm animæ à corporibus per mortem separatæ: animæ verò à corporibus separatæ eliciunt intellectionem & volitionem: ergo, &c.

*Solvitur argumentum ex Scriptura pettum.*

Objicies. Qui commisceri possunt cum mulieribus, ex eisque filios generare, verum habent corpus: atqui angeli commisceri possunt cum mulieribus, ex eisque filios generare; id enim contigisse probant hæc verba Genesis 6. *Videntes filii Dei filias hominum, quòd essent pulchræ, acceperunt sibi uxores ex omnibus quas elegerant.* Nempè nomine, *filii Dei*, intelliguntur Angeli, tum quòd ii filii Dei opponantur filiabus hominum, tum etiam quòd loco, *filii Dei*, plures ex codicibus septuaginta interpretum legant *Angelos Dei*, licèt non omnes, ut hisce verbis docet Augustinus lib. 15. de civitate Dei, cap. 23. *Septuaginta interpretes, & Angelos Dei dixerunt istos, & filios Dei, quod quidem non omnes codices habent; nam quidam nisi filios Dei habent: tum denique quòd in libro Enoch, ii filii Dei vocentur Angeli: Quamvis autem ille liber Enoch non sit unus è Canonicis, non levis tamen est ponderis, cum Judas Apostolus in suâ Epistolâ canonicâ testimonium ex eo desumpserit: ergo, &c.*

Resp. ad 1. neg. min. Ad 2. neg. ant. seu per hæc verba, *Filii Dei*, Angelos intelligi. Ratio est 1. quia intelligi non possunt angeli sancti: Ii enim (dicente Christo Matthæi 20.) neque nubunt, neque nubuntur. Non possunt quoque dæmones intelligi, cum dæmones nusquam in Scripturis appellentur filii Dei. Præterea de iis intelligi non possunt voces, *Filii Dei*, quorum peccata non fuerunt diluvii causa. Moyses Genesis sexto capite narrare voluit causam, quæ Deum impulit

pulit ad perdendum genus humanum diluvio: atqui non Angelorum, sed hominum peccata fuerunt causa diluvii: *Videns autem Deus*, (inquit Moyses) *quod multa malitia hominum esset in terra, & cuncta cogitatio cordis intenta esset ad malum omni tempore, penituit eum, quod hominem fecisset in terra. Et tactus dolore cordis intrinsecus: Delebo, inquit, hominem quem creavi, à facie terræ.*

Nec obstat, quod aliqui codices loco, *Filii Dei*, legant, *Angeli*: ( ut relatum est ex Augustino ) non enim omnes codices sic legunt, sed aliqui tantum. Præterea Cyrillus lib. 9. adversus Julianum emendatiorem censet lectionem, quæ habet *Filios Dei*, quàm quæ habet, *Angelos Dei*.

Nullius pariter est roboris, quod ex Enoch libro laudatur, scilicet apocryphus est liber ille, nec eum reddidit canonicum Judas Apostolus, siquidem librum non laudat, sed prophetiam quæ voce tantum, ac majorum traditione accepta esse potuit. *Prophetavit* ( inquit ) *& de his septimus. ab Adam Enoch*. Præterea in libris apocryphis non omnia sunt dubiæ fidei: Igitur Judas Apostolus, spiritu quo ad scribendum agebatur, judicare potuit, sententiam quam laudavit, verè probatam fuisse ab Enoch, quamvis cætera quæ in eodem libro continentur, minimè probaverit.

Dicendum est igitur vocibus, istis *Filii Dei*, quæ Genesis capite sexto leguntur, intelligi filios Seth, idque ( ut ait Jansenius in hunc locum ) siue propter præstantiam corporis non enervati libidinibus, siue potius propter animum in pietate & veri Dei cultu constantem; filias hominum esse filias Cain, quia tanquam caro & sanguis nihil nisi humana & terrena cogitabant. Hi ergo ( prosequitur idem author ) cum hætenus cognationi Cain tanquam à Deo. maledictæ non permiscerentur, pulchritudinis libidine victi, defertâque avitâ pietate, acceperunt sibi uxores ex om-

omnibus quas elegerant, id est, quæcumque sibi placuisset accipere, quo indicari videtur, eos nec à violentiâ abstinuisse. Unde cùm earum quoque perversissimos mores discerent, sicut Israelitæ Madianitarum; dixit Deus: Non permanebit spiritus meus, id est, flatus ille, seu spiraculum vitæ quod eis inspiravi, non manebit amplius in hominibus istis successione perpetuâ, sed brevî delebo eos diluvio. Haftenus laudatus scriptor in suo in Genesim in Commentario.

*Solvitur argumentum petitum ex Patribus.*

Objicies 1. Multi Patres docuerunt, angelos<sup>s</sup> esse substantias ex spiritu & corpore constantes.

Primò, nonnulli scripserunt, eos qui in cœlis sunt, ignoto quidem, sed tamen materiali cibo quem Scriptura panem angelorum vocat, nutriri; eos verò qui huicce inferiori mundo præpositi sunt, sese cum mulieribus commiscuisse, ex eisque genuisse demones. Ita Justinus quoad utramque partem in Dialogo cum Tryphone; ita etiam quoad postremam Athenagoras initio Apologiæ, Clemens Alexandrinus lib. 8. Stromatum, cap. 3. Tertullianus lib. de cultu feminarum cap. 10. Lactantius Institution. lib. 2. cap. 14. Ambrosius in Apologiâ Davidis cap. 1. nec non plures alii, sive secundi, sive tertii, sive quarti sæculi scriptores.

Secundò, alii, licèt negarint illud angelorum cum mulieribus commercium, contenderunt tamen, angelos habere corpora subtilissima, & non minùs quàm sit aer, in omnem motum flexibilia. Basilus in libro de Spiritu sancto cap. 16. sic loquitur: *Ideo & in loco sunt* (cœlestes virtutes) *& sunt aspectabiles, in specie propriorum corporum iis, qui digni sunt, apparentes.* Cyrillus Alexandrinus libro nono in Joannem scribit, solum Deum incorporeum esse. Joannes Thessalonicensis hæc habet in Dialogo, qui in septimâ generali  
sy-

*synodo, Actione 5. lectus est: Solus revera Deus incorporeus & incircumscriptus est. Intelligibiles verò creaturæ non penitus incorporeæ sunt, & invisibiles, ut Deus. Ideò in loco sunt & circumscribuntur. Sicubi autem incorporeos appellari angelos invenias, idcirco sic appellantur, quòd ex materialium quatuor elementorum permixtione non constent, nec ejusmodi sint corpora crassa, & solida, qualia nobis circumfusa sunt.*

Quæ ex Patribus Græcis mox laudata sunt, probat Tertullianus lib. de Carne Christi, cap. 16. Ad ea alludit Fulgentius in libro de Trinitate, ubi referens antiquorum sententiam, sic loquitur: *Planè ex duplici eos esse substantia, asserunt magni, & docti viri, id est, ex spiritu incorporeo, & ex corpore.*

Augustinus in eam quoque propendet opinionem, quæ angelis ætherea corpora tribuit. Lib. 2. de Trinitate, cap. 7. asserit, eos corpus suum, cui non subduntur, sed subditum regunt, in speciebus quas velint, accommodatas vertere. In Psal. 85. scribit, corpus hominis habere quidem vitam dum homo in humanis agit; sed tamen dici posse mortuum, comparatum corpori illi quod futurum est, qualia sunt angelorum corpora. Epistolâ 115. interroganti Nebridio, quomodo potestates superiores nostram imaginationem movere possint, respondet, id fieri per earum in nostrum corpus sensibilem impressionem: *Nequaquam (ait) est absurdum eos, qui aërio, vel æthereo corpore aliquid in corporibus agunt, quæ naturali ordine penetrant, longè majore uti facultate ad movendum quidquid volunt.* Sermonem 102. de Diversis, celerimum cœlorum motum comparat cum celeritate quâ corpus angelicum movetur.

Ex iis autem Patrum textibus sic argui potest. Illi habent corpus, qui per sui cum mulieribus conjunctionem dæmones generarunt; qui sunt aspectabiles in specie propriorum corporum; qui non crassa quidem, sed subtilia habent corpora; — qui

qui ex duplici substantiâ constant; qui prolixi-  
corpus suum movent; qui in mentes nostras  
agunt per corporis sibi proprii in sensus nostros  
impressionem; qui sunt corporei; atqui (ut pa-  
tet ex laudatis Patribus) Angeli sunt ejusmodi  
ergo verum habent corpus.

Resp. 1. concessâ maj. dist. min. Atqui Angeli  
sunt ejusmodi in sententiâ aliquorum Patrum,  
conc. min. in sententiâ majoris partis Patrum;  
neg. min. Antiqui Patres de quæstione, de quâ  
agitur, variè senserunt. Nonnulli Platonica phi-  
losophiâ inibuti, Angelos (fatemur) crediderunt  
substantias esse, quæ, sicut homo, ex spiritu &  
corpore constarent; Verùm alii, & quidem pars  
major (ut patet ex iis quos ad nostræ conclusio-  
nis defensionem laudavimus) contrariam sen-  
tentiam amplexi sunt.

Resp. 2. conc. maj. disting. min. Atqui Angeli  
sunt ejusmodi, ex Patribus, quorum aliqui de eâ  
re dubitando locuti sunt, conc. min. qui non  
dubitando locuti sunt, neg. min. Augustinus,  
qui plura scripsit quæ angelico corpori favent,  
pluribus tamen in locis dubitans ac veluti hæsi-  
tans eâ de re loquitur. Enchiridii cap. 59. scribit  
difficillimam esse quæstionem de corporibus An-  
gelorum. Lib. 1. Retractat. cap. 26. id quod dixerat  
quæst. 67. inter octoginta tres, quosdam Angelos  
animalium adinstar vivere, retractat velut auda-  
cius ac sine fundamento dictum lib. 21. de Civit.  
cap. 10. Cùm enim dixisset, dæmonibus sua esse  
corpora, quæ consentex aere, sic loquitur:  
*Si autem quisquam nulla habere corpora dæmones*  
*assererat, non est hac de re aut laborandum operosa*  
*inquisitione, aut contentiosa disputatione certandum.*  
Idem S. Doctoris dubium legere est lib. 3. de Ge-  
nesi ad literam, cap. 10. ubi de Angelorum corpo-  
ribus agens, conditionaliter loquitur: *Si hæc*  
*(inquit) ita sint.* Eandem sententiam tanquam  
dubiam exhibet quoque lib. 15. de Civit. cap. 23.  
nec non epistolâ 157. veteris editionis.

Idem



Idem quoque dubium tenuit duodecimo sæculo Bernardum : hæc enim scribit lib. 5. de Consideratione, cap. 4. *Et primò quidem cives spiritus esse illic potentes..... corpore æthereos..... Quamquam de corporibus horum, non modò unde sint, sed an aliquatenus sint, hæret sententia aliquorum. Unde si quis inter opinabilia magis id ponendum censuerit, non consento.* Sermone 5. in Cantica fatetur, rem de quâ hîc agitur, & apud se & apud veteres esse dubiam : *Ceterum* ( inquit ) *angelica corpora, utrumnam ipsis spiritibus naturalia sint, sicut hominibus sua.... nolo ut à me requiratis. Videntur Patres de hujusmodi diversa sensisse; nec mihi perspicuum est, unde alterutrum doceam, & nescire me fateor.*

Resp. 3. inter scriptores quibus placuit, Angelos esse compositos ex spiritu & corpore, numerari non debere eos omnes qui dicunt Angelos esse corporeos : siquidem 1. vocem, *Corporeum*, non sumunt strictè, hoc est, pro substantiâ extensâ in longum, latum & profundum; sed latè, id est, pro eo omni quod loco definitur, seu quod ita est in uno loco, ut non sit alibi. Ratio est, quia vocem, *Corporeum*, plerumque opposuerunt immensitati diuinæ : sic Cassianus Coll. 7. cap. 13. dicit, solum Deum esse incorporeum, *quia est ubique & omnia penetrat* : sic etiam Hilarius ad calcem libri 2. de Trinitate, propter eandem rationem scribit, solum Deum esse Spiritum : *Spiritus* ( inquit ) *nec circumscribitur, nec tenetur, quia per naturæ suæ virtutem ubique est.* 2. Alii ex iisdem scriptoribus *corporeum* sumpserunt pro eo omni quod est compositum ex substantiâ & accidentibus, siue sit omninò spirituale, siue sit ex spiritu & corpore compositum; in eoque sensu dixerunt, solum Deum esse spiritum, & creata omnia esse corporea : *Comparatione quidem nostrorum corporum, angeli spiritus sunt* ( ait Damascenus lib. 2. de Fide Orthod. cap. 3. ) *sed comparatione summi & incircumscripti spiritus, sunt corpus.*

Itaque ex tribus solutionibus ad argumentum datis patet 1. non omnes Patres, sed aliquos tantum docuisse, angelorum substantiam ex spiritu & corpore constare; patet 2. plures ex iis qui in eam sententiam propenderunt, eam non proposuisse tanquam certam, sed tanquam dubiam, de qua cuique pro libito licitum esset opinari; patet 3. inter eos Patres numerari non debere eos omnes qui scripserunt, angelos esse corporeos, cum id de eis non absolutè sumptis, sed comparative tantum, ad Deum nimirum, dixerint.

*Solvitur argumentum ex Concilio Nicæno II. petitum.*

Objicies. In Concilio Nicæno II. Actione 5. lectus est Dialogus Joannis Thessalonicensis, in quo vir quidam sanctus cum gentili disputans inducitur. In eo autem dialogo Joannes ore Sancti quem pro Christianis loquentem inducit, asserit 1. Angelos & Archangelos esse corporeos, cum e contra solus Deus sit incorporeus: *Solus revera Deus (inquit) incorporeus & incircumscriptus est. Intelligibiles verò creaturæ non penitus incorporeæ sunt.* Asserit 2. eos, quod corporei sunt, loco circumscribi posse: *Ideo in loco sunt, & circumscribuntur.* Asserit 3. quod textus in quibus nonnulli Patres scribunt, eos esse incorporeos, intelligi debeant non de carentiâ cujuslibet, vel subtilis, corporis; sed crassi, solidi, & impenetrabilis, cujusmodi sunt ea quæ constant ex quatuor elementorum commixtione. *Sicubi autem incorporeos appellari angelos invenias, aut demones, aut animas, idcirco sic appellantur, quod ex materialium quatuor elementorum permixtione non consent, nec ejusmodi sint corpora crassa & solida, qualia nobis circumfusa sunt.* Asserit 4. eos in proprio corpore nonnunquam ab hominibus visos fuisse: *In specie propriorum corporum visi sunt ab iis quorum Deus oculos aperuit.* Asserit 5. Basilium, Athanasium, & Methodium ejusdem

dem secum esse sententiæ. Ubi autem perlectus fuit ille Joannis Thessalonicensis dialogus, Tarasius Constantinopolitanus Patriarcha sic locutus est: *Ostendit Pater, etiam angelos oportere pingi, quoniam circumscripti sunt, & hominum specie multis apparuerunt.* Tarasii dictum probavit tota Synodus: *Sancta Synodus dixit: Etiam Domine.*

Ex hactenus dictis sic argumentum conficitur. 1. Illi sunt corporei, quos Joannes Thessalonicensis asseruit esse corporeos. 2. Ii sunt corporei, quos Tarasius dixit hominibus apparuisse, loco circumscriptos esse, ac ob id posse pingi. 3. Ii sunt corporei, de quibus ad mentem Joannis Thessalonicensis & Tarasii Patriarchæ locuta est Synodus Nicæna II. Atqui Joannes Thessalonicensis asseruit angelos esse corporeos, Tarasius dixit eos hominibus apparuisse, posse loco circumscribi, ac ob id pingi posse; de angelis ad mentem Joannis Thessalonicensis & Tarasii locuta est Synodus Nicæna II. ergo, &c.

Resp. 1. neg. priorem partem majoris propositionis. Nec enim privata sententia Joannis Thessalonicensis præferri debet Patribus & argumentis, quæ ad nostræ conclusionis probationem adducta sunt.

Resp. 2. dist. alteram ejusdem majoris propositionis partem. Ii sunt corporei quos Tarasius dixit circumscribi & apparuisse in propria specie, conc. maj. in alienâ specie, neg. maj. Tarasius hoc tantum posteriore modo, non autem priore, dixit angelos apparuisse: ait nimirum, eos *hominum specie*, quæ haud dubiè non est angelis propria, multis apparuisse. Nec est quòd quis urgeat Tarasium approbasse Joannis Thessalonicensis dialogum: siquidem illum non probavit quantum ad omnia, sed tantum quoad aliqua; hoc est, probavit quidem hocce Joannis dictum quoad substantiam sumptum: *Angelos circumscribi &*  
ap-

*apparuisse*, sed eum non probavit sumptum quò ad modum circumscriptionis & apparitionis: nempe tantum abest, ut dixerit Angelos in proprio corpore visos esse (ut dixerat Joannes Thessalonicensis) quin potius id expressè negarit, asserens eas Angelorum apparitiones fuisse sub hominum specie.

Resp. 3. dist. tertiam ejusdem majoris propositionis partem: *It sunt corporei*, de quibus Nicæna II. Synodus locuta est ad mentem Joannis Thessalonicensis, quantum ad omnia, conc. maj. quantum ad aliqua tantum, neg. maj. Sancta Synodus id tantum in Joanne Thessalonicensi probavit, quod in ipso Tarasius probaverat, nempe immediate post verba Tarasii, subjecit ista: *Etiam Domine*: ac proinde, cum (ut mox observatum est) Tarasius in Joanne Thessalonicensi probaverit tantum Angelos circumscribi & apparere, non probaverit verò, quòd in corpore sibi proprio circumscribantur, & appareant, non aliud quoque probavit sacra Synodus, dum Tarasio hisce verbis, *Etiam Domine*, subscripsit.

Confirmatur responsio ex scopo quem sive Tarasius, sive Patres Nicænæ Synodi sibi proposuerunt: hoc unum adversus Iconomachos intenderunt, *Licetum esse Angelos pingere*: id autem revera licere, sic ex Joanne Thessalonicensi collegerunt: *Licetum est eos pingere qui circumscribuntur loco, & hominibus apparent: atqui Angeli circumscribuntur loco, & hominibus apparent: & quidem secundum Joannis sententiam, in propria specie, secundum nostram verò in aliena, scilicet humana: ergo, &c.* Hincque patet necessarium non fuisse, ut Patres secundæ Nicænæ Synodi Joannis de proprio Angelorum corpore dogma probarint, ut colligerent, eidem Joanni persuasum fuisse, licetum esse Angelos pingere.

*Solvitur argumentum petatum ex apparitionibus Angelorum.*

Objicies. Illi sunt incorporei, qui sub sensibili specie multoties hominibus apparuerunt; qui cum eis sunt collocuti; cum iis manducarunt ac biberunt: atqui hæc omnia præstiterunt Angeli, ut patet ex variis Scripturæ textibus: ergo Angeli sunt corporei.

Respondeo 1. aliquando Augustinum dubitasse, utrum Angeli apparuerint in assumptis aliarum creaturarum corporibus, an verò in propriis, quæ pro libito in varias species, ac formas immutaverint: *Sed fateor* (ait lib. 3. de Trin. c. 1.) *excedere vires intentionis meæ, utrum Angeli manente spiritali sui corporis qualitate per hanc occultius operantes, assumant ex inferioribus elementis corpulentioribus, quod sibi coaptatum, quasi aliquam vestem mutant, & vertant in quaslibet species corporales, etiam ipsas veras, sicut aqua vera in verum vinum conversa est à Domino: an ipsa propria corpora transformant in quod voluerint accommodata ad id quod agunt.* Sed dubium illud non semper Augustinum tenuit: scilicet lib. 16. de Civit. Dei cap. 29. scribit, Angelos in assumptis corporibus apparuisse.

Respondeo 2. aliquos authores scripsisse, Angelorum apparitiones, quarum Scripturæ mentionem faciunt, veras non fuisse, sed tantum phantasticas; quatenus nimirum Deus, patriarcharum aliorumve, quibus Angeli dicuntur apparuisse, sensus ita movit, ut moti fuissent, si Angeli sub aliquâ sensibili specie sese realiter præsentem exhibuissent. Sed admitti non debet illa responsio: Nam 1. ii quibus Angeli dicuntur apparuisse, non uniûs sensûs, sed plurium sensuum actione probarunt Angelorum præsentiam: Quæ autem multoties plurium sensuum testimonio comprobantur, ad imaginariam, & fictitiam apparentiam reduci non possunt: non enim aliâ ratione

Chri-

Christus suis apostolis probavit, se post resurrectionem verum corpus habuisse. 2. Quod est tantum in imaginatione cognoscentis, ab omnibus indifferenter eodem modo non videtur: at angeli eodem modo ab omnibus indifferenter visi sunt: scilicet ii qui apparuerunt Abraham, à totâ illius familiâ visi sunt: is qui Tobiam comitatus est, passim ab omnibus videbatur.

Resp. 3. dist. maj. Illi sunt corporei, qui sub sensibili & propriâ specie apparuerunt, conc. maj. qui sub alienâ specie, neg. maj. Angeli non apparuerunt in propriâ specie, seu in corpore sibi proprio, sed in alieno, humano nimirum: formarunt autem sibi corpus humanum ex aere circumstante, quem virtute, quâ pollent in res creatas, in ossa, carnem, aliasve corporis humani partes condensarunt. Si quis verò roget, quas operationes angeli exercuerint in corporibus assumptis, dicendum erit, quòd licet reales fuerint, verè enim cibum infuderunt ori, digesserunt in stomacho; non fuerint tamen vitales, eo quòd profectæ non sint à principio vitali, quod quidem in homine non aliud est quàm anima, quæ verè ac substantialiter unitur corpori; cum è contra angeli accidentaliter tantum, hoc est, per quasdam exteriores operationes, ut nauta navi, corporibus assumptis uniti fuerint.

Quæres utrum fidei sit angelos esse incorporeos.

Respondent nonnulli, doctrinam quâ angeli asseruntur penitus incorporei, ad fidem pertinere. Nituntur autem præcipuè testimonio Concilii Lateranensis IV. quod quidem capitulo I. sic loquitur: *Firmiter credimus, quòd unus est solus. verus Deus..... creator omnium invisibilium & visibilium, spiritualium & corporalium, qui sua omnipotentis virtute simul ab initio temporis utramque de nihilo condidit creaturam, spiritua- lem & corporalem, angelicam videlicet & munda- nam; ac deinde humanam quasi communem ex spi-*  
ritu

*ritu & corpore constitutam.* Iis autem in verbis, (ajunt) angelica natura dicitur spiritualis per oppositionem ad entia quæ merè corporea sunt, & per oppositionem ad hominem qui ex spiritu & corpore constat. Nituntur iterum iis Scripturæ locis, in quibus angeli, sive boni, sive mali, dicuntur spiritus, sicut Deus ipse spiritus vocatur.

Respondet Estius 1. temerarium esse asserere Angelos habere corpora: *Verum alii moderatius & rectius existimant, his quidem argumentis effici, quò minus absque temeritate aliqua post Lateranense decretum affirmari possit, angelos esse corporeos aut habere corpora: satis enim evidenter ex decreto apparet, hanc fuisse mentem Patrum illius Concilii, quòd angelica creatura sit spiritualis.* Respondet 2. quæstionem de quâ agitur, ad fidem non pertinere, eo quòd multi Patres ante Concilium Lateranense, & post ipsum plures scholastici contenderint, articulum illum ad fidem minimè spectare: *Cæterum ab Ecclesia definitum esse & proinde ad fidem pertinere negant: Qua in sententia fuit S. Thomas, de malo quæst. de demonibus art. 1. Sixtus Senensis lib. 5. Bibliothecæ sanctæ, annotat. 8. ubi profitetur, non obstante decreto Lateranensi, malle se sequi Bernardi modestiam nihil de hac re pro certo definientis.* Respondet 3. Concilii Lateranensis intencionem in suo decreto constituendo non fuisse, ut definiretur, quasdam esse creaturas merè spirituales, alias merè corporeas, tertias ex spiritu & corpore constantes; sed hoc unum, Deum esse creatorem omnium quæ sunt in universo, tam eorum quæ dicuntur corporalia & visibilia, quàm eorum quæ spiritualia & invisibilia, sive hæc prorsus corpore careant, sive aliâ generaliori ratione spiritualia & invisibilia dicantur. Respondet 4. datam explicationem probari posse 1. ex eo quòd decretum editum sit adversus Albigeneses, qui secuti Manichæos, tunc contendebant, Deum non esse rerum om-

omnium principium, sed quasdam esse à principio nequam, alias verò à bono principio, quod quidem Deum esse fatebantur: 2. ex eo quòd contrarium non ostendatur iis locis, in quibus angeli simpliciter vocantur spiritus: sicut in sacris literis vocabulum *Spiritus*, interdum quibusdam corporibus tribuitur, ita & quædam corpora dicuntur invisibilia: *Vnde patet* (verba sunt authoris laudati) *argumentum quod petebatur à distinctione visibilium & invisibilium, ad probandum aliquam creaturam esse prorsus incorpoream, non omninò certum esse secundum Scripturam sacram.*

## C A P U T II.

### *Utrum Angeli sint immortales.*

**Not.** **I**mmortalitas enti convenire potest, aut ab extrinseco, aut ab intrinseco. Convenit ab extrinseco, cùm petitur à causâ extrinsecâ quæ entis corruptionem impedit; è contra convenit ab intrinseco, cum petitur ex ipsiusmet entis natura quæ efficit, ne subjectum sit corruptionis susceptivum.

**CONCLUSIO I.** Angeli sunt immortales ab extrinseco.

Probatur. Illi sunt immortales ab extrinseco, quorum corruptio semper impediètur à causâ extrinsecâ: atqui angelorum corruptio semper impediètur à causâ extrinsecâ, Deo nimirum à quo in æternum conservabuntur; mali quidem, ut in æternum ardeant juxta illud Matthæi 25. *Ite in ignem æternum qui paratus est diabolo & angelis ejus*, nec non & juxta illud epistolæ Judæ: *Angelos qui non servaverunt suum principatum, vinculis æternis sub caligine reservavit.* Angeli sancti semper quoque conservabuntur, ut cum hominibus prædestinatis parato sibi regno fruantur.

C O N-



CONCLUSIO 2. Angeli sunt immortales ab intrinseco.

Probatur. Illi sunt immortales ab intrinseco quorum natura corrumpi non potest: atqui angelorum natura corrumpi non potest; siquidem 1. ea natura corrumpi non potest, quæ non est susceptiva principii corruptionis: sed natura Angelorum non est illius susceptiva; scilicet principium corruptionis est dissolutio partium, ejusmodi verò dissolutionis susceptiva non est Angelorum natura: cum enim sit omninò spiritualis, partes non habet, quæ à se invicem dissolvi possint. 2. Forma per se subsistens, hoc est, quæ non est in aliquo subjecto, nec exigit in eo esse, corrumpi non potest: atqui Angelorum natura est forma per se subsistens, seu habet esse independentem ab aliquo subjecto in quo existat, aut in quo exigit existere: ergo, &c.

Objicies 1. In Scripturis immortalitas quæ fit ab intrinseco, Deo soli, per creaturarum exclusionem, tribuitur: *Qui solus* (inquit Apostolus 1. ad Timoth. 1.) *habet immortalitatem*: ergo immortalitas ab intrinseco non convenit Angelis.

Resp. dist. ant. Immortalitas intrinseca quæ fit independens, soli Deo tribuitur, conc. ant. quæ fit dependens, neg. ant. Se habet, Dei respectu, immortalitas, sicut se habet bonitas: ergo quemadmodum bonitas quæ Deo soli tribuitur, *Nemo bonus, nisi solus Deus*, non excludit dependentem bonitatem, quæ injustis reperitur: ita nec immortalitas quam Apostolus Deo tribuit, excludit dependentem & participatam immortalitatem, quam asseruimus Angelis convenire.

Objicies 2. Patres non semel asserunt, Angelos non naturâ, sed gratiâ tantum, immortales esse. *Immortalis est Angelus* (inquit Damascenus lib. 2. de Fide Orthod. cap. 3.) *non natura, sed gra-*

*tia*. Ejus autem effati hanc rationem reddit : *Nam quidquid initium habuit, desinere suapte natura potest.* Sophronius Hierosolym. in Epistolâ quæ legitur in Actis sextæ Synodi, Act. xi. eâdem ratione loquitur : *Immortales ( inquit ) perseverant Angeli, non quòd naturam revera incorruptam habeant, sed quòd gratiam divinitus sortiti sunt largitricem immortalitatis, & incorruptibilitatis conciliatricem.* Non ablimili ratione alii Patres loquuntur.

Resp. dist. ant. Patres asserunt, Angelos esse immortales non naturâ, sed gratiâ, & nomine gratiæ intelligunt donum creationis, conc. ant. & intelligunt donum supernaturale, neg. ant. Ratio est, quia Patres eam Dei gratiam, per quam, ut docent, angeli sunt immortales, non minùs damnatis quàm beatis Angelis communem faciunt. Hic igitur est eorum sensus, Angelos non à se, sed à Deo per creationis donum immortalitatem habere; illud verò donum nomine gratiæ vocatur, quòd creaturæ nondum existenti minimè debeat.

Confirmatur ex Hieronymo qui in Comment. in Epist. Pauli ad Titum, sic loquitur : *Et nisi fallor, quomodo solus habere dicitur immortalitatem, cum & Angelos, & multas rationabiles fecerit creaturas, quibus dederit immortalitatem: ita & solus dicitur verax, non quòd & cæteri non immortales, & veritatis sint amatores: sed quòd ille solus naturaliter sit & immortalis & verus: cæteri verò immortalitatem & veritatem ex largitionis illius dono consequantur.*

Objicies 3. Illi non sunt immortales ex naturâ suâ, quos Deus potest in nihilum redigere: nimirum qui in nihilum possunt redigi, perire possunt: atqui Deus potest Angelos ad nihilum redigere; nam potest desinere eos conservare, cum eos non necessariò, sed liberè conservet.

Resp. ad 1. neg. maj. Ad 2. dist. ant. qui possunt  
sunt

sunt in nihilum redigi, perire possunt ab extrinseco, conc. ant. ab intrinseco, neg. ant. Angeli ab extrinseco quidem perire possunt, quatenus nimirum Deus potest eos non conservare; sed non possunt perire ab intrinseco, hoc est, eorum natura non est susceptiva principii corruptionis, seu actionis per quam creatura aliquam in eis physicam corruptionem efficiat,

## CAPUT III.

*Utrum Angeli inter se specie differant.*

Not. **C**Irca difficultatem de quâ est quæstio, tres sunt theologorum sententiæ. Nonnulli docent, Angelos omnes ejusdem esse speciei, & differre tantum secundum qualitates accidentales. Contendunt alii, plures quidem speciei differre, eos nimirum qui pertinent ad varios ordines qui in Scripturis aut in Patribus recensentur, sed non omnes: ita ut sub eadem specie plura sint individua. Tertii tandem (ut videre est apud S. Thomam, quæst. 50. art. 4.) docent, singulos Angelos differre specie, ut etiam divinitus duo ejusdem speciei esse non possint.

**CONCLUSIO I.** Utrum Angeli sint unius aut diversæ speciei, quæstio est quæ ad fidem minimè pertinet.

Probatur 1. Ea quæstio ad fidem minimè pertinet, quam Ecclesia nusquam definiit: atqui eam de quâ agitur, Ecclesia nusquam definiit: ergo, &c. 2. De eadem quæstione multo cum dubio præcipui Patres locuti sunt: *Et esse itaque sedes* (ait Augustinus lib. ad Orosium, contra Priscill. & Orig.) *dominationes, principatus, potestates in caelestibus apparatibus firmissimè credo, & differre inter se aliquid indubitata fide teneo. Sed quæ*

*me contemnas, quem magnum putas doctorem, quam ista sint, & quid inter se differant, nescio; nec sanè ignorantia periclitari me puto.*

CONCLUSIO 2. Probabilior videtur sententia quæ asserit, Angelos omnes ejusdem esse speciei.

Probatur. Ea sententia videtur probabilior quæ propius accedit ad modum loquendi Patrum, scilicet (ut ostendimus tom. 1.) doctrina Patrum locus est theologicus: atqui sententia quæ docet, omnes Angelos ejusdem esse speciei, propius accedit ad modum loquendi Patrum: ergo, &c.

Maximus martyr in caput quintum Dionysii de cœlesti hierarchiâ, docet *Oussam*, per quam Dionysius asseruit Angelos differre, non esse substantiam, sed hypostasim tantum.

Basilius scribit, Angelos non differre naturâ, sed dignitate tantum: *Angeli omnes* (inquit lib. 3. contra Eunomium) *ut appellationis unius, sic & nature omninò sunt ejusdem invicem.* Addit eos non aliâ ratione differre, quàm quâ stellæ à se invicem discrepant: Nam (ait) *& stella à stella differt in gloria: natura verò stellarum omnium est una.* Eodem modo loquitur Gregorius Nyssenus ad calcem libri sexti contra Eunomium: *Non enim* (inquit) *ut Eunomio placet, illa quæ à Paulo recensita sunt superiorum mundo virtutum nomina, naturas aliquas inter se differentes significant; sed appellationum significatio ipsa præcipuè demonstrat.*

Cyrellus Alexandrinus supponit tanquam principium, Angelos ejusdem esse speciei, ut probet, eos in Angelicâ naturâ nihil omninò differre: *Angelus* (inquit lib. 2. in Joannem) *ab altero Angelo nulla re differt secundum id quod sunt angeli: nempe pro eo, quòd cum sint ejusdem omnes speciei, in unam naturam colligantur.* Cyrillo subscribit Damascenus: *Angeli & homines* (ait in libro de duabus voluntatibus) *suam quique di-*  
visam

*visam & distinctam habent hypostasim, etsi ejusdem naturæ sint.*

Ex Patrum textibus, qui hucusque laudati sunt, sic argumentum conficitur: Illi senserunt Angelos omnes ejusdem esse speciei, qui docuerunt, eos hypostasi quidem, sed non naturâ differre; eos ejusdem esse naturæ; non magis discrepare, quàm stella ab aliâ stellâ discrepat; eos eandem habere speciem, & ided in unam naturam colligari: Atqui (ut ex relatis textibus patet) Patres id docuerunt: ergo senserunt, Angelos omnes ejusdem esse speciei.

Respondent adversarii, Patres nominibus essentiae, naturæ, intelligere essentiam, naturam, genericè, non autem specificè communem; hoc est, laudati Patres hoc unum voluerunt, Angelos esse ejusdem essentiae ac naturæ in ratione creaturæ intellectualis, non verò in ratione differentiae, quæ sub genere creaturæ intellectualis contineatur.

Verùm inanis est illa nonnullorum Thomistarum responsio. Nam 1. supponit, Patres naturæ & essentiae nomina sumpsisse incompletè, hoc est, pro genere tantum; non autem completè, id est, pro genere & differentiâ simul: id autem, præterquam quòd asseritur absque fundamento, est omninò falsum: siquidem cum illa nomina simpliciter & absolutè proferuntur, complectuntur genus & differentiam subjecti de quo prædicantur, alioquin dicendum esset, usitatum ac proprium esse loquendi modum, quo quis assereret, hominem & brutum, ejusdem esse essentiae, ejusdem esse naturæ: scilicet brutum & homo in genere, animalis nimirum, conveniunt. 2. Patres in argumento laudati, essentiam, naturam opponunt hypostasi ac individuo: at species sola proximè & propriè opponitur hypostasi ac individuo. 3. Conceptis terminis iidem Patres scribunt, Angelos ejusdem esse speciei, confirmantq; addendo, eos non differre nisi penes dignitatem,

quæ haud dubiè qualitas non specifica, seu essentialis, sed accidentalis tantùm: *In dignitate quidem* (ait Basilius) *est differentia; in natura verò communio.*

Objicies 1. Illi differunt specie, quorum differentia petitur à forma: siquidem differentia quæ petitur à forma, inducit speciei diversitatem: unde homo idèd à bruto specie differt, quòd aliam ab eo formam, animam nempe rationalem, habeat: Atqui Angelorum ab invicem differentia petitur à formâ: scilicet omnis differentia petitur vel à formâ, aut à materiâ; in angelis autem non petitur à materiâ, cum ( ut superius dictum est ) angeli sint substantiæ, materiæ cujuslibet expertes: ergo, &c.

Resp. ad 1. conc. maj. neg. min. Ad 2. dist. maj. Omnis differentia essentialis petitur à formâ aut à materiâ, conc. maj. differentia accidentalis, neg. maj. Differentia quæ inter angelos reperitur, non est essentialis, sed accidentalis tantùm; unde non petitur à formâ, sed à numero, seu individuatione; hoc est, Michael v. g. à Gabriele differt, quòd hanc non autem illam in individuo naturam habeat, licèt ejusdem sit speciei cum aliorum Angelorum naturâ.

Objicies 2. Duo Angeli non possunt solo numero differre: ergo necesse est, ut singuli specie differant. Probatur ant. Si duo Angeli solo numero differrent, species, seu forma angelica in duobus illis Angelis esset multiplex, quemadmodum in pluribus humanæ naturæ individuis multiplex est humana formâ: atqui forma Angelica non potest esse multiplex in duobus angelis: nempe illa forma non potest esse multiplex, quæ recipi non potest in materiâ: siquidem forma quæ recipi non potest in materiâ, non potest esse diversimodè participata, cum diversimodâ participatio dicat naturæ participatæ limitationem, seu finitum & inadæquatum modum habendi  
for-

formam: ea verò limitatio, is finitus modus habendi formam, sumuntur ex receptione in materiâ seu subjecto: solum enim subjectum efficit, ut natura in eo sit limitata; ut finitus sit modus habendi formam: Sed Angelorum forma recipi non potest in materiâ, seu in subjecto; cum (ut jam observatum est) nulla sit in Angelis materia.

Resp. ad 1. neg. ant. Ad 2. concessâ majore, nego min. Ad 3. neg. maj. Ad 4. nego, limitationem, finitum & inadæquatum modum habendi formam, peti ex solâ receptione in materiâ, in subjecto: petitur nimirum præterea ex Dei voluntate, quæ non omnem & adæquatum modum habendi formam, communicat singulis ejusdem speciei individuis.

Confirmatur. Dux animæ rationales, destructis corporibus quibus erant unitæ, non omni, non adæquato modo participant speciem, seu formam humanam, sed tantum limitato & inadæquato; ac proinde limitatus & inadæquatus modus habendi formam, non petitur ex receptione in materiâ, in subjecto: nam ut supponimus, non existunt corpora in quibus recipiantur.

Nec satis est, quòd in ordine ad corpora creatæ sunt: siquidem 1. creari potuerunt sine ordine ad corpora; 2. ordo ad corpus non limitat naturam, nisi in quantum corpus realiter existit: siquidem ut causa realiter operetur, debet realiter existere.

Objicies 3. Conveniens fuit, ut Deus plures angelorum species crearet: ergo singuli non sunt ejusdem speciei. Probatur ant. Conveniens fuit ut Deus in rebus corruptibilibus plures species crearet: ergo conveniens quoque fuit, ut plures crearet angelorum species, cum substantiæ separatae ac incorruptibiles, ut est angelica, præcipuæ sint universi partes.

Resp. ad 1. neg. ant. Ad 2. conc. ant. neg. consequ. Ratio disparitatis est, quia plures rerum cor-

ruptibilium species, necessariæ fuerunt homini propter quem omnia corporea condita sunt : multiplices verò species Angelorum necessariæ non fuerunt aut ad Dei laudem, aut ad hominis tutelam.

Addendum est, argumenta quæ ex convenienti, aut inconvenienti sumuntur, levis esse ponderis, ut iis probetur, Deum hæc aut illâ ratione debuisse se gerere in suis operationibus ad extra: Quasi verò is qui toties infirma mundi elegit, ut confunderet fortia, sua consilia, suum agendi modum ad humanam regulam exigere debeat.

### Q U Æ S T I O III.

#### *De Angelorum authore.*

**Not. 1.** **F** Ide certum est, Angelos bonos habere Deum authorem: *Sua omnipotentia virtute* ( inquit Concilium Lateranense IV. c. 1. ) *Deus simul ab initio temporis utramque de nihilo condidit creaturam, spirituales & corporales, angelicam videlicet & humanam.* Idem quoque constat de angelis malis sive dæmonibus: *Diabolus enim* ( ait idem Concilium ) *& dæmones alii, à Deo quidem natura creati sunt boni, sed ipsi per se facti sunt mali.*

Eandem veritatem ratio confirmat : nempè cum Angeli sint omninò spirituales, ab aliis Angelis per generationem externam produci, non potuerunt; neque enim spiritus spiritum exterius generat : nec per internam generationem, quippè quòd interna substantialis generatio soli Deo Patri propria sit, cum solus per suam infinitam intellectionem possit perfectam sui imaginem producere. Angeli non potuerunt quoque à se ipsis esse, cum nullum ens sibi ipsi dare possit esse ; nihilum enim non potest agere, quod tamen necessarium esset, ut se ipsum produceret.

*Not. 2.*



Not. 2. Fide quidem & ratione certum est, Angelos Deum authorem habere: sed non eadem certitudine constat, quandonam, ubi & quo in statu creati fuerint; eas igitur difficultates subsequentibus capitibus explicemus oportet.

## CAPUT PRIMUM.

### *Quando & ubi creati sint angeli.*

CONCL. I. **A**ngeli, creati non fuerunt ante visibile hoc universum.

Probatur 1. ex Scripturâ. Genesis 1. hæc habentur: *In principio creavit Deus cælum & terram.* Psalm. 110. *Initio tu Domine terram fundasti.* Exodi 20. *Sex diebus fecit Deus cælum & terram, & omnia quæ in eis sunt.* Ex iis autem locis sic argumentum conficitur. Angeli ante hoc universum creati non fuerunt, si ante aliam omnem creaturam Deus cælum & terram condiderit; si angeli sint ex iis rebus, quas Deus fecit sex dierum spatio: atqui Deus cælum & terram ante omnem aliam creaturam condidit; Angeli sunt ex iis rebus, quas Deus fecit sex dierum spatio: siquidem voces istæ, *In principio*, redduntur per has alias, *Ante omnia*, ut hisce verbis docet Augustinus lib. 11. de Civit. Dei, cap. 6. Porro si *literæ sacre, maximèque veraces*, ita dicunt, *in principio fecisse Deum cælum & terram, ut nihil antea fecisse intelligatur, quia hoc potius in principio fecisse diceretur, si quid fecisset ante cætera cuncta quæ fecit.* 2. Hæc verba: *Et omnia quæ in eis sunt*, ea omnia complectuntur, quæ sunt sive in cælo sive in terrâ: ergo angelos quoque complectuntur, cum nonnulli sint in cælis, & alii qui in terrâ versentur.

Probatur 2. ex Patribus. Epiphanius hæresi 65. Num. 4. & 5. sic loquitur: *Illud enim evidenter divinus sermo declarat, neque post sidera*

*productos Angelos, neque ante calum, terramque constitutos: Id verò probat ex Geneseos capite 1: quod quidem eadem ratione, quâ Augustinus, exponit: Quoniam ( inquit ) in principio creavit Deus calum ac terram, ut illud sit creandi principium, ante quod creatis ex rebus omninâ nulla fuerit. Idem docet Theodoretus quæst. 3: ubi enim hanc sibi quæstionem proposuit: Præceduntne Angeli creationem cali & terræ, an unâ cum eis creati sunt? Respondet, Angelos ante cælum corporeum creatos non esse, tum quòd cælo circumscripti sunt, tum etiam quòd cum ad hominum tutelam destinati sint, inutilis fuisset eorum ante mundi creationem productio: Quo ministerio ( inquit quæst. 4. ) fungebantur Angeli, qui creationem præcedebant, cum nullus esset qui indigeret, ut adjuvaretur eorum opera?*

Augustinus lib. 22. contra Faustum, capite 10. docet, Angelos primâ die factos fuisse; idem quoque scribit pluribus aliis in locis, quos ad probationem tertiæ conclusionis proferemus. Augustino subscribunt plures alii Patres Latini quorum textus ibidem referentur. Eorumdem Patrum doctrinam probasse videtur Concilium Lateranense IV. cap. 1. ubi asserit, Deum sua omnipotentis virtute simul ab initio temporis utramque de nihilo condidisse creaturam, spiritualem & corporalem, angelicam videlicet & mundanâ.

Objicies. Plures Patres Græci docuerunt, Angelos ante visibile hoc universum à Deo creatos fuisse. Basiliius hom. 1. in Hexaméron sic loquitur: *Erat enim ( ut apparet ) aliquid etiam ante hoc universum, quod mente quidem nostra contemplari possumus; non est tamen literis ullis proditum, quod rudibus, & cognitione adhuc infansibus nequaquam congruere videbatur.* Chrysostomus libro primo ad Stagirium, hæc habet: *Fecit Angelos, Archangelos, nullius alterius*

rius gratia, sed bonitatis illius .... Post horum creationem, etiam hominem facit ob eandem causam, nec non totum hunc mundum; quibus quidem verbis innuere videtur, totum mundum post Angelorum creationem conditum fuisse.

In eandem sententiam abierunt plures Latini. Ambrosius lib. 1. in Hexameron, cap. 5. quæstionem apertè definit: *Angeli* (ait) *dominationes, & potestates, etsi aliquando ceperunt, erant tamen jam, quando hic mundus est factus.* Ambrosio subscribit Hilarius, tum in præfatione ad Psalmos, tum libro contra Auxentium. Subscribit pariter Hieronymus in primum caput Epistolæ ad Titum, ubi sic loquitur: *Sex milia necdum nostri orbis implentur anni, & quantas prius æternitates, quanta tempora fuisse arbitrandum est, in quibus Angeli, throni, dominationes, ceteraque virtutes servierint Deo, & absque temporum vicibus atque mensuris Deo jubente subsisterint?* Hieronymo adhæret Beda: *Angeli* (inquit in libro quæstionum, quæstione 9.) *ante creationem mundi creati sunt.* Ergo Patribus persuasum fuit, Angelos fuisse creatos longè antequam Deus hoc universum produceret.

Resp. 1. conc. ant. dist. conseq. Ergo Patribus persuasum fuit, Angelos fuisse creatos antequam Deus hoc universum produceret, & illis Patribus contradicunt alii multò plures, conc. conseq. Et non contradicunt alii multò plures, neg. conseq. Theologicæ conclusiones equidem ex Patribus petendæ sunt, sed ex iis qui multò plures quàm alii in aliquam abeunt sententiam: at Patres qui negant Angelos ante hujus universi productionem creatos fuisse, multò sunt in majori numero: ipsamque quæstionem non incidenter, ut plures ex iis qui in argumento laudati sunt, sed deditâ operâ & ex professio tractarunt.

Præterea in eo Patrum numero immeritò recensetur Basilius: siquidem illius textus potest exponi de Deo ipso, hoc est, Basilius per rem illam quam scribit ante mundum extitisse, Dei ipsius Verbum intellexit: siquidem asserit, rem illam esse æternam: *Erat (inquit) quidam mundi productione status antiquior, sempiternus, perpetuus*. Ex eodem quoque numero expungi debet Chrysostomus: hæc enim illius verba, *Nec non totum hunc mundum*, non referuntur ad ista, *Post horum creationem*, sed ad hæc alia, *Bonitatis illius*: Ita ut sensus non sit, visibilem hunc mundum post angelorum creationem productum fuisse; sed iste tantum, Deum, visibilem hunc mundum nullius alterius gratiâ, sed suæ tantum bonitatis causâ produxisse.

Instabis. S. Thomas apertè docet, omnes Græcos Patres asserere, angelorum creationem præcessisse creationem universi: *Ad primum ergo dicendum*, (inquit 1. p. q. 61. art. 4.) *quòd Hieronymus loquitur secundum sententiam dictorum Græcorum, qui omnes hoc concorditer sentiunt, quòd angeli sunt ante mundum corporeum creati*. Cum etiam nonnulli sint ex Latinis Patribus, qui in Græcorum sententiam abierint, sequitur, multò plures esse Patres qui affirmarunt, angelos ante mundum corporeum conditos fuisse, quàm qui id negarunt, prindèque verior est affirmativa illa sententia.

Resp. 1. propositionem quâ asseruit, Græcos concorditer docere angelos esse conditos ante mundum corporeum, continere quæstionem facti minimè revelati, ac proindè illius iudicium penes est quemque theologum. Resp. 2. dist. ant. Et illa verba S. Thomæ non sunt universaliter, sed cum exceptionibus, intelligenda, conc. ant. Et sunt universaliter & absque exceptionibus, intelligenda, neg. ant. Et sanè evidenter patet ex iis, quæ prolata sunt ad nostræ conclusionis probationem, Epiphanium, Theodoretum, ac plures alios

alios Græcos quos laudat Estius, apertè docuisse Angelos ante visibilem hunc Mundum minimè creatos fuisse.

CONCLUSIO 2. Quamvis vera sit propositio quæ negat, Angelos ante visibilem hunc mundum creatos fuisse, non est tamen certa certitudine fidei Catholicæ.

Probatur 1. Illa propositio non est certa certitudine fidei Catholicæ, quæ expressè non continetur aut in Scripturâ aut in traditione, aut quam Ecclesia non declaravit iis, implicite saltem, contineri: nam (ut tomo 1. diximus agentes de censuris propositionum) ut quid ad fidem Catholicam pertineat, necesse est, ut aut explicitè in iis sacris fontibus contineatur, aut si implicite tantum, contineri declaretur ab Ecclesiâ: atqui propositio, quæ negat, Angelos ante visibilem hunc mundum creatos fuisse, expressè non continetur aut in Scripturâ aut in traditione, nec Ecclesia definiit iis, saltem implicite, contineri: ergo, &c. Minor in quâ difficultas est posita, patet ex iis quæ mox in objectionum solutionibus dicentur.

Probatur 2. Ea propositio non pertinet ad fidem Catholicam, quam nulli Patres dixerunt ad eam pertinere, quam è contra ad eam pertinere negarunt plurimi, sive ante, sive post Concilium Lateranense IV. atqui nulli Patres dixerunt, propositionem de quâ agitur, ad fidem pertinere, nullius enim textus proferri potest; plures è contra negarunt, eam ad fidem pertinere.

Et quidem *primò*, ante Concilium Lateranense IV. S. Augustinus libro unico de Genesi ad Litteram, cap. 3. ubi in utramque partem movit quæstionem, utrum Angeli ante mundum creati fuerint, docet, unum tantum ad fidem pertinere, scilicet Angelos à Deo creatos esse: Sed (ait) quoquo modo hoc se habeat; res enim secretissima est, in humanis conjecturis impenetrabilis: illud certè accipiendum est in fide, etiamsi modum

*nostræ cogitationis excedit, omnem creaturam habere initium, tempusque ipsum esse creaturam. Quamvis Theodoretus (ut superius dictum est) expressè neget, Angelos ante mundum visibilem creatos fuisse, fatetur tamen, eum qui contrarium dixerit, nihil contra fidem proferre. Magister Sententiarum lib. 2. Sent. dist. 2. Hugo Victorinus cap. 5. Annotat. in Genesim, eâdem fermè ratione loquuntur.*

*Secundò, post Concilium Lateranense IV. S. Thomas hæc habet 1. p. q. 61. art. 3. in Corp. Non est igitur probabile, quòd Deus creaturam angelicam seorsim ante alias omnes creaturas creaverit. Quamvis contrarium non sit reputandum erroneum.*

*Objicies. Scriptura docet 1. Deum in principio creasse cælum & terram; 2. ipsum intra sex dies fecisse omnia quæ cælis & terrâ continentur; 3. Concilium Lateranense IV. definiit Deum simul initio temporis utramque de nihilo condidisse creaturam, angelicam videlicet & mundanam: Atqui ea loca probant, Angelos non fuisse creatos ante visibilem hunc mundum: ergo, &c.*

*Resp. dist. min. Ea loca probant argumento quod non faciat certitudinem fidei, conc. min. quod faciat certitudinem fidei, neg. min. Hoc est, licèt (ut superius ostensum est) ex iis locis colligi possit, Angelos ante hoc universum visibile creatos non fuisse, id tamen non colligitur tanquam fide Catholicâ certum. Ratio est, quia alii aliter explicant textus qui in argumento recensentur.*

*Et sanè nonnulli contendunt, voces istas, In principio, significare, Ab initio aliquo temporis, ita ut sensus sit mundum non semper fuisse, Deumque effecisse, ut mundum qui nullus in æternitate fuerat, de novo, quando ei libuit, primùm esse inciperet. Ex quâ quidem explicatione duo colliguntur, alterum, mundum non esse æternum, sed*

sed aliquando incœpisse : alterum, cognosci antiquitatem mundi, ita ut præcisè statui possit, quinam ab orbe condito ad hoc usque tempus fluxerit annorum nûmerus. In utroque ethnici aberrarunt: quidam enim censuerunt, mundum esse ab æterno; alii cœpisse quidem illum aliquando putaverunt, sed innumera ferè retrolapsa sæcula numerarunt. Vide Pererium lib. i. in Genesim, cap. i. vers. i.

Nonnulli alii scriptores contendunt, verba de quibus agitur, *In principio*, idem esse ac, *In Filio*; per eum enim omnia facta sunt, & sine ipso factum est nihil. Utramque illam expositionem tanquam probabilem refert S. Thomas i. p. 61. art. 3. ad 3. ubi sic loquitur: *Si verò contrarium teneatur* (angelos ante mundum creatos fuisse) *quod dicitur* Genesim 1. *In principio Deus creavit cælum & terram*, exponendum est, *in principio*, id est, *in Filio*; vel *in principio temporis*, non autem *in principio*, id est, *antequam nihil fieret*.

2. Hæc verba: Exodi 20. *Sex diebus fecit Deus cælum & terram, & omnia quæ in eis sunt*, ab aliquibus exponuntur de rebus tantùm visibilibus, ita ut sensus sit, nullam ex creaturis corporeis cælo ac terrâ contentis esse, quæ intra sex dierum spatium à Deo producta non fuerit.

3. Concilii Lateranensis locus quo decernitur Angelos simul ab initio temporis cum mundo visibili creatos esse, duobus modis explicari potest. Dici potest *primò*, particulam, *Simul*, non intelligi de simultate physica quæ instans indivisibile significet, sed de simultate morali quæ quandam habeat latitudinem; eâ fermè ratione, per quam ea quæ eodem die, imò & eodem anno facta sunt, plerumque dicuntur esse simul facta. Dici potest *secundò*, particulam, *Simul*, à Patribus Lateranensibus intellectam quidem fuisse de simultate physica, ita ut significare voluerint, Angelos physice simul ab initio temporis cum mundo visibili fuisse conditos; verùm (inquit Estius) laudati

dati Patres id non proposuerunt tanquam fidei articulum; sed tantum tanquam probabiliorem opinionem.

Nec obstat, quod Patres Concilii Lateranensis damnare voluerint Origenem qui docuit, substantias spirituales ante mundum visibilem conditas fuisse. Nam cum (inquit Cajetanus) *dupliciter teneatur, Angelos productos esse ante corpora, scilicet vel secundum errorem jam dictum* (de Origene loquitur, cui visum est, substantias spirituales per se productas fuisse à Deo, corporales verò longo post tempore, & quidem per accidens, nimirum ut spirituales propter demerita in corporibus tanquam in carceribus concluderentur) *vel simpliciter & absolute, quod ex Dei voluntate Angeli præcesserint mundum visibilem, Decretalis illa, quamvis secundum verba utramque positionem destruat, contra primam tamen tanquam contra hæresim interpretanda est; ad secundam verò tanquam ad minus probabilem applicari potest. Et ratio hujus glossæ est, quia determinationes istæ non nisi contra aliquos errores fieri consueverunt.*

CONCLUSIO 3. Incertum est, quo in loco creati sint Angeli: probabile tamen est, eos in cælo empyreo creatos fuisse.

Probatur prior pars. Id incertum est, de quo tum Scriptura tum Patres silent: atqui reverà silent de loco, in quo creati fuerunt Angeli: Et quidem 1. in Scripturis ne apex quidem est ejusmodi loci. 2. In Patribus nonnulla quidem reperire est, sed quæ per modum dubii prolata sint.

Probatur altera pars. 1. Conveniens fuit, ut in loco nobiliori crearentur nobiliores universi partes: atqui Angeli sunt ejusmodi: ergo, &c. 2. In eo loco Angeli creati fuerunt, ex quo Angeli prævaricatores dejecti sunt: sed dejecti sunt ex cælo empyreo; de illo nimirum cælo nonnulli exponunt hæc verba Lucæ 10. *Videbam satanam sicut fulgur de cælo cadentem*; nec non hæc alia  
apud



apud Isajam cap. 14. *Quomodo de cælo cecidisti Lucifer?* Addunt, favere Augustinum illi explicationi, cum lib. xi. de Civit. Dei, cap. 33. hæc scribit: *Illam* ( hoc est, sanctorum Angelorum societatem ) *in cælis cælorum habitantem* : *Istam*, diabolicam, *inde*, è cælis cælorum, *dejectam*.

Objicies 1. In eo loco creati non fuerunt Angeli, ad quem mali Angeli ambierunt ascendere: atqui mali Angeli ambierunt ascendere ad cælum empyreum; sic enim apud Isajam cap. 14. loquuntur: *In cælum conscendam, super astra Dei exaltabo solium meum*: ergo, &c.

Resp. ad 1. neg. min. Ad 2. neg. ant. Nempè verba quæ ex Isajâ laudata sunt, non sunt Angelorum, sed Babyloniorum regis, cui propter ingentem superbiam hyperbolicus ille loquendi modus tribuitur. Resp. iterum dist. min. Mali Angeli ambierunt ad cælum empyreum metaphorice sumptum ascendere, conc. min. proprie & ad literam sumptum, neg. min. hoc est, cæli nomine eò loci intelligitur æqualitas cum Deo quam Angeli prævaricatores ambierunt: *Ad tertium dicendum* (inquit S. Thomas 1. p. q. 63. art. 4.) *quòd loquitur ibi non de cælo aliquo corporeo, sed de cælo SS. Trinitatis, in quod Angelus peccans ascendere voluit, dum voluit aliquo modo Deo æquiparari*.

Objicies 2. Illi creati non fuerunt in cælo empyreo, qui in eo nihil externum operati sunt; substantiæ enim spirituales non sunt in loco, nisi per suam operationem ad extra: sed Angeli nihil externum operati sunt in cælo empyreo: ergo, &c.

Resp. conc. maj. neg. min. scilicet Angeli in primo suæ creationis instanti concurrerunt ad ornatum cæli empyrei: quid verò ad eum contulerint, incognitum est nobis: nec mirum, cum incognita sit nobis ipsa cæli empyrei natura: Nonnulli contendunt, concurrisse eos ad lucem quâ empyreum fulget, eoque trahunt hæc

S. Tho-

S. Thomæ verba in 1. Sent. dist. 37. quæst. 3. art. 1. *Angelus est in loco, in quantum operatur circa aliquod corpus locatum, vel motum, vel lumen, vel aliud hujusmodi.* Sed de illo argumento redibit sermo ubi de Angelorum loco inferius dicetur.

## CAPUT II.

### *De statu in quo Angeli creati fuerunt.*

**Not. 1.** **S**Tatus in quo creati fuerunt Angeli, beatitudinem; & gratiam complectitur; ac proinde querendum est 1. utrum Angeli in primo suæ creationis instanti fuerint beati; 2. utrum gratiam habuerint.

**Not. 2.** Beatitudo duplex est, naturalis & supernaturalis. Prior posita est in eâ perfectione quæ omnem omnino miseriam excludat; altera addit intuitivam Dei visionem. Gratia est quoque duplex, sanctificans & actualis. Illa se habet per modum rei permanentis, & reddit subjectum Deo gratum; illa è contra se habet per modum transeuntis, & movet subjectum ad actum supernaturalem eliciendum.

**CONCLUSIO 1.** Angeli, creati sunt beati beatitudine naturali; non autem beatitudine supernaturali.

Probatur prior pars. Beatitudo naturalis, ex observatis, posita est in perfectione quæ omnem omnino miseriam excludat: atqui Angeli, creati sunt in illâ perfectione, tum quòd miseria sit poena peccati, nempè sub Deo justo nemo potest esse miser, nisi mereatur: tum quòd Patres id expressè docuerint: *Diabolus & angeli ejus* (inquit Augustinus lib. de corrept. & gratiâ, cap. 10.) *beati erant, antequam caderent.*

Objicies. Illi creati non sunt beati, etiam beatitudine naturali, qui certi non erant se nunquam futuros esse miseros: illa nimirum incertitudo, cum animum excruciet, non levis est miseria; atqui

atqui Angeli, certi non fuerunt, se nunquam futuros esse miseros: non enim sciebant, an essent perseveraturi in statu in quo conditi fuerant: ergo Angeli non fuerunt creati in beatitudine, etiam naturali.

Resp. dist. maj. Illi creati non fuerunt beati, etiam beatitudine naturali, qui certi non erant se nunquam futuros esse miseros, si non certò sciverint se habuisse media, quibus in statu in quo conditi fuerant, perseverare possent, conc. maj. si id certò sciverint, neg. maj. Angeli certò cognoverunt, se per liberum arbitrium adjutum gratiâ quam experiebantur præsentem, quamque sciebant sibi non defuturam, posse, si vellent, in statu in quo conditi fuerant, perseverare: *Si autem* (inquit Augustinus lib. de Correp. & Gratiâ, cap. 11. *hoc adjutorium vel Angelo, vel homini, cum primum facti sunt, defuisset.... non utique sua culpa cecidissent.*

Probatur altera conclusionis pars. Illi non fuerunt creati, beati beatitudine supernaturali, qui creati sunt, ut per merita beatitudinem supernaturalem tanquam præmium consequerentur: atqui sic creati sunt omnes Angeli: *Diabolus verò & Angeli ejus* (inquit Augustin. lib. de Corrept. & Gratiâ, cap. x.) *et si beati erant, antequam caderent, & se in miseriam casuros esse nesciebant; erat tamen adhuc quod eorum adderetur beatitudini, si per liberum arbitrium in veritate stetissent, donec istam summæ beatitudinis plenitudinem, tanquam præmium ipsius permansionis acciperent: id est, ut magna per Spiritum sanctum data abundantia charitatis Dei, cadere ulterius omnino non possent, & hoc de se certissimè nossent.*

CONCLUSIO 2. Angeli, creati sunt in statu gratiæ sanctificantis.

Probatur. Illi creati sunt in statu gratiæ sanctificantis, qui creati sunt in bonâ voluntate, in amore casto, per quem beati in cœlis adhærent Deo; quibus Deus, condendo naturam, simul

largitus est gratiam: nempe gratia sanctificans non aliud est, quam bona voluntas, quam amor castus per quem iusti in terris & beati in cœlis adhærent Deo: atqui boni Angeli sic à Deo creati sunt, Augustino teste, qui lib. 12. de Civit. Dei sic loquitur: *Et istam (bonam voluntatem) quis fecerat, nisi ille qui eos cum bona voluntate, id est, cum amore casto, quo illi adhærent, creavit, simul in eis & condens naturam, & largiens gratiam? Unde sine bona voluntate, hoc est, Dei amore, nunquam sanctos Angelos fuisse credendum est: ergo, &c.*

Probatur 2. de malis Angelis. 1. Illi creati sunt in statu gratiæ sanctificantis, qui ut primùm facti sunt, facti sunt lux; qui illuminati fuerunt, ut sapienter beatèque viverent: plerumque nimirum tum Scriptura tum Patres lucis ac sapientiæ nominibus utuntur, ut gratiam sanctificantem exprimant: atqui pravi Angeli, ut primùm facti sunt, facti sunt lux; illuminati fuerunt, ut sapienter, beatèque viverent: *Simul ut facti sunt* (ait Augustinus lib. XI. de Civ. Dei, cap. XI.) *lux facti sunt, non tamen ita tantùm creati, ut quoquo modo essent, aut quoquo modo viverent; sed etiam illuminati, ut sapienter, beatèque viverent.* 2. Illi creati sunt in statu gratiæ sanctificantis, de quibus dicitur, quod si in statu, in quo conditi fuerant, perseverassent, æternam beatitudinem consecuturi fuissent: neque enim per perseverantiam in donis naturalibus creatura potest æternam beatitudinem consequi, cum dona naturalia nullam habeant cum fine supernaturali proportionem: atqui de malis Angelis dicitur quod si in statu, in quo conditi fuerant, perseverassent, æternam beatitudinem consecuturi fuissent: *Erat tamen adhuc* (inquit Augustinus lib. de Corrept. & Gratiâ, cap. 10.) *quod eorum adderetur beatitudini, si per liberum arbitrium (adjutum gratiâ versatili, ut suo loco dicetur) in veritate stetissent, donec istam summæ beatitudinis*

*nis plenitudinem, tanquam præmium ipsius permanentis, acciperent.*

Probatur 3. rationibus. 1. Non est potior ratio de Angelis, siue bonis, siue malis, quàm de homine: atqui ( ut hujusce partis dissertatione tertiâ dicetur ) homo creatus fuit in statu gratiæ sanctificantis: ergo, &c. 2. Deus, in instanti creationis rerum corporearum, eis indidit virtutes seminales, per quas ad finem sibi convenientem possent pervenire; ergo à pari ( argumentum est S. Thomæ 1. p. q. 62. art. 3. ) omnibus creaturis intellectualibus, ac proinde Angelis, indidit virtutem seminalem, per quam ad finem sibi convenientem pervenire possent: ea verò seminalis virtus non est alia, quàm gratiâ sanctificans, quæ principium est habituale cujuscumque operis meritorii, quo creatura rationalis beatitudinem ad quam est creata, consequatur.

CONCLUSIO 3. Angeli, siue boni, siue mali, in primo reali creationis instanti receperunt gratiam actualem.

Probatur. Creaturæ innocentes, in primo reali instanti suæ creationis, receperunt gratiam necessariam, ut possent vitare quodcumque peccatum: *Si autem* ( ait Augustinus libro de Corrept. & Gratiâ, cap. XI. ) *hoc adiutorium vel Angelo, vel homini, cum primum facti sunt, defuisset, non utique sua culpa cecidissent*: atqui Angeli in suâ creatione erant innocentes, ac statim indiguerunt actuali gratiâ, ut possent vitare peccatum, omissionem nimirum actûs amoris in Deum: eodem enim instanti quo cœperunt frui ratione, obligati fuerunt elicere actum amoris in Deum: scilicet, si non elicuissent actum amoris in Deum, necessariò elicuissent actum amoris in creaturam: siquidem voluntas quæ corpori non est unita, non potest vel uno esse instanti, quin actum amoris in aliquod objectum eliciat. Augustini est argumentum illud: nempe docet, nec Angelum nec hominem sic

factum esse, ut sine Dei adiutorio posset non peccare: *Quoniam* (inquit lib. de Corrept. & Gratia cap. xi.) *non talis natura facta erat, ut sine divino adiutorio posset permanere, si vellet.* Idem non multò post hisce aliis verbis asserit: *Namque ut reciperet bonum, gratia non egebat, quia nondum perdiderat: ut autem in eo permaneret, egebat adiutorio gratiæ, sine quo id omninò non posset.*

Objicies 1. Ideò asseritur, Angelos esse creatos in gratiâ sanctificante, quòd statim lux à Deo facti sint: atqui id falsum est: siquidem Augustinus lib. 2. de Genes. ad literam cap. 1. asserit, Angelicam naturam primò informiter creatam fuisse, & cælum dictam, postmodum verò formatam esse, & lucem appellatam: ergo, &c.

Resp. ad 1. neg. min. Ad 2. dist. ant. Augustinus asserit, angelicam naturam primò informiter creatam fuisse per respectum ad gloriam, conc. ant. per respectum ad gratiam, neg. ant. Hoc est, status quem per creationem habuerunt Angeli, multum fuit imperfectus, si comparatur cum statu gloriæ, non autem si comparatur cum statu gratiæ: nimirum licet Angelus gratiam habuerit viatori convenientem, non habuit tamen perfectam illam gratiam quæ convenit possessori: *Erat autem adhuc* (ait Augustinus lib. de Corrept. & Gratia, cap. x.) *quod eorum adderetur beatitudini, id est, ut magna per Spiritum sanctum data abundantia charitatis Dei, cadere ulterius omninò non possent.* Sanctus Thomas aliam sufficit solutionem: dicit enim, informem fuisse Angeli productionem in instanti naturæ, concedit; in instanti temporis, negat. Hoc est, prius est prioritate naturæ, non autem prioritate temporis, Angelum factum esse in esse naturali, quàm in esse gratiæ. Confirmari potest ea solutio, 1. ex eo quòd Augustinus (ut superius observatum est) lib. xi. de Civit. Dei, hæc scripserit de Angelis: *Simul ut facti sunt, lux facti sunt*

2. ex eo quòd secundùm Augustini sententiam, de quâ in secundâ hujusce partis dissertatione dicemus, omnia simul creata fuerint; ac proinde, secundùm eundem Augustinum, statui non potest prioritas temporis inter lucis, cœlique creationem.

Objicies 2. Illi creati non fuerunt in gratiâ, in quibus Deus ostendere voluit, quid absque gratiâ posset liberum arbitrium: atqui Deus in Angelis ostendere voluit, quid absque gratiâ posset liberum arbitrium: *Credimus* (verba sunt Augustini lib. de Corrept. & Gratiâ cap. x.) *Deum sic ordinasse Angelorum & hominum vitam, ut in ea prius ostenderet, quid posset eorum liberum arbitrium, deinde quid posset suæ gratiæ beneficium, justitiæque judicium: ergo, &c.*

Resp. dist. maj. In quibus Deus ostendere voluit, quid absque gratiâ actuali, & quidem efficace, posset liberum arbitrium, conc. maj. absque gratiâ sanctificante, aut gratiâ actuali minimè efficace, neg. maj. Augustinus eò loci vult explicare discrimen, quod reperitur inter gratiam actualem, quâ creatura innocens indiguit ad operandum bonum, & inter gratiam quâ creaturæ lapsæ opus est ad idem bonum operandum: Discrimen autem illud in eo positum est, quòd innocenti creaturæ, utpotè sanæ ac robustæ, ad operandum bonum satis fuerit auxilium indifferens, & determinandum à libero arbitrio, cum è contra homo lapsus ad operandum bonum indigeat auxilio per se efficaci, seu quod liberum illius arbitrium, utpotè languidum & infirmum, ad bonum agendum determinet: unde in hoc statu elucet divinæ gratiæ virtus & potentia, cum è contra in altero statu, liberi arbitrii vires enituerint: *Tale quippe erat* (ait Augustinus libro de Corrept. & Gratiâ, cap. xi.) *adjutorium quod defereret, cum vellet, & in quo permaneret, si vellet, non quo fieret, ut vellet. Hæc prima est gratia quæ data est primo Adam, sed hæc poten-*  
rior

*tior eſt in ſecundo Adam: Prima eſt enim qua fit, ut habeat homo juſtitiam ſi velit: ſecunda ergo plus poteſt, qua etiam fit ut velit, & tantum velit, tantoque ardore diligit, ut carnis voluntatem contraria concupiſcentem, voluntate ſpiritus vincat.*

Quæres 1. utrum ſit dogma fidei, quòd Angeli in ſtatu gratiæ ſanctificantis creati fuerint.

Reſp. negativè. Ratio eſt 1. quia dogma de quo agitur, nec Scripturâ nec traditione explicite continetur, nec uſquam Eccleſia definiit, illud in ſacris illis fontibus vel implicitè reperiri. 2. Plures ex antiquioribus ſcholasticis defende runt ſententiam noſtræ concluſioni contrariam, ſeu docuerunt, Angelos omnes, non in ſtatu gratiæ ſanctificantis, ſed tantum in juſtitiâ quâdam naturalis ordinis conditos fuiſſe, à quâ Lucifer cum ſociis exciderit, & in quâ è contra alii ſtantes, donati ſint poſteà gratiâ ſanctificante & auxiliis actualibus, quibus intuitivam Dei viſionem conſecuti ſunt. Ita ſenſerunt Hugo Victorinus lib. 1. de Sacram. p. 5. cap. 19. Magiſter Sentent. lib. 2. diſt. 3. Rupertus lib. 13. in Matthæum, Alenſis, Bonaventura, Scotus, multique alii, quorum habitâ ratione Sanctus Thomas in hanc diſtinctionem ſcribens, aſſeruit, illorum theologorum doctrinam fuiſſe ſuo ſæculo communiorẽ. 3. Idem Sanctus Doctor in Summâ non ut certam certitudine fidei, ſed ut probabilem tantum, propugnat ſententiam quæ docet, Angelos in ſtatu gratiæ ſanctificantis conditos fuiſſe: *Reſpondeo dicendum* (inquit 1. p. q. 62. art. 3. in Corp.) *quòd quamvis ſuper hoc ſint diverſæ opinionones... hoc tamen probabilius videtur tenendum, & magis dictis ſanctorum Patrum conſonum eſt, quòd fuerunt creati in gratia gratum faciente.*

Quæres 2. utrum omnes Angeli tum in donis naturalibus, tum in gratiâ fuerint æquales.

Reſp.



Resp. 1. Angelos, inæquales in donis naturalibus creatos fuisse. Idque evidens est 1. in eorum sententiâ qui contendunt, omnes Angelos esse diversæ speciei: quæ enim differunt specie, differunt quoque proprietatibus naturalibus. 2. Id quoque patet in oppositâ sententiâ: nam quemadmodum in rebus corporeis, individua ejusdem speciei inæquales habent perfectionis gradus: ita par fuit, ut inæquales habuerint individua specierum spiritualium.

Resp. 2. Angelos non in donis tantum naturalibus ( ut mox dictum est ) sed etiam in supernaturalibus impares fuisse: nimirum ita docent author libri de cœlesti hierarchiâ, Basilii lib. de Spiritu sancto, cap. 16. Joannes Damascenus lib. 2. de Fide Orthodoxâ, cap. 3. Magister Sententiarum lib. 2. dist. 3. Par fuit ( ajunt illi scriptores ) ut Deus eum gratiæ gradum Angelis largiretur, qui cum naturalibus eorum donis proportionem haberet.

Nec inde sequitur, dona naturalia in Angelis fuisse dispositiones ad supernaturalia: siquidem tota ratio, cur Angeli qui in naturalibus alios superarunt, uberiores gratiam habuerint, peti debet ex supremâ Dei voluntate, qui donorum naturalium quos Angelis contulerat, rationem habere voluit in supernaturalium dispensatione: Eum tamen ordinem servare noluit in homine lapso, ut ( inquiunt authores quos retulimus ) homo lapsus intelligat, gratiam Dei donum esse omnino gratuitum: quàm enim fabulosum sit pactum quod nonnulli recentiores scribunt initum fuisse inter Deum & hominem de conferendâ gratiâ iis, qui per vires liberi arbitrii sibi relictæ, benè moraliter se gesserint, ostendemus in tractatu de Gratiâ.

## QUÆSTIO IV.

*De proprietatibus Angelorum.*

**Not.** **I**Nter Angelorum proprietates sunt cognitio, amor, locus, motus, locutio, missio: de his igitur subsequenter capitibus agendum nobis incumbit.

## CAPUT PRIMUM.

*De cognitione Angelorum.*

**Not. 1.** **C**Ertum est, Angelos esse præditos cognitione: siquidem cognitio necessario convenit cuilibet substantiæ spirituali: imò nonnulli contendunt, actualem cognitionem esse de illius essentiâ, eamque per actualem cognitionem differre à corpore; quod quidem, quantumcumque subtile supponatur, non potest esse capax alicujus cognitionis, sed solius motus localis, qui pro variâ partium subtilitate & figurâ, vel tardior est, vel velocior.

**Not. 2.** Supposito, quòd Angeli præditi sint cognitione, quaeripotest 1. quòdnam sit objectum cognitionis angelicæ; 2. quòdnam sit illius medium; 3. denique quænam sint illius dotes, seu qualitates per quas ab humana cognitione differt. Ut autem nodos illos solvamus, hocce caput in plures articulos dividamus oportet.

## ARTICULUS I.

*De objecto cognitionis Angelicæ.*

**Not.** **O**bjectum cognitionis Angelicæ est id omne, quod angelicus intellectus potest cognoscere. Id autem quod potest ab eo cognosci, reducitur 1. ad substantias spirituales, Deum nempe, naturam angelicam, & animam rationalem; 2. ad res ex materiâ constantes, cujusmodi sunt corpora omnia; 3. ad futura, sive necessaria, sive libera; 4. ad occultas hominum cogitationes, sive sint præteritæ, sive præsentæ, sive futuræ; 5. denique ad mysteria supernaturalis ordinis. Operæ pretium est, ut ea omnia variis conclusionibus explicemus.

**CONCLUSIO I.** Angelus per naturæ vires multa de Deo cognoscit, se ipsum quoque novit, nec non alios angelos, ac substantias per se subsistentes.

Probatur prior pars. Homo lapsus per naturæ vires multa de Deo cognoscit, existentiam nimirum & attributa quæ proximè ex ideâ Dei sequuntur: *Invisibilia enim ipse* (ait Apostolus ad Rom. 1.) *à creatura mundi, per ea quæ facta sunt, intellecta conspiciuntur, sempiterna quoque ejus virtus & divinitas:* ergo à fortiori Angelus, cum sit multò perfectior homine, plura de Deo per vires naturæ cognoscit.

Probatur altera pars. Angelus id omne cognoscit, quod proportionem habet cum vi illius intellectivâ, quodque ipsi est intimè præsens: nam præter duplicem illam conditionem alia non requiritur, ut facultas intellectiva objectum aliquod cognoscat: atqui Angeli substantia proportionem habet cum vi illius intellectivâ, cum ejusdem sit ordinis; est quoque intimè præsens vi illius intellectivæ: ergo, &c. Nec obstat, quòd

anima licet proportionem habeat cum vi hominis intellectivâ, ipsique sit intimè præsens; tamen semetipsam, saltem perfectè, non cognoscat. Non obstat (inquam) quia anima, quamdiu remanet unita corpori, ab ipso impeditur, ne spiritualia perfectè contempletur.

Probatur tertia pars. Primò, Scriptura nobis exhibet angelos sibi invicem quasi colloquentes: *Clamabunt* (ait Isaias cap. 6.) *alter ad alterum*. Zachariæ 2. unus angelus dicit alteri: *Curre, loquere ad puerum istum*. Apocal. 5. unus angelus loquebatur quatuor angelis: *Nolite nocere terræ & mari*. 2. Spiritus qui unam simul societatem constituunt, se ipsos mutuò norunt: non enim in alio posita est spirituum societas, quàm in mutuâ sui ipsius cognitione, & in amore quo se mutuò prosequuntur.

CONCLUSIO 2. Angeli cognoscunt res omnes materiales.

Probatur. Res materiales considerari possunt vel secundum rationes communes, vel secundum singulares: atqui Angeli utroque modo cognoscunt res materiales. Et quidem 1. norunt communes rerum omnium rationes: nempe quæ in inferioribus gradibus reperiuntur, continentur in superioribus; ac proinde à superioribus, si sint intellectiva, cognoscuntur. 2. Norunt aliqua singularia: siquidem (ut argumentatur S. Thomas) angeli ea norunt, quorum administratio ipsis est credita: atqui singulare administratio angelis est credita, juxta illud ad Hebræos 1. *Omnes sunt administratorii spiritus*.

CONCLUSIO 3. Angeli certò cognoscunt futura necessaria; contingentia verò, quæ ut plurimum accidunt, per conjecturam; quæ verò sunt aut fortuita, aut libera, ab eis ignorantur.

Probatur prior pars. Angeli certò cognoscunt ea quæ necessariam habent connexionem cum causis, quas comprehendunt: atqui futura necessaria

faria connexionem habent necessariam cum causis, quas Angeli comprehendunt: scilicet Angeli propter naturæ suæ perfectionem, cognoscunt ea omnia, ad quæ causarum naturalium virtus sese potest extendere: ergo ejusmodi causæ ab eis comprehenduntur.

Probatur altera pars. Quæ non necessariò, sed ut plurimum, accidunt, ab hominibus probabiliter cognoscuntur: ergo à fortiori cognoscuntur ab angelis, quorum vis intellectiva multò perfectior est humanâ. Jam verò quòd non certò sed probabiliter tantùm ea noverint, colligitur ex eo, quòd futura de quibus agitur, non infallibilem, aut necessariam cum suis causis connexionem habeant.

Probatur tertia pars. Si angeli futura libera aut omninò fortuita, cognoscerent, ea viderent aut in se ipsis, aut in futurorum causis: atqui neutrum dici potest. Non primum; nam ut quis in se ipso videat futura, necesse est, ut sit futuris præsens: at Angelus non est præsens futuris; neque enim creatura omnibus temporibus simul est præsens, sed Deus solus, qui cum sit æternus, omnia simul tempora complectitur. Non potest quoque dici, quòd angelus futura contingentia videat in eorum causis: scilicet Angelus non potest in causâ indifferente videre effectum determinatum; sed causæ futurorum contingentium sunt indifferentes: idè enim dicuntur contingentes, quòd respectu suorum effectuum sint omninò indifferentes.

Quæres, utrum dogma sit fidei, quòd angeli per vires naturæ futura libera aut omninò fortuita certò non cognoscant.

Resp. affirmativè: nempè tum Scriptura, tum Patres Deo soli, per creaturarum exclusionem, tribuunt cognitionem futurorum, de quibus agitur. *Annuntiate* ( apud Isaiam cap. 14. ) *quæ ventura sunt in futurum, & sciemus, quia Deus estis*

*estis vos*. Hæc quoque leguntur cap. 46. *Ego sum Deus, & non est ultra Deus, nec est similis mei, annuntians ab exordio novissimum, & ab initio quæ nondum facta sunt*. Sic quoque loquitur Tertullianus Apologetici cap. 20. *Idoneum opinor testimonium divinitatis, veritas divinationis*.

Objicies. Angeli tum sancti tum reprobi sapius futura contingentia prædicunt: ergo ab utrisque cognoscuntur.

Resp. conc. ant. dist. conseq. Ab utrisque cognoscuntur, diverso modo, conc. conseq. eodem modo, neg. conseq. Angeli sancti nonnulla futura contingentia norunt ex speciali Dei revelatione; reprobi verò per quasdam tantum conjecturas: unde quæ ab illis prædicuntur, semper eveniunt; è contra quæ ab istis, plerumque non contingunt. *Futura quidem* (ait Damascenus lib. 2. de Fide Orthod. cap. 3: ) *tamen sine Dei angelis, nec demones norint, utrique tamen prædicunt, sed dispari modo. Angeli enim futuros eventus non aliter prædicunt, quàm Deo ipsis quæ futura sunt detegente, quo fit, ut ea omnia eveniant, quæ ab ipsis prædicuntur. Demones autem ipsi quoque prædicunt, interdum videlicet, quia ea quæ procul geruntur, cernunt interdum sola conjectura ducti, ex quo etiam efficitur, ut plerumque mentiantur*.

CONCLUSIO 4. Angeli non cognoscunt occultas ac liberas cordis cogitationes, licet actu & realiter existant.

Probatur. Id angeli non cognoscunt, quod si-  
ve Scriptura, si-ve Patres Deo soli proprium faciunt: atqui si-ve Scriptura, si-ve Patres Deo soli propriam faciunt occultarum & liberarum cogitationum notitiam: *Tu solus* (ait Scriptura 2. Paral. 6: ) *nostis corda filiorum hominum*. Psal. 7. *Scrutans corda & renes Deus*. Jeremiæ 17. *Pravum est cor omnium & inscrutabile: quis cognoscet illud? Ego Dominus scrutans cor & probans renes*.

Sad-

Sancti Patres usi sunt eo argumento; seu, ex eo quòd Deo soli conveniat cogitationum notitia, probarunt, Christum, quibus erant perspectæ, verum esse Deum: *Dominus videns cogitationes eorum, ostendit*) inquit Hieronymus in cap. 9. Matthæi) *se Deum, qui possit cordis occulta cognoscere*.

Objicies 1. Angeli sive boni sive mali comprehendunt essentiam animæ: ergo vident omnes illius modificationes: nempè idea comprehensionis includit non solum cognitionem substantiæ, sed etiam omnium illius modorum, cum sit cognitio omnium perfectissima: atqui angeli sive boni sive mali comprehendunt essentiam animæ; sunt enim animâ multò superiores: ergo, &c.

Resp. ad 1. conc. ant. neg. consequ. Ad 2. dist. ant. Idea comprehensionis includit cognitionem omnium modificationum necessariarum substantiæ quæ comprehenditur, conc. ant. modificationum liberarum, neg. ant. Ratio est, quia ad perfectam substantiæ cognitionem satis est, ut tum ipsa substantia, tum ea quæ naturaliter seu necessariò ex illa sequuntur, cognoscantur; ac proindè cum liberæ cordis cogitationes non sequantur necessariò ex angelicâ aut humanâ mente, rectè mens ipsa comprehendendi dicitur, in quantum à creatâ mente potest comprehendendi, quamvis liberæ illius cogitationes non cognoscantur.

Instabis. Quòd objectum aliquod non cognoscatur, id oritur aut ex eo quòd non sit proportionatum cum facultate intellectivâ, aut ex eo quòd illi minimè sit præsens: atqui neutrum habet locum in objecto de quo agitur; nimirum mentis cogitationes sunt quid intelligibile, ac proindè proportionem habent cum intellectivâ angelorum facultate; actu quoque sunt in anima quæ cogitat; & consequenter cum ipsa anima quæ cogitat, præsens sit Angelo,

illi quoque præsentēs sunt ejusdem animæ cogitationes.

Resp. ad 1. conc. maj. neg. min. Ad 2. concedo animam esse præsentem angelo, sed nego inde sequi, quòd animæ cogitationes angelo sint præsentēs: idque oritur ex eo, quòd non habeant necessariam cum animâ connexionem, nec anima (ut supponitur) eas Angelo manifestare velit.

Objicies 2. Id possunt Angeli, quod possunt homines multum sagaces: atqui homines multum sagaces cognoscunt aliorum hominum cogitationes: *Corda hominum* (ait Scriptura Proverb. 17.) *manifesta sunt prudentibus*: ergo, &c.

Resp. conc. maj. disting. min. Homines multum sagaces cognoscunt aliorum hominum cogitationes, quæ se produnt aliquibus signis sensibilibus, conc. min. quæ non se produnt signis sensibilibus, neg. min. Nonnullæ sunt cogitationes, quæ nullâ ratione, sui vestigia corporibus imprimunt; è contra sunt aliquæ aliæ, quæ signa quædam sensibilia corporibus imprimunt: scilicet vel movent imaginationem, vel vultum immutant. Illas nec Angeli nec homines, quantumcumque sagaces supponantur, nosse possunt naturali virtute; sed nihil obstat, quin istas percipiant, ita tamen ut certò scire non possint, an mens ejusmodi cogitationibus consensum præbuerit: *Angeli* (inquit Augustinus lib. de divin. dæmonum, capite 5.) *omnium dispositiones, non solum voce prolatas, verum etiam cogitatione conceptas, cum signa quædam ex animo exprimuntur in corpore, tota facilitate perdiscunt*.

Nec obstant hæc, quæ idem S. Doctor scripsit lib. 2. Retract. cap. 30. *Rem dixi occultissimam audaciorē asseveratione, quàm debui. Nam pervenire ista ad notitiam dæmonum, per nonnulla etiam experimenta compertum est. Sed utrum signa quædam dentur ex corpore cogitantium illis sensibilia, nos autem latentia; an alia vi, & ea spiritali,*



*tali, ista cognoscant; aut difficillimè pòtest ab hominibus, aut omninò non pòtest inveniri.* Non obstant (inquam) nam Augustinus iis verbis non rejicit, quod antea scripserat, scilicet dæmones cognoscere cogitationes, quæ signa quædam corporibus imprimunt; sed dubitat, an eas cogitationes sensibili virtute, an verò spiritali percipiant. Nec mirum est, quòd S. Doctor anceps hæserit, an dæmones virtute aliquâ sensibili, corporum impressiones noverint, cum ipse diu dubitarit, an dæmones habeant subtilia quædam corpora, quæ sicut humana, aliorum corporum impressionibus moveantur.

Quæres, utrum fide Catholicâ certum sit, Angelos non cognoscere occultas cordis humani cogitationes.

Resp. sententiam quæ docet, cogitationes de quibus agitur, ab Angelis non cognosci, esse quidem certam ac veram, cum maximè cum Scripturis & Patribus cohæreat, sed tamen non esse certam certitudine Fidei Catholicæ: nam ex Catholicis alii aliter exponunt tum Scripturæ tum Patrum loca quæ superius relata sunt: scilicet non pauci contendunt, Angelos naturali virtute posse quidem cognoscere occultissimas cordium cogitationes, sed tamen eas actu non cognoscere, eò quòd (inquiunt) Deus nolit suum concursum præbere, aliunde tamen necessarium, ut virtus naturalis, quâ pollent angeli, executioni mandetur. Ita censent Scotus, Ochamus & Gabriel. Alii plus addunt, nempe judicant, probabile esse, quòd angeli cognoscant actu quascunque mentis tum cogitationes tum affectiones, quæ præsentibus sunt, non autem præteritas, aut futuras, & in hoc volunt Angelorum cognitionem à divinâ discrepare; ita Durandus. Unde licet interpretationes ejusmodi, sint falsæ eo quòd tum Scriptura tum Patres absolutè ac sine restrictione loquantur, & quidem maximè de cogitationibus actu præsentibus; tamen cum Ec-

clésiæ expresso aliquo decreto illas interpretationes non proscripserit, haberi non debent tanquam hæreticæ.

**CONCLUSIO 5.** Angeli naturæ viribus cognoscere non possunt religionis Christianæ mysteria.

Probatur. Id Angeli cognoscere non possunt naturæ viribus, cum quo eorum intellectiva facultas non habet proportionem; nam inter principium cognoscens & objectum cognitum debet esse proportio: atqui inter intellectivam Angeli facultatem viribus naturalibus relictam, & inter mysteria religionis Christianæ, nulla est proportio: Ista enim sunt ordinis supernaturalis; intellectiva verò facultas Angelorum, ordinis omninò naturalis.

Quæres, utrum Deus angelis viatoribus aliqua revelarit mysteria, & in primis mysterium Incarnationis.

Resp. 1. Certum esse, Deum aliqua mysteria Angelis viatoribus revelasse, scilicet Angeli viatores habuerunt fidem; fides autem habet pro motivo divinam revelationem: at Deus alia non revelavit Angelis, quàm quæ essent supernaturalis ordinis; siquidem Angeli per naturæ vires novaverant quæ sunt ordinis naturalis: At quæ sint in specie mysteria, quæ Deus Angelis viatoribus revelarit, incertum est omninò.

Nonnulli contendunt, eos antequam cœlesti beatitudine fruerentur, nec quoad substantiam, nec quoad circumstantias particulares, novisse mysterium Incarnationis: cum enim (inquiunt) beatitudinem non essent ex Christi meritis consecuturi, non erat opus, ut incarnationem Verbi docerentur.

Alii post S. Thomam asserunt 1. mysterium illud Angelis imperfectè fuisse revelatum: *Mysterium regni Dei, quod est impletum per Christum* (ait S. Doctor 1. p. q. 64. art. 1. ad 4.) omnes quidem Angeli à principio aliquo modo cognoverunt,

runt , sed maximè ex quo beatificati sunt visione Verbi, quam demones nunquam habuerunt.

Asserunt 2. S. Angelis fuisse revelatum perfectiùs initio beatitudinis, non tantùm secundùm substantiam , hoc est , prout dicit hominem Deum super omnes principatus exaltandum, sed etiam plures circumstantias particulares, licèt non secundùm omnes: *Ad primum ergo dicendum* ( inquit idem S. Doctor 1. p. q. 57. art. 5. ) *quòd de mysterio Incarnationis dupliciter contingit loqui. Vno modo in generali, & sic omnibus revelatum est à principio suæ beatitudinis. Alio modo possumus loqui de mysterio Incarnationis quantum ad speciales conditiones, & sic non omnes Angeli à principio de omnibus sunt edocti, imò quidam, etiam superiores Angeli, postmodum didicerunt.*

Asserunt 3. omnes angelos statim post hominis lapsum cognovisse mysterium Incarnationis, quantum ad aliquas circumstantias particulares, istam v. g. quòd per Christum ex Adami stirpe nasciturum, homo lapsus redimendus erat, ac diabolus qui seduxerat Evam, superandus. Nam ( inquirunt ) hæc ad serpentem verba, Genesis 3. *Inimicitias ponam inter te & mulierem, & semen tuum & semen illius, ipsa conteret caput tuum,* sunt verba Angeli Dei nomine loquentis: Angelum autem non fugiebat sensus verborum, quæ ab illo proferebantur.

Asserunt 4. processu temporis ante Christum natum, Angelos cognovisse plures alias ejusdem mysterii circumstantias, aut Deo, prout ferebant occasiones, plenius revelante, aut Apostolis ejusmodi circumstantias prædicantibus; unde Paulus ad Ephesios 3. scribit, sibi datam esse Evangelizandi gratiam, ut ( inquit ) *innotescat principibus & potestatibus in cælestibus per Ecclesiam multisformis sapientia Dei secundùm prævisionem sæculorum, quam fecit in Christo Iesu Domino nostro.*

## ARTICULUS II.

*De medio cognitionis angelicae.*

**Not. 1.** **N**omine medii hîc intelligitur id in quo Angelus videt objecta, ad quæ ferri potest illius cognitio. Ea autem objecta ( ut patet ex dictis articulo præcedenti ) sunt Deus, ipsa Angeli natura, res corporeæ, cordis humani cogitationes, religionis Christianæ mysteria: quærendum est igitur, ubinam angelicus intellectus ea omnia cognoscat, & à quâ causa efficiente sit medium, in quo cognoscuntur.

**Not. 2.** Circa eam quæstionem variæ sunt scholasticorum sententiæ. Nonnulli docent, Angelum videre res omnes in speciebus, quæ ipsis sint aut à Deo infusæ, aut congenitæ. Econtra alii docent, Angelum res nonnullas videre in suâ substantiâ, alias verò in ipsarum rerum speciebus: quâ ratione nodus ille solvendus sit, subsequentes conclusiones aperient.

**CONCLUSIO I.** Angeli non vident Deum in aliquâ specie creatâ, sed eum in se ipso immediate vident.

**Probatur.** Qui vident Deum intuitivè, eum vident immediate: hoc enim est discrimen inter intuitivam Dei cognitionem & abstractivam, quòd ista sit cognitio Dei in creaturis, illa verò in ipso Deo: atqui ( ut tomo 1. dictum est ) Angeli, cum sint beati, Deum vident intuitivè: ergo eum vident non in speciebus, sed in illo immediate.

**Confirmatur.** Angeli Deum non vident in eo quod ipsum, ut in se est, repræsentare non potest: atqui species creatæ non possunt repræsentare Deum, ut in se est: illud enim solum potest Deum repræsentare, ut in se est, quod est perfecta

fecta illius imago: sed species creatæ non sunt ejusmodi; nempe id soli Verbo debetur, in quo eadem est essentia, eademque perfectiones, quæ in Deo Patre reperiuntur.

CONCLUSIO 2. Angeli se ipsos non vident in speciebus à se distinctis.

Probatut. Species illæ distinctæ, sunt inutiles: ergo Angeli se ipsos in illis non vident. Probatur ant. Species ideò tantum necessariae sunt, ut facultas intellectiva conjungatur cum objecto cognoscendo: atqui in casu de quo agitur, species ad id non sunt necessariae: siquidem Angelus sibi ipsi intimè præsens est; ac proinde non est opus speciebus, ut natura angelica, quæ est objectum cognitionis, cum intellectivâ facultate conjungatur.

CONCLUSIO 3. Angeli in se ipsis cognoscunt communes rationes rerum omnium corporearum, non autem singulares.

Probatur prior pars. Angeli cognoscunt in se ipsis rationes, quæ in illorum naturâ continentur, se ipsos nimirum comprehendunt: atqui rationes communes rerum omnium corporearum continentur in Angelorum natura; siquidem naturæ superiores continent rationes communes naturarum inferiorum: sic vivens continet perfectiones communes non viventis, animal v.g. perfectiones lapidis: Sed Angelorum natura superior est naturâ corporeâ: ergo continet rationes communes rerum corporearum.

Probatur altera pars. Angeli id tantum in se ipsis cognoscunt, quod in eorum naturâ continetur: nempe ut quid in aliquo medio cognoscatur, necesse est, ut in illo contineatur: atqui rationes singulares rerum corporearum, seu specificæ illarum differentiae, non continentur in naturâ angelicâ; lapis v.g. in ratione specificâ lapidis non est in Angelorum naturâ, alioquin Angelus esset lapis; quod implicat: ergo, &c.

**CONCLUSIO 4.** Rationes singulares, seu differentiae, tum specificae, tum numericae, quae ab Angelis cognoscuntur, videntur in propriis rerum speciebus.

Probatur. Angeli cognoscunt rationes singulares rerum in eo, per quod res conjunguntur eorum intellectivae facultati, & per quod repraesentantur: atqui rationes singulares rerum per species conjunguntur facultati intellectivae Angelorum, & per eas repraesentantur; cum enim in angelicâ naturâ minimè contineantur, non est aliquid aliud præter illarum rerum species, per quod res conjungantur intellectivae facultati Angelorum, & per quod repraesententur.

**CONCLUSIO 5.** Angeli per species sibi congenitas vident rationes communes rerum, rationes verò singulares per species à Deo infusas.

Probatur prior pars. Angeli per species sibi congenitas vident ea, quae in propriâ suâ naturâ cognoscunt; atqui (ex dictis conclusione 3.) Angeli vident in propriâ suâ naturâ communes rerum rationes; ergo, &c. Altera verò pars sic ostenditur. Angeli (ut conclusione 4. dictum est) vident res singulares in earum speciebus: sed illae species ex objectis exterioribus non recipiuntur ab Angelis; neque enim res corporeae possunt Angelos ad sui cognitionem movere; nimirum quod corporeum est, movere non potest spirituale, nisi illi, ut anima rationalis corpori, sit unitum; ergo species de quibus agitur, sunt Angelis à Deo infusae.

Quæres, utrum Deus Angelis, ubi primùm conditi sunt, infuderit species communes rerum omnium, quas naturaliter cognoscere possunt.

Resp. affirmativè. Ratio est, quia intellectus angelicus creatus fuit in statu perfectio: at perfectus non est intellectus, cui desunt species rerum quas naturaliter cognoscere potest.

## ARTICULUS III.

*De dotibus cognitionis Angelorum.*

*Not.* **H**ic cum S. Thomâ 1. p. quæst. 58. quaerimus 1. utrum Angeli cognitio semper sit in actu; 2. utrum multa simul attingat; 3. utrum sit discursiva; 4. an componat, ac dividat; 5. an possit esse falsa; 6. quid sit Angelorum tum matutina, tum vespertina cognitio.

**CONCLUSIO 1.** Angeli cognitio est semper in actu respectu eorum, quæ videt in Verbo, non autem respectu rerum aliarum.

Probatur prior pars: Ea cognitio semper est in actu respectu alicujus objecti, quæ sine intermissione illud objectum contemplatur: atqui Angeli cognitio sine intermissione contemplatur res quas videt in Verbo: scilicet Verbum est veluti speculum, in quo res illæ necessariò repræsentantur. Altera verò pars sic ostenditur: Angeli cognitio non semper est in actu respectu rerum quas sine intermissione non considerat: atqui non considerat sine intermissione res quas non videt in Verbo; in hoc enim angelica cognitio differt à cognitione divina, quòd hæc semper actu in objectum suum feratur.

**CONCLUSIO 2.** Angeli cognitio plura simul attingit, sed non omnia.

Probatur: Angeli cognitio simul attingit ea quæ in unicâ specie repræsentantur: atqui plura, licet non omnia, repræsentantur in unâ specie. Quæ videntur in Verbo, exhibentur in essentiâ divinâ, quæ maximè est una. 2. Individua ejusdem speciei, in unicâ ideâ communi repræsentantur. 3. e contra quæ sunt diversæ speciei, non continentur in unicâ ideâ, v. g. leo non continetur in ideâ bovis: ergo simul non cognoscuntur.

CON-

CONCLUSIO 3. Angelorum cognitio non est discursiva respectu eorum, quæ naturaliter ab eis cognoscuntur.

Probatur. Illa cognitio non est discursiva, quæ non infert unum ex alio : nimirum discursus non aliud est, quàm illatio unius ex alio ; atqui Angeli cognitio non infert unum ex alio in iis quæ naturaliter ab iis cognoscuntur ; nam ea cognitio non infert unum ex alio, quæ est comprehensiva, scilicet in cognitione illativâ unius ab alio unum supponitur ignotum, in cognitione verò comprehensivâ, omnia simul sunt nota : sed Angelorum cognitio est ( ut superius dictum est ) comprehensiva, respectu eorum quæ ab eis naturaliter, hoc est, per species illis ingenitas, cognoscuntur : ergo, &c.

Quæres, utrum Angeli cognitio sit discursiva respectu earum rerum, quæ ab eis naturaliter non cognoscuntur.

Respondent nonnulli negativè, alii verò, & quidem multò plures, affirmativè ; idque ( inquirunt ) patet ex eo, quòd Angeli ex his aut illis motibus, quos in alicujus hominis corpore percipiunt, inferant, eum has aut illas cogitationes animo volvere ; sic etiam dæmones ex Christi miraculis inferebant, eum esse Messiam in lege promissum.

CONCLUSIO 4. Angeli cognitio non est per divisionem & compositionem, in iis quæ naturaliter ab eo cognoscuntur.

Probatur. Cognitio comprehensiva non est per divisionem & compositionem ; siquidem dividere, componere, non aliud sunt, quàm apprehendere subjectum sine prædicato, aut ipsum cum prædicato conjungere per actum distinctum ab eo, per quem apprehenditur : atqui ( ut superius dictum est ) Angeli cognitio est comprehensiva respectu earum rerum, quæ naturaliter ab illo cognoscuntur : ergo, &c. Desumptum est illud argumentum ex S. Thomâ, qui 1. p. q. 58. art. 4. sic



fic loquitur: *Si intellectus statim in ipso principio videret conclusionis veritatem, nunquam intelligeret discurrendo, vel ratiocinando: Similiter si intellectus statim in apprehensione quidditatis subjecti, haberet notitiam de omnibus quæ possunt attribui subjecto, vel removeri ab eo, nunquam intelligeret componendo & dividendo, sed solum intelligendo quod quid est.*

CONCLUSIO 5. Angeli cognitio non potest esse falsa respectu eorum quæ ab eo naturaliter cognoscuntur, imò nec respectu eorum quæ supernaturaliter conveniunt objecto, secus verò in Angelis damnatis.

Probatur prior pars. Cognitio comprehensiva non potest esse falsa; nimirum posita est in perfectâ ac adæquatâ objecti cognitione, ac proinde objecti prout est à parte rei: atqui (ut jam sæpè diximus) Angeli cognitio est comprehensiva respectu eorum quæ ab eo naturaliter cognoscuntur: ergo, &c.

Altera conclusionis pars non minùs est evidens. Nam ea cognitio non potest esse falsa, quæ non dicit absolutam, sive affirmationem, sive negationem: Sed in Angelis sanctis cognitio eorum quæ supernaturaliter tantùm cognosci possunt, non dicit absolutam, sive affirmationem, sive negationem, sed hypotheticam tantùm, hoc est, salvâ ordinatione divinâ: e contra verò pravi Angeli, cum eorum voluntas sit inordinata, absolutum de rebus supernaturalibus, aut merè contingentibus iudicium ferunt; ac proinde mirum non est, quòd in iis rebus sæpissimè fallantur. *Angeli boni* (inquit Sanctus Thomas) *habentes rectam voluntatem, per cognitionem quidditatis rei non judicant de his quæ supernaturaliter ad rem pertinent, nisi salva ordinatione divina; unde in eis non potest esse falsitas aut error. Dæmones verò per voluntatem perversam, subducentes intellectum à divina sapientia, absolute interdum de rebus judicant secundum*

*naturalem conditionem. Et in his quæ naturaliter ad rem pertinent, non decipiuntur; sed decipi possunt quantum ad ea quæ supernaturalia sunt: Sicuti considerans hominem mortuum, iudicet eum non resurrecturum: Et si videns hominem Christum, iudicet eum non esse Deum.*

**CONCLUSIO 6.** Duplex est in Angelis cognitio, Matutina scilicet & Vespertina.

Probatur. Cognitio matutina & vespertina, sunt ejusdem objecti cognitio perfectior & minus perfecta, quemadmodum manè & vesperè sunt eadem dies, sed perfectior & minus perfecta: atqui datur in Angelis cognitio ejusdem objecti perfectior & minus perfecta; siquidem perfectio aut imperfectio cognitionis petuntur ex perfectione aut imperfectione mediorum, in quibus res cognoscuntur, cum in uno clariùs repræsententur, quàm in alio: sed ex mediis in quibus Angeli res cognoscunt, unum est perfectius alio: nimirum Angeli beati vident res creatas in Verbo; eas quoque vident in speciebus quæ sibi de iisdem rebus inditæ sunt; at res creatæ perfectiùs in Verbo repræsentantur, quàm in speciebus quas de iis Deus Angelis indidit: ergo, &c.

Confirmatur ex Augustino, qui lib. 4. de Genesi ad lit. c. 24. docet 1. uno reali temporis momento res omnes creatas fuisse. Docet 2. sex illos dies quos Scriptura testatur Deum impendisse ad rerum productionem, metaphoricè sumi debere, pro cognitione nimirum quam Deus de rebus creatis successivè contulit Angelis. Docet 4. Angelos beatos priùs, & quidem perfectè, creaturas in Verbo vidisse, deinde successivè ac minus perfectè in ipsarummet rerum speciebus receptis, non quidem ex ipsismet rebus, sed Angelico intellectui (ut superiùs dictum est) infusis. Vide quæ tom. 1. diximus agentes de objecto intuitive Dei visionis. Vide etiam quæ hujusce tertix partis dissertatione secundâ, de aspectabilis hujus universi creatione dicentur.

## CAPUT II.

*De Angelorum amore.*

*Not.* **D**E Angelorum amore quæremus 1. utrum reverà detur; 2. quodnam sit illius objectum; 3. utrum sit immutabilis.

**CONCLUSIO 1.** Datur amor in Angelis.

Probatur. Amor est motus quo voluntas fertur in bonum; & quidem per complacentiam, si sit præsens; per desiderium verò, si sit absens: atqui motus ille datur in Angelis: nempe motus ad bonum, sive per complacentiam, sive per desiderium, sequitur ex ejusdem boni cognitione: neque enim intellectus potest aliquod bonum cognoscere, quin voluntas aliquo in eum motu, cum sit naturale illius objectum, veluti quodam pondere feratur: ergo, cum in Angelis (ut præcedente capite dictum est) sit boni cognitio, necesse est, ut in eis quoque sit nonnullus ejusdem boni amor.

**CONCLUSIO 2.** Angelus seipsum, creaturas mente præditas, & Deum diligit, sed diversimodè.

Probatur prior pars. Diligere objectum aliquod, est velle ei bonum: atqui Angelus sibi, creaturis mente præditis, Deo, vult bonum; sibi quidem ac ceteris creaturis mente præditis vult pacem, quæ non habetur, nisi per possessionem ultimi finis, ad quem creaturæ mente præditæ, creatæ sunt; Deo autem, summum honorem, summam gloriam. Altera pars non minùs evidens est: scilicet Angelus diversimodè diligit, quæ diversimodè diligenda sunt; illius enim amor est amor rectus: Sed creaturæ quæ mente præditæ sunt, & Deus, diversimodè diligenda sunt: creaturæ nimirum in ordine ad Deum, Deus verò propter seipsum diligendus est. Vide quæ hu-

huiusce operis tom. 5. de charitatis ordine dicuntur.

Quæres, utrum amor quo Angelus Deum, ut authorem naturæ, super omnia diligit, sit amor naturalis.

Resp. negativè. Ratio est, quia amor Dei super omnia, etiam ut authoris naturæ, est amor, quem Augustinus sæpè vocat amorem castum: at amor castus, ex eodem Augustino, est charitas: Charitas autem (ut habetur primæ Joannis 4.) ex Deo est.

Confirmatur. Amor quo Angelus, dum esset in viâ, Deum, ut est author naturæ, dilexit, fuit amor qui Deo serviit: amor verò qui Deo servit, ab ipso Deo, sive hominibus, sive Angelis donatur, Augustino teste, qui lib. 4. contra Julianum, cap. 4. sic loquitur: *Absit autem, ut virtutes veræ cuiquam serviant, nisi illi vel propter illum cui dicimus, Deus virtutum converte nos. Proinde virtutes quæ carnalibus delectationibus, vel quibusque commodis & emolumentis temporalibus serviunt, veræ prorsus esse non possunt: Quæ autem nulli rei servire volunt, nec ipsæ veræ sunt: Veræ quippe virtutes Deo serviunt in hominibus, à quo donantur hominibus: Deo serviunt in Angelis, à quo donantur & angelis.*

Dices. Quæ mox data fuit responsio, videtur adversari S. Thomæ, qui 1. p. quæst. 60. art. 5. sic loquitur: *Quia igitur bonum universale est ipse Deus, & sub bono continetur etiam ipse Angelus, & homo, & omnis creatura, sequitur, quod naturali dilectione etiam Angelus & homo plus & principalius diligat Deum, quam seipsum: alioquin si naturaliter plus seipsum diligeret, quam Deum, sequeretur, quod naturalis dilectio esset perversa; & quod non perficeretur per charitatem, sed destrueretur.*

Sed nullius est ponderis illud argumentum: scilicet S. Thomas eò loci non loquitur de amore elicitò & libero, sed de amore innato &

ne-

necessario. Ratio est 1. quia scribit, non Angelum tantum, sed etiam hominem naturaliter diligere Deum super omnia: at, in ejusdem S. Thomæ doctrinâ, homo non potest Deum, etiam ut authorem naturæ, naturaliter, hoc est, naturæ viribus, super omnia diligere. Ratio est 2. quia S. Doctor non loquitur de Deo, ut est bonum à cæteris distinctum, sed ut est bonum quoddam commune non separatum ab aliis: *Deus* (inquit in responsione ad quartum) *secundum quod est universale bonum, à quo dependet omne bonum naturale, diligitur naturali dilectione ab unoquoque*: at bonum illud commune necessario, sive quoad specificationem, sive quoad exercitium, à creaturis mente præditis diligitur: illius enim boni amor non aliud est, quàm propositio ad universale bonum indita creaturæ rationali.

CONCLUSIO 3. Angelorum amor non est naturaliter immutabilis. Est contra plures Thomistas, quibus placet, Angelum ita objectum aliquod eligere, ut in factâ electione sit prorsus immutabilis.

Probatur 1. Angelorum amor re ipsa mutatus est: ii enim qui perierunt, ex amantibus Deum, peccando facti sunt non amantes. Dæmonis voluntas circa Christi mortem mutata est: nempe prius eam voluit, sed postea eam per Judæos qui petierunt, ut de cruce descenderet, conatus est impedire.

Probatur 2. Si quis Angelorum amor esset immutabilis naturaliter, esset præsertim amor Dei qui in beatis Angelis reperitur, & amor peccati qui est in dæmonibus: atqui neuter ex iis amoribus est naturaliter immutabilis: Si enim esset naturaliter immutabilis, Patres beatificum Angelorum amorem adscripsissent eorum naturæ, non autem Dei gratiæ; eidem naturæ, non autem divinæ desertioni, tribuissent obstinatum peccati amorem, qui in pravis Angelis reperitur:  
atqui

atque neutrius ex illis amoribus immobilitatem Patres tribuerunt Angelorum naturæ; sed aut soli gratiæ, aut divinæ desertioni. Hoc ipsum (inquit Fulgentius lib. de Fide ad Petrum, c. 23.) quod ab illo statu beatitudinis in quo sunt, mutari deterius nullatenus possunt, non est eis naturaliter insitum; sed postquam creati sunt, gratiæ divinæ largitate collatum. Hæc etiam habet Augustinus lib. 22. de Civitate Dei, cap. 1. Casum Angelorum voluntarium justissima pœna sempiternæ infelicitatis obstrinxit: atque in eo summo permanentibus ceteris, ut de sua sine fine permansione certi essent, tanquam præmium ipsius permansionis dedit. Isidorus lib. 1. de Summo bono capite 12. sic loquitur: Gratia dicimus, non natura, esse immutabiles Angelos: nam si natura immutabiles essent, diabolus non utique cecidisset.

Objicies. Illi sunt immutabiles ex naturâ suâ, in quibus post electionem non remanet indifferentia judicii; scilicet indifferentia judicii est radix mutabilitatis in voluntate, seu ratio propter quam voluntas modò velit unum objectum, modò verò illud non velit, petitur ex eo quod intellectus semper eadem ratione non apprehendat objectum; quippè novæ rationes illi plerumque occurrunt, propter quas voluntas odit objectum, quod prius deperierat: atque post electionem non remanet in Angelis indifferentia judicii circa objectum quod elegerunt; cum enim perfectus sit eorum intellectus, unico instanti detegit omnes omninò rationes, propter quas objectum aut odio haberi aut amari debeat: Differt enim (inquit Sanctus Thomas 1. p. quæstion. 64. art. 2.) apprehensio Angelis ab apprehensione hominis in hoc, quod Angelus apprehendit immobiliter per intellectum, sicut et nos immobiliter apprehendimus prima principia quorum est intellectus: homo verò per rationem apprehendit mobiliter, discurrendo de uno ad aliud, ha-

*habens viam procedendi ad utrumque oppositum. Vnde & voluntas hominis adhæret alicui mobiliter, quasi potens etiam ab eo discedere, & contrario adhære: voluntas autem Angeli adhæret fixè & immobiliter: & ideo si consideretur ante adhesionem, potest liberè adhære & huic & opposito, in his scilicet quæ non naturaliter vult.*

Resp. ad 1. conc. maj. neg. min. Ad 2. dist. ant. Angelorum intellectus detegit omnes rationes propter quas objectum aut odio haberi aut amari debeat; & illæ rationes remanent in Angelorum intellectu, etiam post factam electionem, conc. ant. & non remanent, neg. ant. Ubi Angelus propter hanc aut illam rationem elegit aliquod objectum, habet adhuc in apprehensione rationes alias, propter quas illud post electionem deferere possit, si tamen sit ex numero eorum objectorum, quæ non sunt ultimus finis, aut quæ cum eo non habent connexionem necessariam. Ad 3. dist. ant. ex S. Thomâ Angelus immobiliter apprehendit objectum, quod est ultimus finis, aut cum eo necessariam habet connexionem, conc. ant. quod nec est ultimus finis, nec habet cum eo necessariam connexionem, neg. ant. Confirmatur responsio ex eo, quod juxta doctrinam S. Thomæ, Angeli sancti per primum suæ voluntatis actum, beatitudinis præmiûm consecuti sint, alii verò damnationem æternam; ac proinde cum S. Doctor scribit, utroque immobiliter objectum apprehendere, illique immobiliter inhærere, loquitur de objecto per quod Angeli sancti, constituti sunt beati, & de peccato, per quod Angeli mali, facti sunt in æternum miseri.

## CAPUT III.

*De Angelorum loco.*

**Not.** **H**Oc in capite queri potest 1. utrum Angeli sint in loco; 2. quotuplex sit eorum locus; 3. quomodo sint in loco; 4. denique per quid in eo constituentur.

## ARTICULUS I.

*Utrum Angeli sint in loco.*

**CONCL.** **A**ngeli verè sunt in loco. Probatur. Ii sunt in loco qui in eo operantur; neque enim causa efficiens operatur ubi non est: atqui Angeli in loco operantur; movent nimirum hominum corpora, ut in obsessis patet; apparent hominibus, ut ex Scripturâ docemur: ergo reuera sunt in loco.

Quæres, utrum sola virtus Angeli sit in loco, an etiam illius substantia.

Resp. Angelum esse in loco non tantum secundum suam virtutem, sed etiam secundum substantiam. Reverà enim substantia Angelorum est aut in cœlis, aut in inferno, aut in terris: quæ enim proferrentur testimonia ad secundæ conclusionis probationem, non tantum intelliguntur de præsentia virtutis, qualis est præsentia Solis in visceribus terræ, sed etiam de præsentia substantiæ.

Confirmatur 1. ex Patribus. Chrysostomus lib. 6. de Sacerdotio, agens de sacrificii tempore sic loquitur: *Per id tempus & Angeli sacerdoti assident, & cœlestium potestatum universus ordo clamores excitat, & locus altari vicinus in illius honorem, qui immolatur, Angelorum choris plenus est.*

Non



Non absimili ratione loquitur Concilium Aquilgranense, imperante Ludovico Pio celebratum: *Nec (inquit cap. 132.) dubitare licet, ubi Corporis & Sanguinis Domini geruntur mysteria, supernorum civium adesse conventus.* Athanasius in Epist. ad Serapionem, concludit, ideò Spiritum sanctum esse majorem Angelis, quòd sit ubique, Angeli verò *certis locis circumscribantur*, hoc est, definiantur.

Confirmatur 2. ex eo, quòd hic articulus: *Substantiæ separatae nusquam sunt*, quondam, (Sylvio teste I. p. q. 52. art. 1.) tanquam erroneus ab Episcopo Parisiensi proscriptus fuerit.

## ARTICULUS II.

### *Quinam sit Angelorum locus.*

CONCL. I. **T**Riplex est Angelorum locus, cælum, infernus, aer.

Probat. *Primò*, aliquos Angelos in cælis esse, certissimum est: ibi enim regnant cum Patre nostro qui in cælis est. *De die illo vel hora (inquit Christus Marci 13.) nemo scit, neque Angeli in calo.* Lucæ 2. *Discesserunt ab eis Angeli in cælum.* Lucæ 22. *Apparuit illis Angelus de calo.* Matthæi 28. *Angelus Domini descendit de calo.*

*Secundò*, constat quoque nonnullos Angelos ad infernum detrusos fuisse: hæc enim leguntur secundæ Petri 2. *Si enim Deus Angelis peccantibus non pepercit, sed rudentibus inferni detractos in tartarum, tradidit cruciandos in judicium reservari.* Consonat Judas in Epistolâ suâ canonicâ, cap. 6. *Angelos verò (ait) qui non servaverunt suum principatum, sed dereliquerunt suum domicilium, in judicium magni diei vinculis æternis sub caligine reservavit.*

Tandem *tertiò*, non minùs est certum, plures

è dæmonibus in aere versari. Job cap. 1. Satan interrogatus, unde veniret, ait : *Circuii terram & perambulavi eam*. Primæ Petri 5. hæc habentur : *Adversarius vester diabolus tanquam leo rugiens circumit, querens quem devoret*. Eodém spectant, quæ scribit Paulus ad Eph. cap. 2. *In quibus aliquando ambulastis secundum principem aeris hujus*. Ejusdem Ep. cap. 6. dæmones vocantur mundi rectores tenebrarum harum, *spiritualia nequitiæ in cælestibus*, hoc est, aeriis locis. In eum verò textum sic loquitur Hieronymus : *Hæc autem omnium doctorum opinio est, quod aer iste, qui cælum & terram medius dividens inane appellatur, plenus sit contrariis fortitudinibus*.

Objicies. Secundæ Petri 2. innuitur, omnes prorsus Angelos apostatas in infernum detrufos fuisse : *Rudentibus inferni detractos in tartarum tradidit cruciandos*. Idem quoque colligi potest ex capite sexto Epistolæ canonicæ Judæ. Ergo nulli dæmones sunt in aere.

Respondet Estius negando conseq. Ratio est (inquit) quia licet Deus omnes Angelos apostatas statim post peccatum in infernum detruserit : postea tamen principi eorum permisit, ut ex illo carcere egressus, primos parentes ad peccatum provocaret ; post peccatum verò primorum parentum, nonnullos alios permittit pariter ex inferis exire, ut Adami posteros ad peccatum pelliciant, atque pro meritis eos divexent. Respondent alii, Petrum eo sensu asseruisse, Angelos prævaricatores in infernum detrufos fuisse, quod major eorum pars in tenebricosum illum locum dejecta fuerit. S. Thomas 1. p. q. 64. art. 4. illi responso patrocinator.

Quæres, utrum dæmones, sive qui in infernis concluduntur, sive qui versantur in aere, torqueantur, tum pœnâ damni, tum pœnâ sensus ; hoc est, utrum non solum crucientur ex carentiâ intuitivæ Dei visionis, sed etiam utrum igne torqueantur.

Re-

Respondeo 1. nonnullos ex antiquis censuisse dæmones, sive qui tartaris concluduntur, sive qui versantur in aere, post extremum tantum judicii diem ignis poenâ cruciandos esse. Ita sensisse videntur Tertullianus in Apolog. cap. 27. Justinus in apologiâ priore. Quidam recentiores in eam sententiam trahunt hæc Bernardi verba Sermone de Transitu S. Malachie: *Definita quidem, sed nondum promulgata sententia est. Denique jam diabolo ignis paratus est, etsi nondum præcipitatus in ignem, modico adhuc tempore finitur malignari.*

Respondeo 2. alios, & quidem multò plures ex Patribus censuisse, dæmones omnes ignis poenâ statim post peccatum cœpisse cruciari: Ita enim docent Auctor libri de vitâ contemplativâ lib. 1. c. 3. Beda in caput 3. Lucæ, Augustinus lib. de Corrept. & Gratiâ c. 10.

Respondeo 3. S. Thomam de eâ quæstione agere 1. p. q. 64. art. 4. Eò verò loci refert 1. eorum sententiam, qui contendunt, nec animas damnatorum, nec dæmones igne cruciari debere ante extremum judicii diem, atque eam esse erroneam: *Quod (inquit ad 4.) est erroneum.* Refert 2. opinionem aliam quæ asserit, animas quidem jam nunc igne cruciari, sed id negat de dæmonibus: Illi verò sententiæ nullam inurit notam, sed simpliciter eam hisce verbis recenset: *Alii verò licet non concedant de animabus, concedunt tamen de dæmonibus.* Refert 3. proprium suum judicium: *Sed (inquit) melius est dicendum, quòd idem judicium sit de malis animabus, & de malis Angelis, sicut idem judicium est de bonis animabus, & de bonis Angelis.* Addit S. Doctor quòd licet Angeli qui in aere versantur, nondum igni sensibili sint alligati; illo tamen crucientur, quòd sciant se post extremum judicii diem in eum esse dejiciendos: *Similiter (inquit) dicendum est, quòd dæmones licet non actu alligentur gehennali igni, dum sunt in aere iste*

*caliginoso ; tamen ex hoc ipso quòd sciunt, illam alligationem sibi deberi, eorum pœna non diminuitur.*

Respondeo 4. tenendam esse omninò eam S. Doctoris opinionem, cum invaluerit in Ecclesiâ ; seu , asserendum est , dæmones omnes etiam nunc igne torqueri , & quòcumque eant , sua secum supplicia circumferre .

Ad ea verò Patrum loca quæ pro priorè sententiâ laudata sunt , dicendum est 1. eos Patres qui scripserunt, dæmones omnes nondum pati pœnam ignis , intelligi debere de pœnâ sumptâ quoad locum, in quo sævit ejusmodi pœna : neque enim ( ut dictum est ) omnes dæmones tartaro concluduntur .

Dicendum est 2. alios Patres qui docuerunt nondum esse completa dæmonum supplicia , intelligendos esse de complemento quoad locum , & quoad privationem potestatis tentandi homines, quâ pollent degentes in terris : *Nec est contra hoc, ( inquit S. Thomas ) quòd rogaverint Dominum, ut non mitteret eos in abyssum : ( ut dicitur Lucæ 8. ) quia hoc petierunt, putantes sibi pœnam, si excluderentur à loco, in quo possunt hominibus nocere .*

Dicendum est 3. textum ex Bernardo prolatum non intelligi de omnibus dæmonibus , quasi docere voluerit , nullum ex dæmonibus jam nunc inferorum igne torqueri ; sed intelligitur de iis tantùm dæmonibus , qui ( ut superius dictum est ) in terris versantur , nec adhuc ( ut loquitur S. Thomas ) igni tartareo sunt alligati .

## ARTICULUS III.

*Quomodo Angeli sint in loco.*

**Not.** **D**Uobus modis res aliqua potest esse in loco, circumscriptivè nimirum & definitivè. Esse in loco circumscriptivè, est respondere variis partibus loci, quo res supponitur contineri: esse verò definitivè, est rem ita esse in uno loco, ut non sit alibi.

**CONCLUSIO I.** Angeli non sunt in loco circumscriptivè.

**Probatur.** Ex observatis, esse in loco circumscriptivè, est ita contineri loco, ut res quæ in eo est, correspondeat variis partibus loci, seu spatii: sed Angeli non correspondent variis partibus loci, seu spatii; siquidem ut res aliqua correspondeat variis partibus loci, ipsa debet habere partes: atqui Angeli partes non habent, cum (ut superius probatum est) expertes sint cujuslibet materiæ, cui soli partes conveniunt.

**Objicies.** Athanasius in Epistola ad Serapionem asserit, Angelos certis locis circumscribi: *Angeli (inquit) consistunt in certis locis, loco circumscribuntur.* Eodem modo loquitur Gregorius Magnus lib. 2. *Moralium*, cap. 3. *Circumscribitur* est (ait) *Angelicus spiritus*: ergo, &c.

**Resp. dist. ant.** Angeli, ex Athanasio & Gregorio Magno, circumscribuntur improprie, conc. ant. proprie, neg. ant. Circumscribi proprie, est (ut jam dictum fuit) correspondere partibus spatii; improprie verò, est spatio comprehendi: hoc, non autem illo modo, Patres in argumento laudati sumpserunt verbum, *Circumscribi*. Ratio est, quia sic locuti sunt, ut probarent immensitatem, non angelis, sed Deo soli convenire: ac ad id probandum satis erat argumentum desumptum ex eo, quòd quælibet creatura, ipse etiam

Angelus, loco comprehendatur, id est, ita sit in uno loco, ut non sit alibi.

CONCLUSIO 2. Angeli sunt in loco definitivè.

Probatur. Ex observatis, rem esse definitivè in loco, est eam certo spatio ita contineri, ut non sit alibi, seu, est loco comprehendi: atqui Angeli certo spatio ita continentur, ut non sint alibi: & in hoc differunt à Deo, qui, cum sit immensus, nullo spatio, nullo loco comprehenditur.

Objicies 1. Unus Angelus potest divinitus simul esse pluribus in locis: atqui quod, etiam divinitus, potest esse pluribus in locis, non est in loco definitivè: siquidem esse in loco definitivè, est rem ita in esse uno loco, ut non sit alibi: ergo, &c.

Resp. conc. maj. neg. min. Ad cujus probationem, dist. ant. Est rem ita esse in uno loco, ut non sit alibi, spectatâ virtute naturali, conc. ant. spectatâ virtute supernaturali, neg. ant. Hâc tantum virtute, non autem illâ, Angelus potest esse pluribus in locis.

Objicies 2. Si unica tantum in orbe esset hostia consecrata, Corpus Christi ita esset in uno loco, ut non esset alibi: & tamen ex theologis, non esset definitivè sub speciebus panis: ergo quamvis Angelus ita sit in uno loco, ut non sit alibi, non sequitur, quod sit in loco definitivè.

Resp. conc. ant. neg. conseq. Ratio disparitatis, est, quia existit aliquid in orbe, ratione cujus Corpus Christi multiplicari possit: nempe est substantia panis, quæ ubicumque reperta fuerit, potest per evangelica verba, *Hoc est corpus meum*, in Christi Corpus transsubstantiari: at nihil est, ratione cujus Angelus constitui possit pluribus in locis: unde mirum non est, quod Angelus, non autem corpus Christi, sit in loco definitivè.

## ARTICULUS IV.

*Per quid Angeli sint in loco.*

*Not.* 1. **S**Tatus quæstionis est, quænam sit forma, per quam Angelus in loco constituitur: quemadmodum quando quæritur, per quid sol calefaciat, status quæstionis est, quænam sit forma, per quam sol effectum illum operatur.

*Not.* 2. Circa quæstionem eo, quo dictum est, modo propositam, duplex est scholasticorum sententia. Scotistæ post Subtilem Doctorem passim asserunt, Angelum constitui in loco per suam essentiam prout à spatio indistantem; unde cum ab eis quæritur, quid sit, angelum esse in loco, respondent esse, ipsius essentiam à spatio non distare. Thomistæ e contra post Angelicum Doctorem docent, Angelum constitui in loco per operationem ad extra; in eâ autem operatione duo sunt, applicatio nimirum angelicæ virtutis ad aliquod corpus, & effectus qui in corpore sequitur ex ejusmodi virtutis applicatione; eâ ferme ratione quâ in tractu navis, applicatio virtutis ex parte trahentium, distinguitur ab actuali navis tractu: nec enim toties navis movetur loco, quoties quis per suæ virtutis applicationem, illam trahere conatur.

**CONCLUSIO I.** Angeli non constituuntur in loco per suam essentiam.

Probatur. Angeli per id non constituuntur in loco, quod per se est indifferens ad hunc aut illum locum: scilicet id per quod res aliqua constituitur in loco, debet eam determinare, ut sit in uno loco potius quàm in alio: atqui (ut patet) Angelorum essentia per se est indifferens, ut sit in uno loco potius quàm in alio.

Nec valet, quod nonnulli respondent, essentiam Angeli determinari ad locum per essentiam,

non quidem absolutè sumptam, sed prout est indistans à loco. Non valet (inquam) nam indistans satis non est, ut res sit in loco; siquidem res non est in loco nisi per contactum, hoc est, nisi tangat locum, in quo dicitur esse: sed indistans non efficit, ut res locum tangat; locus enim non tangitur, nisi aut per quantitatem, aut per virtutem locati: ergo cum in adversariorum suppositione, Angelus locum non tangat, aut per quantitatem, aut per virtutem, reverà illum minimè tangit, ac proindè non est illi præfens.

CONCLUSIO 2. Angeli sunt in loco libero per operationem ad extra.

Probatur 1. iis omnibus argumentis, quibus hujusce operis tom. 1. ostensum est, Deum esse formaliter in loco per operationem ad extra; hoc est, operationem ad extra esse formam, per quam Deus constituitur in loco.

Probatur 2. Res non est in loco, ut mox observatum est, nisi per contactum: atqui contactus in Angelis non est, nisi per virtutem, seu per operationem ad extra: ergo, &c.

Probatur 3. Per id solum Angelus est in loco libero, per quod potest absolvi ab omni loco, seu existere sine omni loco: atqui per solam operationem ad extra, Angelus potest absolvi ab omni loco libero, seu loco in quo non sit violenter: ergo per solam operationem ad extra constituitur in loco libero. Minor propositio est evidens; neque enim est aliquid aliud præter operationem ad extra, quod Angelus pro libito possit aut ponere aut tollere. Itaque major, in quâ difficultas est posita, hisce momentis ostenditur. *Primò*, Angelus potest se ipsum ab omni loco absolvere: *Nihil prohibet*: (inquit S. Thomas quæst. 3. de potentia, art. 19. ad 2.) *Angelos non esse in loco, si voluerint*: ergo Angelus per id constituitur in loco, per quod potest absolvi ab omni loco. *Secundò*, Angeli creati potuerunt ante mundum hunc

cor-



corporeum ; imò ( ut superius dictum est ) reverà , secundùm aliquos Patres , creati sunt ante mundum : atqui in illâ suppositione non esset aliquis locus : ergo angeli , absolutè loquendo , possunt absolvi ab omni loco .

CONCLUSIO 3. Angelus est in loco violento per passionem ortam à causâ efficiente extrinsecâ .

Probatur . Per id angelus est in loco violento , per quod exteriori corpori invitus conjungitur : atqui per passionem ortam à causâ extrinsecâ invitus exteriori corpori conjungitur ; sic nonnulli dæmones per passionem ab igne tartareo , inviti sunt in inferis : ergo pravi angeli sunt in loco violento per passionem .

Objicies 1. Per id angelus non constituitur in loco sibi naturali , quod supponit , angelum jam esse in loco : atqui operatio ad extra supponit angelum jam esse in loco ; scilicet operari sequitur esse : ergo angelus non est in loco sibi naturali per operationem ad extra .

Resp. ad 1. conc. maj. neg. min. Ad 2. dist. ant. Operari sequitur esse sumptum absolutè , conc. ant. sumptum in ordine ad locum , subdistinguo , in agentibus corporeis , conc. ant. in agentibus spiritualibus , neg. ant. Ratio est , quia agentia corporea sunt in loco per quantitatem , seu dimensionem , quia per eam replent locum , seu variis loci partibus correspondent ; unde mirum non est , quòd eorum præsentia in loco , præsupponatur operationi ad extra : è contra verò agentia spiritualia , cum non habeant quantitatem , per quam eorum substantia , loci partibus correspondeat , non tangunt locum , nisi per virtutem , seu actionem quam in eum exe-runt .

Objicies 2. Si Angelus esset in loco per operationem ad extra , existerè posset absque omni loco : nempè cum operatio ad extra sit libera ,

Angelus posset ab omni operatione externâ temperare : sed Angelus non potest existere absque omni loco ; nam ens creatum existens dicit esse quod sit alicubi, cum dicat esse limitatum : ergo, &c.

Resp. ad 1. conc. maj. neg. min. Ad 2. neg. ant. Ad 3. dist. ant. Ens creatum existens dicit esse limitatum termino essentiaë, quæ est finita, conc. ant. termino loci, neg. ant. *Ad quartum dicendum* ( ait S. Thomas in 1. Sent. dist. 37. quæst. 3. art. 1. ) *quod hoc non reputo inconveniens, quod Angelus possit esse, & non in loco, quando nullam operationem circa locum habet; nec est inconveniens, ut tunc nusquam, vel in nullo loco esse dicatur; sicut etiam non est inconveniens, quod nullo colore coloratus dicatur.*

Objicies 3. In sententiâ quæ asserit, Angelos esse in loco per operationem ad extra, non potest explicari, quomodo Angeli sancti sint in cœlis; quâ ratione animæ Sanctorum qui ante Christi adventum obierant, in lyngo esse dicerentur: neque enim Angeli quidquam externum in cœlis operantur; aut operatæ sunt animæ, quæ lyngo ante Christi adventum detinebantur: nec in ægypti deserto dæmon Asinodæus, ubi Tobiaë 8. alligatus fuerat à Raphaelæ.

Resp. neg. ant. Nam dici potest 1. Angelos, cum præfecti sint rerum omnium corporearum administrationi, per aliquam operationem non-nihil conferre ad externum cœli empyrei ornatum, quamvis id nos lateat, quod illius respectu conferunt; nec id mirum est, cum ipsiusmet empyrei cœli qualitates nobis ignotæ sint. Dici potest 2. animas Sanctorum, quæ quondam lyngo concludebantur, fuisse in loco, non quidem per actionem aliquam, sed per passionem: licet enim non cruciarentur, tamen patiebantur sui detentionem à causâ extrinsecâ, Deo nimirum. Ratio autem disparitatis, quæ inter Angelos beatos, & ani-

animas de quibus agitur, reperiebatur, desumpta erat ex eo, quòd Angeli beati, in cœlis existentes, loco sibi connaturali fruerentur; animæ verò Patriarcharum erant in loco violento, aut saltem præternaturali. Verùm (ut superius dictum est) substantia spiritualis in loco sibi connaturali, seu in quo vult esse, constituitur per operationem ad extra, cum è contra in loco sive violento, sive præternaturali, per passionem ortam ab aliquâ causâ extrinsecâ, constituatur. Verùm in his similibusve explicandis usurpare licet hanc Augustini lib. 2. de Trinitate, capite 10. sententiam: *Quemadmodum hæc faciant Angeli*, (de miraculis loquitur) *vel potius quemadmodum Deus hæc faciat per Angelos suos*, nec oculorum acie penetrare, nec fiducia rationis enucleare, nec propectu mentis comprehendere valeo, ut tam certus loquar ad omnia, quæ requiri de his rebus possunt, quàm si essem Angelus, aut propheta, aut apostolus. Dici potest 3. cum Estio, mysticè intelligi debere, quæ de Asmodæo dicuntur Tobie 8.

Objicies 4. Angeli custodes semper sunt propè clientes suos, & tamen semper circa illos non operantur exteriùs: ergo Angeli custodes non sunt in loco per operationem ad extra.

Resp. 1. neg. ant. scilicet innumera sunt, tum salutis, tum vitæ corporeæ pericula, è quibus Angeli custodes, suos clientes sine intermissione liberant. Resp. 2. negando, Angelos custodes semper esse propè suos clientes: interdum enim sunt in cœlo; idque non impedit, quin etiam tunc sint clientium suorum custodes. Ratio est, quia licet tunc circa clientes nihil operentur exteriùs; ad eos tamen virtutem suam dirigunt, hoc est, parati sunt eis, cum opus fuerit, opitulari: unde tunc non habent quidem ad clientes relationem rei locatæ ad locum, sed habent ordinis relationem. Desumpta est illa solutio ex S. Thomâ, nempe 1. p. q. 113. art. 6. ad 3. sic loquitur: *Angelus licet*

*interdum derelinquat hominem loco, non tamen derelinquit eum quantum ad effectum custodiæ, quia etiam cum est in cælis, cognoscit, quid circa hominem agatur, nec indiget mora temporis ad motum localem, sed statim potest adesse.*

Objicies 5. Si Angelus esset in loco per operationem, posset esse simul in pluribus locis, etiam à se invicem distantibus; imò simul in cælo & in terrâ: siquidem pluribus iis in locis aliquid exterius simul operari potest, ut patet in angelo qui lib. 4. Regum cap. 19. centum octoginta quinque millia hominum percussit: atqui consequens est absurdum: ergo, &c.

Resp. dist. ant. Angelus posset esse pluribus in locis inadæquatis, conc. ant. adæquatis, neg. ant. Locus adæquatus est actio externa quæ exhaurit totam agendi virtutem, quæ reperitur in angelo; inadæquatus verò est actio quæ non exhaurit totam illius agendi virtutem. Hincque pater, angelum naturaliter non posse esse in pluribus locis adæquatis; nam ex suppositione quòd in uno loco aliqua actio externa exhauriat totam illius agendi virtutem, angelus naturaliter non potest in alio loco operari; econtra verò, cum per unam actionem illius virtus non exhauritur, nihil impedit, quin in alio loco operetur; ac proindè quin in illo loco existat. Verùm cum angeli virtus sit finita, non potest ubique operari: imò nec in spatio, quod non est intra sphæram activitatis illius: cujusmodi verò sit illud spatium, petitur ex majori vel minori angelorum virtute, quæ nonnunquam extendit se ad domum, nonnunquam ad civitatem, aliquando ad provinciam & regnum. Sed hæc satis sint de iis, similibusve quæstionibus. Qui de iis plura nosse voluerit, S. Thomam 1. p. q. 53. ejusque commentatores Sylvium & alios poterit consulere.

## CAPUT IV.

## De motu, &amp; locutione Angelorum.

CONCL. I. **A**ngeli moventur localiter.

Probatur. Scripturæ motum localem Angelis adscribunt; siquidem tribuere ascensum, descensum, circuitum, itineris confectionem, est motum localem adscribere: ea enim motus localis ideam complectuntur, seu derelictionem termini, *A quo*, & progressum ad terminum, *Ad quem*: atqui Scripturæ ea omnia tribuunt Angelis: nempe Matthæi 28. hæc habentur: *Angelus autem Domini descendit de cælo*. Hæc etiam Lucæ 2. *Discesserunt Angeli à pastoribus in cælum*. Job 1. Satan hæc ait: *Circuivi terram & perambulavi eam*. Tobix 5. Angelus Raphael dicit: *Omnia itinera ejus frequenter ambulavi*.

Objicies. Moveri localiter, est successive correspondere variis partibus spatii: atqui id Angelis non convenit, cum quantitatem non habeant: ergo motus localis, saltem propriè, eis minimè convenit.

Resp. dist. maj. Moveri localiter, est successive correspondere variis partibus spatii, in rebus corporeis, conc. maj. in rebus spiritualibus, ut sunt Angeli, neg. maj. Duplex est species motus localis, etiam propriè sumpti: Prior quæ solis corporibus convenit, posita est in eo quod mobile variis spatii partibus correspondeat: posterior, quæ spiritibus est propria, posita est in eo quod mobile aut continuè aut successive in variis spatii partibus operetur.

Quæres, utrum Angelus possit ab uno extremo ad aliud extremum moveri impertransito medio.

Resp. affirmativè. Ratio est, quia motus Angelis positus est in illius operatione ad extra: porro  
An-

Angelus potest operari in uno spatii extremo quamvis nec in alio extremo, nec in medio operetur; ac proinde ab uno extremo moveri potest in aliud, impertransito medio.

CONCLUSIO 2. Angeli inter se colloquuntur.

Probatur 1. ex Scripturâ: Loqui, est internam cogitationem alteri per aliquod signum manifestare: atqui Angeli id præstant. Nam 1. hæc leguntur Isajæ sexto: *Seraphim clamabant alter ad alterum.* Judas Apostolus in epistolâ suâ canonicâ refert Michaelis cum diabolo circa Moy-sis corpus contentionem: at contentio inter spiritus esse non potest, nisi contendentes sibi invicem quibusdam mediis suas cogitationes manifestent. Apostolus linguam Angelis tribuit: *Si* (inquit 1. ad Corinth. 13.) *linguis hominum loquar & Angelorum, charitatem autem non habeam, factus sum velut æsonans: ergo Apostolus docuit, mutuam esse inter Angelos colloquium.* Chrysostomi est argumentum illud; sic enim in eum Pauli locum loquitur: *Linguam Angelorum hic appellat, non corpus Angelis attribuens, sed ejusmodi est quod ait: Quamvis ita loquar, ut Angeli inter se colloquuntur.* Eadem est Theophylacti in eundem locum sententia: *Angelis porro lingua est intellectiva, (ait) vis nimirum illa, qua sibi mutuò divinarum rerum intellectum, ac divinas cogitationes impertiunt.*

Probatur 2. ratione: Qui perfectam inter se societatem habent, sibi invicem mutuò loquuntur: id enim necessariò videtur exigere perfectio societatis: sed Angeli perfectam inter se societatem habent: nempe cœlestis Jerusalem præcipui sunt cives; respublica cœlestis ex Angelis præcipuè componitur.

Quæres, quomodo Angeli inter se loquantur.

Resp. Angelorum loquendi modum positum esse 1. in eo quòd Angeli cogitationes ad se invicem dirigant; 2. in eo quòd Deus ex impositâ sibi

sibi lege excitet in Angelo ideam cogitationis quæ ad ipsum ab alio Angelo directæ fuit : *Ex hoc* ( inquit Sanctus Thomas 1. p. quæst. 107. art. 1. ) *quod conceptus mentis angelicæ ordinatur ad manifestandum alteri voluntatem ipsius Angeli, conceptus mentis unius Angeli innotescit alteri: & sic loquitur unus Angelus alteri. Nihil est enim aliud loqui ad alterum, quam conceptum mentis alteri manifestare.*

Ex iis quæ mox dicta sunt de modo loquendi Angelorum, colligitur 1. localem distantiam non impedire, quin Angeli custodes qui in terris versantur, cum iis colloquantur qui sunt in cælis. Colligitur 2. unius Angeli colloctionem cum altero, ceteris Angelis non innotescere; non enim ( ut supponitur ) Angelus ille sibi proponit, suas cogitationes omnibus manifestas facere.

## C A P U T V.

### *De missione Angelorum.*

*Not.* **H**ic nomine missionis intelligitur processio à Deo per imperium ad aliquem effectum producendum. De eâ verò missione quæremus 1. utrum Angelis conveniat; 2. an Angeli ex omnibus ordinibus mittantur; 3. utrum quilibet homo habeat Angelum sui custodem; 4. utrum pariter adsit cuique Angelus malus.

## A R T I C U L U S I.

### *Utrum missio conveniat Angelis.*

**C O N C L.** **M**issio convenit Angelis. Probatur. Ex observatis, missio, in creatis, est processio à Deo per imperium ad aliquem effectum producendum: atqui ejusmodi processio convenit Angelis: scilicet Angeli  
tum

tum in veteri testamento, tum in novo sæpius, jussi sunt, aut ministeria sua hominibus exhibere, aut quæ ventura erant, prænuntiare: Exodi 33. sic Deus Moyſi loquitur: *Mittam præcurſorem tuum Angelum.* Tobix 12. Raphael ait: *Tempus est, ut revertar ad eum qui me miſit.* Lucæ 1. *Miſſus est Angelus Gabriel à Deo.*

Quæres, utrum Angeli qui sua ministeria hominibus exhibent, dici possint hominum ministri.

Resp. negativè. Ratio est, quia Angeli nusquam in Scripturis dicuntur hominum ministri, sed Dei tantum: unde Angelus qui Apocalyp. 19. & 22. suum ministerium exhibuit Joanni, se ipsum non vocavit Joannis servum, sed conservum: nec ii qui Danielis 10. regnorum curam agunt, dicuntur regnorum servi, imò principes regnorum appellantur: *Princeps autem regni Persarum* (verba sunt Angeli Daniëlem alloquentis) *restitit mihi viginti & uno diebus: & ecce Michael unus de principibus venit in adjutorium meum, & ego remansi ibi juxta Regem Persarum.* 2. Patres (ut patet ex Leone Magno serm. 2. de quadragesimâ) ex his Euangelii verbis Matthæi cap. 4. *Angeli accesserunt, & ministrabant ei,* concludunt, Christum esse Deum, supponentes, Angelos non creaturis sed Deo soli servire. 3. Licet Pastor gerat ovium curam, non dicitur tamen servus ovium, sed heri, cujus sunt oves: ita quamvis Angelis commissa sit hominum cura, dici nihilominus non debent hominum servi, sed Dei tantum, à quo missi sunt: Hincque concluditur, quòd cum Bernardus serm. xi. in Psalmum, *Qui habitat,* Angelos vocat hominum ministros, intelligi non debeat de ministerio subjectionis, sed de ministerio laboris & operis.



## ARTICULUS II.

*Virum Angeli ex omnibus ordinibus mittantur.*

CONCL. **P**robabilius est, Angelos non ex ordinibus infimis tantum, sed ex omnibus, mitti ad hujus universi regimen, & ad hominum tutelam.

Probatur. Nullus est Angelorum ordo, ex quo ad hujus universi regimen & ad hominum tutelam non mittantur Angeli: ergo non ex infimis tantum, sed ex omnibus ordinibus mittuntur. Probatur ant. Apostolus ad Hebræos cap. i. scribit, *omnes* Angelos mitti propter homines: *Nonne omnes* (ait) *sunt administratorii spiritus in ministerium missi propter eos, qui hæreditatem capiunt salutis?* atqui per vocem illam, *Omnes*, Apostolus intelligit omnes prorsus Angelorum ordines: cum enim illa vox, *Omnes*, universalitatem aliquam importet, de universalitate saltem ordinum intelligi debet.

Confirmatur argumentum ex scopo, quem eò loci Paulus sibi proponit. Intendit nimirum probare, Christum dignitate ac naturâ superare creaturas omnes, ipsos etiam Angelos, qui principem inter creaturas locum obtinent; id verò probat ex eo, quòd Angeli tanquam Dei ministri mitti dicantur propter eos qui hæreditatem capiunt salutis; Christus è contra non minister, sed Dei Filius appelletur: at corrueret illud argumentum, si vel unus esset ordo, ex quo Angeli ad homines non mitterentur: nempè dici posset, aliquos esse Angelos, eos scilicet qui sunt ex superioribus ordinibus, qui tanquam Dei ministri non sunt missi propterea eos qui hæreditatem capiunt salutis; ac proinde Christum illis supremorum ordinum Angelis non esse superiorem.

Con-

Confirmatur 2. Non est potior ratio, cur de omnibus Angelorum ordinibus non intelligatur vox, *Omnes*, quam in hâc sententiâ: *Nonne omnes sunt administratorii spiritus, &c.* Paulus adhibe, quàm in his aliis, quibus eodem capite sæpiùs utitur: *Adorent eum omnes Angeli Dei. Ad quem Angelorum dixit aliquando: Sede à dextris meis, &c.* atqui in istis, vox, *Omnes*, vox, *Angelorum*, de omnibus Angelorum ordinibus intelliguntur; nullus enim est ordo qui Christum non adoraverit: ergo & in illâ sententiâ, *Nonne omnes sunt, &c.* vox *Omnes*, de omnibus omninò ordinibus intelligi debet.

Confirmatur 3. ex Patribus, qui non semel Apostoli locum de quo est quæstio, de omnibus omninò Angelorum ordinibus exposuerunt. Gregorius Nyssenus lib. 1. contra Eunomium de Seraphim illis agens, qui apud Isajam trisagium hymnum canunt, docet eos esse Dei ministros, qui propter salutem eorum qui salvantur, emittuntur. Bernardus in Sermone de S. Benedicto, neminem debere otio torpere, colligit ex eo, quòd ipsi Cherubim, licèt Deo adstantes, agant tamen nostri curam, mittanturque ut hominum salutem procurent: *Cherubim, ait Propheta, stabant & non sedebant: quid laborasti ut jam sedeas? Omnes administratorii sunt spiritus missi in ministerium, propter eos qui hereditatem capiunt salutis.* Vide de eodem argumento Cyrillum in secundo libro de Rectâ Fide ad Reginas; Hieronymum in sextum Isajæ caput; Chrysostomum in caput primum epistolæ ad Hebræos.

Objicies 1. Gregorius Magnus lib. 17. Moraliū cap. 9. in hæc Danielis cap. 7. verba: *Millia millium ministrabant ei, & decies millies centena millia assistebant ei*, docet, Angelos non mitti ex omnibus ordinibus: sic enim loquitur: *Aliud est assistere, aliud ministrare. Assistunt enim illæ procul dubio potestates, quæ ad quædam hominibus nuntianda non exeunt: Ministrant verò hi*  
qui

qui ad explenda officia nuntiorum veniunt. Sed tamen ipsi quoque contemplatione ab intimis non recedunt. Et quia plures sunt qui ministrant, quàm qui principaliter assistunt, assistentium numerus quasi definitus, ministrantium verò infinitus ostenditur. Ergo, &c.

Resp. dist. ant. Gregorius Magnus docuit, Angelos quos adstantes vocat, non mitti, ipsique contradicunt alii Patres, conc. ant. & illi non contradicunt alii Patres, neg. ant. Nam Athanasius Oratione tertiâ contra Arianos scribit, infinita millia Deo assistere ministrorum, qui parati sunt ut mittantur. Hieronymus in caput 33. Job, docet, Angelum quemlibet de cælo assistentem ante faciem Dei, ad hominum utilitates à Deo mitti. Tota ratio, cur nonnulli negarunt, Angelos assistentes mitti ad ministeria hominibus exhibenda, petitur ex eo, quòd arbitrati sint vocem, Assistere, significare præsentiam quæ ministerium excludat: sed falsus est ille sensus; scilicet Assistere, idem est ac Præsto esse, seu exhibere se paratum ad recipienda exequendaque principis mandata: undè in Scripturis plures ex Angelis qui Assistentes appellantur, leguntur ad homines missi. Raphael, qui Tobix 12. fatetur se unum esse ex septem qui adstant ante Deum, infima quæque obsequia Tobix exhibuit. Gabriel qui Lucæ 1. sic loquitur: Ego sum Gabriel qui adsto ante Deum, ad Zachariam, dum Sacris daret operam, missus est. Michael qui Danielis 10. vocatur, unus de principibus primis, & c. 9. princeps magnus, missus est ad ferendam opem. Tandem Seraphim qui omnium supremi habentur, licèt Deo assistant, mittuntur tamen, Hieronymo teste: nempe epist. 142. quæ est ad Damasum, refert cujusdam opinionem quâ id asseritur, eamque minimè rejicit: *Quidam Græcorum in Scripturis optimè eruditus* (ait) *Seraphim virtutes quasdam in calis esse exposuit, quæ ante tribunal Dei assistentes, laudent eum, & in diversa ministeria mittantur.*

Ob-

Objicies 2. Ratio præcipua, propter quam asseritur, Angelos ex omnibus ordinibus ad homines mitti, petitur ex his Apostoli verbis ad Hebræos 1. *Nonne omnes sunt administratorii spiritus in ministerium missi propter eos, qui hæreditatem capiunt salutis?* Sed id ea verba non probant; siquidem non aliud significant, quam quòd Lex Nova in eo præcellat Veteri, quòd ista data sit per ministerium Angelorum, abstrahendo, an illi Angeli fuerint ex supremis, an infimis ordinibus: e contra Lex Nova à Christo data fuerit: ergo, &c.

Resp. ad 1. conc. maj. neg. min. Ad 2. neg. ant. seu negatur, Apostolum de lege veteri loqui; loquitur enim de Christo, quem probare vult Deum esse, eo quòd in Scripturis appelletur Filius Dei, cum e contra Angeli omnes sint administratorii spiritus, missi propter eos qui hæreditatem capiunt salutis. Confirmatur ex eo, quòd in toto illo priore capite epistolæ ad Hebræos ne verbum quidem sit de lege veteri, sed totum est in asserendâ Christo divinâ filiatione.

### A R T I C U L U S III.

*Utrum quilibet homo habeat Angelum sui custodem.*

Not. **H**omo vel est fidelis, vel infidelis: uterque potest considerari vel ut est particularis persona, vel prout reipublicæ aut societatis membrum: expendendum est igitur, utrum homo variis illis modis consideratus, habeat Angelum sui custodem.

CONCLUSIO I. Quilibet fidelis habet Angelum sui custodem.

Probatur. Jacob habuit Angelum sui custodem: *Angelus* (inquit Gen. 48.) *qui eruit me de cunctis malis*. Idem quoque dici debet de Judithâ: *Custodivit me* (ait cap. 13.) *Angelus ejus*.  
Adeste

Adesse pariter cuique parvulo, probant hæc Christi verba, Matthæi 18. *Angeli eorum semper vident faciem Patris mei qui in cælis est.* Dum Ecclesia Christi adhuc erat in incunabulis, omnium mentem pervaserat illa sententia, quod quisque fidelis Angelum haberet sui custodem: id enim evincitur ex eo quod Actorum 12. fideles, Petro januam pulsante, dixerint: *Angelus ejus est.* Unde sic arguitur. Idem de quolibet fidei, saltem iusto, ferri debet iudicium, ac de Jacobo, Judithâ, parvulis innocentibus, Petro: atqui ii omnes (ut patet ex laudatis textibus) habuerunt Angelum sui custodem: ergo, &c.

Confirmatur ex Patribus. Chrysostomus in caput 18. Matthæi sic loquitur: *Hic manifestum est, quia omnes sancti Angelos habeant.* Sic etiam Basilius in Psal. 48. *Cuiuslibet fidelium est Angelus assistens.*

Quæres, utrum sit de fide, cuique fidei ac electo Angelum custodem adesse.

Resp. negativè: neque enim id unquam Ecclesia aperte definiit, nec evidens est unanimis eâ de re Patrum sententia. Verùm temeraria esset propositio quæ id negaret, cum plures Patres affirmativam propositionem ex Scripturâ collegerint: *Valdè probabile est, (inquit Estius) unumquemque hominem, præsertim fidelem & electum, habere deputatum sibi peculiarem Angelum bonum, velut custodem, ducem ac directorem inter tot pericula tam animi quàm corporis, quibus hæc vita plena est: Etenim id est Scripturis admodum consentaneum, & sententiis Patrum celebratum.*

CONCLUSIO 2. Multum probabilis est sententia quæ asserit, omnibus hominibus, etiam infidelibus, adesse Angelum custodem.

Probatur. Plures ex S. Patribus sententiam, de quâ in conclusione, docuerunt. Hieronymus in caput 13. Matthæi, sic loquitur: *Magna dignitas animarum, ut unaquæque habeat ab ortu suæ nati-*

ceps erat regni Græcorum, sic Daniele allo-  
cutus est: *Princeps regni Persarum restitit mihi  
viginti & una diebus, & ecce Michael unus de Prin-  
cipibus primis venit in adiutorium meum, & ego  
remanſi ibi juxta regem Persarum.*

Probatur 2. Basilius de Angelis agens: *Alii  
ipſorum (inquit) gentibus præpoſiti ſunt, alii fide-  
lium ſingulos conſequuntur.* Theodoretus quæ-  
ſtione 3. in Genefim: *Cuique genti (inquit)  
Angelum præſſe, affirmat Scriptura.* Idem docet  
Ambroſius lib. 3. de Virginitate, Damascenus  
lib. 2. de Fide Orthod. cap. 2. multique alii  
veteres.

Quæres, quid officii ab Angelis cuſtodibus  
hominibus exhibeatur.

Reſp. 1. Angelos cuſtodes periculis ac malis  
imminentibus homines liberare: *Angelus (inquit  
Jacob Genefis 48.) qui eripuit me de cunctis malis.*  
2. Impediunt, ne dæmones hominibus noceant,  
ut patet ex cap. 6. & 8. Tobix. 3. Pias cogita-  
tiones ſuggerunt, Exodi 23. Judith. 13. Actor. 5.  
Tandem preces noſtras offerunt Deo ſuaſque, ipſi  
noſtris conjungunt, Auguſtino teſte, epiſt. 121.  
Bernardo, Serm. 3. ſuper, *Miſſus eſt*, & Serm. 7.  
ſuper Cantica.

## ARTICULUS IV.

*Utrum homo quilibet habeat Angelum  
malum.*

Not. **S**Tatus quæſtionis eſt, utrum ſicut quilibet  
homo ad ſui cuſtodiam habet Angelum  
bonum, ita etiam ad exercitium habeat Angelum  
malum.

CONCLUSIO. Quilibet homo non habet  
Angelum malum, à quo aut ad peccatum provo-  
cetur, aut in naturæ fortunæque rebus detrimen-  
tum patiatur.

Pro-

Probatur. Homo vel est reprobis, vel electus: atqui nec reprobis, nec singulis electis, adest Angelus malus. Nam 1. idè Angelus malus reprobis deputatus esset, ut eos provocaret ad peccatum: sed ad id necessarius non est, plures enim sunt è reprobis, qui dæmoni voluntariè serviunt, cum in omnibus, pravis concupiscentiæ desideriis obsequantur. 2. Frustrà dæmon aliquis cuique electo divinitus deputatus fuisset, cum dæmones omnes multum proclives sint ad tentandum electos, semperque præsto sint, ut eis noceant. 3. Cum (Jacobo teste in epistolâ Canonicâ) Deus neminem tentet, non convenit, per illius providentiam hoc agi, ut cuilibet homini tentator provideatur. 4. Quæ conclusioni adversatur sententia, nec Scripturâ, nec Patribus nititur; imò traxisse videtur originem à gentilibus; qui duos genios, alterum bonum, & alterum malum, cuique homini destinatos esse voluerunt.

Objicies 1. Decet Dei providentiam, ut electos suos probet; ut in eos & in reprobos ob præterita peccata sæviat: sed ad id necessarium est, ut Angelus malus cuique homini destinatus sit: ergo, &c.

Resp. conc. maj. neg. min. Ratio est, quia ut Deus suos electos probet, eosque ob peccata castiget, non est opus, ut per ipsum tentator illis provideatur; sed satis est, ut aut dæmoni qui ad nocendum homini maximè proclivis est, tentandi facultatem faciat, aut permittat hominem obsequi innatæ sibi concupiscentiæ, quæ perpetua est illius tentatio, ipsique dominatur, nisi contrariâ boni cupiditate superetur.

Objicies 2. Nonnulli è veteribus docuerunt cuilibet homini destinatum esse divinitus Angelum malum: id enim scripserunt Origenes hom. 12. in Lucam, Cassianus collatione 13. cap. 12. Magister Sentent. & post ipsum nonnulli alii auctores: ergo, &c.

Resp.

Resp. dist. ant. Et Origeni, Cassiano, Magistro Sentent. non assenserunt alii Patres, conc. ant. & assenserunt alii Patres, neg. ant. Præterea Origeni non multum fidei debetur, cum non solum in hoc capite, sed etiam in pluribus aliis quæ maximi sunt momenti, multos errores defende- rit. Quod ad Cassianum pertinet, Prosper lib. 3. contra Collatorem cap. 27. dogma de quo agitur in ipso arguit.

Objicies. Quilibet homo habet Angelum bonum sui custodem: ergo & Angelum malum sui inimicum.

Resp. neg. conseq. Ratio est, quia decuit, ut Deus, cum sit summè bonus, salutis acquirendæ media, non autem impedimenta, hominibus provideret.

## Q U Æ S T I O V.

### *De merito Angelorum.*

Not. **Q**Uæremus hîc 1. utrum Angeli merue- rint; 2. quid & per quid merue- rint.

CONCLUSIO I. Angeli sancti reverà me- ruerunt.

Probatur. Illi meruerunt, in quibus fuerunt conditiones omnes ad meritum requisitæ: atqui fuerunt in angelis; scilicet ad meritum, ex parte operantis requiritur, ut sit liber, viator, in statu gratiæ sanctificantis; ex parte verò operis, ut sit bonum tum ratione objecti, tum ratione finis; requiritur præterea, ut fiat ex motu gratiæ actua- lis: atqui eæ omnes conditiones fuerunt in Ange- lis. Nam 1. erant liberi: neque enim ex necessitate determinati erant ad alicujus actûs sive speciem, sive exercitium; unde nonnulli peccarunt, alii verò steterunt. 2. Licet Angeli creati fuerint beati



beatitudine inchoatâ, quæ posita est in imperfectâ Dei cognitione & imperfecto illius amore ; non fuerunt tamen ( ut superius dictum est ) creati in statu beatitudinis consummatæ, quæ in intuitivâ Dei cognitione consistit, ac proindè aliquandiu fuerunt in viâ, nec semper in termino .

3. Gratiâ sanctificante ( ut jam suo loco probatum est ) donati fuerunt: Potuerunt elicere actum obedientiæ, fidei, spei, & charitatis: ergo penes ipsos fuit efficere opera quæ bona essent, tum ratione objecti, tum ratione finis: Ad ea autem opera efficienda præsentem habuerunt gratiam actualem, ut in tractatu de Gratiâ dicitur: ergo in Angelis fuerunt omnes conditiones ad merendum requisitæ.

CONCLUSIO 2. Angeli meruerunt augmentum gratiæ sanctificantis, & beatitudinem supernaturalem, quæ posita est in intuitivâ Dei cognitione.

Probatur 1. Homo viator per actus supernaturalis ordinis meretur utrumque, gratiæ scilicet augmentum, & beatitudinem supernaturalem: ergo & utrumque Angelus meritus est. 2. Id meruit Angelus, quod fuit præmium illius in bono perseverantiæ: atqui beatitudo supernaturalis fuit huiusmodi, Augustino teste, qui lib. de Correp. & Gratiâ cap. 11. sic loquitur: *Angeli sancti, cadentibus aliis per liberum arbitrium, per idem liberum arbitrium steterunt ipsi: & huius mansionis debitam mercedem recipere meruerunt, tantam scilicet beatitudinis plenitudinem, qua eis certissimum sit, semper se in illa mansuros.* Eâdem ratione S. Doctor loquitur lib. de dono persever. cap. 7. *Diabolo ( inquit ) cum suis cadente, in veritate steterunt, & ad securitatem perpetuam non cadendi, in qua nunc eos esse certissimi sumus, pervenire meruerunt.*

CONCLUSIO 3. Angeli non meruerunt æternam beatitudinem per opera illam subsequencia, sed per ea quæ eam præcesserunt.

Pro-

Probatur 1. autoritate Augustini, qui ( ut mox ostensum est ) conceptis terminis docuit Angelos per suam in bono perseverantiam meruisse beatitudinem æternam: 2. Per id meruerunt Angeli quod est via ad terminum; non autem per id quod terminum sequitur: atqui opera quæ præcesserunt beatitudinem, fuerunt via ad terminum, ipsam scilicet beatitudinem, non autem ea quæ beatitudinis adeptionem subsequuta sunt: ergo, &c.

Inde verò colligitur 1. Angelos non meruisse beatitudinem per gratiam, per quam in bono confirmati sunt; ea nimirum gratia non alia est quàm ipsius beatitudinis adeptio: quam Augustinus *magnam abundantiam charitatis* appellat. Nec obstat, quòd S. Thomas in 4. Sentent. dist. quintâ doctrinam contrariam propugnauerit: ab eâ nimirum recessit postea 1. p. q. 62. art. 4. in Corpore.

Colligitur 2. alienam esse à veritate sententiam Magistri Sententiarum, cui visum est, Angelos meruisse beatitudinem æternam per obsequia, quæ Deo circa homines exhibent, prout in præscientiâ divinâ priora fuerunt ipsâ beatitudinis adeptione: scilicet per absurdum est asserere quempiam à termino ad viam pervenire, cum e contra via sit medium, per quod terminus comparatur.

## Q U Æ S T I O VI

### *De primo Angelorum peccato.*

Nos. **I**N primo Angelorum peccato considerari possunt illius origo, species, auctores, poena: igitur operæ pretium est, ut de iis sermonem instituamus.

## CAPUT PRIMUM.

*Quæ fuerit origo primi peccati Angelorum.*

CONCL. **O**Rigo primi peccati in Angelis non fuerunt aut ignorantia mentis, aut passio cordis; sed sola voluntatis potestas.

Probatur prior pars. Illud non fuit origo, seu causa primi peccati in Angelis, quod in eis locum non habuit ante peccatum; nimirum causa debet esse prior effectu suo: atqui nec mentis ignorantia, nec passio cordis, locum habuerunt in Angelis ante peccatum; siquidem siue ignorantia, siue passio, mala quædam sunt, quæ naturam in quâ reperiuntur, miseram efficiunt: Sed ea quæ naturam efficiunt miseram, locum non habuerunt in Angelis ante peccatum, cum (ut sæpè docet Augustinus) sub Deo iusto nemo sit miser, nisi mereatur.

Probatur altera pars conclusionis 1. Patres angelorum arbitrio casum illorum adscribunt: *Angelis sanctis* (inquit Augustinus) *cadentibus aliis per liberum arbitrium, per idem liberum arbitrium steterunt ipsi*. Summa erat in Angelis arbitrii in differentia; nihilque omninò fuit extrinsecum, quod ad malum eos determinarit: ergo arbitrii libertas, sola fuit causa primi eorum peccati.

Objicies 1. Causa primi peccati in Angelis fuit inconsideratio, seu, angeli attenderunt ad rationes, propter quas seipsos diligere poterant, excellentiam nimirum naturæ sibi per creationem datæ, sed non attenderunt ad finem ultimum, ad quem suam excellentiam referre debuerunt: ergo non voluntatis potestas, sed potius inconsideratio mentis, fuit in Angelis origo primi peccati.

Resp.

Resp. neg. maj. Ratio est, quia inconsideratio de quâ agitur, fuisset inconsideratio privativa, seu non advertentia rei, quam Angeli potuissent & debuissent advertere; ac proindè illa inconsideratio fuisset peccatum; peccat enim peccato omissionis, qui ad rem non attendit, ad quam potest ac tenetur attendere; ergo illa inconsideratio non fuit origo, seu causa primi peccati in Angelis. Pretereâ si in Angelis inconsideratio locum habuerit, vel fuit involuntaria, vel voluntaria: Si primum, motus quidam inordinatus prævenire potuit Angeli innocentis voluntatem: sed id falsum est, alioquin enim concupiscentia, seu inordinatus amor creaturæ, locum in Angelis innocentibus habuisset. Si secundum, illa inconsideratio fuisset imperata à voluntate, & consequenter fuisset peccatum verè ac propriè dictum; non fuisset igitur causa primi peccati in Angelis; sed potius ipsa fuisset primum peccatum.

Objicies 2. Errant (ait Scriptura Proverborum 14.) qui malum operantur: ergo Angeli, cum peccaverint, errarunt: error igitur fuit causa primi eorum peccati.

Resp. dist. ant. Errant aut errore mentis aut errore cordis, qui malum operantur, conc. ant. errore mentis semper, neg. ant. Error prioris generis non magis locum habere potuit in Angelis innocentibus, quàm in Adamo ante suum lapsum, at in Adamo nondum lapso locum non habuisse, supponunt hæc Augustini verba lib. 3. de libero arbitrio, cap. 18. *Approbare falsa pro veris, ut quis errèt invitus, non est natura instituti hominis, sed pœna damnati*: at verò in eisdem Angelis locum habuit error posterioris generis: nempe error ille positus est in eo, quòd voluntas eligat objectum, quod lex vetat eligere: sed angeli ejusmodi objectum elegerunt, propriam nimirum excellentiam Deo rerum omnium fini ultimo prætulerunt.

Obijcies 3. Voluntas creata non fertur in malum, nisi intellectus in illo malo nonnullam boni rationem apprehenderit: non enim ( ut habet tritum apud philosophos axioma ) malum quâ malum potest amari: ergo Angelorum intellectus aliquam rationem boni apprehendit in primo peccato, cuius rei facti sunt: si autem eam boni rationem apprehendit, laboravit errore, cum à parte rei nulla esset boni ratio in peccato, quo se Angeli contaminarunt: ergo error, seu ignorantia, fuit origo primi eorum peccati.

Resp. ad 1. conc. totum argumentum, seu & antecedens & consequens: Ad 2. dist. ant. nulla erat ratio boni in peccato Angelorum sumpto secundum formale, conc. ant. sumpto secundum materiale, neg. ant. Peccatum Angelorum secundum materiale sumptum, fuit amor propriæ excellentiæ; is autem amor, in se bonus erat, scilicet naturæ rationali conveniens est, ut se ipsam diligat. Econtra peccatum Angelorum, sumptum secundum formale, fuit privatio debitæ rectitudinis, seu defectus relationis propriæ excellentiæ ad Deum tanquam ultimum finem; in eâ autem privatione non est à parte rei ratio boni, nec aliquam in eâ intellectus Angelicus apprehendit; unde deceptus non fuit, antequam peccaret: ac proinde deceptio, seu ignorantia, non potuit esse causa primi peccati, in quod Angelus incidit, sed sola illius voluntatis electio.

## C A P U T II.

*Cujus speciei fuerit primum peccatum Angelorum.*

CONCL. I. **P**rimum Angelorum peccatum fuit peccatum superbiæ.

Probatur 1. ex Scripturâ. 1. Id à quo omnis per-

perditio sumpsit initium, fuit primum peccatum Angelorum: nempe ab Angelorum peccato orta sunt mala omnia, ipsa etiam Adami prævaricatio; neque enim peccavit, nisi à dæmone per Evam tentatus: atqui omnis perditio sumpsit initium à superbiâ: *Superbiam* (ait Spiritus sanctus Tobix 4.) *nunquam in tuo sensu, aut in tuo verbo dominari permitte: in ipsa enim initium sumpsit omnis perditio.* 2. Isaix 14. sub figurâ regis Babyloniorum describitur primum angelorum peccatum: atqui peccatum, quod eò loci describitur, est superbia: *Detracta est ad inferos superbia tua: Quomodo cecidisti de calo lucifer, qui dicebas in corde tuo, In cælum conscendam, super astra Dei exaltabo solium meum?*

Probatur 2. ex Patribus. Chrysostomus hom. 15. in Joannem sic loquitur: *Neque in diabolum versus fuisset Angelus, nisi hoc se scelere (de superbiâ agit) coinquinasset.* Sic etiam Hieronymus Epist. 83. *Iudicium & ruina diaboli nulli dubium, quin arrogantia sit.* Augustinus docet his Psalmi 18. verbis: *Si mei non fuerins dominati, tunc immaculatus ero,* intelligi superbiam de quâ sic habet: *Hoc est delictum, quod dejecit Angelum, quod ex angelo fecit diabolum.* Bernardus in tractatu de modo benè vivendi, Serm. 37. hæc scribit: *Superbia radix omnium malorum, Angelos deposuit.* Ex iis textibus patet superbiam fuisse primum angelorum peccatum.

Probatur 3. rationibus. *Primò*, Superbia (Augustino teste lib. 14. de Civit. Dei, c. 13.) est inordinatus amor propriæ excellentiæ: atqui primum angelorum peccatum non aliud fuit, quàm ille inordinatus amor: *Ascendam in cælum* (ait prævaricator angelus Isaix 14. sub figura regis Babyloniorum) *similis ero Altissimo.* 2. Primum Angelorum peccatum fuit amor rei cuiusdam spiritualis; nec enim substantiæ spirituales possunt corporeis rebus affici: Sed ille

amor non potuit esse, nisi peccatum superbix; nempe in amore spiritualium non peccatur, nisi quia regula, ad quam amor ille debet exigi, contemnitur, seu quia amor ille inhæret creaturæ, cum ad Deum ultimò referri deberet. Eo principio nixus Augustinus, lib. 12. de Civit. Dei, capite 6. de Angelis apostatis sic loquitur: *Ab illo qui summus est, averſi, ad ſe converſi ſunt, & hoc vitium non aliud, quàm ſuperbia eſt.* 3. Primum Angelorum apostatarum peccatum, illud fuit, quod in eis arguit sanctorum Angelorum princeps: atqui arguit superbiam; ob id enim vocatur Michael, quod quidem nomen idem significat, ac si quis dicat: *Quis ut Deus?* hoc est, *Quis est iste, qui se Deo audeat comparare?*

Objicies 1. Primum Angeli peccatum fuit peccatum inobedientiæ; nam ideò excidit ex iustitiâ, in quâ creatus fuerat, quòd Deus (ut ipsa ratio præcipit) subijci noluerit. 2. Videtur etiam (ut Scotus arbitratur) quòd fuerit peccatum luxuriæ spiritualis: siquidem Angelus peccavit, quòd ex consideratione propriæ excellentiæ summè delectatus sit. 3. Videtur tandem, quòd fuerit peccatum invidiæ: nimirum contemplatus Dei independentiam, invidiâ in eum exarsit, sibi que independentiam illius appetiit: *Ascendam in cælum, ſimilis ero Altissimo.*

Resp. ad 1. neg. ant. Ratio est, quia in Angelo fuit aliquid prius eâ non subiectione, cujus meminit argumentum; inordinatus nimirum amor sui; ideò enim noluit Deo subijci, quòd se ipsum inordinatè dilexerit.

Resp. ad 2. equidem Angelum summè delectatum esse ex consideratione propriæ excellentiæ, verum ea delectatio non constituit peccatum speciale luxuriæ spiritualis, sed potius peccatum superbix. Ratio est, quia delectatio non constituit speciale peccatum, nisi ratione rei, quæ

quæ est causa, seu objectum delectationis : delectatio v. g. in cibis efficit peccatum gulæ; in venereis, peccatum luxuriæ, & in honoribus peccatum superbiæ; ac proindè summa illa delectatio, quâ Angeli ex suæ excellentiæ consideratione affecti fuerunt, fuit delectatio quæ speciale peccatum superbiæ constituit.

Resp. ad 3. neg. ant. Ratio est, quia invidia est dolor conceptus ex alterius bono: at dolor ille non fuit in Angelis, ubi primùm peccarunt: neque enim conciliari potuit cum summâ illa delectatione, quâ affecti sunt ex propriæ excellentiæ consideratione. Præterea invidia, seu dolor conceptus ex alterius bono, nascitur ex amore inordinato quo quis se ipsum deperit: ille autem amor inordinatus ipsummet est superbiæ peccatum, ut superius observatum est ex Augustino.

Quæres, in quo sita fuerit Angelorum apostatarum superbia.

Respondent 1. nonnulli, in eo positam fuisse, quòd Christum adorare noluerint. Scilicet (ajunt illi scriptores) statim ab Angelorum creatione, mysterium Incarnationis eis revelatum est, jussique sunt homini Deo patriæ cultum exhibere. Angeli sancti (prosequuntur iidem authores) divinum illud præceptum mandarunt executioni; apostatæ verò obedire noluerunt.

Sed 1. ea sententia nulla Scripturæ aut Patrum testimonio nititur: 2. adversatur Patribus qui non aliam Incarnationis causam agnoscunt, quàm hominis redemptionem: at Angeli ante suum peccatum non noverant futuram per Christum hominis redemptionem; neque enim tunc præcognoverunt hominis casum, ac proindè nec futuram illius redemptionem: 3. Angeli sancti non erant habituri perseverantiam, aut alia gratiæ dona, per Christi merita; ac proindè non erat



opus, ut Incarnationis mysterium illis ante eorum lapsum revelaretur.

Respondent 2. alii, superbiam Angelorum in eo sitam fuisse, quòdeam cum Deo similitudinem, quæ per visionem intuitivam habetur, consequi voluerint per naturæ suæ vires, & absque auxilio supernaturali.

Verùm si id absolutè voluerint, necesse est, ut priùs judicaverint id esse possibile: neque enim voluntas absolutè desiderat objectum, cuius adaptionem intellectus judicat non esse possibilem: at Angeli non judicarunt possibile, ut per naturæ vires intuitivam Dei visionem consequerentur; alioquin eorum intellectus turpi errore, imò & hæresi, ante peccatum laborasset; quod (ut supra dictum est) falsum est omninò.

Respondent 3. alii, in eo sitam fuisse superbiam Angelorum, quòd æqualitatem cum Deo, seu independentiam, desideraverint. Confirmant 1. ex eo, quòd Scripturæ id innuere videantur: *Similis* (ait diabolus Isaïæ 14.) *era Altissimo*: Ezechielis 28. irridetur, quòd dixerit: *Deus ego sum*. 2. In eo (inquiant) posita fuit prævaricatoris Angeli superbia, quòd ipse post lapsum ab hominibus existimari cupit: atque cupit pro Deo haberi. Siquidem effecit, ut sibi quondam ubique gentium offerrentur sacrificia, & alia divinis cultus signa exhiberentur.

Verùm dici non potest, quòd Angelus prævaricator æqualitatem cum Deo desideraverit, absolutè: nec enim (ut jam observatum est) posuit antè peccatum judicare, æqualitatem illam esse possibilem, sed eam expetiit conditionatè, si nimirum esset possibilis. Quamobrem (ut nobis videtur) in eo posita fuit Angelorum superbia, quòd desideraverint esse æquales Deo, si id foret possibile; in eoque desiderio mirum in modum sibi complacuerint.

## CAPUT III.

*Quinam Angeli peccaverint.*

Not. **S**Tatus quæstionis est 1. utrum aliqui Angeli ex singulis ordinibus ceciderint; 2. utrum major fuerit numerus eorum qui ceciderunt, quàm eorum qui steterunt; 3. utrum dæmonum princeps fuerit omnium Angelorum supremus.

CONCLUSIO 1. Probabile est, aliquos ex singulis ordinibus Angelos cecidisse.

Probatur. Apostolus ad Rom. 8. inter humanæ salutis hostes recenset Angelos, Principatus, Virtutes: *Neque Angeli ( inquit ) neque Principatus, neque Virtutes ..... neque creatura alia poterit nos separare à charitate Dei*. Primæ ad Corinth. cap. 15. præter Principatus & Virtutes recenset Potestates: *Cum evacuaverit ( ait ) omnem Principatum & Potestatem & Virtutem*. Ex ordine Seraphimorum nonnulli quoque lapsi sunt; nam ( ut conclusione 2. dicetur ) ex illo ordine fuit dæmonum princeps. Ex Cherubimis pariter aliquos cecidisse, colligitur ex eo, quòd nomen Cherub in malum sumatur Ezechielis 28. Tandem cum Archangeli sub Angelorum nomine comprehendantur, & cum Throni & Dominationes sint Seraphimis & Cherubimis inferiores; probabiliter inferitur, plures ex singulis Angelorum ordinibus cecidisse.

Nec obstat, quòd Seraphimorum & Thronorum nomina Angelis apostatis minimè tribuantur: siquidem gravis est ejus rei ratio, quam S. Thomas 1. p. q. 63. art. 9. ad 3. hisce verbis tradit: *In sacra Scriptura tamen nomina quorundam ordinum, ut Seraphim & Thronorum, demonibus non attribuantur, quia hæc nomina sumuntur ab ardore charitatis, & ab in habitatione Dei, quæ*

*non possunt esse cum peccato mortali . Attribuuntur autem eis nomina Cherubim , Potestatum , & Principatum , quia hæc nomina sumuntur à scientia & potentia , quæ bonis malisque possunt esse communia .*

**CONCLUSIO 2.** Tot Angeli ex singulis ordinibus non ceciderunt, quot ex iisdem ordinibus steterunt.

Probatur 1. Stellæ, quæ Apocalypf. 8. concussæ leguntur, sunt, per metaphoram, Angeli qui ceciderunt: atque ex stellæ tot non fuerunt numero, quot stellæ concussæ non fuere, seu Angeli qui steterunt in iustitiâ: *Et percussa est* ( inquit Joannes ) *pars tertia stellarum* . Eiusdem libri cap. 12. hæc leguntur de Angelorum apostatarum principe, quem Scriptura draconem appellat: *Et cauda ejus trahebat tertiam partem stellarum cæli , & misit eas in terram*: igitur duæ aliæ stellarum partes dejectæ non sunt in terram: at ex stellæ, sive quæ dejectæ sunt in terram, sive quæ remanserunt in cælis, adumbrant Angelos tum apostatas tum fideles: scilicet non multò post verba quæ mox laudata sunt, hæc alia leguntur: *Et factum est prælium magnum in cælo : Michael & Angeli ejus præliabantur cum dracone , & draco pugnabat & Angeli ejus . Et non valuerunt , neque locus inventus est eorum amplius in cælo .*

Probatur 2. autoritate & ratione S. Thomæ, qui 1. p. q. 63. art. 9. sic loquitur: *Peccatum est contra naturalem inclinationem: Ea verò quæ contra naturam sunt, ut in paucioribus accidunt . Nec obest, quòd ex hominibus multò plures sint impii, quàm justi: Non obest ( inquam ) quia hominis natura, per peccatum originale in aliam fermè naturam immutata est; hoc est, alios induit affectus ab iis in quibus primùm à Deo condita fuerat; ac proindè peccatum aliquo vero sensu non est contra naturam hominis per peccatum corrupti .*

CON-

CONCLUSIO 3. Dæmonum princeps fuit omnium Angelorum supremus. Ita S. Thomas 1. p. q. 63. art. 7.

Probat 1. ex Scripturâ. Job 40. sub typo Behemot, de diabolo dicitur: *Ipse est principium viarum Dei*, id est (ut interpretatur Estius) opus, seu creatura Dei prima & præstantissima. Ezechielis cap. 31. sub typo Regis Assur, de eo hæc dicuntur: *Cedri non fuerunt altiores illo in paradiso Dei. Omne lignum paradisi non fuit assimilatum illi, & pulchritudini ejus*. Eidem sententiæ favent Patres, ut videre est apud Tertullianum lib. 2. contra Marcionem; Hieronymum in caput quartum Danielis; Augustinum lib. 2. de Genesi ad litteram, cap. 19. Gregorium Magnum lib. 32. Moralium, cap. 24. Bernardum Serm. 1. de Adventu. Nonnullas rationes idem confirmantes videre est apud Estium in lib. 2. Sent. dist. 6. §. 10. eas autem hic non inserimus, quod levis ponderis esse videantur.

Objicies. Angelus qui primus peccavit, Ezechielis 28. dicitur fuisse ex ordine Cherubimorum. *Tu Cherub* (ait propheta alloquens Tyriorum regem, quo adumbratus est dæmonum princeps) *extensus & protegens*: Sed Angelus qui est ex ordine Cherubimorum, non fuit omnium Angelorum supremus, cum ipse Cherubimorum ordo sit inferior ordine Seraphimorum: ergo, &c.

Resp. dist. ant. Princeps dæmonum Ezechielis 28. vocatus fuit Cherub, & illud nomen non erat proprium ordini, ex quo erat dæmonum princeps, conc. ant. & proprium erat, neg. ant. Dæmonum princeps post peccatum appellari non potuit Seraphim, eo quod charitas eo nomine significata, in subiecto conciliari non possit cum statu peccati mortalis; potuit contra appellari Cherub, eo quod scientiæ plenitudo quæ per illud nomen significatur, non excludatur per peccatum mortale. Sed hæc satis sint de argumento de quo nihil certi statui potest.

## CAPUT IV.

*De pœna peccati Angelorum.*

**Not.** Jam superius dictum est, Angelos omnes statim post peccatum, damnatos fuisse, tum damni, tum ignis pœnâ; sed jam quæstio est de pœnis, quæ ad eorum aut intellectum, aut voluntatem, aut præfecturam pertinent. Præterea quærendum est, utrum tum istæ tum aliæ pœnæ perpetuò duraturæ sint.

**CONCLUSIO 1.** Intellectus dæmonum nihil in naturalibus passus est detrimenti: in gratuitis, quæ merè erant speculativa, imminuta est illius cognitio: in iis verò, quæ gratuita simul & in Deum affectiva, totaliter ablata est.

Probatur prior pars. Intellectus in naturalibus non minuitur, nisi cum minuitur natura, cujus est facultas; nam facultas sequitur naturam: atqui Angelorum natura per peccatum non est imminuta: ergo nec eorum intellectus in naturalibus. Altera pars sic ostenditur. Cognitio gratuita quæ in merâ speculatione consistit, est cognitio per revelationem: atqui ea cognitio multùm fuit imminuta in Angelis: pauca nimirum per revelationem attingunt; cum è contra dum starent, plurima cognoscerent: *De secretis divinis* (inquit S. Thomas 1. p. q. 64. art. 1.) *tantum revelatur eis, quantum oportet, vel mediantibus Angelis, vel per aliqua temporalia divinæ virtutis effecta.* Tandem tertia pars est evidens: siquidem cum dæmones omni prorsus charitate destituti sint, carent iis virtutibus, quæ ad charitatem referuntur, ut sunt fides, spes & aliæ ejusmodi.

**CONCLUSIO 2.** Obduratio in malo, pœna est quâ dæmonum voluntas castigatur.

Probatur. Eorum voluntas est obstinata in malo, qui non possunt à peccato temperare: atqui dæmones non possunt à peccato temperare, cum  
eis

eis desit omnis gratiæ auxilium. Addendum est cum S. Thomâ, eos in omnibus suis actibus peccare lethaliter, eò quòd in eis summum Dei odium dominetur; non demerentur tamen, eò quòd ad demerendum satis non sit peccatum, sed præterea status viæ in peccante requiratur.

CONCLUSIO 3. Angeli apostatæ eâdem pollent in Angelos, qui sibi adhæserunt, præfectorâ, quâ pollebant ante peccatum.

Probatur. Matthæi 12. Beelzebub vocatur dæmoniorum princeps: *Pharisæi autem audientes, dixerunt: Hic non ejicit dæmones, nisi in Beelzebub principe dæmoniorum.* Ibidem dæmonum societas à Christo dicitur regnum: *Si Satanâs Satanam ejicit, adversum se divisus est: quomodo ergo stabit regnum ejus?* Sed necesse est, ut in regno præsent aliqui, cæteri verò subjiciantur. Præterea dæmones antequam caderent, sibi invicem subordinati erant: ergo etiam post lapsum, cum nomina quæ subordinationem significant, retinuerint, ut patet ex locis quæ superius ex Rom. 8. primæ Corinth. 15. Ephes. 6. laudavimus. Confirmatur ex eo, quòd quorundam dæmonum, aliorum respectu, subjectio, sequatur ex illorum natura: nempe alii aliis naturâ sunt excellentiores: atqui quæ sequuntur ex naturâ, per peccatum (ut superius dictum est) ab Angelis ablata non fuerunt: ergo, &c.

Objicies. Angeli superiores, per peccatum meruerunt dejici ex suo in inferiores Angelos principatu: ergo reverà eo dejecti sunt.

Resp. neg. ant. Ratio est, quia principatus ille post peccatum non confert ad bonum superiorum, sed potius ad malum: ita S. Thomas ratiocinatur 1. p. q. 109. art. 2. ubi sic loquitur: *Quod autem superioribus inferiores subdantur, non est ad bonum superiorum, sed magis ad malum eorum: quia cum mala facere maxime ad miseriam pertineat, præesse in malis, est esse magis miserum.*

Quæ-

Quæres, an dæmonum principatus, ad hominem, resque illi subjectas extendatur.

Resp. affirmative. 1. Non ob aliud enim diabolus in Scripturis dicitur princeps hujus mundi, Deus hujus sæculi, mundi rector tenebrarum harum. Nec mirum est, quod homo post peccatum diabolo subjici cœperit; nam, ut fert axioma, *A quo enim quis superatus est, hujus & servus est.* Ecclesia eo nixa principio, exorcismos adhibere solet, ut ab homine diabolus expellat: *Ecclesia* (inquit Augustinus lib. 4. contra Julianum c. 4.) *filios fidelium nec exorcizaret, nec exsufflaret, si non eos de potestate tenebrarum erueret:* adhibet quoque preces, ut creaturæ, eæ etiam quæ ratione destitutæ sunt, liberentur ab infestatione dæmonum, qui eis sæpius utuntur, ut homines ad peccatum moveant. Eam verò dæmonum infestationem Paulus præ oculis habuit, cum hæc scripsit ad Romanos: *Vanitati enim creatura subjecta est non volens, sed propter eum qui subjecit eam in spe. Quia & ipsa creatura liberabitur à servitute corruptionis in libertatem gloria filiorum Dei:* In quæ quidem Apostoli verba sic Estius loquitur: *Ad quam vanitatem hoc quoque pertinet, quod creatura quæ in usum hominis venit, pro magna parte permissa est potestati principis hujus mundi: Propter quod & multæ creaturæ consuetudine fidelium benedicuntur, & juxta Apostolum I. ad Timoth. 4. sanctificantur per verbum Dei & orationem, ut potestas diaboli, per eas nocere parati, cohibeatur.*

CONCLUSIO 4. Æterna sunt Angelorum apostatarum supplicia.

Probatur 1. ex Scripturâ. Matthæi. 25. hæc habentur: *Discedite à me maledicti in ignem æternum, qui paratus est diabolo & Angelis ejus:* atqui si ignis qui instrumentum est supplicii, sit æternus, necesse est, æternum etiam esse supplicium. Valet idem argumentum respectu hominum damnatorum: unde ibidem de reprobis & præ-

prædestinatis hæc dicuntur: *Et ibunt hi in supplicium æternum: Iusti autem in vitam æternam.* Hinc etiam fit, ut Marci 3. de iis qui blasphemaverint in Spiritum sanctum, hæc legantur: *Qui autem blasphemaverit in Spiritum sanctum, non habet remissionem in æternum; sed reus erit æterni delicti.* Hinc quoque Paulus 2. ad Thessalonicenses 2. de impiis, sive christianis, sive infidelibus, dicit: *Qui pœnas dabunt in interitu æternas à facie Domini.*

Probatur ex traditione. Irenæus lib. 4. adversus hæreses cap. 4. sic loquitur: *Quibuscumque dixerit Dominus, Discedite à me maledicti in ignem æternum, isti erunt semper damnati.* Tertullianus libro de Carne Christi, capite 14. probat, demonum supplicia fore æterna, quòd Christus pro eis mortuus non sit: *Nullum (ait) mandatum de salute Angelorum suscepit Christus à Patre. Quod Pater neque repromisit, neque mandavit, Christus administrare non potuit.* Cyprianus in calce libri ad Demetrianum, aliam profert rationem, desumptam nimirum ex defectu satisfactionis & pœnitentiæ, sine quibus nec diabolus nec homo inflictâ sibi pœnâ liberari possunt: *Quando istinc excessum fuerit, nullus jam pœnitentiæ locus, nullus satisfactionis effectus.* Hieronymus in hæc Matthæi verba: *Et ibunt hi in supplicium æternum, iusti autem in vitam æternam,* hæc habet: *Prudens lector adverte, quòd & supplicia æterna sint, & vita perpetua metum deinceps non habeat rumarum.* Plures alii tum Latini tum Græci Patres pro eodem argumento laudari possent, sed adeat lector Augustinum lib. 21. de Civ. Dei, Gregorium Magnum lib. 24. Moralium, cap. 16.

Quæres, quis inter Christianos censuerit, demonum aut hominum damnatorum pœnas, finem aliquando habituras esse.

Resp. Theophilum Alexandrinum, epistolâ secundâ Paschali; Hieronymum epistolâ 59. ad Avianum.



Avitum, Augustinum lib. de hæresibus, cap. 18. quintam generalem Synodum in anathematismis, errorem de quo agitur, Origeni tribuisse. Eum quoque Sociniani postremis hisce temporibus amplexi sunt; impiè nimirum arbitrantur æquum non fore Dei judicium, si creaturas ob unum, vel cogitationis, peccatum lethale, æternis suppliciis addixerit.

## QUÆSTIO VII

### *De variis Angelorum effectibus.*

Not. **D**icemus hîc 1. de extraordinariis effectibus sanctorum Angelorum; 2. de iis qui ab apostatis nonnunquam producantur; 3. de miraculis quæ istis tribuuntur.

CONCLUSIO I. Varii sunt extraordinarii sanctorum Angelorum effectus.

Probatur enumeratione. *Primò*, nonnunquam in corporibus assumptis, hominibus apparent; id autem prioribus mundi & Ecclesiæ sæculis frequentius, quàm nunc, fieri consueverat.

*Secundò*, Angelis sanctis, Danielis cap. 10. & 11. tribuuntur regnorum everfio, & illorum ad alios populos translatio: tribuuntur etiam clades, quibus profligantur exercitus: unde Augustinus lib. 4. de Civit. Dei, cap. 17. refellens Deorum cultores, qui dicebant, *Quòd Deam Victoriæ Iupiter mittat, atque illa tanquam Regi Deorum obtemperans, ad quos jusserit, veniat, & in eorum parte confidat*, sic loquitur: *Hoc verè dicitur non de illo Iove quem Deorum Regem pro sua opinione consingunt, sed de illo vero Rege sæculorum quòd mittat non Victoriæ, quæ nulla substantia est, sed Angelum suum, & facias vincere quem voluerit.*

Ter-

*Tertio*, Angeli sancti divinæ misericordiæ in homines pios, & justitiæ in impios judicia, in hac vitâ exequentur: *Si propterea* (ait Augustinus in illa Psalmi 77. verba, Immissiones per Angelos malos) *per malos Angelos illa Deum fecisse putaverimus, quia pænæ infligebantur, non beneficia præstabantur, tanquam nemini Deus pænas irroget per Angelos bonos, sed per illos veluti militia cælestis carnesces; consequens erit, ut etiam Sodomam per Angelos malos: everfam esse credamus, & malos Angelos Abraham & Loth hospicio suscepisse videantur, quod absit, ut contra Scripturas apertissimas sentiamus.*

**CONCLUSIO 2.** Plures sunt modi, quibus Angeli mali possunt extraordinarios effectus operari.

Probatur. Applicando (ut loquuntur) activa passivis, dæmones possunt producere animalia quæ sine generatione strictè sumptâ, ex aliis corporibus nascuntur, ut sunt ranæ, muscæ, mures, vermes. Vide Augustinum lib. 15. de Civit. Dei, cap. 23. nec non quæst. 21. in Exodum.

Præterea, vi potestatis quam habent movendi corpora, facile, si Deus permittat, possunt nostris sensibus illudere, ita ut nostri sensus eodem modo afficiantur, ac ab ipsismet exterioribus corporibus afficerentur; unde possunt oculis objicere lapides pro lupis, & vicissim lupos pro lapidibus. Possunt quoque, Deo permittente, ex ejusdem potestatis virtute, cogere nubes, excitare fulmina, variis motibus terram concutere, fructibus nocere, morbis quibusdam in homines sævire. Vide eundem Augustinum loco proximè laudato. Hincque colligitur, quàm piè se gerat Ecclesia, cum, adhibitis precibus, aerem, flumina, terræ fructus benedicit.

**CONCLUSIO 3.** Dæmones non possunt vera patrare miracula.

Probatur. Miraculum est opus quod excedit naturalem cujuslibet creaturæ virtutem: atqui opus

opus huiusmodi dæmones efficere non possunt : neque enim Deus aliam eis tribuit virtutem quam quæ data fuit , cum educti sunt ex nihilo : ergo non possunt vera miracula patrare .

Confirmatur 1. Si Deus dæmoni facultatem faceret patrandi vera miracula , esset in confirmationem aut erroris, aut veritatis : atqui neutrum dici potest . Non primum : cum enim Deus sit ipsamet veritas , non potest , sive per se ipsum , sive per alium , quempiam in errorem inducere . Non etiam secundum : siquidem non convenit, ut Deus tribuat mendaciorum Patri virtutem supernaturalem, quâ veritas apud homines confirmetur , præsertim cum in Scripturis vetet hominibus , ne diaboli aut operibus aut consiliis assensum præbeant .

Confirmatur 2. Si Deus diabolo facultatem faceret patrandi vera miracula , nihil esset , quo certi esse possemus, Deum , non autem creaturam aliquam , nobis loqui , ac proinde vacillaret fides , cum fides nitatur testimonio Dei loquentis : sed absurdum est consequens : ergo, &c.

Confirmatur 3. ratione petitâ à simili, quam tom. 2. Brevium observationum, Gummarus Huigens, in Academiâ Lovaniensi sacrae theologiae Doctor ac Professor , hisce verbis proponit : *Et si Rex possit in regno suo permittere , ut subditis suis in penam eorum quæ in Regem commiserunt , obveniant ab hostibus variae illusiones penales , ac aliae afflictiones ; non potest tamen , si impedire valeat , permittere , ut circa characteres & sigillum Regis ita à quibusdam illusoribus decipiantur subditi , ut nulla circumspectione aut prudentia , litteras nomine regis fictas discernere valeant à litteris verè à rege conscriptis , & ipsius sigillo signatis : nam hoc permittens , saltem ordinariè , non poterit agrè ferre , si veris suis litteris fides non adhibeatur .* Vide eundem authorem loco proximè laudato .

Objicies 1. Id possunt dæmones, quod possunt malefici; malefici nimirum non operantur, nisi dæmonum virtute: atqui malefici possunt patrare vera miracula: siquidem reipsa patrata sunt à maleficis Pharaonis, cum (ut habetur Exodi 7.) per incantationes verterint virgas suas in dracones, & aquam in sanguinem, eduxerintque, sicut Moyse, ranas ex fluviis: ergo, &c.

Resp. ad 1. conc. maj. neg. min. Ad 2. neg. ant. seu, nego, mutationes de quibus agitur, fuisse miracula. Ratio est 1. quia mutationes illæ (secundum sententiam Josephi lib. 2. Antiquit. Tertulliani lib. de animâ cap. 57. & plurium aliorum) non fuerunt veræ, sed tantum apparentes: scilicet Pharaonis malefici per suas præstigias ita populorum oculis ludificarunt, ut dracones, ranæ, sanguis apparuerint, quamvis à parte rei, & virgæ, & fluvijs, & aquæ, in suâ naturali substantiâ remansissent. Ratio est 2. quia, licet concedatur, mutationes de quibus agitur, fuisse veras ac reales (ut docet Augustinus quæst. 21. in Exodum, eo quod Scriptura eodem modo de eis loquatur, quo de mutationibus quæ Moyse tribuuntur) non sequitur tamen, maleficos illos vera miracula patrassse: nempe licet illa opera humanam virtutem superaverint, non fuerunt tamen supra naturales dæmonum vires: cum enim sibi ipsis à Deo permittuntur, activa passivis applicando, possunt (ut docet Augustinus lib. 3. de Trinitate, cap. 83.) corpora quædam in alia transmutare, in ea præsertim quæ aut non vivunt, aut ex putri materiâ per imperfectam tantum generationem, ut mures & ranæ, producuntur: *Sciendum est tamen* (inquit Sanctus Thomas 1. p. quæst. 114. art. 4.) *quod quamvis hujusmodi opera demonum, quæ nobis miracula videntur, ad veram rationem miraculi non pertingant, sunt tamen quandoque veræ res: sicut magi Pharaonis per virtutem demonum veros serpentes & ranas fecerunt.* Præterea, ex suppositione, quod mutatio-

tiones, de quibus est hic quaestio, reales ac veræ fuerint, dici potest cum Jansenio in cap. 7. Exodi, veras dracones aliunde adductos ope daemonis, virgarum loco fuisse substitutos, fallendo oculos, ut nemo praestigias illas animadverteret: Et sic praestigiae fuissent non in conversionis termino, seu re conversæ, sed in convertendi modo; unde & Hebraicè malefici isti vocantur praestigiatores: Scriptura tamen dicit fecisse similiter, quia modus agendi externus similis erat, quemadmodum & Angeli dicuntur comedisse.

Objicies 2. Nullum est majus miraculum, quàm cum quis è mortuis suscitatur: atqui daemones possunt homines è mortuis suscitare; de facto nimirum, saltem ad tempus, suscitarunt Samuelem, qui per Pythonissæ incantationes Sauli Regi & apparuit & locutus est post mortem: de eo autem miraculo hæc habentur Ecclesiast. 46. *Et post hoc dormivit (Samuel) & notum fecit regi, & ostendit illi finem vitæ suæ, & exaltavit vocem suam de terra in prophetia, delere impietatem gentis: ergo, &c.*

Resp. ad 1. neg. min. Ad 2. dist. ant. Dæmones de facto suscitarunt Samuelem, apparenter tantum, conc. ant. verè & realiter, neg. ant. *In hoc facto* (ait Augustinus lib. 2. ad Simplicianum, quaest. 3.) *potest esse alius simplicior intellectus, & expeditior exitus, ut non verè spiritum Samuelis excitatum à requie sua credamus, sed aliquod phantasma & imaginariam illusionem, diaboli machinationibus factam; quam propterea Scriptura nomine Samuelis appellat, quia solent imagines rerum, eorum nominibus appellari, quorum imagines sunt.*

Præterea dici potest, quòd etiam ex suppositione, quòd realis ac vera fuerit suscitatio Samuelis, inde non sequatur, diabolum aliquod miraculum patrassè; scilicet negandum est, illud miraculum operâ diaboli patratum fuisse: sed potius uni Deo tribuendum est. Nec obstat, quòd incantatio

tatio Pythonissæ occasione fuerit, illi miraculo: *Cum enim* (ait Augustinus lib. 2. ad Simplicianum quæst. 3.) *vult Deus, etiam per infimos & inferos spiritus aliquem vera agnoscere, temporalia dumtaxat, atque ad ipsam mortalitatem pertinentia, facile est & non incongruum, ut omnipotens & iustus ad eorum penam, quibus ista prædicantur, ut malum quod eis impendet, antequam veniat, prænoscendo, patiantur, occulto apparatu mysteriorum suorum etiam spiritibus talibus aliquid divinationis impertiat, ut quod audiunt ab Angelis, pronuntient hominibus: Tantum autem audiunt, quantum omnium Dominus atque moderator vel jubet vel finit.*

Objicies 3. Diabolus imminente totiûs orbis clade, per Antichristum plura patrabit miracula; per eum enim patrabit miracula, per quem adveniet in omni virtute & signis: atqui sic diabolus, imminente totiûs mundi clade, per Antichristum adveniet: *Tunc* (ait Apostolus 2. ad Thessalonicenses 2.) *revelabitur ille iniquus, quem Dominus Iesus interficiet spiritu oris sui: & destruet illustratione adventus sui eum, cujus est adventus secundum operationem Satanae in omni virtute & signis & prodigiis mendacibus, & in omni seductione iniquitatis iis qui pereunt, eò quòd charitatem veritatis non receperunt, ut salvi fierent: ergo, &c.*

Resp. ad 1. neg. ant. Ad 2. dist. min. Diabolus per Antichristum adveniet in omni virtute & signis, quæ naturales diaboli vires non excedent, conc. min. quæ excedent naturales dæmonis vires, neg. min. Diabolus, si suis viribus à Deo permittatur, summâ in substantias corporeas virtute pollet: ita ut (nisi Deus impediret) planetarum ordinem invertere posset, aliaque peragere, quæ licet hominis potestatem superent, non excedunt tamen dæmonis vim naturalem Itaque Antichristus multa operaturus est, quæ pro miraculis habebuntur ab iis, qui aut non attendunt  
ad

ad dæmonis virtutem, aut potius qui à Deo spargente pœnales cæcitates super illicitas cupiditates deferentur: *Solet ambigi* (inquit Augustinus lib. 20. de Civitate Dei, cap. 29.) *utrum propterea dicta sint signa & prodigia mendacii, quoniam mortales sensus per phantasmata decepturus est, ut quod non facit, facere videatur: An quia illa ipsa, etiamsi erunt vera prodigia, ad mendacium pertrahent credituros, non ea potuisse nisi divinitus fieri, virtutem diaboli nescientes, maxime quando tantam, quantam nunquam habuit, accipiet potestatem.*

Objicies 4. Translatio Sagarum in conventus nocturnos, in quibus & ventri & libidini serviunt, videtur naturales diaboli vires superare: Realis est tamen illa translatio: ergo dæmones aliquid possunt, quod superat naturales eorum vires, ac proinde possunt patrare miracula.

Resp. 1. neg. maj. scilicet, diabolus (ut superius ostensum est) corpora, eorum præsertim hominum qui propter peccatum sunt illius juris, potest, absolutè loquendo, cum à Deo permittitur, de loco in locum movere. Resp. 2. neg. min. seu negatur, realem ac veram esse translationem, de quâ agitur. Nimirum ejusmodi translatio tribui potest imaginationi, à quâ mulieres quæ dicuntur sagæ, ita decipiuntur, ut credant, licèt falsò, se translatas fuisse ad nocturnos conventus, in quibus ventrem & libidinem expleverint. Confirmatur 1. ex eo quòd pluribus experimentis compertum sit, sagas visas fuisse in carcere, in lecto, in aliisve similibus loci, toto eo tempore, quo asserebant, se nocturnis de quibus agitur, conventibus interfuisse. Confirmatur 2. ex eo quòd tanta sit imaginationis vis, ut iis in locis ubi mulieres sub nomine sagarum ad judices trahuntur, plures aliæ sibi persuadeant, quòd & ipsæ sagæ sint: nempe quæ de sagis audiunt, ita movent earum imaginationem, ut certò credant, se & fecisse & passas esse illa omnia, de quibus lis aliis

aliis intentatur. Hincque fit, ut iis in provinciis, in quibus tribunalia adversus sagas eriguntur, crescat in dies earum numerus; cum è contra in aliis, in quibus nihil agitur simile, vel exiguus, vel nullus sit sagarum numerus. Vide de hoc argumento Abulensem in caput 13. Genesios quæstione 354. Cajetanum in 2. 2. quæst. 95. art. 3.

Quæres, an sint aliquæ regulæ, quibus vera miracula discerni possint à quibusdam diabolici operibus, quæ miraculum hominibus faciunt.

Resp. affirmativè. Nam 1. falsa miracula curiositati, non autem ædificationi serviunt: 2. Tantùm abest, ut hominibus profint, quin potius noceant quàm maximè: 3. Plerumque tendunt ad sacrilegia, lasciviam, aliaque tum facinora, tum flagitia. Econtrà vera miracula (ut patet in iis quæ sive Christus, sive Apostoli patrarunt) animabus corporibusque profuerunt: *Pertransit* (ajunt Scripturæ de Christo) *benefaciendo, & sanando omnes oppressos à diabolo.*

Præter notas, quæ mox traditæ sunt, aliæ rursus proferri possunt. *Primò*, cum objectum quod uni & alteri hoc vel illo modo videtur, eadem ratione omnibus non apparet, signum est, quòd illusio sit in sensibus, nihilque sit reale in objecto. *Secundò*, illusio est pariter, cum, objecto quod reale deprehenditur, deest aliqua ex proprietatibus, quæ naturaliter illi convenire debent, ut si corpus quod appareret, non esset palpabile. *Tertiò*, cum fundamentum est judicandi, rem quæ de novo producta videtur, aliunde, per celeritatem nimirum dæmonum, allatam fuisse, ut observavimus supra de draconibus, in quos virgæ maleficorum Pharaonis mutatae videbantur. *Quartò*, cum judicari potest, ope dæmonum afferri objectum, & ablato substitui aliud. Hinc cum Augustino dicendum est, fabulam esse, quòd *socii Diomedis*, quia nusquam subitò comparuerunt, &



postea nullo loco apparuerunt, perdentibus eos ulsionibus Angelis, in eas aves, quæ pro illis occultè ex aliis locis, ubi est hoc genus avium, ad ea loca perductæ sunt, ac repente suppositæ, creduntur esse conversi. Tandem quintò, miraculum est apparens, non verum, quando alio miraculo præstantiore superatur: sic Ægyptii colligere poterant, miracula quæ coram Pharaone ab eorum maleficis patrabantur, fictitia tantùm fuisse: nempe serpens, in quem mutata fuit Aaronis virga, voravit maleficiorum serpentes, & Magi ita in quarto portento defecerunt, ut Moyse ad ulteriora prodigia progredienti dixerint, *Digitus Dei est hic.*

## Q U Æ S T I O VIII.

### *De variis Angelorum ordinibus.*

**Not.** **H**ic quæremus 1. quot sint Angelorum ordines; 2. quot hierarchiis ordines illi contineantur; 3. quænam sint singularum hierarchiarum proprietates.

**CONCLUSIO** 1. Novem sunt Angelorum ordines.

Probatur. Tot sunt Angelorum ordines, quot tum in Scripturis, tum in Patribus reperiuntur: atqui tum in Scripturis, tum in Patribus novem Angelorum ordines reperiuntur. Et quidem primò in Scripturis novem recensentur. Isaias c. 6. de Seraphimis, tanquam qui constituent ordinem ab aliis distinctum, sic loquitur: *Seraphim stabant super illud: sex alæ uni, & sex alæ alteri.* Moyses Genesis 3. meminit *Cherubimorum*: hæc quoque de eis habentur Ezechielis 10. *Cherubim autem stabant à dextris domus.* Paulus primæ ad Thessalonicenses 4. laudat Archangelos: *Quoniam (inquit) ipse Dominus in jussu & in voce Archan-*

*Archangeli, & in tuba Dei descendet de celo.*  
 Idem nomen legere est in Judæ Canonica: Cum  
 (ait) *Michael Archangelus cum diabolo disputans*  
*de Moyſi corpore.* Paulus ad Romanos 8. loquitur  
 de Angelis, tanquam de ordine ab aliis Angelo-  
 rum ordinibus distincto: *Certus sum enim, quia*  
*neque mors, neque vita, neque Angeli, neque Prin-*  
*cipatus, neque Virtutes, &c.* Idem Apostolus ad  
 Coloss. 1. quatuor distinctos ordines describit:  
*Sive throni (ait) sive dominationes, sive principatus,*  
*sive potestates.* Ad Ephesios 1. dominationibus,  
 principatibus, & potestatibus addit Virtutes:  
*Supra (inquit de Christo loquens) omnem prin-*  
*cipatum, & potestatem, & virtutem.* Ex quibus  
 locis patet, septem Angelorum ordines ab Apo-  
 stolo recenseri; quibus quidem ordinibus si  
 jungantur Seraphimi, & Cherubimi, quorum  
 Isaias & Ezechiel meminerunt, novem, ex Scri-  
 pturâ, erunt Angelorum ordines.

Secundò, Patres, ubi deditâ operâ catalogum  
 texuere ordinum Angelorum, nec plùs, nec mi-  
 nus quàm novem recensuerunt. Ignatius in Epi-  
 stolâ ad Trallianos, quam Hieronymus inter ge-  
 nuinas admittit, sic loquitur: *Ego verò non, quia*  
*vincens sum, & intelligere possum cœlestia, & an-*  
*gelicos ordines; nec non angelorum & exercituum &*  
*principatum differentias, ac virtutum & domina-*  
*tionum discrimina; thronorumque ac potestatum va-*  
*rietates, eorum magnitudines, cherubim ac sera-*  
*phim excellentias, &c.* Irenæus lib. 2. cap. 54.  
 eundem textit catalogum, cum hoc tamen di-  
 scrimine, quòd *Exercituum* loco ponat vocem,  
*Principatum.* Eundem quoque descripsit Dio-  
 nyſius lib. de cœlesti Hierarchiâ, cap. 6. Iis Græ-  
 cis Patribus adhærent Latini. Instar omnium  
 sit Gregorius Magnus hom. 34. ubi sic loqui-  
 tur: *Novem Angelorum ordines diximus, quia*  
*videlicet esse, testante sacro eloquio, scimus ange-*  
*los, archangelos, virtutes, potestates, principa-*  
*tus, dominationes, thronos, cherubim atque sera-*  
*phim.*

*phim*. Eadem, quæ Gregorius, ratione locuti sunt, qui post illius tempora scripserunt, ut videre est apud Bernardum lib. 5. de Consideratione, cap. 4. Rupertum lib. 3. de processione Spiritus sancti, cap. 16. Magistrum Sententiarum, S. Thomam & alios.

Objicies. Hieronymus lib. 2. contra Jovinianum, Ambrosius lib. 1. de Fide cap. 1. Cyrillus Hierosolymitanus catechesi 6. quatuor tantum recensent Angelorum ordines: ergo non sunt novem.

Resp. dist. ant. Et illi Patres non excludunt majorem numerum, conc. ant. & excludunt, neg. ant. In locis propositum non fuit Patribus accuratum describere catalogum ordinum Angelorum; ac proinde mirum non est, quod tunc omnium non meminerint. Confirmatur ex eo, quod Ecclesia Latina tum in missæ præfatione, tum in hymno Ambrosiano, *Te Deum laudamus*, non recenseat novem Angelorum ordines: & tamen inde concludi non potest, Ecclesiam Latinam solum illum numerum admittere, qui iis in locis recensetur. Confirmatur iterum ex eo, quod nonnulli ex Patribus qui nobis objecti sunt, alibi novem ordines expressè recensuerint, ut patet in Hieronymo, lib. 2. Apologiæ contra Rufinum.

CONCLUSIO 2. Novem Angelorum ordines tribus hierarchiis continentur.

Probatum ex Patribus, inter quos Dionysius lib. de cœlesti hierarchiâ, cap. 6. expressè docet novem ordines Angelorum triplici hierarchiâ contineri. In priorem refert Seraphimos, Cherubimos, Thronos: in alteram, Dominationes, Virtutes, Potestates: in tertiam denique, Principatus, Archangelos, Angelos. Gregorius hom. 34. Dionysianæ hierarchiæ subscribit, cum hoc tamen discrimine, quod Principatus collocet in secundâ, & Virtutes in tertiâ. Gregorium sequuntur Bernardus lib. 5. de Consideratione

ratione, cap. 4. Magister Sententiarum & S. Thomas.

Quæres, quid tum Dionysius, tum Gregorius tum alii deinde Patres per hierarchiam intellexerint.

Resp. Hierarchiam in genere sumptam, seu prout abstrahit à cœlesti aut Ecclesiasticâ, esse Sacrorum præfecturam, seu potestatem. *Sciendum est igitur* ( inquit Maximus initio Commentationum ad Dionysium de Cœlesti Hierarchiâ ) *Hierarchiam quidem esse principatum, ac velut curam ordinandorum Sacrorum: Hierarcham verò qui Sacris præest, eaque curat ac moderatur.* At verò Hierarchia cœlestis, de quâ hîc agitur, est potestas ordinandarum functionum quæ in cœlis fiunt; sicut hierarchia Ecclesiastica est potestas ordinandorum Sacrorum quæ fiunt in terris; Hierarcha verò, qui tanquam princeps Sacris illis præest. Igitur hîc hierarchiæ nomine non aliud intelligitur, quàm certus Angelorum numerus, qui sibi invicem ac uni tanquam principi in ordine ad cœlestes actiones subordinantur; unde, si sumatur adæquatè, dicit, secundum Dionysium, potestatem, scientiam, & actionem.

CONCLUSIO 3. Variæ sunt ordinum Angelorum proprietates.


Probatur. Proprietates ordinum Angelorum considerari possunt vel respectu spiritualium perfectionum quibus præditi sunt, vel respectu ministeriorum exteriorum quibus funguntur: atqui utrovis modo considerentur, sunt variæ: ergo, &c.

*Primò*, perfectionum intrinsecarum proprietates esse varias, demonstrant ipsa ordinum Angelicorum nomina: Siquidem Seraphimi sic appellantur, quòd, Bernardo teste Serm. 19. in Canticâ, maximè Deo conjuncti, summâ ardeant charitate. Cherubimi sic dicuntur, quòd præditi sint eminente sapientiâ, seu scientiâ. Throni, quòd

peculiari modo sint Dei sedes, unde ab eo singulariter inhabitantur, & ratione inhabitationis hujusmodi singulari pace ac tranquillitate fruuntur; Dominationes, quod in eis maximè eluceat Dei in res creatas principatus: *Mira* (inquit Gregorius) *potentia præeminent*; Virtutes, quod in recipiendis Dei illuminationibus maximè sint constantes; Principatus, quod Dei majestatem ac dignitatem referant, & ad illius contemplationem & amorem alios alliciant; Archangeli, quod sublimium Dei arcanorum præ cæteris conscii sint. Vide Dionysium lib. de cœlesti hierarchiâ, cap. 5.

*Secundò*, eadem ordinum angelicorum nomina, secundum Gregorii Magni interpretationem, significant diversitatem ministeriorum, quibus Angeli funguntur. Seraphimi sic appellantur, quod charitatem quâ ardent, in alios Angelos transfundant; Cherubimi, quod scientiam quâ præditi sunt, aliis communicent; Throni, quod alios suæ securitatis ac pacis participes efficiant; Dominationes, quod ad eos tanquam ad principes, aliorum angelorum ministeria referantur; Virtutes, quod per eos miracula patrentur; Potestates, quod efficiant suo ministerio, ne potestates infernales hominibus noceant; Principatus, quod in divinorum mandatorum executione cœlestibus virtutibus principentur; Archangeli, quod (ut putat Gregorius) summa nuntient; Angeli denique, quod nuntient minima, nullamque in divinis nuntiandis singularem prærogativam habeant.

Sed hæc de Angelis satis sint. Qui plura nosse voluerit, consulat Dionysium de Cœlesti Hierarchiâ, Gregorium Magnum hom. 34. in Evangelia, Bernardum lib. 5. de Consideratione, Magistrum Sentent. lib. 2. dist. 9. & tandem S. Thomam 1. p. quæst. 107. & sequentibus.



## DISSERTATIO SECUNDA.

*De Vniversi Productione.*

*Not.* **M**oyſes toto priore Geneſeos capite deſcribit historicam aſpectabilis huius *Univerſi* productionem. Eam verò non divinâ tantum revelatione, ſed etiam humanâ didicerat, ſcilicet Majorum ſuorum traditione, & quidem facili ac breviffimâ: ab Adamo nimirum per Mathuſalem, Sem, Iſaacum, Levi, & Amram patrem ſuum, quæ in ſuum librum retulit, acceperat. Non aliam hîc adhibebimus methodum, quàm quæ à ſacro illo ſcriptore fuit adhibita; hoc eſt, ſigillatim recenſebimus opera, quæ intra ſex dierum ſpatium, intra quod mundum conditum fuiſſe ſcribitur, recenſuit.

## QUÆSTIO PRIMA.

*De opere diei primæ.*

**CONCL.** **D**iei primæ opera, ſunt cœlum, terra, lux, diviſio lucis à tenebris.

Probatur authoritate Moyſis, qui Geneſeos capite 1. ſic loquitur: *In principio creavit Deus cœlum & terram. Terra autem erat inanis & vacua, & tenebræ erant ſuper faciem abyſſi, & Spiritus Dei ferebatur ſuper aquas. Dixitque Deus, fiat lux: Et facta eſt lux. Et vidit Deus lucem quòd eſſet bona, & diviſit lucem à tenebris. Appellavitque lucem diem, & tenebras noctem: factumque eſt vespere & mane dies unus.*

Quæres 1. quinam sit sensus verborum quæ ex Moyse jamjam laudata sunt.

Resp. verba de quibus agitur, illustrari posse subsequente, & quidem brevi, commentario, quem ex doctissimo recentiore descripsimus. *In principio*, hoc est (secundum Augustini sententiam lib. 2. de Civit. Dei cap. 9.) ante omnia, *creavit*, produxit non ex præexistente materiâ, ut voluit Hermogenes apud Tertullianum, sed ex nihilo fecit; *Deus*, non Angeli (ut placuit Simoni Mago, ac aliis apud eundem Tertullianum, de Præscript. c. 36.) *cælum & terram*, supremam mundi partem & infimam, & quidquid earum ambitu continetur.

*Terra autem erat inanis & vacua*. Hebr. *Desolata & inanis*, sine plantis, sine animalibus. *Et tenebræ erant super faciem abyssi*, aded ut terra esset aquarum abyssu & tenebris obvelata. *Et Spiritus Dei*, quem pauci pro aere, & ferè omnes post Ambrosium lib. 1. cap. 8. in Hexam. pro Spiritu sancto accipiunt, *ferebatur super aquas*. Syr. Confovebat aquas, ad similitudinem aviculæ incubantis (ait Basiliius hom. 2. in Hexam.) vimque vitalem imprimendis in ea quæ ab ipsa foveantur. Idque non absque ratione (inquit Chrysostomus hom. 3. in Genesim) Scriptura divina præveniendò dicit, eò quòd postea dictura est nobis, quòd animalia ex aquis istis producta sint.

*Dixitque Deus, Fiat lux: Et facta est lux*. Dixit verbo sibi coæterno (ait Augustinus lib. 1. de Genesi ad literam, cap. 10.) id est immutabilis sapientiæ internis æternisque rationibus, non corporali sono vocis. *Et vidit Deus lucem quòd esset bona*, quia facta ad artis suæ, hoc est, æternæ sapientiæ regulas. Sed numquid nesciebat ante, quòd lux bona esset? Prorsus noverat: Verùm (ait Chrysostomus) demittit se, & juxta humanam consuetudinem hæc omnia loquitur beatus ille Propheta. Et quemamodum homines cum

magnum aliquid elaboraverint ... tunc tandem ... opus laudibus extollunt: ita & divina Scriptura solet & nunc, cum se ad aurium nostrarum infirmitatem demisit.

*Et divisit lucem à tenebris*, divisit, naturâ, loco, tempore. *Appellavitque lucem diem*, & *tenebras noctem*, hoc est, voluit appellari lucem non quancumque, sed quæ tenebris succedit, *Diem*, & tenebras quæ luci succedunt, *Noctem*. *Factumque est vespere & mane dies unus*, id est, ex nocte quæ incipit *vespere*, & ex die subsequente quæ incipit *manè*, factus est dies *unus*, hoc est, primus, phrasi hebraicâ, quâ numerus cardinalis pro ordinali ponitur.

Quæres 2. Quid intelligi debeat lucis nomine, quam Moyses scribit primâ die creatam fuisse.

Resp. varias esse de propositâ quæstione sententias. Alii Angelos, alii nubem, aut columnam, alii aliud corpus lucidum, quod successivè utrumque hemispherium pererraret, intelligunt. Sed operæ pretium est hîc sequi consilium Augustini lib. 2. de Gen. ad lit. c. 18. *Vt servata semper moderatione piæ gravitatis, nihil de re obscura temerè credamus: ne fortè quod postea veritas patefecerit, propter amorem nostri erroris oderimus.*

## Q U Æ S T I O II.

### *De opere secunda diei.*

CONCL. **O**pus secundæ diei non aliud fuit, quàm firmamentum.

Probatur autoritate Scripturæ quæ sic habet Geneseos 1. *Dixit quoque Deus, Fiat Firmamentum in medio aquarum, & dividat aquas ab aquis. Et fecit Deus firmamentum, divisitque aquas quæ erant sub firmamento, ab his, quæ erant*



*super firmamentum. Et factum est ita. Vocavitque Deus firmamentum, calum: & factum est vespere & mane dies secundus.*

Quæres 1. quid loco proximè laudato Scriptura intelligat firmamenti nomine.

Resp. intellexisse quidpiam extensum, quod aquas ab aquis dividat. *Fiat firmamentum: Quasi quis dicat humana lingua* (ait Chrysostomus hom. 4. in Genesim) *fiat paries quidam & interstitium, in medio dividens & separationem faciens.* An autem illud spatium sit aer, an verò corpus aliquod solidum, quod aere sit superius, non una est antiquorum sententia. Trita est, apud recentiores præsertim, opinio quæ docet firmamentum esse immensum illud aeris spatium, quod à terris ad empyreum usque protenditur; & in quo sidera, tanquam pisces in mari, postea collocata sunt, suosque agunt circulos.

Confirmant 1. ex eo quòd Scriptura non raro aeris nomine vocet substantiam illam, quam hîc firmamentum appellat, velut cum ait Psal. 146. *Qui operit calum nubibus: Matthæi 16. Triste & rubicundum calum.* Tritum est & illud: *Volucres cæli.* Confirmant 2. ex eo, quòd Moyses populari loquendi ratione usus sit: atqui fert popularis loquendi modus, ut aer, cæli nomine vocetur. Favet Augustinus lib. 2. de Genesi ad litteram, capite 4. ubi sic loquitur: *Talibus eorum disputationibus aliquis cedens ostendit, & ipsum aerem calum appellari, non solum sermone communi, sed etiam nostrarum Scripturarum autoritate, ubi legitur, Volatilia cæli.* Cum ergo probasset, & hunc aerem calum dici, nulla alia causa etiam firmamentum appellatum voluit existimari, nisi quia intervallum ejus dividit inter quosdam vapores aquarum, & istas aquas quæ corpulentius in terris fluiant. Quam considerationem laude dignissimam judico.

Quæres 2. quid intelligi debeat aquarum nomine,

mine, quas Moyſes ſcribit eſſe ſuper firmamentum.

Reſp. varias eſſe de illis aquis ſententias. Cenſent aliqui, aquas illas, licet noſtris puriores ſint, eiſdem nihilominus eſſe ſpeciei. Ita philoſophantur ii quibus placet, firmamentum eſſe corpus ſolidum. Si quis verò quærat ab iis authoribus, cuinam in eâ ſuppoſitione uſui ſint illæ aquæ; reſpondent, ibi collocatas fuiſſe, ut humore ſuo firmamenti celerrimum motum temperent. Alii verò, ii præſertim qui firmamentum aerem interpretantur, contendunt, aquas de quibus agitur, eſſe aquarum terreſtrium vapores tenuiſſimos, qui poſtea in nubes condenſati, pluviâ efficiunt. Hinc autem facilè intelligitur quâ ratione firmamentum, ſeu aer, dividat (ut ſcribit Moyſes) aquas ab aquis: nempe vapores, ſeu nubes, medio aere dividuntur ab aquis quæ in terris fluitant.

Quæres 3. cujus formæ ac figuræ ſint orbes cœleſtes.

Reſpondet Auguſtinus his verbis lib. 2. de Ge-  
neſi ad litteram, cap. 9. *Quæri ſolet, quæ forma & figura cœli eſſe credenda ſit ſecundum Scripturas noſtras. Multi enim multa diſputant de iſis rebus, quas majori prudentia noſtri authores omiſerunt, ad beatam vitam non profuturas diſcuntibus, & occupantes (quod peius eſt) multum pretioſa & rebus ſalubribus impendenda temporum ſpatia. Sed... breviter dicendum eſt, de figura cœli hoc ſciſſe Authores noſtros, quod veritas habet; ſed Spiritum Dei qui per ipſos loquebatur, noluiſſe iſta docere hominès, nulli ſaluti profutura.*

## QUÆSTIO III.

## De opere diei tertiæ.

**CONCL.** **D**ie tertiâ congregatæ sunt aquæ : terra facta est arida, & germinavit.

Probatur ex Scripturâ quæ sic habet Geneseos cap. 1. *Dixit verò Deus: Congregentur aquæ quæ sub celo sunt, in locum unum, & appareat arida. Et factum est ita. Et vocavit Deus aridam, Terram, congregationesque aquarum appellavit Maria. Et vidit Deus quod esset bonum. Et ait: Germinet terra herbam virentem, & facientem semen, & lignum pomiferum faciens fructum juxta genus suum, cujus semen in semetipso sit super terram. Et factum est ita. Et factum est vespere & mane dies tertius.*

Quæres 1. quis sit ille locus, in quem aquæ congregatæ sunt.

Resp. esse vel terræ cavitates, quibus maria continentur, vel meatus subterraneos, in quos aquæ defluunt, vel ipsam terræ superficiem, ad quam eadem aquæ decurrunt. Si quis autem roget modum quo facta sit ejusmodi aquarum congregatio, dicendum erit, die tertiâ, aquæ tenuis, ac nebulosæ voraginis, quâ ante cooperta erat terra, vastitatem inferiore sui parte condensatam, in uno consedisse loco. Favet Augustinus lib. 1. de Genesi ad litteram cap. 12. ubi sic loquitur : *Cum totam omnino terram undosa materia cooperiret, quò cederet, ut nudaret aliquas partes? An forte varior aqua velut nebula terras tenebat, quæ congregatione spissata est; ut ex multis partibus eas, in quibus arida possit apparere, nudaret? Ut autem aquæ illæ condensatæ, terræ sinu exciperentur, tellus ipsa quæ antea desinebat in æquabilem*  
omni

omni ex parte sphæram, in pluribus sui partibus altiùs depressa, & in immensum excavata est; Hincque factum est, ut alię illiùs partes in ingentem altitudinem elatæ sint, indeque surrexerint montes, qui quasi terræ tumores extiterint.

Quæres 2. quo sensu à Moyse dictum sit, aquas congregatas fuisse in unum locum.

Resp. 1. Moysen loqui de primariâ ac præcipuâ congregatione, quæ haud dubiè in unum locum facta est. Resp. 2. Scripturæ textum intelligi debere distributivè: *Congregentur aquæ omnes in unum locum*, hoc est, in suum quemque locum: ita ut licet plures sint collectiones, aqua tamen omnis certo ac præfinito sibi loco consistat.

Quæres 3. cur Moyses terram vocaverit *Aridam*.

Resp. id factum fuisse duplici de causâ. *Primò*, quòd per Dei imperium, aquis in terræ sinus congregatis, ejusdem terræ superficies exsiccata esset: *Secundò*, ut sciremus, terram, cum planè exsiccata esset, non sponte suâ, sed Dei virtute herbas ac fructus protulisse.

## QUÆSTIO IV.

*De operibus diei quarta & quinta.*

CONCL. I. **D**ie quartâ Deus produxit solem, lunam, stellas.

Probaturnarratione Moylis quæ sic habet Geneseos I. *Dixit autem Deus: Fiant luminaria in firmamento cæli, & dividant diem ac noctem, & sint in signa & tempora, & dies & annos, ut luceant in firmamento cæli, & illuminent terram. Et factum est ita: Fecitque Deus duo luminaria magna: luminare majus, ut præsetter diei, & luminare minus, ut præsetter nocti; & stellas. Et posuit*

*fuit eas in firmamento cæli.... Et factum est vespere & mane dies quartus.*

Quæres, quinam sit sensus singulorum verborum, quibus in eâ narratione Moyses usus est.

Resp. firmamenti nomine Moysen non intellexisse spatium illud, quod (ut secundâ quæstione dictum est) aquas ab aquis dividit; sed ingentem illum tractum qui ab aquis tenuioribus, quæ aeri supereminent, in immensum ferè protenditur. Solem & lunam vocat luminaria magna, non quidem respectu stellarum omnium: nimirum ex paralaxi (ut mathematici loquuntur) constat, stellas multò majores esse sive sole sive luna. Scribit, luminaria facta fuisse in signa, & tempora, & dies, & annos. *Non illa* (inquit Augustinus lib. 2. de Genesi ad literam, cap. 17.) *quæ observare vanitatis est, sed utilia, & usibus hujus vitæ necessaria:* Unde sequitur: *Et tempora;* hoc est, ut designent tempora, ver, æstatem, autumnum, hyemem, messem, vindemiam, aliaque hujusmodi quæ ad vitam sustentandam conferunt. Addit Moyses, *Et posuit eas in firmamento cæli*, non quidem quòd priùs illas fecerit, deinde posuerit in firmamento; sed quòd eas in ipso firmamento condiderit.

CONCLUSIO 2. Die quintâ Deus pisces & volucres ex aquis produxit.

Probatur hisce verbis Moysis, Geneseos cap. 1. *Dixit etiam Deus: Producant aquæ reptile animæ viventis, & volatile super terram sub firmamento cæli. Creavitque Deus cete grandia & omnem animam viventem atque motabilem, quam produxerant aquæ in species suas, & omne volatile secundum genus suum. Et vidit Deus, quòd esset bonum: Benedixitque eis dicens: Crescite & multiplicamini, & replete aquas maris: avesque multiplicentur super terram. Et factum est vespere & mane dies quintus.*

Quæres, quid ea Moysis verba significant.

Resp.

Reſp. Moſen per, *Reptile*, intellexiſſe piſces, qui cū pedibus careant, in aquā repunt, ſicut ſerpentes in terrā; piſces autem & aves ſcribit ex aquā effecta fuiſſe: *Quoniam* (inquit Baſilius homil. 8. in hexame.) *cognatio quadam eſt avium cum piſcibus. Etenim quemadmodum piſces aquam ſecant, pinnarum agitatione progrediētes: ſic idem in volucribus licet cernere. Per hæc alia verba, Cete grandia, author intelligit piſces illos ingentes, qui præ ſuā magnitudine montes videntur. Tandem per hæc alia, Benedixit eis, dicens: Crescite & multiplicamini, intellexit ſœcunditatem, quam tum piſcibus, tum avibus Deus impertitus eſt. Quærit Theodoretus, Cur Deus non benedixit plantis, animalibus autem dixit, Crescite? Reſpondet quæſtion. 7. in Geſenim: Deus pro nutu ſuo ſtatim univerſam terram replevit pratis, ſegetibus, & aliis omnis generis herbis, & arboribus: bruta verò animalia, bina creavit. Vnde merito benedictionem eis largitus eſt, ut per multiplicationem, quadam replerent maria, quadam aerem, nonnulla verò terram.*

## Q U Æ S T I O V.

### *De opere ſexta diei.*

CONCL. **D**e ſextā animalia & homo producta ſunt.

Probatur ex Geſenim capite 1. ubi hæc leguntur: Dixit quoque Deus, Producat terra animam viventem in genere ſuo, jumenta & reptilia & beſtias terra ſecundum ſpecies ſuas: factumque eſt ita. Et fecit Deus beſtias terræ juxta ſpecies ſuas, & jumenta, & omne reptile terræ in genere ſuo. Et creavit Deus hominem ad imaginem ſuam: ad imaginem Dei creavit illum: maſculum & ſeminam

*minam creavit eos . Benedixitque illis Deus , &c.*

Explicatur prior pars textûs ex Moyse laudati. *Producat terra animam viventem in genere suo :* hoc est, animalia viventia secundum suas species, quæ in tres classes distinguuntur, jumenta, à juvando dicta (nimirum hominibus tum ad laborem, ut equi & cameli, tum ad cibum, ut oves & vituli, necessaria sunt.) *Reptilia*, quæ super terram aut repunt, ut serpentes, vel saltitant, ut lacerti: *Bestias terræ*, sub quibus comprehenditur quidquid reliquum est, & maximè feræ, siue noceant veneno, siue minimè noceant. Nec enim citra peccatum nocuissent homini, ut etiam quondam in vipera & leonibus erga Paulum & Daniele demonstratum est. Vide Augustinum lib. 1. de Genesi contra Manichæos, cap. 1. Quæ autem ex putri materiâ nascuntur, ut pulices, ranæ, mures, non immediatè sunt à Deo producta, sed tantum mediatè, ex putri nimirum materiâ ex quâ deinceps per calorem genita sunt. Idem quoque dici debet de animalibus heterogeneis, ut sunt muli, leopardi: creatis enim eorum parentibus, virtute creata censentur.

Explicatur altera pars ejusdem textûs: *Et ait: in quæ quidem verba sic loquitur Ambrosius lib. 6. hexam. cap. 7. Non sibi utique, quia non dicit, faciam, sed, faciamus. Non Angelis, sed dicit Filio, etiamsi Iudæi nolint, etiamsi Ariani repugnent. Faciamus hominem.* Vide (ait Chrysostomus *homil. 8.* in Genesim) quanta verborum diversitas: non enim jam dicit: *Fiat homo*, sed quid? *Faciamus hominem.* *Ad imaginem & similitudinem nostram*, id est, ut sit imago quæ nos ipsos referat. Nec tamen hoc (ait Augustinus lib. 6. de Gen. ad literam, cap. 12.) *secundum corpus, sed secundum intellectum mentis*, quæ capax est intuitivæ Dei visionis, & perfectæ in eum charitatis. *Et præsit piscibus maris, &c.* ratione, ut videlicet intelligamus, (ait Augustinus lib. 3. de Gen.,

Gen. ad literam, cap. 20.) in eo factum hominem ad similitudinem Dei, in quo irrationabilibus animantibus antecellit. Addit Moyses, Masculum & feminam creavit eos; ac proinde corpore sexu distincto. Creavit quidem eodem die, sed non simul: nam primò solus Adam creatus est, cui Evam postea dedit in adiutorium. *Benedixitque illis & ait, Crescite: quibus quidem verbis Deus vim seminis ad procreandam prolem primis parentibus contulit: Sed (ait Augustinus) absit, ut credamus illos conjuges in paradiso constitutos, per libidinem impleturos fuisse, quod in sua benedictione Deus dixit, Crescite &c.* Subdit idem sanctus Scriptor, *Et dominamini piscibus maris, &c.* Nimirum par fuit, ut inferiora parerent homini, quandiu ipse Deo pareret. *Dixitque Deus: Ecce dedi vobis omnem herbam & universa ligna, &c. ut sint vobis in cibum.* Inordinate igitur se gerit ille qui eis non in cibum, sed in voluptatem abutitur.

Quæres 1. utrum sex illi dies quos Scriptura testatur Deum impendisse ad rerum omnium productionem, sint dies veri, an figurati tantum.

Resp. dies de quibus agitur, fuisse veros dies. Ratio est 1. quia res quæ sex diebus factæ sunt, res sunt veræ, ut unanimi consensu Patres adversus Origenem demonstrant: ergo & dies, quos Deus ad rerum productionem impendit, sunt dies veri: nempe Scriptura eodem modo loquitur de iis diebus, quo de rebus quæ intra dies illos factæ sunt. Ratio est 2. quia Scriptura figuratè sumi non debet, cum nulla ad id necessitas cogit: *Cum primitus (ait Augustinus lib. 8. de Civit. Dei, cap. 7.) proprie res ipsas intelligere ratio nulla prohibeat, cur non potius auctoritatem Scripturæ simpliciter sequimur in narratione rerum gestarum, res verè gestas prius intelligentes, tum demum quidquid aliud significant, perscrutantes?* atqui nulla necessitas cogit sumendi Scripturam figu-

ratè



ratè iis locis, in quibus loquitur de diebus quos Deus ad mundi productionem impendit; neque enim ex sensu literali aliquod sequitur absurdum: ergo, &c. Ratio est 3. quia diebus de quibus agitur, successit cessatio ab omni opere; *Sex enim diebus* (ait Scriptura Exodi 20.) *Fecit Dominus cælum & terram, & mare, & omnia quæ in eis sunt, & requievit in die septimo: idcirco benedixit Dominus diei Sabbati, & sanctificavit eum*: at sex diebus non successisset (in oppositâ sententiâ) cessatio ab omni opere, nec actio quæ præcessisset, fuisset causa huiusmodi cessationis: quod tamen asserit Scriptura, cum utatur particulâ causali, *Enim*, dicens: *Sex enim diebus* &c.

Objicies 1. Augustinus lib. xi. de Civit. Dei, cap. 7. scribit, dies de quibus agitur, esse figuratè sumendos. Nempe docet, sex illos dies non aliud esse, quàm angelicas cognitiones rerum quas à Deo, uno ac eodem die, imò & eodem instanti productas esse contendit: Ita ut dies prima, sit angelica cognitio lucis; dies secunda, cognitio firmamenti; & sic de aliis eo ordine quo in Scripturis describuntur: vespera sit cognitio creaturæ in se ipsa, manè è contra sit cognitio quâ cognoscitur in Verbo; hîc quidem clariùs, illic autem obscuriùs. Rationes verò quibus S. Doctor nititur, hæ sunt. *Prior*, Non fuerunt distincti dies ante solis productionem: ergo saltem tres priores figuratè sumi debent. *Alterâ*, Scriptura Ecclesiast. 18. testatur, omnia simul creata fuisse: *Qui vivit in æternum* (inquit) *creavit omnia simul*.

Resp. dist. ant. Augustinus scribit, dies de quibus agitur, figuratè summi debere, & illi passim alii Patres contradicunt, ipseque eo in capite à suis principiis recedere videtur, conc. ant. Et illi passim alii Patres non contradicunt, nec eo in capite à suis principiis recedere videtur, neg. ant. Augustino, in capite de quo agitur, alii Patres  
non

non subscripserunt: scilicet timuerunt, ne totam Scripturarium fidem, quantum ad res gestas attinet, enervarent, nisi & dies, & quæ diebus illis creata narrantur, propriè & non figuratè sumerentur. Præterea nulla cogit necessitas dies illos sumendi figuratè; ac proindè Augustinus à suis principiis recessisse videtur, cum naturalem & literalem sensum admittere detrectavit.

Quæ autem prolatae sunt ab Augustino rationes, necessario non concludunt. Nam 1. Basiliius hom. 2. in hexam. modum tradit, quo tres primi dies sine sole peracti sunt: *Tunc verò fiebat dies*, (inquit) *cui cedenti nox vicissim succedebat; non quidem secundum motionem solis, sed primigenia illa luce suum splendorem diffundente, sequo rursus contrahente, idque pro mensura à Deo definita.* 2. Cum Scriptura dicit, omnia creata fuisse simul, intelligitur de simultate rerum, non autem de simultate temporis: ita ut sensus sit, nihil esse quod à Deo creatum non sit. Solutio illa confirmari potest ex eo, quodd loco adverbii *Simul*, in græco textu legatur, *Communitè*, hoc est, sine exceptione. Præterea etiam si daretur, omnia esse creata simul simultate temporis, non inde tamen sequeretur, veros non esse dies de quibus agitur. Nempè Deus veros dies impendisset ad creationem rerum aliarum, non quidem sumptarum secundum substantiam, sed tantum secundum modum, hoc est, secundum ornatum & situm in quo collocatae sunt.

Quæres 1. utrum dies nocte prior fuerit, an verò nox præcesserit diem.

Resp. probabilior nobis videri sententiam quæ asserit, noctem præcessisse diem. Ratio est 1. quia cælum & terra facta sunt ante creationem lucis: ergo nox præcessit diem. 2. Tempore legis Mosaicæ, dies à vespera (quæ per synecdochen pro nocte sumitur) incipiebant, ut

ut patet ex Levitici cap. 23. ubi Dominus jubet ut à vespere à vespere sabbata celebrentur : atqui id præceptum est , quòd Deus sabbatum , quo ab omni opere cessavit , inchoasset à nocte quæ septimam diem præcessit : 3. Sententiæ quam propugnamus, subscribunt multi Patres, inter quos Hieronymus in illud Jonæ capitis secundi : *Et erat Jonas in ventre piscis tribus diebus & tribus noctibus*, sic loquitur : *Nam & in Genesi nox non præcedentis diei est, sed sequentis*, hoc est , principium futuri , non finis præteriti.

Objicies. In Genesi dies ante noctem nominatur : *Appellavitque lucem diem, & tenebras noctem*. 2. Post illa verba, hæc habentur : *Factumque est vespere & mane dies unus*, id est, primus.

Resp. ad 1. dist. ant. Appellavit lucem diem, & tenebras noctem, non servans ordinem temporis, conc. ant. & servans ordinem temporis, neg. ant. Idem Moyses in suâ narratione præmisit diem nocti, quòd immediatè ante verba, de quibus est quæstio : *Appellavitque lucem diem*: locutus fuisset de luce : *Et vidit Deus lucem quòd esset bona: & divisit lucem à tenebris*: igitur ut repetitionem vitaret, statim de eadem luce subjunxit : *Appellavitque lucem diem*. Confirmatur solutio ex aliis Scripturæ locis, in quibus servato temporis ordine, nox præmittitur diei : *Nox & dies* ( Genesi 8. ) *non deficient*. Idem pariter ordo servatur in cantico trium puerorum : *Benedixite noctes & dies Domino*.

Resp. ad 2. dist. ant. factum est vespere & mane dies unus, ita ut vespera, hoc est, nox, præcesserit mane, conc. ant. ita ut non præcesserit, neg. ant. Equidem vespera de quâ Moyses loquitur, conjuncta cum mane, hoc est, cum die proximè sequente, constituit primam diem, sed non constituit conjuncta cum mane, hoc est, cum luce præcedente : nec enim tunc, seu cum  
Deus

Deus creauit cœlum & terram, adhuc creata fuerat lux, quæ per illud mane intelligitur. Confirmatur responsio ex eo, quodd secundum Hebræum loquendi morem vespera per synecdochen sumatur pro nocte, & mane pro die quæ sequitur noctem: id enim videre est Marci c. i. *Vespere autem facto cum occidisset sol: Capite ultimo: Valdè mane orto jam sole.*

Quæres 3. quâ anni tempestate conditus sit mundus, seu in quo Zodiaci signo sol à Deo primum constitutus sit.

Resp. varias esse de propositâ quæstione sententias. Theodoretus putat, mundum verno tempore fuisse productum: *Nam* (inquit quæst. 72. in Exodum) *ineunte vere prata florent, & segetes fluctuant, & fructum arbores emittunt.* Contra Lyranus, Abulensis, Pererius & alii plures censent, mundum autumnali tempore conditum fuisse.

Confirmant 1. ex eo quodd eâ anni parte, non autem verno tempore, fructus maturi sint & ad cibum apti. 2. Ante Moysen autumnus erat anni civilis initium; unde & æstatis exitus (Exodi 23. & 24.) finis anni vocatur.

Nec est, quodd quis opponat praxim Judæorum qui annum sacrum à mense Nizan, seu æquinoctio verno incipiunt. Nempè constat id à Moyse primum institutum fuisse, cum antea ab autumno initium duceret. Vide Pererium libro 1. Comment. in Genesim, ad opus tertiæ diei; Serarium in caput. 5. Josue quæstione 27. & alios Scripturarum interpretes.

DISSERTATIO TERTIA.

*De primo homine.*

Not. **Q**Uæ spectant ad primum hominem, reducuntur ad illius creationem; ad dotes quas accepit ab authore suo; ad peccatum cujus per inobedientiam reus factus fuit: de iis igitur, tribus subsequenter quæstionibus nobis agendum incumbit.

QUÆSTIO PRIMA.

*De primi hominis creatione.*

Not. **P**rimi hominis creatio complectitur modum quo productus est à Deo; locum & statum in quo conditus fuit.

CONCLUSIO I. Primus homo corpore & animâ donatus est à Deo.

Probatur autoritate Scripturæ, quæ sic habet Geneseos 2. *Formavit igitur Deus hominem de limo terræ, & inspiravit in faciem ejus spiraculum vitæ, & factus est homo in animam viventem.* In his verbis: *Formavit Deus hominem*, totum, seu homo, pro parte, hoc est, corpore, sumitur: in his aliis *Spiraculum vitæ*, intelligitur anima quæ vitæ principium est & origo; tandem hæc alia: *Et factus est homo in animam viventem*, significant, ex unione corporis cum animâ hominem factum esse animal vivens, nempe anima quæ pars est hominis, per synecdochen sumitur pro toto quod ex utriusque partis, corporis nimirum & animæ, conjunctione resultat.

Quæ-

Quæres 1. cur Deus primi hominis corpus ex limo formaverit.

Resp. Deum hominis corpus ex limo formasse, ut illius immortalitas, non naturæ, sed gratiæ tribueretur: *Quid mirum* (inquit Augustinus lib. 2. de Genesi ad literam contra Manichæos agens, cap. 7.) *aut difficile Deo, etsi de limo istius terræ hominem fecit, tale tamen corpus ejus efficere, quod corruptioni non subjaceret, si homo præceptum Dei custodiens peccare nolisset?*

Verum licet hominis corpus id habeat commune cum bestiis, quod ex limo formatum sit: tamen illius fabrica, bestiarum corporibus longè antecellit. Nam 1. corporis figurâ non proni, sed erecti sumus: 2. sic dispositum est corpus, ut homo judicet, ipsum factum esse ad animæ rationalis ministerium: 3. Tam numerosa est partium omnium congruentia, ut vix judicari possit, an in eo condendo major sit utilitatis habita ratio, quàm decoris: 4. In ipsis etiam partibus quæ non apparent, tanta est proportio, ut ex illius contemplatione mens mirum in modum delectetur: 5. Sunt quædam in humano corpore, quæ decori tantum, non autem usui inserviunt: ex is autem omnibus patet, in formatione corporis dignitatem necessitati fuisse prælatam. Vide rationes illas fusè pertractatas apud Augustinum pluribus capitibus libri de Genesi ad literam.

Quæres 2. cur Scriptura loquens de homine, dicat, Deum formasse illius corpus ex limo, animam verò inspiratæ in faciem ejus.

Resp. Scripturam eum loquendi modum adhibuisse, ut significaret, hoc esse discrimen inter corpus & animam, quod illud ex præsupposito subjecto, limo nimirum, productum sit, anima contra educta non sit ex subjecto, sed ex nihilo ac proindè per creationem producta sit: *Hoc testimonio* (inquit Augustinus lib. 7. de Genesi ad literam, cap. 18.) *sanè satis admonemur, ex nihilo*

*hilo Deum fecisse animam, quam primo homini dedit, non ex aliqua jam facta creatura sicut corpus ex terra; & ideo cum redit, non habet quò redeat nisi ad authorem qui dedit eam, non ad eam creaturam ex qua facta, sicut corpus ad terram. Si quis autem roget, quo præcisè tempore creata sit anima, respondendum erit, tunc tantum productam fuisse, cum unita est corpori: nimirum Deus eam creando, corpori infudit. Ratio est, quia si extitisset aliquandiu ante suam cum corpore unionem, aliquid aut meruisset aut demeruisset; tunc enim aut creaturam aut Deum amasset: at dici non potest, quòd tunc aut meruerit aut demeruerit, cum juxta Apostolum de eo tantum judicandus sit homo, quòd in corpore suo gesserit, sive bonum sive malum.*

*Quæres 3. quando, ex quâ materiâ, & propter quid condita sit prima mulier.*

*Resp. ad 1. Evam, seu primam mulierem, immediate post Adami formationem productam fuisse. Et creavit Deus hominem ad imaginem suam: (inquit Scriptura Genes. 1.) ad imaginem Dei creavit illum; masculum & feminam creavit eos. Nec obstat, quòd eadem Scriptura Genes. capite 2. de mulieris formatione loquatur, cum e contra productionem hominis capite 1. recensuerit: Siquidem quæ scripta sunt cap. 2. non aliud sunt, quàm iterata, & quidem per compendium, narratio eorum quæ sextâ die facta fuerant: unde idem secundum caput non de mulieris tantum productione, sed etiam de Adami formatione loquitur.*

*Resp. ad 2. primam mulierem factam fuisse 1. de viro suo Adamo: 2. de viro dormiente: 3. de latere viri: 4. de costâ ejus: 5. pro costâ detractâ, substituta est caro; scilicet omnes illæ circumstantiæ Geneseos cap. 2. sigillatim recensentur: de iis autem sic loquitur Augustinus lib. 12. de Civitate Dei, cap. 23. Hæc autem fabulosa potius quàm vera esse arbitrantur, qui virtutem*

ac sapientiam Dei, quæ novit & potest etiam sine seminibus ipsa certè facere semina, ex his usitatis & quotidianis metiuntur operibus. Ea verò quæ primitus instituta sunt, quoniam non noverunt, infideliter cogitant. Deus autem fecit mulierem ex viro, ut commendaret unitatem; non fecit ex capite, ne dominetur; non ex pedibus, ne serviat; sed ex costâ, ut vitæ socia sit. Addit Scriptura, eam Adamo fuisse datam in adjutorium; eo quòd data sit tantùm ad filiorum generationem: Non enim video (ait Augustinus lib. 9. de Gen. ad literam cap. 7.) ad quod aliud adjutorium mulier facta sit viro, si generandi causa subtrahatur. Circumstantias illas mysticè variis in locis explicuit idem Augustinus, sed satis sint quæ de iis habet tractatu 9. in Joannem: Dormit Adam (inquit) ut fiat Eva: moritur Christus ut fiat Ecclesia. Dormienti Adæ fit Eva de latere, mortuo Christo lancea percutitur latus, ut profluant Sacramenta, quibus formetur Ecclesia.

CONCLUSIO 2. Adam & Eva extra paradysum voluptatis creati sunt, sed paulò post in eum translati fuère.

Probatur. Gen. c. 2. hæc habentur: Tulit ergo Dominus Deus hominem, & posuit eum in paradiso voluptatis, ut operaretur & custodiret illum. Ex illis vocibus, Tulit, Posuit, Tertullianus lib. 2. contra Marcionem, & Bahlius hom. de paradiso, colligunt, primos parentes extra paradysum à Deo creatos fuisse. In eo autem non multò post positi sunt, ut operarentur per agriculturam (ait Augustinus lib. 8. de Genesi ad literam, cap. 10.) non laboriosam, sed deliciosam. Et ut custodirent illum, ipsi sibi (ait idem S. Doctor) ne aliquid admitterent, quare inde mererentur expelli.

Quæres 1. in quâ orbis parte situs esset paradysus voluptatis.

Resp. inutile esse id quærere, inutilius investigare, temerarium definire, noxium de eo li-



ligere : *Nempè melius est* ( inquit Augustinus lib. 8. de Gen. ad lit. cap. 8. ) *dubitare de occultis , quàm litigare de incertis*. Hinc ibidem , cap. 7. paradisum illum dicit, *locum à cognitione hominum remotissimum*.

CONCLUSIO 3. Adamus creatus est in statu gratiæ sanctificantis.

Probatur 1. Ex Augustino , natura humana sine vitio , sine culpâ , salva & incolumis , à Deo creata est : *Creatus est* ( inquit serm. 11. de verbis Apost. cap. 2. ) *primus homo in natura sine culpa , in natura sine vitio* : atqui , juxta ejusdem S. Patris doctrinam , salvum , sanum , sine culpâ , sine vitio esse , non aliud est , quàm esse in statu gratiæ sanctificantis ; qui enim est sine vitio , sine culpâ ; qui salvus est & incolumis , jus habet ad beatitudinem æternam : nempè ( ut ait lib. 1. de peccatorum meritis , cap. 24. ) *À salute & vita æterna hominem nisi peccata non separant*. Unde lib. de peccato originali , cap. 13. concludit adversus Pelagianos , infantes qui sine baptismo moriuntur , si innoxii sint , ( ut asseriebant hæretici ) hoc est , *si sine vitio procreentur , hoc solum in se habentes , quod Deus condidit* , consequi debere , non vitam æternam tantùm , quam Pelagiani distinguebant à regno cœlesti ; sed ipsum etiam regnum cœleste , quod quidem positum est in intuitivâ Dei visione .

Probatur 2. Adamus aut cum sapientiâ aut cum stultitiâ conditus fuit ; non enim datur medium : *Nemini dubium est* ( inquit Augustinus ) *omnes homines , aut stultos , aut sapientes esse*. Non fuit verò conditus cum stultitiâ : nempè conditus est ( ut jam dictum est ) sine vitio , proindeque sine stultitiâ quæ magnum est vitium : atqui si Adamus conditus fuit cum sapientiâ , sequitur eum quoque conditum fuisse in statu gratiæ sanctificantis ; siquidem ea sapientia non erat sine charitate : scilicet Augustinus lib. 2. de libero arbitrio , cap. 9. definit , sapientiam non aliud esse quàm

quàm veritatem in qua cernitur ( saltem imperfectè ) & tenetur summum bonum .

Probatur 3. Ille creatus est in statu gratiæ sanctificantis, qui creatus est cum perfectâ charitate: nempe perfecta charitas necessariò confert sanctitatem subjecto in quo reperitur: atqui Adamus creatus fuit cum perfectâ charitate: siquidem ille creatus est cum perfectâ charitate, qui creatus est cum voluntate omni ex parte bonâ , hoc est nulli admixtâ malo: nimirum bona voluntas & charitas sunt unum & idem: *Quasi verò* ( inquit Augustinus lib. de Gratiâ Christi, c. 1. ) *aliud sit bona voluntas , quàm charitas , quam Scriptura nobis esse clamat ex Deo .* Sed Adamus creatus est cum voluntate , omni ex parte , bona , quia creatus est rectus: rectitudo autem idem est cum bonâ voluntate: *Fecit Deus* ( ait idem S. Doctor lib. 4. de Civit. Dei, cap. xi. ) *sicut scriptum est , hominem rectum , ac per hoc voluntatis bonæ: non enim rectus esset , bonam non habens voluntatem : bona igitur voluntas opus est Dei .*

Probatur 4. Ille conditus est in statu gratiæ sanctificantis, qui conditus est cum integritate , cum salute quæ sine gratiæ auxilio servari non possunt: integritas enim & salus quæ sine gratiæ auxilio servari non possunt, ordinis sunt supernaturalis: atqui Adamus conditus est cum integritate & salute quæ sine gratiæ auxilio servari non potuerunt: *Natura humana* ( ait Augustinus Epist. 106. ) *etiamsi in illa integritate , in qua condita est , permaneret , nullo modo se ipsam , creatore suo non adjuvante , servaret .* Illud autem creatoris auxilium esse gratiam ordinis supernaturalis apertè definit Concilium Arausicanum can. 19. qui confectus est ex mox laudatis Augustini verbis; sic enim habet: *Natura humana , etiamsi in illa integritate , in qua condita est , permaneret , nullo modo se ipsam , creatore suo non adjuvante , servaret . Unde cum sine gratia Dei salutem non possit*

*custodire, quam accepit, quomodo sine Dei gratia poterit reparare, quod perdidit?*

Objicies. Ille non fuit creatus in statu gratiæ sanctificantis, qui tunc tantum factus est homo spiritualis, cum à Deo positus est in paradiso voluptatis; nam Adamus (ut superius dictum est) extra illum paradisum efformatus est: atqui Adamus tunc tantum factus est spiritualis, cum à Deo positus est in paradiso voluptatis: nempe S. Augustinus lib. 2. de Genesi contra Manichæos, cap. 8. tractans illum Scripturæ locum: *Insufflavit in faciem ejus spiraculum vitæ*, sic loquitur: *Nondum tamen spiritalem hominem debemus intelligere, qui factus est in animam viventem, sed adhuc animale. Tunc enim spiritualis effectus est, cum in paradiso, hoc est, in beata vita constitutus, præceptum etiam perfectionis accepit, ut verbo Dei consummaretur: ergo, &c.*

Resp. ad 1. conc. maj. neg. min. Ad 2. dist. ant. Et illæ voces, *Nondum, Tunc*, significant tantum ordinem narrationis, conc. ant. Et significant præterea ordinem rerum gestarum, neg. ant. Hoc est, S. Augustinus eò loci non aliud vult, quam quòd Scriptura prius narret hominis creationem, quam illius sanctificationem per gratiam. Illam contendit significatam fuisse hisce verbis: *Insufflavit in faciem ejus spiraculum vitæ*; istam verò his aliis: *Et posuit eum in paradiso voluptatis*.

Objicies 2. Angeli omnes conditi non sunt in statu gratiæ sanctificantis: ergo nec primi parentes.

Resp. neg. ant. apertè nimirum repugnat Augustino, qui (ut superius observavimus agentes de Angelorum creatione) sic loquitur lib. 12. de Civit. Dei, cap. 9. *Et istam, bonam voluntatem, quis fecerat, nisi ille, qui eos cum bona voluntate, id est, cum amore casto, quo illi adhærent, creavit, simul in eis & condens naturam, & largiens gratiam? Unde sine bona voluntate, hoc est Dei*

*Dei amore, nunquam sanctos Angelos fuisse, credendum est. Addit ibidem S. Doctor, eum amorem non aliud esse, quam charitatem quæ sanctos homines justificat: mox enim scribit de sanctis Angelis posse dici, quod charitas Dei diffusa sit in eis per Spiritum sanctum, qui datus est eis. In ea autem verba observare est, bonam voluntatem vocari amorem castum, amorem qui per gratiam datur, charitatem quæ per Spiritum sanctum diffunditur in sanctorum hominum cordibus: hincque concludi potest, Augustinum per bonam voluntatem, in quâ non semel asserit, Adamum fuisse creatum, non aliud intelligere, quam amorem castum, amorem qui per gratiam datur, charitatem quæ in cordibus sanctorum hominum per Spiritum sanctum diffunditur; ac proinde non minus aperte docuit, primos parentes in statu gratiæ sanctificantis conditos fuisse, quam sanctos Angelos.*

Quæres, utrum sit de fide, primum hominum parentem conditum fuisse cum gratiâ sanctificante.

Respondet affirmativè Jansenius Yprensis libro de gratiâ primi hominis, cap. 1. *Existimamus (inquit) non posse in controversiam rem istam revocari, sed tanquam in Ecclesia definitam, & si de certam debere supponi.* Respondet Estius, cui subscribimus, negativè. Ratio est 1. quia Ecclesia expressè (quod tamen, ut agentes de propositionum censuris, tom. 1. diximus, requiritur ad articulum fidei, qui alioquin explicitè non continetur in Scripturis,) nullibi definiit, rectitudinem, integritatem, in quibus creati fuerunt primi parentes, esse à gratiâ sanctificante. 2. Scotistæ, quorum hoc in capite sententiam Ecclesia nullo aperto decreto proscripsit, contendunt, primam justitiam, rectitudinem primorum parentum fluxisse à quodam naturalis integritatis dono, quod quidem (aiunt) postea, cum nimirum Adamus positus est in paradiso voluptatis, perfectum & consummatum fuit per gratiam

ſanctificantem. 3. Præcipua adverſariorum ratio petitur ex his verbis Concilii Tridentini, ſeſſ. 5. *Si quis non conſitetur, primum hominem Adam, cum mandatum Dei in paradifo fuiſſet tranſgreſſus, ſtatim ſanctitatem & juſtitiam, in qua conſtitutus fuerat, amiſſiſſe, anathema ſit*: Atqui verba illa non probant, fide certum eſſe Adamum in gratiâ ſanctificante conditum fuiſſe: Siquidem ( ait Eſtius ) aliud eſt creatum eſſe in juſtitiâ, & ſanctitate, aliud in eâ conſtitutum fuiſſe; nam & in paradifo conſtitutus, id eſt, poſitus fuit primus homo, Genefis 2. quamvis in eo creatus non fuerit. Nec obſtat argumentum Janſenii ſcribentis, Concilium Tridentinum per vocem, *Conſtitutum*, intellexiſſe *Conditum*, ed quòd ( inquit ) Concilia & Scripturæ, quas Concilium Tridentinum ſe dicit ſequi, indicent, Adamum non alio tempore *conſtitutum fuiſſe in ſanctitate*, quàm cum creatus eſt. Non obſtat ( inquam ) illud argumentum: nam licèt ſit pluſquam probabile, vocem, *Conſtitutum*, quâ Concilium Tridentinum utitur, ſumi pro, *Conditum*; id tamen non eſt de fide: ſiquidem ſacra ſynodus ( ut teſtantur hiſtorici qui illius acta deſcripſerunt ) de indiſtriâ vocem, *Conſtitutum*, adhibuit, deleriſſeque juiſſit vocem, *Conditum*, quam decreti confeſſores primùm inferuerant; ne ſcilicet damnarentur theologi ( alioquin Catholici ) qui negaverant, primum hominem in ſtatu gratiæ ſanctificantis creatum fuiſſe. Ex his quæ hucusque dicta ſunt, patet in capite de quo agitur, hoc unum eſſe de fide, primos parentes charitate & ſanctitate donatos fuiſſe, antequam in peccatum laberentur.

CONCLUSIO 4. Adamus creatus fuit beatus beatitudine, non perfectâ quidem, ſed imperfectâ.

Probatur. *Primò*, Adamus ſtatim dilexit bonam voluntatem in quâ conditus fuerat: at dilectio bonæ voluntatis, inchoata fuit in illo beatitudo:

tudo: scribit enim Augustinus lib. 1. de liber. arbitrio, cap. 13. planè beatum esse hominem dilectorem bonæ voluntatis suæ: nam (inquit) *hoc gaudium quod hujus boni adeptione gignitur, etiam tranquille, & quietè, & constanter erigit animum, beata vita dicitur: nisi tu putes aliud esse beatè vivere, nisi veris bonis, certisque, gaudere.*

Secundò, in paradiso nullum aderat malum quod primi parentes timerent, nullumque aberat bonum, quod justè cuperent: *Quid timere vel dolere poterant illi homines* (inquit Augustinus lib. 14. de Civit. Dei, cap. 10. *in tantorum tanta affluentia bonorum, ubi nec mors metuebatur, nec ulla corporis mala valetudo? nec aberat quidquam quod bona voluntas adipisceretur; nec inerat quod carnem, animumve hominis feliciter viventis offenderet: atqui beatitudo, saltem imperfecta, in eo posita est, quòd nullum adsit malum quod timeatur, nullum absit bonum quod justè desideretur.*

Tertiò, beatitudo posita est in pace, in immortalitate, in securitate: atqui iis bonis Adamus innocens in paradiso fruebatur: *Nulla rixa* (inquit Augustinus lib. de Corrept. & Gratiâ, cap. xi.) *à se ipso adversus se ipsum tentatus, atque turbatus, in illo beatitudinis loco, sua secum pace fruebatur.* Ejusdem libri cap. 10. docet, Adamum potuisse & non mori, & certam facere suam beatitudinem, si voluisset: *Hominem* (inquit) *fecit cum libero arbitrio, & quamvis sui futuri casus ignarum, tamen idèò beatum, quia & non mori, & non miserum fieri, in sua potestate esse sentiebat.* In quo statu recto ac sine vitio si per ipsum liberum arbitrium manere voluisset, profectò sine ullo mortis & infelicitatis experimento, acciperet illam merito hujusmodi permansionis, beatitudinis plenitudinem, qua & sancti Angeli sunt beati, id est, ut cadere non posset ulterius: & hoc certissimè sciret. Vide quæ de Angelorum beatitudine dissertatione 2. dicta sunt.

Probatum altera conclusionis pars, seu, perfecta beatitudo non fuisse primorum parentum in paradiso beatitudinem. Perfecta beatitudo posita est in intuitivâ Dei visione: atqui primi parentes in paradiso fructi non sunt intuitivâ Dei visione: nam 1. intuitiva Dei visio necessariò importat impeccabilitatem in subjecto qui eâ fruitur: atqui impeccabilitas locum non habuit in primis parentibus existentibus in paradiso voluptatis; reverà enim peccarunt, licet potuerint non peccare: *Possset ergò permanere si vellet* ( inquit Augustinus lib. de Corrept. & Gratiâ, cap. xi. ) *quia non deerat adjutorium, per quod possset, & sine quo non possset perseveranter bonum tenere quod vellet. Sed quia noluit permanere, profectò ejus culpa est, cujus meritum fuisset, si permanere voluisset.* 2. In primis parentibus, Augustino teste lib. 14. de Civit. Dei, cap. 16. flagrabat charitas in Deum de corde puro, & conscientiâ bonâ, & fide non fictâ: at fides componi non potest cum Dei possessione, quæ quidem in intuitivâ Dei visione consistit. 3. Primi parentes non ampliori donati sunt privilegio, quàm S. Angeli: Sed ( ut suo loco probatum est ) S. Angeli dum essent in viâ, donati non sunt intuitivâ Dei visione: ergo, &c.

Objicies. Perfecta beatitudo & Dei visio sunt unum & idem: atqui Adamus in paradiso fructus est Dei visione, ut his verbis docet Augustinus in Psal. 70. Serm. 7. *Dicatur mihi, quid illi deerat in paradiso constituto, in media opulentia, mediisque deliciis, cui magnæ deliciæ erant ipsa visio Dei, cujus faciem quasi inimici timuit post peccatum?*

Resp. dist. maj. Perfecta beatitudo & Dei visio intuitiva, seu Dei, prout in se est, sunt unum & idem, conc. maj. visio abstractiva, seu Dei cognitio per creaturas, neg. maj. Hâc visione, non autem illâ, Adamus in paradiso fruebatur.

## Q U Æ S T I O II.

### *De dotibus hominis innocentis.*

**Nos.** **H**ominis innocentis dotes numerari non possunt: cum enim homo innocens immediatè prodierit à Deo, sitque illius imago, par fuit, ut omnibus virtutibus donaretur quæ naturæ adeò sublimi convenirent. Methodi causa eas omnes reducemus ad virtutes, quæ spectant ad intellectum, voluntatem, corpus. De iis igitur subsequentiis conclusionibus est agendum.

### C A P U T P R I M U M.

#### *De dotibus ad intellectum hominis innocentis spectantibus.*

**CONCL. I.** **H**omo innocens per infusionem, habuit eam rerum scientiam, quam procedente tempore sibi proprio Marte comparare potuisset.

Probatur 1. Homo conditus fuit, ut foret totius naturæ princeps; 2. nomen imposuit omnibus rebus corporeis; 3. præpositus est dux omnium qui ex eo oriundi erant: ergo par fuit ut Deus ei rerum omnium naturalium cognitionem, hominum regendorum normam, infunderit.

**CONCLUSIO 2.** Homo innocens errare non potuit.

Probatur. Primò, errare non potuit in iis, quorum notitiam à Deo acceperat: nempe Deus non potest aut falli, cum sit summè sapiens, aut fallere, cum sit summè bonus: 2. Errare non potuit in iis, quorum notitiam nondum acceperat:

Z 5 scili-



scilicet cum esset sapientissimus, temperabat ab affirmatione aut negatione rerum, quas certò non noverat: 3. Errare pariter non potuit in rebus quæ per sensus cognoscuntur, quia quandiu ratio remansit Deo subdita, phantasmata rationem sibi subdicere non potuerunt: 4. A nullo decipi potuit; non ab alio homine, cum solus esset; non ab Angelo sancto: nemo enim (ait Augustinus) authore sancto fit deterior; non etiam à dæmone, quippè sciebat illum esse mendacii parentem: 5. Tandem errare non potuit in iis quæ ad mores & pietatem spectant: siquidem error ille magnum fuisset malum: at malum omne aberat à beato statu, in quo constitutus fuerat homo innocens. Præterea, *Approbare falsa pro veris, ut erret invitus, non est* (ait Augustinus lib. 3. de libero arbitrio, cap. 18.) *natura instituti hominis, sed pœna damnati*: Ergo homo, quamdiu stetit in statu innocentie, nullâ erroris specie potuit errare. Vide Augustinum lib. 14. de Civit. Dei, cap. 14.

Objicies 1. Prima mulier adhuc innocens decepta fuit à serpente: *Serpens* (inquit ipsa Genesis 3.) *decepit me & comedi*: ergo homo innocens errare potuit.

Resp. neg. ant. Ratio est, quia licet illam mulieris seductionem non præcesserit peccatum operis, præcessit tamen peccatum cordis; internæ nimirum elationis: dicit enim Augustinus lib. 11. de Genesi ad liter. c. 3. quod mulier verbo serpentis non crederet, nisi jam inesset mentis ejus amor propriæ potestatis, & quædam de se superba præsumptio.

Objicies 2. Adamus ideò comedit ex fructu vetito, quod per illius esum speraverit se (ut serpens promiserat) consecuturum æqualitatem cum Deo: *Scit enim Deus* (ait serpens Genesis 3.) *quod in quocumque die comederitis ex eo, aperti erunt oculi vestri, & eritis sicut dii, scientes bonum & malum*: ergo, &c.

Resp.

Resp. neg. ant. Ratio est 1. quia *Adam* (ait Apostolus 1. ad Timoth. 2.) *non est seductus, mulier autem seducta est.* 2. Sicut Salomon (ait recentior quidam in caput 3. Geneseos) blanditiis uxorum ad idola colenda cessit, nullo errore seductus; ita vir fœminæ, unus uni, homo homini, conjux conjugi, non tanquam verum loquenti credidit, sed sociali necessitudine paruit; & ita sciens, prudensque peccavit. Vide Augustinum libr. 14. de Civit. Dei, cap. II.

## C A P U T II.

*De dotibus ad hominis innocentis voluntatem spectantibus.*

Not. **Q**Uæremus hîc 1. utrum & quæ fuerint passiones in voluntate hominis innocentis; 2. utrum & quæ in eâ virtutes extiterint; 3. an in eâ locum habuerit concupiscentia.

CONCLUSIO I. Passiones quæ respiciunt malum pœnæ, non fuerunt in voluntate hominis innocentis; secûs verò eæ quæ ordinantur ad bonum.

Probatur prior pars. Passiones quæ respiciunt malum pœnæ, sunt timor & dolor: atqui nec timor, nec dolor fuerunt in voluntate hominis innocentis: *Timor quidem non erat:* (ait Augustinus libr. 14. de Civit. Dei, cap. 10.) *Quid enim timere poterant primi homines in tantorum affluentia bonorum, ubi nec mors metuebatur, nec ulla mala valetudo? Nec dolor, quando quidem nihil inerat, quod carnem, animumve hominis feliciter viventis offenderet..... Erat devitatio tranquilla peccati, qua manente, nullum omninò aliunde malum quod contristaret, irruebat.*

Probatur altera pars. Primò, passiones quæ sunt de bono præsentē, ut amor & gaudium,

fuisse in primis parentibus etiam ante peccatum, docet Augustinus loco proximè laudato: *Amor ( inquit ) erat in eis imperturbatus in Deum, atque inter se, conjugum fide, & sinceritate viventium, & ex hoc amore grande gaudium, non desistente quod amabatur ad fruendum.* 2. Inerant quoque, sed citra animi sollicitudinem, passionēs quæ respiciunt bonum absens, sed habendum suo tempore: nimirum erant in eis desiderium & spes æternæ beatitudinis, quam noverant per fidem, & quæ eis servabatur in præmium. 3. Quæ in primis parentibus inerant passionēs, aliter sunt in nobis, aliter erant in eis: in nobis enim nonnunquam præveniunt, & perturbant rationis usum; in eis verò nec præveniebant, nec perturbabant usum rationis, sed ipsi in omnibus obsequebantur.

CONCLUSIO 2. Nullus omninò concupiscentiæ motus locum habuit in Adamo innocente.

Probatur. Concupiscentiæ nomine intelligitur propensio ad actum rationi oppositum, idque ad discrimen alterius concupiscentiæ, quæ fertur ad actum rationi consentaneum: prioris generis est ea de quâ dicit Apostolus ad Gal. 5. *Spiritus concupiscit adversus carnem*: atqui in Adamo innocente non fuit propensio ad actum rationi oppositum: ergo, &c. Minor propositio, in quam vertitur difficultatis cardo, subsequētib; momenti ostenditur.

*Primò*, Propensio ad actum rationi oppositum non est vel sine peccato, vel sine bello: scilicet aut ratio illi subjicitur, & tunc est peccatum; vel ipsa subjicitur rationi, & tunc est bellum: atqui in Adamo innocente nec peccatum fuit nec bellum: *Si talis erat, qualis nunc est* ( inquit Augustinus lib. 1. operis perfect. cap. 7. ) *vel illi resistebatur per temperantiam, vel per intemperantiam cedebatur: ac sic homo libidini aut peccando servire cogeatur, aut bello intimo repugnare* 2  
quo-

*quorum alterum honestati, alterum paci felicitatis illius, si humanum sensum habetis, non convenire sentitis.*

*Secundò, Propensio ad actum rationi oppositum, statim post peccatum exorta est in primis parentibus. Tunc enim exorta est, cum de suâ nuditate erubuerunt; nimirum erubescencia nata est ex eo, quòd primi parentes aliquid inordinatum experti sint: atqui primi parentes non erubuerunt de suâ nuditate ante, sed tantùm post peccatum: de iis enim, postquàm peccassent, dicitur Genesis 2. Cumque cognovissent se esse nudos, consueverunt folia ficus, & fecerunt sibi perizoniata, quibus pudenda velarent. Ita ratiocinatur Augustinus libro 5. contra Julianum, cap. 2. Ego verò (inquit) non à pictore inanum figurarum, sed à scriptore divinarum didici literarum, quia illi primi homines nudi erant, & non confundebantur. In quibus absit, ut tanta innocentia tam impudens esset, sed nondum inerat, quod puderet. Peccaverunt..... & adhuc clamas: Nihil illic indecens norumque senserunt? Hanc plane impudentiam tuam nimis incredibilem, absit ut dicam, nullus te Apostolus, aut Propheta, sed nec pictor docuit nec poeta.*

*Tertiò, Concupiscentia est magnum malum, licet non sit peccatum: nempè non expectat rationis imperium, sed exurgit invitâ etiam ipsâ ratione, nec sedatur aut quiescit ipsâ imperante; movet ac pertrahit ad malum: atqui nullum malum erat in primis parentibus innocentibus; nam sine vitio, sine culpâ, ab authore suo creati fuerant: ergo, &c.*

*Objicies. Concupiscentia, seu propensio ad bonum sensibile, per se est indifferens ad bonum aut malum, ut patet in desiderio cibi, in delectatione que ex alicujus objecti jucundi perceptione concipitur; sed quod per se est indifferens ad bonum aut malum, fuit in primis parentibus innocentibus: ergo, &c.*

Respa.

2. innatum eis non fuisse propriæ excellentiæ ac laudis amorem ; is enim amor est concupiscentia propriè dicta, cum hominem avertat à creatore, eumque ad creaturam per fruitionis desiderium inclinet. Infertur 3. quòd si quæ fuerint in eis sensuum voluptates, nunquam voluntatis nutum, aut præcesserint, aut excesserint. Illationes ejusmodi desumptæ sunt ex Augustino qui lib. 4. contra Julianum cap. 14. sic loquitur : *Remanet igitur, ut aut nulla ibi fuerit carnalis concupiscentia, sed ille fuerit vivendi modus, ut omnia necessaria congruis membrorum officiis, sine ul- lius motu libidinis, implerentur.... aut (ne nimium videamur offendere homines, qui voluptatem corpo- ris quomodocumque defendunt) ita ibi credatur carnalium sensuum fuisse libidinem, ut omnino ra- tionali subdita voluntati, non aliàs adesset, nisi cum per illam vel saluti esset corporis, vel stirpis propagini consulendum; & tanta adesset, ut nulla ex parte mentem supernarum cogitationum delecta- tione deponeret.*

Quæres 2. utrum negatio concupiscentiæ in primis parentibus innocentibus oriretur à gratiâ sanctificante, an verò ab aliquo dono quod ab illâ distinctum esset.

Resp. eam ortam fuisse à gratiâ habituali, seu sanctificante; ea nimirum gratia duplicem in pri- mis parentibus innoxiiis effectum operabatur, mentis scilicet ad Deum, & carnis ad spiritum, subjectionem. Ubi autem per inobedientiam mens creata Dei jugum excussit, caro cœpit in spiritum rebellare : *Injustum enim erat* (ait Augu- stinus lib. 1. de Nuptiis & Concupiscentiâ, c. 6.) *ut obtemperaretur à servo suo, id est, à corpore suo, ei qui non obtemperaverat domino suo.*

## CAPUT III.

*De dotibus ad corpus hominis innocentis spectantibus.*

Not. **D**Otes quæ pertinent ad corpus hominis innocentis, sunt immortalitas, immunitas à quibuscumque miseriis, quies omnium sensuum.

CONCLUSIO I. Corpus hominis innocentis fuit immortale.

Probatur 1. ex Scripturâ. Apostolus ad Rom. 5. apertè docet, per peccatum mortem in mundum intrasse: *Per unum hominem (inquit) peccatum in hunc mundum intravit, & per peccatum mors: ergo ante peccatum, hominis corpus non erat obnoxium morti. Quod Apostolus reverà accidisse testatur, Deus Adamo minatus fuerat Genesis 2. Quocumque die comederis ex eo, morte morieris: in quæ quidem verba sic Augustinus loquitur libro 1. de peccat. merit. cap. 16. Quamvis annos multos, primi homines, postea vixerint, illo tamen die mori cæperunt, quo mortis legem, qua in sensum veterascerent, acceperunt. Sapientiæ 2. hæc habentur: Deus mortem non fecit: invidia autem diaboli mors intravit in mundum: at si corpus hominis innocentis mortale fuisset, Deus ipse fecisset mortem, hoc est, plasmando corpus, quod esset obnoxium morti, ipse mortem in mundum invexisset.*

Probatur 2. ex traditione. Primò, Synodus Palæstina tanquam hæreticam proscripsit propositionem, quâ Pelagius asseruerat, *Adam mortalem factum, qui sive peccaret, sive non peccaret, moriturus esset: De eo Palæstinorum patrum iudicio hæc habet Augustinus lib. de gestis Pelagii, capite 3. Unde fit consequens, ut quisquis sequitur illius Episcopalis auctoritatem iudicis, & ipsius Pelagii confessionem (subdolè nimirum & ore*  
tenuis

tenuit eandem propositionem in Concilio dampnaverat) hæc tenere debeat, quæ semper tenuit Catholica Ecclesia: Adam nisi peccasset, non fuisset moriturus. 2. Concilium Carthaginense V. idem definiit: Placuit omnibus Episcopis, qui fuerunt in hac sancta Synodo, ut quicumque dicit Adam primum hominem mortalem factum, ita ut si peccaret, si non peccaret, moreretur in corpore, hoc est de corpore exiret, non peccati merito, sed necessitate naturæ, anathema sit. 3. Concilium Tridentinum sess. 5. can. 1. ea veterum Synodorum decreta, hisce verbis innovavit: Si quis non confitetur, primum hominem Adam.... incurrisset per offensam prævaricationis huiusmodi, iram atque indignationem Dei, atque adeo mortem, quam antea illi comminatus fuerat, anathema sit. 4. Patres, & imprimis Augustinus, ex morte cui nunc homines obnoxii sunt, desumpserunt argumentum ad asserendam adversus Pelagianos existentiam peccati originalis: at nullius esset ponderis illud argumentum, si Adamus innocens mortis legibus subjectus fuisset.

Objicies 1. Augustinus lib. 1. de peccator. meritis, cap. 3. scribit, Adamum ante peccatum fuisse mortalem: ergo, &c.

Resp. dist. ant. Augustinus scribit Adamum ante peccatum fuisse mortalem; hoc est, mori potuisse, conc. ant. mori debuisse, neg. ant. Hæc propositio, Adamus innocens, erat mortalis, potest duplicem habere sensum; istum scilicet, Adamus mori poterat, & hunc alium, Adamus debebat mori. In priore sensu vera est propositio, nempe Adamus peccare poterat: Poterat mori, (ait Augustinus lib. 1. contra Julianum, operis imperf.) poterat namque peccare; sed in altero sensu est hæretica: cum enim Adamus posset non peccare, nulla in eo erat moriendi necessitas. Igitur discrimen hominis innocentis à lapso, est, quod iste necessario, si vellet, si nollet, moriatur, ille verò mori potuerit, quod potuerit peccare,

care, ac proinde velle mori. Discrimen è contra hominis innocentis à beatis, est, quòd isti, cum peccare non possint, nullâ ratione post resurrectionem mori possint: *Prima immortalitas* (inquit Augustinus lib. de Corrept. & Gratiâ, c. 12.) *erat posse non mori: novissima* (beatorum) *erit multò major, non posse mori.*

**Objicies 2.** Corpus quod constat ex elementis contrariis, & diversis humoribus, est mortale: siquidem corpus quod ita compactum est, necessariò obnoxium est intemperiei; ac proinde dissolutioni, & tandem morti: atqui corpus primorum parentum, etiam ante peccatum, constabat ex elementis contrariis, & diversis humoribus; nam ejusmodi compositio cuilibet corpori animali essentialis est: ergo corpus primorum parentum erat immortale, etiam ante peccatum.

**Resp. dist. maj.** Corpus, quod constat ex elementis contrariis, est mortale, si Deus singulari beneficio non impediatur illius mortem, conc. maj. si impediatur. neg. maj. Corpus Adami, ex se quidem & ex naturâ suâ non habebat, etiam ante peccatum, donum immortalitatis; scilicet in internâ illius compositione nihil erat, quod interitum arceret: verùm munus illud singulare habebat ex Dei beneficio, qui per justitiam originalem elementa, ex quibus Adami corpus constabat, in debitâ temperie fuisset conservaturus; ita ut in eo non esset aliquis humor, aut aliquod elementum, quod alteri elemento aut humori læsionem allaturum fuisset.

**Objicies 3.** Corpus, quod tandem consenuisset, erat mortale: atqui corpus Adami innocentis tandem consenuisset: ergo, &c.

**Resp. dist. maj.** Corpus quod tandem consenuisset, erat mortale, si non adfuisset cibus qui vires illius in juventutis flore ac integritate conservaturus fuisset, conc. maj. si adfuisset ille cibus, neg. maj. Duplici cibo usus fuisset Adamus  
inno-



innocens, altero ad sustentationem, altero autem ad vitandum senectutis defectum; priorem Deus hisce verbis Genesis 1. concesserat: *Ecce dedi vobis omnem herbam afferentem semen super terram, & universa ligna quæ habent in semetipsis sementem generis sui, ut sint vobis in escam; posteriorem vero Genesis 1. Produxitque Dominus Deus de humo omne lignum pulchrum visu, & ad vescendum suave: lignum etiam vitæ in medio paradisi. Illud autem lignum vitæ vim habuisse depellendi mortem, docet Scriptura: nempe Genesis 3. dicitur, quod ejectus sit Adam ex paradiso, ne fortè de ligno vitæ sumeret, & viveret in æternum: Ecce Adam (sunt Dei ipsius verba) quasi unus ex nobis factus est, sciens bonum & malum: nunc ergo ne fortè mittat manum suam, & sumat etiam de ligno vitæ, & comedat, & vivat in æternum. Et emisit eum Dominus de paradiso voluptatis. Utriusque illius cibi Sanctus Augustinus variis in locis meminit; de priore hæc habet lib. 13. de Civitate Dei, cap. 20. Licet morituri non essent primi homines, nisi peccassent, alimentis tamen ut homines utebantur, nondum spiritalia, sed adhuc animalia corpora terrena gestantes: de utroque simul sic loquitur lib. 4. contra Julianum, capite 14. Habebat (uterque sexus) ex hoc victu sustentaculum congruum, licet modo quodam immortalis, tamen animali corpori necessarium, ne indigentia laderetur: de ligno autem vitæ, ne senectute perduceretur ad mortem. Lib. 1. de peccatorum meritis eadem ratione loquitur: Habebat (inquit) quantum existimo, & de lignorum fructibus refectioem contra defectioem, & de ligno vitæ stabilitatem contra vetustatem.*

Objicies 4. Adami innocentis corpus obrui potuisset subversione molis alicujus, aut aliquo inopinato casu: ergo erat mortale.

Resp. neg. ant. Ratio est, quia Deus pro singulari suâ providentiâ in suam imaginem inno-

innocentem , impediturus fuisset , ne objectis extrinseca aliquod illi detrimentum inferrent .

Objicies 5. cum Pelagianis apud Augustinum libro 1. de peccatorum meritis, capite 30. Si primi hominis peccato factum est , ut moreremur , Christi adventu fieret, ut credentes in eum non moreremur : neque enim prævaricatoris transgressio plus nobis nocuit , quàm redemptio profuit salvatoris : ergo, &c.

Resp. neg. ant. Ratio est , quia mors quam credentes in Christum patimur , copiosè compensatur per resurrectionem quam sancti ex Christi meritis habituri sunt : per eam enim vitam consecuturi sumus , quæ morti deinceps non erit obnoxia : sed placet verba describere quibus eam rationem exprimit Augustinus libro primo de peccatorum meritis , capite 30. *Cur ( inquit ) non potius hoc attendunt , quod Apostolus sine ambiguitate locutus est : Quia per hominem mors , & per hominem resurrectio mortuorum ? Sicut enim in Adam omnes moriuntur , ita & in Christo omnes vivificabuntur : neque enim aliunde quàm de corporis resurrectione dicebat..... Quomodo ergo plus nocuit ille peccando , quàm iste profuit redimendo , cum per illius peccatum temporaliter moriamur , per istius autem redemptionem non ad temporalem vitam , sed ad perpetuam resurgamus ?* Postquam sanctus Doctor explicuit fructum , quem per resurrectionem ex Christi meritis consequimur , rationem reddit , cur Deus credentes in Christum non liberet temporali morte , quam omnes homines per Adamum incurrerunt : *Poterat autem Deus ( inquit cap. 31. ) etiam hoc donare credentibus , ut nec istius experirentur corporis mortem ; sed si hoc fecisset , carni quædam felicitas adderetur , minueretur autem fidei fortitudo..... Quid enim magnum erat videndo non mori eos qui crederent , credere se non morituros ?*

CON-

CONCLUSIO 2. Corpus Adami innocentis nulli omninò miseriæ fuit obnoxium.

Probatur. Augustinus contra Pelagianos agens, expressè nostram conclusionem tuetur: *Ægritudinem* (ait lib. 1. *Retract.* capite 11.) *ita nullam corpora illa* (post resurrectionem) *patientur, sicut nec ista pati possent ante mortem*. Lib. 9. de Genesi ad literam, labores omnes ab innocentis hominis corpore removet: *Nondum* (ait) *erat labor, ut adjumento indigeret*. Arcet quoque molestias omnes libro 2. de Genesi contra Manichæos, capite 7. *Quid mirum, si corpus potuit ab omnipotente artifice tale fieri, ut nulla molestia, nulla indigentia cruciaret hominem ante peccatum, & nulla corruptione tabesceret?* Quæ mox ex Augustino prolata sunt, nituntur iisdem principiis, quibus nititur immortalitas corpori Adami innocentis divinitus concessa. Nam idèd par fuit, ut corpus ante peccatum, obnoxium non esset morti, quòd mors sit miseria, miseria autem locum non habuerit in innocente Dei imagine, cum sub Deo justo nemo sit miser, nisi mereatur; in homine qui summâ pace ac perfectâ tranquillitate fruebatur, in homine tandem à quo aberat omne malum, & cui ècontra aderat omne bonum, quod viatori convenire potest. 3. Patres ad probandam adversùs Pelagianos existentiam peccati originalis, usi sunt argumento desumpto ex miseriis corporeis, quibus homo subicitur; ac proinde supposuerunt, illum ab iis omnibus miseriis, quantumcumque levissimis, antequam peccaret, immunem omninò fuisse.

Objicies. Primi parentes in statu innocentiae famem, sitim, defatigationem, in corpore passi fuissent: nam ut iis incommodis mederentur, cibo ac potu usi fuissent, juxta illud Genesis 1. *Ecce dedi vobis omnem herbam & universa ligna, ut sint vobis in escam*: ergo corpus hominis innocentis obnoxium erat pluribus miseriis.

Resp.

Resp. ad 1. neg. ant. Ad 2. nego, quòd cibus datus sit hominibus innocentibus, ut se fame ac siti liberarent; sed ut remedio quod haberent præmanibus, ut eas miseras eaque incommoda vitarent: quo quidem medio sibi divinitus concessio si uti noluisent, inordinata fuisset eorum voluntas. *Alebantur ergo alijs, quæ sumebant* (inquit Augustinus lib. 3. de Civitate Dei, capite 20.) *ne animalia corpora molestiæ aliquid esuriendo ac sitiendo sentirent.*

## CAPUT IV.

*De propagatione naturæ in statu innocentie.*

Not. **H**Oc in capite quæremus 1. utrum inter homines innocentes futurum fuisset conjugium; 2. an per libidinem iidem homines innocentes geneaturi fuissent; 3. quales genuissent filios.

CONCLUSIO 1. Ante peccatum fuerunt nuptiæ inter Adamum & Evam; futura quoque fuisset copula carnalis, etiamsi in justitiâ stetissent.

Probatur rationibus quas lib. 14. de Civitate Dei, cap. 22. tradit Augustinus. Primò, non ob aliam causam, quàm ad prolis generationem, viro adjutorium, non vir, sed fœmina facta est. 2. Illi primævæ institutioni accessit etiam Dei benedictio per hæc verba: *Crescite & multiplicamini*. 3. Non valet eorum responsio qui fatentur nuptias quidem fuisse in paradiso ante peccatum, sed futurum non fuisse coitum, nisi peccatum præcessisset: Nam S. Augustinus hisce verbis eam responsionem confutat: *Quid dicit aliud, nisi propter numerositatem sanctorum necessarium hominis fuisse peccatum? si enim non peccando soli remanerent, profectò ut non soli duo justî homines possent esse, sed multi, necessarium peccatum fuit.*

CON-

CONCLUSIO 2. Adamus & Eva, si non peccassent, non generassent cum libidine.

Probatur. Non erat libido in primis parentibus innocentibus, nec futura fuisset in eorum posteris, si perseverassent in iustitiâ: ergo generatio non fuisset facta cum libidine. Antecedens, quod (ut huiusce quæstionis cap. 2. dictum est) ad fidem Catholicam pertinet, Sanctus Augustinus variis argumentis adversus Pelagianos asseruit.

Primum S. Doctoris argumentum desumptum est ex primorum parentum pudore ad libidinem, quam post peccatum experti sunt: illud autem argumentum sic in formâ proponitur: Si libido fuisset in primis parentibus etiam ante peccatum, eos tunc ad ejus motum puduisset, quemadmodum post peccatum puduit: atqui non puduit ante peccatum; tunc enim tantum eos puduit, cum puduit nuditatis: sed post peccatum tantum puduit eos nuditatis, ut probant hæc verba Geneseos 3. *Tulit (mulier) de fructu illius (ligni scientiæ boni & mali) & comedit, deditque viro suo qui comedit. Et aperti sunt oculi amborum: cumque cognovissent se esse nudos, consueverunt folia ficus, & fecerunt sibi perizomata.* Sed placet ipsum Augustinum audire. Ubi sic Deum loquentem induxit lib. 5. operis imperfecti, cap. 16. *Non tibi nuntiata esset nuditas tua, nisi esset prævaricata lex mea, his verbis prosequitur: Quid est autem nuditas nuntiata cui procul dubio ignota non erat, nisi eo motu stimulante & usitato aspectu se urgeret adverti, pudoremque incuieret, quoniam peccato factum erat, ut hominis pars inferior contra superiorem, hoc est, caro contra spiritum concupisceret? Sed tu (alloquitur Julianum) contra omnia claudis oculos, & ita asseris fuisse institutum hominem, ut etiamsi non peccasset, puderet eum nuditatis suæ.*

Alterum Augustini argumentum petitur ex malo libidinis, sicque proponitur: Quod magnum

gnum est malum, locum non habuit in primis parentibus innocentibus: nempe Deus fecit hominem rectum, sine vitio, sine culpâ: atqui libido magnum est malum; siquidem sine ullo discrimine fertur ad illicita, & si ei ceditur, committitur peccatum; unde nulli omnino libidini, quantumcumque levis supponatur, quâcumque sit in re, usquam licet præbere consensum; imò nec in ipso conjugii actu, qui propter solam proles generationem, aut ad reddendum petenti conjugii debitum, fieri debet.

**Tertium argumentum.** Quod est pœna peccati, non fuit in primis parentibus innocentibus: nempe culpa præcedit pœnam: atqui libido quæ sentitur in actu conjugii, est pœna peccati: nam si libido illa non esset pœna peccati, membrum in quo specialiter residet, non minùs obediens esset voluntati, quàm pes aut manus; non sic tamen est obediens: ergo, &c. Vide Augustinum lib. 14. de Civit. Dei, cap. 23. & 24.

**Quartum argumentum** sumitur ex translatione peccati originalis. Id unde peccatum originale contrahitur, non fuit in primis parentibus innocentibus: atqui libido quæ generationem comitatur, est (ut suo loco dicetur) id per quod peccatum originale contrahitur: ergo, &c.

**Quintum argumentum** petitur ex eo, quòd si libido, seu concupiscentia, fuerit in primis parentibus ante peccatum, eis ab authore naturæ inserta fuisset, id est, fuisset ipsis naturalis: atqui primis parentibus concupiscentia inserta non fuit ab authore naturæ: scilicet si ab authore naturæ fuisset primis parentibus inserta, licetè potuissent, & nunc etiam licetè possemus singulis illius motibus ac desideriis consensum præbere: siquidem motibus qui à Deo sunt, possumus licetè præbere consensum: si enim illis obstitimus, aut bono obstitimus aut malo; si bono, peccamus; si malo, malum ipsum in Deum tanquam  
in

in ejus authorem refundimus: atqui singuli concupiscentiæ motus ex Deo essent; nempe ejus sunt fructus, cujus est arbor: ergo, cum concupiscentia (in adversariorum suppositione) esset à Deo, motus qui sunt illius veluti naturales fructus, à Deo pariter essent: *Quam* (concupiscentiam) *nemo potest* (ait Augustinus lib. 4. contra Julianum, cap. 14.) *bonam dicere, nisi cuius adversus eam non amat concupiscere spiritus. Quod si talis non est in motu & ardore genitalium, non adversus eam concupiscat spiritus, ne adversus donum Dei concupiscendo inveniat ingratus; sed quidquid appetiverit, detur tanquam illi quæ ex Patre est. Si autem non est quod detur, hoc potius petatur à Patre, non ut auferat vel comprimatur, sed ut expleat concupiscentiam quam donavit.*

Objicies 1. Libido in brutis naturalis est, & Deum habet authorem: ergo etiam & in hominibus.

Resp. conc. ant. neg. conseq. Ratio est, quia in brutis non est mens, non est ratio, cui dissonet libido: unde cum non possint veritatem, virtutemque mente concipere, & ejus honestate frui; datum est illis sensibile bonum, quo sine ullâ rationis repugantiâ perfruantur: *Idcò* (inquit Augustinus lib. 4. contra Julianum, cap. 14.) *in pecoribus malum non est concupiscentia, quia non adversus spiritum concupiscit, sed eorum potius oblectat spiritum.*

Objicies 2. Si concupiscentia carnis malum est, malum etiam est copula conjugalis; nam quod non potest esse sine malo, est malum: atqui copula carnalis non potest esse sine malo; quippè in hoc rerum statu non potest esse sine libidine, quæ, ut supponitur, magnum est malum.

Resp. ad 1. neg. ant. Ad 2. neg. maj. Ratio est 1. quia nullum est malum sine aliquo bono, & tamen non sequitur, malum esse bonum: ergo à

pari, quamvis non possit esse copula carnalis sine aliquo malo, copula carnalis non ideò debet dici mala: *Concubitus equidem* ( inquit Augustinus lib. 3. contra Julianum, cap. 23. ) *sine malo concupiscentiæ esse non potest, sed non ideò malum est iste concubitus; sicut econtrariò nullum malum sine aliquo bono esse potest, nec ideò bonum est: opus enim Dei bonum est in natura, sine quo tamen non potest esse voluntas mala; ac per hoc sicut adulterium non potest esse sine bona naturæ, nec ideò bonum est; ita connubium non potest esse sine malo concupiscentiæ, nec ideò malum est; imò potius bonum quòd benè malo utitur.* Ratio est 2. quia se habet concubitus in homine lapso sicut vir, qui pede vitiato, aliquid quod bonum sit, operatur: quemadmodum igitur pes vitiatus quo vir ille utitur ad bonum, non est malum, ita nec concubitus est malum, quamvis ad bonum, ad quod tendit, prolis nimirum generationem, malo, hoc est, concupiscentiâ, libidinae, utatur: *Proindè nuptiæ* ( inquit Augustinus lib. 1. de Nupt. & Concup. cap. 7. *quia etiam de illo malo aliquid boni faciunt, gloriantur; quia verò sine illo fieri non potest, erubescunt; tanquam si quispiam pede vitiato ad aliquod bonum etiam claudicando perveniat, nec propter claudicantis malum mala est illa perventio, nec propter illius perventionis bonum bona est claudicatio; ita nec propter libidinis malum nuptias condemnare, nec propter nuptiarum bonum, libidines laudare debemus.*

Objicies 3. Libido, seu concupiscentia quam homo lapsus experitur in concubitu carnali, quamvis fiat aut ad reddendum conjugii debitum, aut ad generandam prolem, non aliud est quàm motus membrorum, quæ data sunt ad generationem, quàm seminatio quæ fit in uxoris gremio, quàm voluptas quæ tum ex illo motu, tum ex illâ seminatione percipitur: atqui ea omnia locum habuissent in primis parentibus, si ante



ante peccatum dedissent operam generationi prolis: ergo hominis generatio facta non fuisset, etiam in statu innocentiae, sine concupiscentia, sine libidine.

Resp. neg. maj. nempè concupiscentia sine quâ jam non fit copula carnalis, dicit motum ad voluptatem qui prævenit usum rationis, qui non cedit rationis imperio, qui inclinat rationem, ut voluptati consentiat, qui mentem impellit, ut ea voluptate fruatur, hoc est, ut illi per amorem inhæreat: at motus ejusmodi magnum est malum, cum adversetur rationi quæ non nisi propter honestatem, nusquam verò propter voluptatem operari debet: *Alii sunt* (inquit Augustinus lib. 4. contra Julianum, capite 27.) *carnis sensus quibus caro præsentia corporalia spiritui quodammodo renuntiat, & alii sunt carnalis concupiscentiæ motus quibus caro adversus spiritum concupiscens, in quæquæ illicita, atque inhonesta præcipitat, nisi adversus eam etiam ipse spiritus concupiscat; quæ discordia carnis & spiritus non creatori carnis, aut sensus, sed malo suatori & homini prævaricatori tribuitur ab eis, quorum fide sana error insanus Pelagianorum & Manicheorum damnatur.*

Objicies. Libido quâ quis ad conjugii voluptatem movetur, non est in se mala, sed tantum illius excessus, cum nempè aut fertur ad voluptatem etiam extra conjugium percipiendam, aut cum voluntas ita ei obsequitur, ut nullum ei limitem præfigat: ergo nihil impedit, quin cum eâ, præfixo ei debito limite, primi parentes, etiam ante peccatum, prolem generassent.

Resp. neg. ant. Ratio est 1. quia libido per se movet ad voluptatem, ex quocumque concubitu sive conjugali, sive non conjugali, percipiendam; per accidens tamen, seu ex imperio rationis, restringitur ad eam quæ nascitur ex concubitu conjugali: unde per se magnum est malum. Ra-

tio est 2. quia malum est, etiam cum per rationem restringitur ad eam, quæ percipitur ex concubitu conjugali: id enim malum est, quod indiget fræno, per quod cohibeatur; id malum est cui spiritus debet resistere: atqui libido etiam in actu conjugali indiget fræno, per quod cohibeatur; illi etiam tunc spiritus debet resistere; ac proinde libido etiam in actu conjugali, & quantumcumque moderata supponatur, est aliquod & quidem magnum malum: *Quid enim te adjuvat* ( inquit Augustinus lib. 5. contra Julianum capite 7. Pelagianum illum alloquens ) *quod reprehendere videris ejus excessum, quia approbas motum? Tunc enim excedit licitum limitem, quando ejus motibus ceditur. Mala est tamen & quando non ceditur, quia malo resistitur, ne bonum castitatis intereat.*

**CONCLUSIO 3.** Adamus & Eva, si non peccassent, genuissent filios omni prorsus miseria liberos.

Probatur. *Primò*, in hominibus de quibus agitur, non fuisset bellum internum, quod homo lapsus experitur in se ipso; cum enim bellum illud sit magnum malum, utpotè contrarium paci ac tranquillitati, in creaturâ innocente & ad Dei imaginem efformatâ locum non habuisset. Præterea in suppositione de quâ est hæc quæstio, assignari non potest author concupiscentiæ, quæ creaturam innocentem perturbasset: illa enim concupiscentia non esset à parentibus; quia (ut supponitur) parentes eâ immunes essent: non esset etiam à Deo; nempe nullum malum est à Deo; ac proinde nec concupiscentia quæ malum est, & quidem grave, cum (ut dictum est superius) perturbet rationem, ei non obtemperet, eam ad peccatum inclinet.

*Secundò*, in hominibus de quibus agitur, non fuisset hæc infirmitas mentis quâ efficitur, ut infantes in Adamo lapsi, nec Deum, nec se ipsos cognoscant. Non fuisset quoque infirmitas corporis,

poris, cum quâ modo nascimur; ubi enim non fuisset mentis infirmitas, nec fuisset infirmitas corporis; istam enim habemus ab aliâ.

*Tertio*, itaque dicendum est, infantes, in illo statu, exceptâ corporis quantitate quæ exigua fuisset propter uteris materni incapacitatem, in omnibus statim futuros fuisse similes suis parentibus.

Quæ hucusque dicta sunt, confirmantur ex Augustino qui libro 3. operis imperfecti, sic loquitur: *Sed illi parvuli nec flerent in paradiso, nec aliquando uti ratione non possent, nec sine usu membrorum infirmi & inertes jacerent, nec morbis affligerentur, nec à bestiis laderentur, nec venenis necarentur, nec aliquo casu vulnerarentur, nec ullo sensu, vel ulla parte corporis privarentur, nec ulli eorum tam vano & obtuso nascerentur ingenio; sed excepta, propter incapaces uteros matrum, sui corporis quantitate, tales omnino, qualis Adam factus est, nascerentur.* Vide eundem S. Doctorem in libris de Civitate Dei, ubi quod mox dictum est, aliis terminis sæpius enuntiat.

### Q U Æ S T I O III.

#### *De peccato primorum parentum.*

**Not.** **I**N primorum parentum peccato perpendi possunt 1. illius causæ; 2. gradus, quibus in illud lapsi sunt; 3. gravitas; 4. denique pœnæ, quibus in illud animadversum est: ea omnia subsequentibus capitibus expendamus oportet.

## CAPUT PRIMUM.

*De causis peccati primorum parentum.*

**Not.** **I**Nter causas primi peccati Adami & Evæ tres fingi possunt externæ, Deus, diabolus, lignum scientiæ boni & mali; & una interna, voluntas nimirum primorum parentum. Quærendum est igitur, quid Deus, diabolus, lignum scientiæ boni & mali, ipsa hominis voluntas ad primum hominis peccatum contulerint.

**CONCLUSIO** 1. Deus nullo modo fuit causa primi peccati, in quod lapsi sunt Adamus & Eva.

**Probatur.** Propter tria tantum Deus dici posset causa primi peccati, in quod Adamus & Eva lapsi sunt; nempe aut quod sit author naturæ quæ peccavit, aut quod naturam creaverit, quam prævidebat peccaturam, aut tandem quod non dederit gratiam, per quam creatura vitaret peccatum. Atqui propter nullum ex iis capitibus Deus dici potest causa primi peccati, in quod Adamus & Eva lapsi sunt: Nam 1. Deus nullam peccandi necessitatem imposuit creaturæ quam condidit: scilicet dedit ei liberum arbitrium, per quod aut ad ignem aut ad aquam posset manum extendere, hoc est, per quod aut ad actum peccati aut ad actum virtutis sese determinare posset. 2. Largitus est eis auxilium, quo possent perseverare in iustitiâ quam in creatione receperant, licet non concesserit auxilium quo re ipsâ perseverarent. Tandem 3. prævisio peccati in quod erant lapsuri, nullum habuit influxum in primorum parentum voluntatem, ac proinde nullam eis peccandi necessitatem imposuit. Sed hæc subsequenter quæstiunculis clariora fient.

Quæ-

Quæres 1. utrum aliqua creatura rationalis possit esse impeccabilis per naturam.

R esp. negativè . Nam 1. ita docet Augustinus lib. 3. contra Maximinum Arianum, cap. 12. *Cumque creaturæ rationali præstatur, ut peccare non possit: non est hoc naturæ propriæ, sed Dei gratiæ.* 2. Quælibet creatura potest deficere, cum facta sit ex nihilo; è contra nec Filius in divinis, nec Spiritus sanctus sunt mutabiles, quia ex substantiâ Patris, non ex nihilo, sicut Angelus & homo, facti sunt.

Quæres 2. cur Deus per suam gratiam non reddiderit hominem impeccabilem.

R esp. Deum per suam gratiam idèd non reddidisse hominem impeccabilem, 1. quòd decuerit, ut homo impeccabilitatem tanquam meritorum suorum præmium mereretur: 2. quòd non decuerit, ut prævenirentur tempora, seu ut quod pro plenissimâ beatitudine servabatur, homini in primâ sui institutione concederetur.

Quæres 3. cur homo talis factus non sit, qui licèt peccare posset, reipsâ tamen peccare nollet.

R esp. id factum esse, quòd auxilium *Quo*, ægræ tantùm ac infirmæ naturæ, non autem sanæ ac integræ conveniret: seu naturæ innocenti ac robustæ satis erat auxilium *Sine quo* poterat non peccare, nec opus erat ei auxilium *Quo* reipsa peccare nollet: *Vt ergo* ( inquit Augustinus lib. de Corrept. & Gratiâ, cap. 12. ) *non acciperet hoc donum Dei, id est, in bono perseverantiam primus homo, sed perseverare, vel non perseverare in ejus relinqueretur arbitrio, tales vires habebat ejus voluntas, quæ sine ullo fuerat instituta peccato, & nihil illi ex se ipsa concupiscentialiter resistebat, ut dignè tantæ bonitati, & benè vivendi facilitati perseverandi committeretur arbitrium: Deo quidem præsciente, quid esset factururus injustè .... sed simul sciente quid de illo ipse faceret justè.*

Quæres 4. Cur Deus primum hominem fecerit, quem sciebat peccaturum.

Resp. 1. Augustinum id referre ad inscrutabilia Dei judicia: *Si* ( inquit lib. 11. de Gen. ad liter. c. 4. ) *queritur, cur Deus tentari permiserit hominem, quem tentatori consensurum esse prævidebat, altitudinem quidem hujus consilii penetrare non possum, & longè suprâ vires meas hoc esse confiteor.* Dicitur potest 2. præscientiam Dei non debuisse obscurare illius tum sapientiam, tum bonitatem, quæ quidem exigere videbantur, ut homo crearetur, licet prævideretur peccaturus: sapientia quidem, quæ hominis peccato tantum bonum, quantum sunt incarnatio Verbi, & generis humani per Christum redemptio, oppositura erat; bonitas verò, quæ propter defectus qui in rebus futuri prævidentur, non debet ab iis condendis abstinere, si res illæ ad universi decus & complementum conferant.

CONCLUSIO 2. Diabolus fuit causa extrinseca peccati primorum parentum.

Probatur. Ille fuit causa extrinseca peccati primorum parentum, qui illos ad divinæ legis infractionem pellexit: atqui diabolus primos parentes ad divinæ legis infractionem pellexit: *Dixit autem serpens ad mulierem:* ( ait Scriptura Genesis 3. ) *Nequaquam morte moriemini: scit enim Deus, quod in quocumque die comederitis ex eo, aperientur oculi vestri, & eritis sicut dii, scientes bonum & malum:* hoc est, ( ut exponit Augustinus lib. 11. de gen. ad lit. capite 30. ) scit Deus, mandatum non ad literam sumi debere, sed in sensu mystico, quem vos per esum fructus, in speciem vetiti, consequemini.

Quæres 1. an serpens, per quem diabolus Evam tentavit, fuerit serpens, saltem secundum externam speciem: 2. ex suppositione quodd fuerit serpens, quomodo loqui potuerit: 3. cur Eva non exhorruerit ad serpentis tum accessum tum

vocem: 4. cur serpens aggressus sit Evam potius quam Adamum .

Resp. ad 1. circa serpentem, de quo est hîc quæstio, tres esse opinionis. Prima, quam Patres passim defendunt, docet, fuisse verum serpentem. Altera quam Cyrillus lib. 3. adversus Julianum apostatam propugnat, asserit, non fuisse verum serpentem, sed ejus tantum simulacrum. Tertia, quæ est Cajetani in Commentariis in Genesim, affirmat, serpentis vocabulo nec verum, nec apparentem serpentem intelligi debere, sed metaphoricum, dæmonem nimirum qui propter noxiam calliditatem quâ pollet, serpentis aut aliorum animalium nominibus sæpius appellatur. Priori sententiæ subscribendum esse censemus, tum quod à Patribus unanimi ferè consensu propugnetur, tum etiam quod cum contextu capituli tertii Geneseos maximè cohæreat: *Sed & serpens erat callidior cunctis animantibus terræ, quæ fecerat Dominus Deus .... Serpens decepit me .... Maledictus es inter omnia animantia & bestias terræ .... Super pectus tuum gradieris, & terram comedes cunctis diebus vitæ tuæ.* Augustinus tamen postrema hæc verba: *Maledictus es, &c.* metaphoricè, hoc est, de diabolo intelligit lib. 2. de Genesi ad liter. capite 36.

Resp. ad 2. serpentem illum non vi propriâ ac naturali locutum fuisse, sed ope dæmonis qui per illius organa ita movit aerem, ut vocis sonum expresseit, eâ fermè ratione, quâ postea Angelus per asinam prophetæ Balaam locutus est.

Resp. ad 3. Evam non exhorruisse ad accessum serpentis, quod sciret, serpentem, aut quodlibet aliud animal, sibi, quamdiu staret in innocentia, nocere non posse. Præterea magnificis intenta promissis, non attendit, an spiritus nequam, an verò bonus, per serpentem loqueretur. Vide S. Thomam 1. p. quæst. 94. art. ult. Addendum est, Evam miratam quidem fuisse, quod, præter

usum communem, brutum animal loqueretur; sed præ curiositate quâ tenebatur, rei eventum expectare voluit.

Resp. ad 4. idè dæmonem potius aggressum fuisse mulierem quàm virum, quòd mulier, ex naturali sui sexûs conditione, viro sit inferior; ac proindè facilius ad peccatum pertrahi potuerit. Augustini est illa responsio: sic enim loquitur Serm. 61. de Diversis: *Lapsus certè primis hominis nostris, quia non est ausus serpens loqui viro, sed ad eum deijciendum famineo usus est ministerio, per inferiorem obtinuit fortiolem; & qui per alterum penetravit, de utroque triumphavit*. Eandem rationem apud eundem S. Doctorem legere est lib. 14. de Civit. cap. 11.

CONCLUSIO 3. Lignum scientiæ boni, & mali, non fuit causa, sed occasio primi peccati primorum parentum.

Probatur prior pars. Nec pulchritudo, nec iudicium de sapore ligni, de quo agitur, potuerunt Evam movere ad primum peccatum: nempe perceptio, seu cognitio rei cujuscumque sensibilis, primos parentes ante peccatum movere non poterat ad amorem sui: nullus enim motus ad amorem, aut ad odium, aut ad aliam passionem, in primis parentibus oriebatur, nisi ex deliberatione & imperio voluntatis.

Altera conclusionis pars non minùs est evidens: nam Scriptura perspicuis verbis narrat, serpentem seu diabolum ex ligno scientiæ boni & mali occasionem sumpsisse pelliciendi primos parentes ad peccatum: *Cur* (inquit serpens Genesis 3.) *præcepit vobis Deus, ut non comederetis ex omni ligno paradisi? cui respondit mulier: De fructu lignorum quæ sunt in paradiso, vescimur: de fructu verò ligni quod est in medio paradisi, præcepit Deus, ne comederemus, & ne tangeremus illud ne fortè moriamur. Dixit autem serpens ad mulierem, Nequaquam morte moriemini: scit enim Deus quòd in quocumque die comederitis ex eo, aperientur oculi*



oculi vestri, & eritis sicut dii, scientes bonum & malum.

Objicies. Scriptura innuere videtur, mulierem plectam fuisse ad esum fructus vetiti, ex illius pulchritudine, & ex judicio quod tulit de illius amœnitate; sic enim loquitur: *Vidit igitur mulier, quod bonum esset lignum ad vescendum, & pulchrum oculis, aspectuque delectabile, & tulit de fructu illius, & comedit*: atqui primum mulieris peccatum fuit esus fructus vetiti: ergo prima mulier plecta, seu provocata fuit ad primum peccatum, ex pulchritudine & sapore vetiti fructus.

Resp. conc. maj. neg. min. Ratio est, quia judicium quod Eva tulit de pulchritudine & sapore ligni scientiæ boni & mali, jam aliud peccatum præcesserat, vana nimirum complacentia in independentia, quam ei serpens hisce verbis promiserat: *Eritis sicut dii, scientes bonum & malum: Non temerè* (ait Rupertus lib. 3. de Trinitate, cap. 9.) *dictum est, Vidit mulier, quasi non eam arborem ante vidisset. Et revera nondum eo modo viderat, quia cum hac præsumptione, qua nunc intuita est, nondum consideraverat.*

CONCLUSIO 4. Sola voluntas fuit interna causa primi peccati, in quod primi parentes lapsi sunt.

Probatur. Triplex tantum fingi potest interna peccati causa, ignorantia, concupiscentia, voluntas: atqui nec ignorantia, nec concupiscentia, fuerunt causa primi peccati primorum parentum: neque enim (ut fusè superius probatum est) duo illi defectus, duo illa mala, locum in primis parentibus ante peccatum habuerunt.

## CAPUT II.

*De specie primi peccati, in quod Adamus  
& Eva lapsi sunt.*

Not. **S**ancti Patres docent, in unâ primorum parentum transgressione plurimum specierum peccata reperiri, superbiam nimirum, curiositatem experiendi virtutem occultam, quam diabolus allèruerat fructu vetito contineri; dubium de sensu præcepti divini; opinionem, quod transgressio foret tantum venialis; gulam; inobedientiam; vanam commissi peccati excusationem: quærendum est igitur, cujus ex iis speciebus fuerit primum Adami & Evæ peccatum.

CONCLUSIO. Primum Adami & Evæ peccatum fuit peccatum superbiæ.

Probatur 1. Primum Adami & Evæ peccatum, fuit independentiæ desiderium, saltem conditionatum, hoc est, si independentia foret possibilis: id enim Adamus & Eva primum desiderarunt, quod serpens hisce verbis pollicitus fuerat: *Eritis sicut dii, scientes bonum & malum.* Atqui conditionatum illud independentiæ desiderium, ipsum est superbiæ peccatum; est enim propriæ excellentiæ inordinatus amor: ergo primum Adami & Evæ peccatum, fuit peccatum superbiæ.

Probatur 2. ex Augustino qui in Psalmum 118. sic loquitur: *Primi homines per serpentem decepti, & dejecti non fuissent, nisi plusquam acceperant, habere, & plusquam facti fuerant, esse voluissent.* Libro 2. de Genesi contra Manichæos cap. 15. in hæc serpentis verba, *Scit enim Deus quod in quocumque die comederitis ex eo, aperientur oculi vestri, & eritis sicut dii;* sic idem S. Doctor loquitur: *Hoc est ergo quod persuasum est, ut propriam potestatem nimis amarent, & cum*

Deo

Deo esse pares vellent..... atque ita quod acceperant amitterent, dum id quod non acceperant, usurpare voluerunt. Non enim accepit hominis natura, ut per suam potestatem Deo non regente beata sit, quia nullo regente per suam potestatem beatus esse solus Deus potest. Lib. 8. de Gen. cap. 13. hæc pariter in eundem scopum habet: *Ab homine peccante nihil aliud appetitum est, nisi non esse sub dominatione Dei, quando illud admissum est, in quo, ne admitteretur, sola deberet jussio dominantis attendi.*

Objicies. Augustinus lib. 2. de Genesi ad litteram, cap. 42. docet, inordinatum uxoris amorem præcessisse Adami inobedientiam; sic enim loquitur: *Noluit Adam Evam contristare, non quidem carnis victus concupiscentia, quam nondum in membris suis senserat, sed amicali quadam benevolentia, qua plerumque fit, ut offendatur Deus, ne homo ex amico fiat inimicus: ergo primum Adami peccatum, fuit inordinatus uxoris amor.*

Resp. dist. ant. Augustinus docet, inordinatum uxoris amorem præcessisse externam & apertam inobedientiam, conc. ant. internam & occultam, neg. ant. Inordinatus uxoris amor præcessit quidem in Adamo externam inobedientiam, hoc est, esum fructus vetiti; id enim testantur hæc Dei ipsius ad Adamum verba: *Quia audisti vocem uxoris tuæ, & comedisti de ligno:* at verò non præcessit internam inobedientiam in eo positam, quod præter ordinem rectum, in suæ excellentiæ contemplatione, & in independentiæ desiderio, mirum in modum delectatus sit; unde interna aversio à Deo præcessit in Adamo inordinatum illius amorem in uxorem suam: *Nisi autem* (ait Augustinus lib. 15. de Civ. Dei, c. 13.) *ad sibi placendum averteretur à superiori immutabili bono, non Dei mandato, uxori præponeret voluntatem.*

Quæres 1. quibus gradibus Eva ceciderit.

Resp. in Evâ præcessisse 1. suggestionem serpentis: *Eritis sicut dii, scientes bonum & malum;*

2. Eva

2. Eva serpentis promissionem volvit animo, ad eamque spontè delectata est; 3. Appetiit id, in quo sibi præter ordinem rectum sibi complacuerat; similitudinem nimirum cum Deo, si foret possibilis; 4. Eam mentis elationem subsecuta est deceptio, verum enim credidit, quod serpens promiserat, seu, se, si fructum ederet, fore sui juris: *Quomodo* (inquit Augustinus lib. 11. de Genesi ad literam, cap. 30. his verbis, *Eritis &c.*) *crederet mulier à bona atque utili re divinius se fuisse prohibitos, nisi jam inesset menti amor ille propriæ potestatis, & quædam de se superba præsumptio quæ per illam tentationem fuerat convincenda & humilianda?* 5. Mulier consideravit lignum scientiæ boni & mali, viditque bonum ad escam & decorum aspectu. *Et non credens* (ait ibidem Augustinus) *posse inde se mori, arbitror, quod putaverit Deum alicujus significationis causa dixisse, Si manducaveritis, morte moriemini; atque ideo sumpsit de fructu ejus & manducavit;* 6. Porrexit Adamo fructum de quo gustaverat, *fortassis etiam* (ait idem Augustinus) *cum verbo suavorio, quod Scriptura tacens, intelligendum reliquit.*

Quæres 2. quibus gradibus Adamus ceciderit.

Resp. Adamum hisce gradibus in legis prævaricationem lapsum fuisse. 1. Ab Eva audit serpentis promissum: *Eritis sicut dii, scientes bonum & malum.* 2. Appetiit eam cum Deo similitudinem, saltem conditionatè, si nimirum foret possibilis. 3. Licèt non crederet, (sicut crediderat mulier) se per esum vetiti fructûs, tantum bonum consecuturum esse; ex eo tamen degustavit, ne contristaret uxorem, ratus suam inobedientiam non fore mortalem, sed venialem tantum, si solo studio indulgendi conjugii suæ, Dei præceptum infringeret: ita docet Augustinus lib. 14. de Civitate Dei, cap. 11. *Credendum est* (inquit) *illum virum suæ faminae..... non tanquam verum loquenti credidisse seductum, sed sociali ne-*  
cessi-

cessitate paruisse. Non enim frustra dixit Apostolus: Adam non est seductus, mulier autem seducta est: nisi quia illa quod hic serpens locutus est, tanquam verum esset, accepit: ille autem ab unico noluit consortio dirimi, nec in communione peccati... Hos autem seductos intelligi voluit, qui id quod faciunt, non putant esse peccatum, ille autem scribit: alioquin quomodo verum erit, Adam non est seductus? Sed inexpertus divinæ severitatis, in eo falli potuit, ut veniale crederet esse commissum, ac per hoc in eo quidem, quo mulier seducta est, non est ille seductus. Nonnulli tamen alii Patres contendunt, Adamum in iis omnibus fuisse seductum, in quibus Eva seducta fuerat; Apostolum verò in eo sensu dicere eum non fuisse seductum, quòd aut primus, aut à serpente, seductus non fuerit: sed Augustini verior est sententia.

### C A P U T III.

#### *De gravitate peccati primorum parentum.*

C O N T R. **P**eccatum primorum parentum fuit gravissimum.

Probatur. Peccati primorum parentum gravitas metienda est 1. ex objecto, quod appetierunt, scilicet (ut ostendimus suprà) appetierunt independentiam, quæ quidem attributum est quod Deo soli convenire potest.

Metienda est 2. ex facilitate præcepti, quod primis parentibus impositum est: Hoc itaque (ait Augustinus lib. 14. de Civitate Dei, capite 12.) de uno cibi genere non edendo, ubi aliorum tanta copia subiacebat, tam leve præceptum ad observandum, tam breve ad memoria retinendum, ubi præsertim nondum voluntati cupiditas resistebat, quod de pæna transgressionis postea subsequutum est, tanto maiore iniustitia violatum est, quanto faciliore posset observantia custodiri.

Metienda est 3. ex bono, quo Adamus fruebatur, & quod per peccatum amisit: *Quantò enim magis homo fruebatur Deo ( inquit Augustinus lib. 21. de Civit. Dei, cap. 12. ) tantò majore impietate dereliquit Deum, & factus est malo dignus æterno.*

Metienda est 4. ex sublimi dignitate, ex quâ cecidit Adam: *Frustra ( ait Augustinus Julianum alloquens lib. 6. operis imperfecti, cap. 22. ) peccato Adæ peccata filiorum ejus, quamlibet magna & horrenda, vel æquare, vel etiam præferre conaris: illius quippe natura, quantò magis sublimior stabat, tantò magis graviter cecidit.*

Metienda est 5. ex gravitate supplicii, quo Deus in Adami peccatum animadvertit: *Pomum ( ait Augustinus lib. 6. operis imperfecti, cap. 23. ) lege Dei vetitum manducare, leve videretur esse peccatum: sed quanti hoc aestimaverit qui non potest falli, satis apparet granditate supplicii. Quodnam verò & quantum sit ejusmodi supplicium, subsequenti capite dicitur.*

Metienda est 6. ex Dei contemptu, qui in Adami peccato reperitur: sed placet eâ de re Augustinum audire: *Quia ergo ( ait S. Doctor lib. 14. de Civit. Dei, cap. 15. ) contemptus est Deus jubens qui hominem creaverat, qui ad suam imaginem eum fecerat, qui ceteris animalibus præposuerat, qui in paradiso constituerat, qui rerum omnium copiam salvisque præstiterat, qui præceptis nec pluribus, nec grandibus, nec difficilibus oneraverat.... justa damnatio subsequuta est, talisque damnatio, ut homo qui custodiendo mandatum futurus fuerat etiam carne spiritalis, fieret etiam mente carnalis.*

Metienda est denique 7. ex eo quòd varix criminum species in Adami prævaricatione contineantur: *Et superbia est illic ( verba sunt Augustini, Enchirid. cap. 45. ) quia homo in sua potius esse quam in Dei potestate dilexit: Et sacrilegium, quia Deo non credidit. Et homicidium, quia semetipsum (& posteros) præcipitavit in mortem. Et fornicatio*

tio spiritualis, quia integritas mentis humanæ serpentina suasionem corrupta est. Et furtum, quia cibus prohibitus usurpatus est. Et avaritia, quia plusquam illi sufficere debuit, appetivit.

# CAPUT IV.

## De pœnis peccati primorum parentum.

CONCL. **V**ARIÆ pœnæ mox subsecutæ sunt peccatum primorum parentum.

Probatur 1. Non finit lex æterna, ut vel momentum sit medium inter culpam & pœnam: ergo pœna mox subsecuta est peccatum primorum parentum. Antecedens ostenditur hisce Augustini verbis lib. 3. de libero arbitrio, cap. 15. *Quia nemo superat leges omnipotentis creatoris, non finitur anima non reddere debitum.... aut enim reddit bene utendo quod accepit, aut reddit amittendo quo bene uti noluit. Itaque si non reddit faciendo iustitiam, reddit patiando miseriam.... Nullo autem temporis intervallo ista dividuntur, ut quasi alio tempore non faciat quod debet, & alio patiatur quod debet, ne vel puncto temporis universalis pulchritudo turpetur, ut sit in ea peccati dedecus sine decore vindictæ.*

Probatur 2. enumeratione pœnarum, quibus Deus sæviit in peccatum primorum parentum.

Prima hujus pœna fuit concupiscentia carnis adversus spiritum; statim enim post peccatum primi parentes inordinatos senserunt concupiscentiæ motus: Posteaquam (inquit Augustinus lib. 13. de Civit. Dei, cap. 13.) præcepti facta est transgressio, confestim gratia deferente divina, de corporum suorum nuditate confusi sunt; unde etiam foliis ficulneis, quæ fortè à perturbatis prima comperita sunt, pudenda texerunt, quæ prius eadem membra erant, sed pudenda non erant. Senserunt ergo novum motum inobedientis carnis suæ, tanquam reciprocam pœnam inobedientiæ suæ.

Altera ejusdem peccati pœna fuit fuga & elongatio à Deo . Nempè scriptum est, quòd cùm primi parentes audiissent vocem Dei ambulantis in paradiso, sese absconderint à facie Domini: in quem quidem Scripturæ locum Augustinus docet 1. probabile esse, Deum hominibus ante lapsum sub humanâ figurâ solitum fuisse apparere: *Satis probabile est* ( inquit lib. 11. de Gen. ad litt. cap. 34. ) *solere Deum per creaturam in forma humana primis illis hominibus apparere*. Docet 2. primos parentes parùm se sapientes exhibuisse, quòd se à Dei conspectu abscondere post peccatum tentaverint . Docet 3. in iis tunc contigisse, quod in oculis debilibus, qui licèt facti sint, ut luce fruantur, eam tamen ferre nequeunt. *Sicut enim* ( ait Serm. 18. de verbis Apostoli ) *oculus factus ad hanc lucem temporalem videndam, tamen si injectum aliquid fuerit, vel irruerit unde turbetur, secluditur ab hac luce; & quamvis eum lux sua præsensia circumfundat, ille tamen avertit, atque absens est: non solum autem absens fit perturbatione sua à luce præsente, sed etiam pœnalis illi est lux, ad quam videndam factus est: sic & oculus cordis perturbatus atque sauciatus, avertit se à luce justitiæ, nec audet eam contemplari, nec valet..... Nam & in paradiso peccavit Adam, & abscondit se à facie Domini. Cum haberet ergo cor sanum puræ conscientie, gaudebat ad præsentiā Dei: postquam peccato oculus ille sauciatus est, cœpit lucem formidare divinam, refugit in tenebras, atque in devia, lignorum veritatem fugiens, umbras appetens:*

Tertia pœna fuit servitus sub libidine ac peccato, & imò & sub regno omnium peccatorum.

Quarta pœna fuit impotentia operandi bonum, nisi intellectus & voluntas medicinali Christi gratiâ sanarentur.

Quinta pœna fuit amissio libertatis ad bonum; unde necesse est, ut ad bonum operandum voluntas per peccatum mortua, per gratiam actualem aliquod vitæ initium recipiat: *Libero arbitrio* ( ait

Au-



Augustinus Enchiridii, c. 3. ) *malè utens homo, & se perdidit & ipsam.*

Sexta pœna fuit ejectione à beatitudine in hujusce vitæ miseras. Eam ejectionem Augustinus lib. 11. de Gen. ad litt. cap. 40. docet adumbratam fuisse per expulsionem è paradiso.

Septima peccati pœna mors est, sive prima, sive secunda. Prima mors (ait Augustinus) animam nolentem pellit è corpore: Secunda mors animam nolentem tenet in corpore; vocabunt enim damnati mortem, & mors fugiet ab eis. Utramque illam mortis speciem Deus primis parentibus, si peccarent, comminatus fuerat.

Graves sunt, fatemur, pœnæ quibus Deus castigavit primorum parentum inobedientiam: quàm tamen justè inflictæ sint, hisce verbis quæ claudent tertiam hanc nostrarum Institutionum partem, declarat Augustinus lib. 14. de Civ. Dei, c. 15. *Quisquis hujusmodi damnationem vel nimiam, vel injustam putat, metiri profectò nescit, quanta fuerit iniquitas in peccando, ubi tanta erat non peccandi facilitas. Sicut enim Abraham non immeritò magna obedientia prædicatur, quia ut occideret filium, res difficillima est imperata: ita & in paradiso tantò major inobedientia fuit, quanto id quod præceptum est, nullius difficultatis fuit. Et sicut obedientia secundi hominis eo prædicabilior, quò factus est obediens usque ad mortem: ita inobedientia primi hominis eo detestabilior, quò factus est inobediens usque ad mortem. Vbi enim magna est inobedientiæ pœna proposita, & res à Creatore facilis imperata; quisnam satis explicet, quantum malum sit, non obedire in re facili, & tantæ potestatis imperio, & tanto terrenti supplicio?*

Finis-tertiæ partis Institutionum  
Theologicarum.

[illegible]





